

Абдулла Кодирий

Үтган күнлар

ТАРИХИЙ РОМАН

ФАФУР ҒУЛОМ НОМИДАГИ АДАБИЁТ ВА САНЪАТ НАШРИЁТИ

Тошкент -1974

Ўз
Қ 53

САРВАТ АЗИМОВ
такрири. остида

Қайта нашр

7—3—4—74
—————
K—M—352—06—73

ЕЗУВЧИДАН

Модомики биз янги даврга оёқ қўйдик, бас, биз ҳар бир йўсинда ҳам шу янги даврнинг янгиликлари кетидан эргашамиз ва шунга ўхшаш достончилик, романчилик ва ҳикоячиликларда ҳам янги асарлар яратишга, халқимизни шу замоннинг «Тоҳир ва Зуҳра»лари, «Чор дарвиш»лари, «Фарҳод ва Ширин» ва «Баҳромгўр»лари билан таништиришга ўзимизда мажбурият ҳис этамиз.

Ёзмоқча ниятланганим бу — «Ўтган кунлар», янги замон романчилиги билан танишиш йўлида кичкина бир тажриба, яна тўғриси, бир ҳавасдир. Ҳар бир ишнинг ҳам янги — ибтидоий даврида талай камчиликлар билан майдонга чиқиши, аҳларининг етишмаклари илиа секин-секин тузалиб, такомилга юз тутиши табиий бир ҳолдир. Мана шунинг далласида ҳавасимда жасорат этдим, ҳаваскорлик орқасида кечадиган қусур ва хатолардан чўчиб ўтирамадим.

Мозийга¹ қайтиб иш кўриш хайрлик, дейдилар. Шунга кўра мавзуни мозийдан, яқин ўтган кунлардан, тарихимизнинг энг кир, қора кунлари бўлган кейинги «хон замонлари» дан белгиладим.

1926.

Абдулла Қодирий
(Жулқунбой)

¹ Мозий — ўтмиш, ўтган замон.

БИРИНЧИ БЎЛИМ

ОТАБЕК ЮСУФБЕК ҲОЖИ ӮҒЛИ

1264 ҳижрия, далв¹ ойининг ўн еттинчиси, қишки кунларнинг бири, қўёш ботгаи, теваракдан шом азони эшитиладир...

Дарвозаси шарқи-жанубга қаратиб қурилган бу донгдор саройни Тошкент, Самарқанд ва Бухоро савдогарлари эгаллаганлар, саройдаги бир-икки ҳужрани истисно қилиш билан бошқалари мусофиirlар ила тўла. Сарой аҳли кундузги иш-кучларидан бўшаб ҳужрала-рига қайтганлар, кўп ҳужралар кечлик ош пишириш ила машғул, шунинг учун кундузгига қараганда сарой жонлик: кишиларнинг шақиллашиб сўзлашишлари, хохолаб кулишишлари саройни кўкка кўтар-гудек.

Саройнинг тўрида бошқаларга қараганда кўркамроқ бир ҳужра, анови ҳужраларга кийиз тўшалгани ҳолда, бу ҳужрада қип-қизил гилам, уларда бўз кўрпалар кўрилган бўлса, бунда ипак ва адрес кўрпалар, нариги-ларда қора чироқ сасиганда, бу ҳужрада шам ёнадир, ўзга ҳужраларда енгил табиатли серчақчоқ кишилар бўлганида, бу ҳужранинг эгаси ҳам бошқача ярати-лишда: оғир табиатли, улуғ гавдали, кўркам ва оқ юзли, келишган қора кўзли, мутаносиб қора қошли ва эндигина мурти сабз урган бир йигит! Бас, бу ҳужра бино ва жихоз ёғидан, ҳам эга жиҳатидан диққатни

¹ Далв — январь.

ўзига жалб этарли эди. Қандайдир бир хаёл ичида ўтирувчи бу йигит Тошкентнинг машҳур аъёнларидан бўлган Юсуфбек ҳожининг ўғли — Отабек.

Сарой дарбозасидан икки киши келиб киргач, улардан бирори дарбоза ёнидаги кимданdir сўради:

— Отабек шу саройга тушганми?

Бизга таниш ҳужра кўрсатилиши билан улар шу томонга қараб юрдилар. Бу икки кишининг биттаси: гавдага кичик, юзга тўла, озроққина соқол, муртли, йигирма беш ёшлар чамалик бир йигит бўлиб, Марғилоннинг бойларидан Зиё шоҳичи деганинг Раҳмат отлик ўғлидир; иккинчиси: узун бўйли, қора чўтири юзли, чоғир кўзли, чувоқ соқол, ўттиз беш ёшларда бўлган кўримсиз бир киши эди. Бу йигит яхшигина давлатманд бўлса ҳам, лекин шуҳрати нима учундир бойлиги билан бўлмай, «Ҳомид хотинбоз» деб шуҳратланган, кишилар Ҳомид орқасидан сўзлашганда унинг отига тақилган лақабини қўшиб айтмасалар, ёлғиз «Ҳомидбой» дейиш ила уни танита олмайдилар.

Ҳомиднинг Отабек билан танишлиги бўлмаса ҳам, Раҳматга яқин қариндош — Зиё шоҳичининг қайниси, Раҳматнинг тоғаси.

Улар ҳужрага келиб кирдилар. Отабек келувчиларни улуғлаб қаршилади.

— Бизни кечирасиз, бек ака! — деб Раҳмат узр айтди.— Вақтсиз келиб сизни тинчсизладик.

Отабек уларга юқоридан жой кўрсатар экан, ёқимли бир вазиятда:

— Тинчсизламадингизлар, билъакс қувонтиргингизлар,— деди.— Шахрингизга биринчи марта келишим бўлгани учун танишсизлик, ёлғизлик мени жуда зериктирган эди!

Шу орада ҳужрага бир чол кириб, у ҳам меҳмонлар билан сўрашиб чиқди. Бу чол Ҳасанали отлик бўлиб, олтмиш ёшлар чамасида, чўзиқ юзли, дўнгроқ пешонали, сариққа мойил тўгарак қора кўзли, оппоқ узун соқолли эди. Соқолининг оқлигига қарамасдан унинг қаддига кексалик аломатлари сезилмас ва тусида ҳам унча ўзгариш йўқ эди

Отабек меҳмонларни танчага ўтқазиб, фотиҳадан сўнг Ҳасаналидан сўради:

— Тузумисиз, ота?

— Худога шукур! — деди Ҳасанали.— Бояғидан бир оз енгилладим. Мазмуни ис теккан экан.

— Баъзи юмишлар буюрсам...

— Буюрингиз, ўғлим.

— Раҳмат, ота, бўлмаса бизга чой қайнатиб берингиз-чи!

— Хўп, бегим!

Ҳасанали чиқди. Раҳмат Отабек билан яна бир қайта соғлиқ сўрашгандан кейин сўради:

— Бу киши кимингиз бўладир, бек ака?

Отабек Раҳматнинг саволига жавоб бермай, эшикка қаради. Ҳасаналини ҳужрадан узоқлатиб, сўнgra жавоб берди:

— Қулнимиз.

Бу сўздан нима учундир Ҳомид ажабланган эди:

— Қулингиз?

— Шундоғ.

Ҳасаналини болалик вақтида Эрондан киши ўғирлаб келувчи бир туркман қўлидан Отабекнинг бобоси ўн беш тилла баробарига сотиб олган эди. Ҳасаналининг Отабеклар оиласида бўлганига эллик йиллар чамаси замон ўтиб, энди Отабеклар оиласининг чин бир аъзоси бўлиб кетган. Хўжаси Юсуфбек ҳожига, айниқса, хўжазодаси Отабекка итоат ва ихлоси том¹ бўлиб, бунинг эвазига улардан ҳам ишонч ва ҳурмат кўрар эди. Ҳасанали ўттиз ёшлиқ вақтида сотиб олинган бир чўрига уйлантирилган бўлса ҳам, аммо ўғил, қизлари бўлмаган, бўлсалар ҳам ёшлиқда ўлиб кетганлар. Шуннинг учун бўлса керак. Отабекка ихлос қўйиб, унга ўз боласи каби қарап: «Ўлганимдан кейин руҳимга бир калима қуръон ўқиса, бир вақтлар Ҳасанали ота ҳам бор эди деб ёдласа, менга шуниси кифоя!» деб қарор берган ва ҳозирдан бошлаб Отабекка бу тўғрида сипоришлар² бериб, ундан самимий ваъдалар олиб юргувчи оқ кўнгилли бир қул эди.

Ҳасанали устида бўлган ҳалиги гапдан кейин Раҳмат сўради:

— Ташкентдан нималар келтирдингиз, бек ака?

— Арзимаган нарсалар: газмол, қолапой афзали ва бир оз қозон.

¹ Том — тўла, тўлик.

² Сипориш — топшириқ.

— Марғилонда газмол билан қолапой афзалининг бозори чаққон,— деди Ҳомид.

Отабек миқроризи билан шам сўхтасини кесиб тузатди. Орада ётсирашга ўхшаш бир ҳол бор, нима учундир бир сўзлаб икки тўхтар эдилар. Бу ўнгайсиз ҳолатдан чиқиши ва сўзни сўзга улаб юбориш учун Раҳмат тиришгандек кўринар эди.

— Марғилонни қандай топдингиз, бек ака, хушландингизми, ё?..

Бу саволнинг жавобига Отабек иккилангандек ва ўнгайсизлангандек бўлди:

— Нима десам экан. Марғилонни ҳар ҳолда... хуш кўрдим. Марғилон Туркистонимизнинг тўқувчилик ҳунарида биринчи шаҳариридир.

Иккиланиб берилган бу жавобдан Ҳомид билан Раҳмат бир-бирларига қарашиб олдилар. Отабек бу ҳолатни сезди ва ўзининг сўзини кулгиликка олиб изоҳ берди:

— Келган кунимдан Марғилонингизни хушламай бошлаган эдим, чунки танишларим йўқ, мусофиричилик билиниб қолаёзган эди. Энди бу соатдан бошлаб, Марғилондан розиман, негаки, йўқлаб келгувчи сизнинг каби қадрдонлар ҳам бўлур экан!

— Кечирингиз, бек ака! — деди Раҳмат.— Мен сизнинг Марғилон келганингизни бугун отамдан эшийтдим. Йўқса, албатта, сизни зериктирмас эдим!

— Аниқми?

— Тўғри тап! — деди Раҳмат.— Отам Тошкент боргандарида тўппа-тўғри сизнинг эшигингизга тушсинлар да, сиз саройга тушинг! Бу тараф билан сиздан ўпкани биз қислак арзийдир!

— Ҳақингиз бор,— деди Отабек.— Аммо, биринчидан, сизнинг ҳовлингизни сўроғлаб топиш менга қийинроқ кўринди, ундан сўнг, молимизни ортган туякашлар шу саройга тайинланган эдилар.

— Ҳар ҳолда, бу узр эмас!

Ҳасанали дастурхон ёзиб, қумғон киргизди. Одатий тақаллуфла билан дастурхон ва чойга қарабади. Ҳомид нонни шиннига булғар экан, сўради:

— Ёшингиз нечада, бек?

Отабекнинг лаби қимиrlамасдан, чой қуйиб ўтирган Ҳасанали жавоб берди:

— Бекка худо умр берса, бу йил ҳамдуна бўлса, тўппа-тўғри йигирма тўрт ёшга қадам қўядилар!

— Йигирма тўрт ёшга кирдимми, ота?! — деди бек.— Чиндан ҳам неча ёшга кирганимни ўзим билмайман.

— Йигирма тўрт ёшга кирдингиз, бек.

Ҳомид тагин сўради:

— Уйланганмисиз?

— Йўқ.

Ҳасанали Отабекнинг ёлғиз «йўқ» билан тўхташига қаноатланмади ва бу тўғрида ўз томонидан изоҳлар беришни лозим кўрди:

— Бек учун бир неча жойларга қиз айттирмак исталинган бўлса ҳам, аввал тақдир битмаганлик, ундан кеийин бекнинг уйланишга бўлган қаршиликларидан бу кунгача тўй қилмай келамиз. Улуг хўжамизнинг қатъий ниятлари бу сафардан қайтгач, бекни уйлантиришдир!

— Менимча, уйланишдек нозик бир иш дунёда йўқдир,— деди Раҳмат ва Отабекка юз ўтириди.— Уйланган хотининг табъингта мувофиқ келса, бу жуда яхши, йўқса, мунчалик оғир гап дунёда бўлмас!

Отабек Раҳматнинг бу сўзини самимият билан қаршилади:

— Сўзингизнинг тўғрилигида шубҳа йўқ,— деди,— аммо, шуни ҳам қўшмоқ керакки, оладиган хотинингиз сизга мувофиқ бўлиши баробарида, эр ҳам хотинга мувофақаттабъ¹ бўлсин.

— Хотинга мувофиқ бўлиш ва бўлмасликнинг унча кераги йўқ,— деди Ҳомид эътиrozланиб.— Хотинларга «эр» деган исмнинг ўзи кифоя... Аммо жиян айттандек, хотин деган эрга мувофиқ бўлса бас.

Раҳмат кулиб Оғабекка қаради. Отабек ҳам истехзоли табассум орасида Ҳомидга кўз қирини ташлади.

— Уйланишдаги ихтиёrimiz,— деди Раҳмат,— отоналаримизда бўлганлиқдан, оладирган келинлари ўғилларига ёқса эмас, балки унинг ота-оналари ўзларига ёқса, бас. Бу тўғрида уйланувчи йигит билан эр қилювчи қизнинг лом-мим дейишга ҳақ ва ихтиёрлари бўлмай, бу одатимиз маъқул ва машруъ ишлардан эмасдир. Масалан, мен: ота-онамнинг ёқтиришлари билан уйландим... Аммо хотиним ота-онамга мувофиқ

¹ Мувофақаттабъ — таъбига мос, мансуб.

бўлса ҳам, менга мувофиқ эмас, сиз айтгандек, эҳтимол, мен хотинимга мувофиқ эмасдирман... Сўзингиз жуда тўғри, бек ака.

Отабек Раҳматнинг сўзини ихлос билан эшилди ва «сен нима дейсан?» дегандек қилиб Ҳомидга қаради.

— Жиян,— деди Ҳомид Раҳматга қараб,— бошлаб, уйланишинг албатта ота-онанг учун бўлиб, улардан ранжиб юришингнинг ўрни йўқ. Хотининг кўнглингга мувофиқ келмас экан, мувофиқини олиб, хотинни икки қил! Буниси ҳам келишмаса, учичисини ол! Хотиним мувофиқ эмас, деб зорланиб, ҳасратланиб юриш эр кишининг иши эмас!

Раҳмат Отабекка кулимсираб қаради-да, тогасига жавоб берди:

— Хотин кўпайтириб, улар орасида азобланишнинг нима ҳикмати бўлсин? — деди.— Бир хотин билан муҳаббатли умр кечирмак, менимча, энг маъқул иш. Масалан, икки хотинликнинг биттаси сизми? Уйингизда ҳар кун жанжал, бир дақиқа тинчлигингиз йўқ.

— Сенингдек йигитлар учун, албатта, битта хотин ҳам ортиқчалик қиласи! — деб кулди Ҳомид.— Кўп хотин орасида азобланиш ўзи нима деган сўз? Қамчинингдан қон томса, юзта хотин орасида ҳам роҳатланиб тириклик қилоласан! Мен бу кунгача икки хотин ўртасида туриб жанжалга тўйгунимча йўқ, аммо хотинни учта қилишга ҳам ўйим йўқ эмас!

— Сизга тараф йўқ, тоға!

Ҳомид мағур бир тусда Отабекка қаради. Отабек унинг сўзидан кулимсираган эди.

Ҳасанали паловга урнаш учун ташқарига чиқди. Отабек меҳмонларга чой қўйиб узатди. Ҳомиднинг ҳалиги сўзидан кейин орадаги баҳс кесилган эди. Уччоловлари ҳам бир нарсанинг хаёлини сургандек кўринар эдилар. Бир неча вақт шу ҳолда қолишиб, Раҳмат тоғасидан сўради:

— Мирзакарим aka қизини эрга бердими, эшилдингизми?

Бу саволдан нима учундир, Ҳомиднинг чехраси бузилди ва тилар-тиламас жавоб берди:

— Бундан хабарим бўлмади. Гумонимча, бермагандир.

Раҳмат сўздан четда қолдирмаслик учун Отабекни ҳам орага олди:

— Бизнинг Марғилонда бир қиз бор,— деди,— шундоқ кўҳликки, бу ўртада унинг ўхшаши бўлмас, деб ўйлайман!

Ҳомид, бир турли вазиятда, ер остидан жиянига қарди. Тоғасининг ҳолидан хабарсиз Раҳмат сўзида давом этди:

— Шаҳримизда Мирзакаримбой отлиғ бир саводгар киши бор, бу шунинг қизидир. Балки сиз Мирзакарим акани танирсиз. У бир неча вақт Тошкентда қутидорлик қилиб турган экан?

— Йўқ... Танимайман.

Ҳомиднинг юзидағи бояги ҳолат яна ҳам кучланиб, гўё тоқатсизлангандек кўринар эди. Раҳмат давом этди:

— Унинг ҳовлиси пояфзал растасининг бурчагидаги иморатдир. Ўзи давлатманд бир киши, Тошкент ашрофларининг¹ кўплари билан алоқадор бўлганликдан, балки отангиз билан таниш чиқар!

— Эҳтимол,— деди Отабек ва нима учундир ғайри ихтиёрий бир тебранди. Унинг юзида бир ўзгариш ва вужудида бир чайқалиш бор эди. Үндаги бу ўзгаришдан Раҳмат хабарсиз бўлса ҳам, аммо Ҳомид уни ер остидан таъқиб этар эди. Бу таъқиб Отабекдаги ҳалиги ўзгаришни пайқабми, ёки тасодифийми эди, бу тўғрида бир мулоҳаза айтиш, албатта, мумкин эмас. Яна бир неча вақт жим қолдилар.

— Энди бизникига қачон меҳмон бўласиз, бек ака?

Раҳматнинг бу сўзи билан Отабек хаёлидан бош кўтарди:

— Худо хоҳлаган вақтда бўлармиз...

— Йўқ, бек ака,— деди Раҳмат,— сиз аниқлаб бир кунни тайин қилингиз, биз бу ерга сизни таклиф қилгани келганимиз!

— Овора бўлмоқнинг нима зарурати бор?

— Бунда овора бўлиш деган нарса йўқ. Иложи бўлса, сизни бу саройдан ҳовлига кўчирамиз. Ҳозирча бир кунни тайин қилиб, бизга меҳмон бўлинг-чи... Отам сиз билан ўтиришиб, Тошкент аҳволоти тўғрисида сўзлашмакка муштоқдирлар!

¹ Ашроф — эътиборли кишилар.

— Бу саройдан сизларни кига кўчишим оғир,— деди Отабек,— аммо отангизнинг зиёратларига боришга ҳар қачон ҳозирман!

— Соғ бўлинг, бек ака; борадиган кунингизни тайин қила оласизми?

— Маълумингиз, кечлари бўш бўламан, шунинг билан бирга отангиз қайси вақтни ихтиёр қилсалар, ижобат¹ этишдан ўзга чорам бўлмас.

— Саломат бўлингиз,— деди Раҳмат,— шуни ҳам сиздан сўрайин: ўтиришга бегона кишилар ҳам айтилса мумкинми, озор чекмасмисиз? Чақирилганда ҳам ўзимизга яқин ва аҳил кишилар бўлур. Масалан, Мирзакарим қутидор каби!

Бу вақт Отабекнинг тусига ҳалигидек ўзгариш чиқди эрса-да, лекин сездирмасликка тиришиб, жавоб берди:

— Меним учун фарқсиз!

Ошдан сўнг меҳмонлар хайрлашиб чиқдилар.

2

ХОН ҚИЗИГА ЛОЙИҚ БИР ЙИБИТ

Отабек ўзи билан кўришган бундаги иккита ёт кишини таҷимаганлиқдан бир-икки қайта уларни кўз остидан кечирди. Буни пайқаган Зиё шоҳичи уларни Отабекка танитди:

— Амакиларингизни сиз танимагандирсиз, албатта,— деди.— Бу қиши отангизнинг яқин дўстларидан Мирзакарим қутидор. Бу зот Андижон савдогарларидан Акрам ҳожи.

Мирзакарим исмлик қирқ беш-эллик ёшлар чамасида, қора қош, қора кўз, кўркам юз, яхшигина кийинган бир киши бўлиб, Акрам ҳожи эллик беш ёшлар орасидаги бир кекса эди. Отабек қайтадан Мирзакарим қутидорни кўздан кечирди.

— Ота қадрдонлари билан таништирганингиз учун раҳмат, амаки,— деди Отабек ва Акрам ҳожи билан Мирзакарим акага тавозуланди.— Отам сизлардек яқин дўстларига салом айтишни менга омонат топширган эдилар.

¹ И жобат — қабул (қилиш).

— Раҳмат, соғ бўлсинлар!

Мажлис Зиё шоҳичининг уйида Отабекнинг меҳмондорчилиги учун йиғилган. Юқорида исмлари ўтган зотлардан бошқа Ҳомид, Раҳмат ҳам Ҳасанали бор эдилар. Таниширишдан сўнг Отабек билан қутидорнинг кўзлари бир-бирларига тез-тез учраша бошладилар. Қутидор нимадир Отабекдан сўрамоқча оғзини жуплаб турса ҳам, Акрам ҳожи билан Зиё шоҳичининг алланарса тўғрисидаги гаплари кети узилмай давом этар эди. Уларнинг кўзи учинчى тўқнашишда қутидор кулимсираб қўйиб, сўради:

— Мени эслай оласизми, бек?

Отабек диққат ва эътибор билан қутидорни кузатиб, жавоб берди:

— Йўқ, амаки!

— Неча ёшга бордингиз?

— Йигирма тўрт ёшга...

Қутидор ўзича нима тўғрисидадир ҳисоб юритди-да:

— Воқиан сиз мени эслай олмассиз,— деди.— Мен Тошкентда қутидорлик қилган вақтимда тахминан, сиз беш-олти ёшлик бола эдингиз... Гўёки, мен Тошкентда кечагина тургандек ва кечагина сизнинг ҳовлингизда меҳмон бўлгандекман... аммо ҳақиқатда орадан ўн беш-йигирма йил ўтиб, сиз ҳам катта йигит бўлгансиз, умр — отилган ўқ эмиш!

— Сиз бизнинг ҳовлида бўлганмисиз?

— Кўп мартабалаб меҳмон бўлдим,— деди қутидор,— ул вақтда бобонгиз ҳам ҳаёт эдилар.

Бу иккисининг сўzlарига қулоқ солиб чётда ўтирган Ҳасанали ҳам гапга аралашиди:

— Амакингиз бизнинг ҳовлига келиб юрадиган вақтларида сиз ёш бола эдингиз, бек! -- деди.--- Амакингиз сизни саройларга олиб ҳам тушар эдилар!

Отабек уялув аралаш кулимсираб, қутидорга қаради:

— Таассуфки, эслай олмайман! --- деди у. Қутидор тагин нимадир айтмоқчи бўлган әди, Акрам ҳожи ўнга йўл бермади.

— Ҳожи акамиз бу кунда қандай иш билан машғуллар?

Отабек:

— Тошкент беги ёнида мушовур¹ сифати билан турадилар.

— Азизбек бу кунда ҳам Тошкентга ҳокимдир?

— Шундоғ.

— Сотқи бек кетсин, Азиз бачча, дени,— деди Ҳомид ва Акрам ҳожига қараб кулди.— Яқингинада Мусулмон чўлоқнинг базми шу Азиз бачча билан қизир эди.— У улуғ бир нарса қашф этгандек мағрур, мажлисга қараб чиқди. Ҳомиднинг заруратсиз айб текшириши мажлисга ётроқ туюлган бўлса керак, мажлисдагилар бир-бирларига қарашиб олдилар. Бу ўринсиз текшириш мажлисни бир оз сукутга юборди-да, сўнгра Акрам ҳожи саволида давом этди:

— Ҳокимингиз жуда золим эмиш, бу тўғри сўзми?

— Тўғри сўз,— деди бек,— Азизбек зулмидан аҳоли жуда тўйган.

Отабекнинг бу жавобидан ёлгиз Акрам ҳожигина эмас, балки мажлиснинг бошқа аъзолари ҳам ажабландилар. Отасининг вали неъмати² бўлган бир бекнинг зулмини иқорор этиш ҳақиқатан ҳам таажжубга лойиқ эди. Азизбек Туркистон хонлигининг энг золим ва мустабид саналган бекларининг бири ва унинг ўз қарамоғида бўлган Тошкент аҳолисига қилган зулмлари Фарғонага достон, аммо Акрам ҳожининг бу саволи Азизбекнинг энг яқини бўлган бир кишининг ўғлини синаб кўришлик учун эди. Бу синаш натижаси Акрам ҳожининг таажжубини ортдири ва бунинг сирини билишга қизиқсинга:

— Отангиз Азизбекнинг мушовури экан,— деди Акрам ҳожи,— нима учун уни бир оз бўлса ҳам йўлга солмайдир?

— Кечирингиз, амак,— деб Отабек кулимсиради,— сиз отамнинг мушовурагини бошқачароқ англаганга ўхшадингиз... Бизнинг бекларга ҳукм вақтида ҳам мушовур бўлмоқ имконсиз нарсадир. Отам Азизбекнинг мушовури ва яқин мусоҳиби³ саналса ҳам ва лекин бу жузъий ишлардагинадир. Бунинг учун сизга бир мисол келтирай, бу иш шу яқин оралардагина бўлди: Тошкентдаги жумалик гап мажлисларидан бирида бир ки-

¹ Мушовур — маслаҳатчи.

² Вали неъмат — хўжайин.

³ Мусоҳиб — ҳамсухбат.

ши Азизбекни мақтар ва бу мақтөвга қарши иккинчи-си: «Нега мунча мақтайсан, Азизбекнинг асли бир бачча-да!» дер. Уларнинг бу музокараларини четдан эшитиб турган хуфиялардан¹ бири бу сўзни Азизбекнинг қулогига етказур. Эртасига Азизбек мазкур икки кишини ўз ҳузурига олдиғиб, мақтовчига улуғ мансаб ато қиласа ва иккинчисини ўлимга буюар... Бу ҳукм мажлисида ҳозир турган отам маҳкумнинг гуноҳини сўраганида Азизбек жаллодга бақирав: «Тезроқ олиб чиқ!» Отам тагин қуллуқ қилганида, жаллодга буюар: «Қўлингдагини бўшатиб, ўрнига ҳожини олиб чиқ!» — Мана кўрдингизми, отамнинг қадру қийматини!

— Бўлмаса аҳоли хонга шикоятнома ёзмайдирми?

— Нечанчи шикоятномани сўрайсиз,— деди Отабек,— Азизбекдан зулм, жафо кўрганлар билан бирлиқда энди ўнинчи шикоятномамизни юборгандирмиз... Лекин хоннинг йўлбошчиси бўлган кишининг ўзи зулмда Азизбекдан неча зина баланд ўринни ишғол этгувчи кимса бўлса, биз қандоғ қиласайлик! Аммо шуниси ҳам борки, кейинги вақтларда Азизбек Кўқоннинг ёрлиғ ва фармонларини илтифотсиз қолдира бошлади... Ҳар ҳолда Тошкент аҳолиси Азизбек истибододидан ортиқ тўйди, кимдан кўмак сўрашни ҳам билмайдир!

Юсуфбек ҳожининг қандай одам экани, айниқса, Акрам ҳожига англашилиб, бу тўғрида ортиқ баҳс қилинмади ва сўз бошқа хусусларга ўтди.

Зиёфат самимият билан чақирилганликдан дастурхон қадрли меҳмонга маҳсус турланган эди, Зиё шоҳи чи билан ўғли Раҳматнинг ҳар замон меҳмонларни дастурхонга қисташлари бошқаларнинг иштаҳаларини очишга сабаб бўлса ҳам, аммо бизнинг Отабекка сира ҳам таъсир қилмас, хаёлланиб ўтирас эди. У нима тўғрида хаёл суриб, қайси тўғрида ўйлар эди? — Буни билиш қийин бўлса ҳам, бироқ унинг ҳозирги баъзи ҳаракатлари диққатни жалб этарлик эдилар: хаёл сурар экан, унинг кўзлари ихтиёrsиз каби қаршисидаги қутидорга қарайди, қутидорнинг кўзи ўзига тушди дегунча, кўзини ундан олиб дастурхондаги кўнгли тиламаган нарсаларга урина бошлайдир... Отабекнинг бу ҳолини

¹ Хуфия — жосус.

мажлисдагилар сезмасалар-да, аммо Ҳомид уни таъқиб эттандек эди.

— Савдо билан қандай шаҳарларга бордингиз, бек? — деб сўради қутидор.

— Ўзимизнинг шаҳарлардан кўпини кўрдим,— деди бек,— ўрус шаҳаридан Шамайга¹ ҳам бордим.

— Ҳа, ҳа, сиз Шамайга ҳам бордингизми? — деб Зиё шоҳичи ажабланди.

— Ўтган йил борган эдим,— деди бек.— Боришим ноқулай бир вақтга тўғри келиб, кўп мاشаққатлар чекдим.

— Чин савдогар сиз эмишсиз,— деди қутидор,— биз шу ёшга келиб ҳали ўзимизнинг каттароқ шаҳарлари мизни ҳам кўра олмадик; сиз ўруснинг Шамайигача боргансиз!

— Юрган дарё, ўтирган бўйро эмиш,— деди Акрам ҳожки.

Рус шаҳарларига бориб савдо қилувчилар Туркистонда жуда оз ҳисобда бўлиб, уларни кўрган Отабек мажлисга тансиқланди. Руслар тўғрисида аллақандай хаёлий ривоятлар эшитиб юрган қутидор ва Зиё шоҳичининг Отабекдан ҳақиқий ҳолни билгилари келиб, ундан Шамайда кўриб-кечиргандарини сўрадилар. Отабек Шамай хотиротини сўзлаб берди. Русларнинг сиёсий, иқтисодий ва ижтимоий тараққиётларини, эшиткувчиларни ҳайратда қолдириб ортиқ тафсилоти билан айтиб, чиққач:

— Шамайга бормасдан илгари ўз ҳукуматдорлигимизни кўриб, бошқалар ҳам шундайдир, деб ўйлар эдим,— деди Отабек,— лекин Шамай меним бу фикримни ост-уст қилиб, ўзимни ҳам бутунлай бошқа киши ясади. Мен ўруснинг идора ишларини кўриб, ўз идорамизнинг худди бир ўйинчоқ бўлганилигини иқоретишига мажбур бўлдим.

Бизнинг идорамиз буқунги тартибсизлиги билан кета берса, ҳолимизнинг нима бўлишига ақдим етмай қолди. Шамайда эканман, қанотим бўлса, ватанинга учсан, тўппа-тўғри хон ўрдасига тушсан-да, ўруснинг ҳукумат қонунларини бирма-бир арз қилсан, хон ҳам

¹ Шамай — Семипалатинск шаҳри, революциядан илгари Туркистон савдогарларининг рус савдогарлари билан савдо қиласидаган шаҳарларидан бири эди.

арзимни тингласа-да, барча элга ёрлиғ ёзиб ўруснинг идора тартибини дастуруламал этишга буюrsa, мен ҳам бир ой ичида ўз элимни ўруслики билан бир қаторда кўрсам... Аммо ўз элимта қайтиб кўрдимки, Шамайдыа ўйлаганларим, ошиқканларим ширин бир хаёл эмиш! Бу ерда сўзимни эшитувчи бирор ҳам бўлмади, бўлсалар ҳам: «Сенинг арзингни шу хонлар эшитадими, шу беклар ижро қиладими?» деб, мени маъюс қилдилар. Илгарироқ мен уларнинг гапига бовар қилмай юрсам ҳам, сўнгидан тўғри сўзни айтганларини билдим. Дарҳақиқат мозористонда «ҳай-ю алал-фалоҳ¹» хитобини ким эшитар эди!

Мажлис Отабекнинг Шамай таассуротини мароқ билан эшитгач, шу кунгача ҳеч кимдан эшитилмаган унинг фикрларига ажабланган эди. Истиқбол қайфуси тушига ҳам кирмаган бу кишилар Отабекнинг даруни дилдан чиқариб айтган гапларидан ҳиссасиз қолмадилар.

Зиё шоҳичи:

— Бизнинг бу ҳолга тушишимиз ўз феъли бадимиздан!

Акрам ҳожи:

— Тўғри!

Ҳомид ҳам бошқалардан қолишмас учун: «Худо коғирнинг бу дунёсини берган!» деб қўйди.

— Менимча, ўруснинг биздан юқоридалиғи унинг иттифоқидан бўлса керак,—деди Отабек,—аммо бизнинг кундан-кунга орқага кетишимиизга ўзаро низойимиз сабаб бўлмоқда, деб ўйлайман, бошқа хил айтганда, Зиё амакимнинг фикрлари қисман тўғри. Орамизда бу қўрқинч ҳолатга баҳақи тушунадиган яхши одамлар йўқ, билъакс бузгунчи ва нивочи унсурлар томир ёйиб ҳар замон содда ҳалқни ҳалокат чуқурига қараб тортадилар. Бу кунги қораҷопон² ва қипчоқ низоларини сизга бир тимсол ўрнида кўрсатайин: ўйлаб кўрилин, бу низолардан бизга қанчалик фойда ва қипчоқ оғайниларимизга нима манфаат ҳосил бўлмоқда?! Фақат бундан фойдаланувчилар икки ҳалқ орасига адован уруғини сочиб юргувчи бир неча иғвогар бошлиқлар-

¹ Алал-фалоҳ — пажот.

² Қипчоқларнинг бой ва амалдорлари ўзбекларни қораҷопон деб атагилар.

гинадир. Масалан, Мусулмонқулни ким холис одам, деб ўйладир? Унинг юрт учун қон тўкишдан бошқа нимага фойдаси тегди? Мусулмонқул ўз гарази йўлида орада йўқ низоларни қўзғаб куёви Шералихонни¹ ўлдириди, гуноҳсиз Муродхонни шаҳид этди, қўй каби юввош Тошкент ҳокими Салимсоқбекни ўлдириб, ўрнига Азизбекдек золимни белгилади ва ўзини мингбoshi эълон қилиб, аклсиз бир гўдакни (Худоёрни) хон кўтариб, эл елкасига минди. Тузук, агар Мусулмонқул бу ишларни бир яхши мақсадни кузатиб қилганда, золимларни ўртадан кўтариб, юртга осойиш берганда, унга ким нима дея олар эди? Ҳолбуки, Тошкент тарихида мисли кўрилмаган Азизбек каби ваҳшийни фақат шу Мусулмонқул қўлидан олди! Башарти Мусулмонқул чин инсон бўлса, инсондан ваҳшний туғилганини ҳеч ким эшитган чиқмас! Модомики, ўз гарази йўлида истибодд орқали эл устига ҳукмрон бўлгувчилар йўқотилмас эканлар — бизга нажот йўқдир, магар шундай гаразчиларни, улар ким бўлсалар ҳам, иш бошидан қувлаш ва улар ўрнига яхши ва холис одамларни ўтқазиш нажотимизнинг йўлидир!

Отабек мажлисга тамоман янги ва эшитилмаган фикрларни сўзлаб кетди, улар бекнинг оғзига анқайишиб қолган эдилар. Дарҳақиқат, ўзаро битмас низоларнинг асли маъносини у яхши англаб таҳлил қилас ва дуруст қиммат берар эди. Унинг шу йўсин мулоҳаза ва фикрлари мажлисгачуволган ипнинг учини топиб бергандек бўлиб, лафзан бўлмаса ҳам, маънан уларнинг таҳсин ва олқишиларини олди.

Отабек хуфтан номози учун таҳорат олишга меҳмонхонадан чиқсан эди, унинг кетича:

— Отанинг боласи-да,— деб Зиё шоҳичи меҳмонларга қараб қўйди.

— Умри узоқ бўлсин,— деди Акрам ҳожи,— йигитларимиз ичida энг ақллиги экан... Агарда хон кўтариш маним қўлимда бўлса эди, хон қилиб Отабекни кўтарар эдим!.. Ўзи ўқиганми?

Бу мақтovлар билан терисига сиғмай кетган Ҳасанали жавоб берди:

¹ Шералихон Мусулмонқулнинг синглисига уйланган эди. Шералихоннинг ўғли Худоёрхон шу Мусулмонқулнинг синглисидан тугилди. Мусулмонқул бемалол иш кўриш учун жияни Худоёрга қизини бериб ўзига куёв қилган эди.

— Тошкент «Беклар беги» мадрасасининг пешқадам муллабаччаларидан эди, лекин уч йилча бўлди, хўжамиз мадрасадан олиб, савдо ишига қўйдилар.

— Худо ҳар нарсадан ҳам берган йигит экан,— деди қутидор.

Аҳли мажлис Отабекни кўкларга кўтариб мақтар ҳади, лекин Ҳомид бу мақташларга иштирок этмас ва нимадандир гижингандек кўринар эди. Шу орада қутидорнинг «уйланганми?» деб Ҳасаналидан сўраши Ҳомидга яна бошқача ҳолат берди. Ҳасаналининг сўровчига, бекнинг қиз ёқтирмаслигини сабаб кўрсатиб шу кунгача уйланмай келганлигини тафсили билан ҳикоя қилиб беришидан сўнг у тоқатсизлангандек бўлди:

— Балки бегингизнинг тамаълари хон қизидадир,— деди истеҳзо билан Ҳомид.— Бундоқ йигитлар уйланганларида ҳам киши қизини умр бўйи азоб ичида ўтказадирлар!..

Сабабига тушибуниш қийин бўлган бу истеҳзога қарши Ҳасанали сукут қилмади:

— Мен унинг хон қизини олиш мақсади борлигини билмайман,— деди кулимсираб,— бироқ у хон қизини олса арзимайдирган йигит эмас... Ҳатто менга ҳам қаттиқ сўз айтишдан сақланган бир йигит ўз никоҳида бўлган озод бир қизга, албатта, заҳмат бермас деб ўйлайман. Хотин урадиган ва хотин устига хотин олиб, хотинларига зулм қиласидиган баъзи ҳайвон сифат кишилардан бўлиб кетиши, менимча, эҳтимолдан жуда узокдир, иним мулла Ҳомид...

Ҳасанали ўтган фаслда Ҳомиднинг ўз оғзидан хотинларига қарши қамчи ишлатганини эшиштан эди. Шунга биноан унинг бу охирги жумласи Ҳомидни ерга қаратиб, лом дейишига мажол бермай қўйди. Зиё шоҳи чи қайниси Ҳомидга «тузатилдингми?» дегандек қилиб қаради ва Ҳасаналидан афв сўради:

— Кечирасиз, ота,— деди,— бизнинг Ҳомидбой шунақа қўланса гаплар учун яратилган одам.

Қутидор ҳам Ҳасаналининг кўнглини кўтариб, тушди:

— Гапингиз тўғри, ота,— деди.— Отабек хон қизига лойиқ бир йигит экан.

Баҳсллашиб учун Ҳомидга йўл қолмаган эди. Бир турли илжайиб ер тагидан Ҳасаналига кўз ташлади.

Ошдан кейин бошлаб Ҳомид, сўнгра бошқа мәҳмонлар тарқалишдилар. Отабек билан қутидорнинг йўллари бир бўлганликдан биргалашиб кетдилар. Қутидор ҳовлисига қайрилар экан, бек билан хайрлашди:

— Албатта бириси кун бизникига марҳамат қиласиз, тузукми?

— Хўп, амак!

— Бизники мана шу бурчакдаги эшик... Қайтага бу-кун бизницида қолсангиз бўлмасми-а?

— Раҳмат... Хайр, саломат бўлингиз!

Улар тўхтаб сўзлашган ўринларидан хайрлашиб узоқлашгач, бир бурчакдан чопонига бурканган бир киши чиқиб, ҳалигилар келган томонга қараб юрди...

3

БЕК ОШИҚ

Сарой тинч уйқуда, тун ярим. Ҳасанали ҳужранинг узун бурама қулфини очиб ичкарига шам ёқди ва бекнинг тўшагини ёзиб, унинг кириб ётишини кутиб турди. Аммо Отабек нима учундир тез кира бермади. Ҳужра эшигининг очилганидан, шам ёқилиб, ўрин ёзилганидан гўё хабарсиз каби устунга суялганча қотиб тураг эди.

— Ўрнингизни ёздим, бек!

Отабек бу сўз билан ҳужрага кирди ва бориб тўшаги ёнига ўтиреди. Ҳасанали бекнинг ечиниб ётишини кутиб тураг, чунки уни ётқизиб ёқилган шамни ўзи билан нариги ҳужрага олиб чиқмоқчи эди. Бироқ Отабек тўшаги ёнига ўтирида, яна ўйлаб қолди...

Отабек бир неча кунлардан бери Ҳасаналининг кўзига бошқача кўринар эди.

Ҳасанали Отабекда шу кунгача кўрилмаган қизиқ бир ҳолатга беш-олти кундан бери ажабсиниб юрар эди. Ҳасаналини ажабсindirган ҳолат ҳам бекнинг шунинг сингари хаёл ичida барчани унугиб қўйиши ва бошқа ишларга эътибор ва парвосизлиги эди.

Ҳасанали бекнинг ҳозир ипидан-нинасигача бўлган қизиқ ҳолини узоқ кузатиб турди. Лекин Отабек хаёл суришдан зерикмаса ҳам, Ҳасанали кузатишдан зе-риди:

— Менда юмишнингиз йўқми?

Отабек бу гапни англамади, шекилли, Ҳасаналининг юзига кўтарилиб қаради-да, яна қўзини бир нуқтага тикиб қолди. Бу ҳолатдан Ҳасаналининг андишаси ортиб, бекнинг бунчалик ангравланишига қандай маъно беришни ҳам билмас эди. Отабек шу ҳолда тағин қанчагачадир ўтирди, ниҳоят уйқудан уйғонган кишидек чўчиб ўзини кузатувчига қаради:

- Чиқиб ётмайсизми?
- Менда юмишингиз йўқми?
- Нима юмишим бўлсин, шамни ҳам олиб кетинг.

Ҳасанали шамни олиб ўз ҳужрасига чиқди. Унинг ҳужраси Отабекники билан бир қаторда бўлиб, газмол, пойафзал ва шунинг сингари моллар илэ тўлган ва Отабекдан бошқа, алоҳида ҳужрада туриши ҳам шу молларни сақлаб ётиш учун эди. Ҳасанали ўрнини ёзар экан, «тавба» деб қўйди.

Оқорида сўзлангандек, Отабекдаги бу ҳолатни бирор ҳафталардан бери пайқаса ҳам, ҳозиргидек андишага тушмаган ва бунчалик диққат этмаган эди. Ҳўжазодасидаги бу ҳолат уни ҳар турли мулоҳазаларга олиб кета бошлади. Тўшаги устига ўтириб, оқ соқолини ўнг қўли билан тутамлаб ўйлар эди: савдо тўғрисида бирор хато қилдими. Зиё шоҳчиникида таомдан тузукроқ тотинмади, бирор оғриги бормикин... Мусоғирчиликда оғриса... аммо бу мулоҳазаларининг биттасига ҳам ўзи қаноатланмади. Зеро, савдо тўғрилари ундан яширин эмас, оғриганда ҳам, албатта, шикоят эшитар эди.

Ўйлаб-ўйлаб бир нарсага ҳам ақли етолмагач, ўрнидан туриб токчада ёниб турган шамни ў chirди. Ҳужра орқа-ўнгни ажратиб бўлмаслик қоронгуланди. Қоронғуда туртиниб, ҳужра эшигига келди-да, авайлаб ғижирлатмай әшикни очди ва секингина ташқарига бош чиқариб саройни кузатди. Киши йўқликка қаноат ҳосил этиб, маҳсичан оёгини оҳиста қўйиб, Отабек ҳужрасининг ёнида тўхтади, саройни яна қараб чиқди. Сарой қоп-қоронғу, тинч уйқуда, аммо бу тинчликни сарой отхонасидаги отларнинг карт-курт хашак чайнашлари ва атрофдаги хўrozларнинг қичқиришларигина бузар эдилар. Ҳасанали секингина дарича остига ётиб ҳужра ичига қулоқ солди. Ҳужра ичи тинч эди. Орадан уч-тўрт дақиқа фурсат ўтиб ҳужрадан шип этган товуш эшитмади. Тағин бир неча дақиқа қулоқ узмай

туриб, сўнгра ўрнидан қўзғалмоқчи бўлган эди, ичкаридан «уфф» деган ихраш эшилди. Ҳасаналининг қулоқлари диккайиб ўрнидан турди, кўзи олаланган эди.

— Бек оғриқ,— деди кўнгилдан ва жазмланиб ҳужра эшигига юриб келди. Эшикни очиб Отабек ёнига кирмоқчи эди. Эшикни итаришга борган қўлини қолдириб, «балки оғриқ эмасдир» деб тўхтади. Яна кирайми, йўқми, деб иккиланиб тургандан кейин, юриб ўзининг ҳужрасига келди. Аммо Отабек тўғрисидаги ташвиш боягидан ўн қайта ортган эди. Ечиниб ухлашга ётган бўлса ҳам, бекнинг хусуси уни кўз юмгали қўймади. Бек тўғрисида ҳар турли хаёлларга бормоқда эди. Юсуфбек ҳожининг: «Ўғлим ёш, сен дунёнинг иссиқ-совугини тотиган ва менинг ишонган кишимсан. Ўғлимнинг ҳар бир ҳолидан хабар олиб туриш сенинг вазифандир!» — деб таъкидлаши, Отабекнинг онаси Ўзбек ойимнинг ёшли кўз билан: «Сени худога, Отамни сенга топширдим!» — деб ёлворишлари, зорланишлари унинг қулоқлари остида такрорлангандек бўлар эдилар. Ухлаб кета олмади. Кўйлакчан эгнига чопонини ёпиниб ўрнидан турди, ҳужрадан чиқиб Отабек дарчаси остига яна келиб ўтириди.

Тун аёз, изғириқ ел тўрт тарафга югуриб жон ачитмоқчи бўлар эди. Ҳасанали ярим ялангоч ҳолда жунжайиб дарича остида, изғириқ қучогида ўтираш эди. У еган совуғига илтифот этмас, вужудини изғириқка топшириб, фикрини ҳужра ичига юборган эди. Ҳужра ичига бирмунча қулоқ солиб ўтиргандан кейин, узун тин олиб, бошини тирқишдан узди, Отабекнинг пишиллаб ухлаган товушини эшитиб, бир даража тинчланди. Васвасадан ариёзган бўлса ҳам, ўрнидан қўзғалмади, нима учундир тагин ҳам совуққа жунжиб ўтира берди. Орадан яна бир неча дақиқа фурсат ўтиб, Ҳасанали тамом тинчланди ҳам туриб кетмоқчи бўлди ва шу ҳолатда ичкаридан уйқусираш эшилди:

«—...Қора кўзлари, камон қошлари...»

— А! — деди Ҳасанали ва қайтадан қулоғини тирқишга олиб борди. Энди унинг бутун борлиги қулоқ бўлиб айланган. Ўзини унутиб, барча диққати ҳужра ичига оққан эди. Ўргадан кўп фурсат ўтмади, бояги уйқусираш яна такрорланди:

«— Ой каби юзлар, кулиб боқишилар, чўчиб қочишилар... Уфф!»

Ҳасанали учун биринчида англашилмай қолган маънолар бу кейинги гап билан ечилди. Ҳасанали эндиги ўтиришни ортиқча топиб ўрнидан турди, ҳужрасига кирап экан, бошини чайқаб, ўзича сўзланди:

— Бек ошиқ!

Ўрни устига чопонини ёпди-да кўрпаси ичига кириб ўтириди ва «чиндан ошиқми?» деган савонни кўнглидан кечирди. Таниш бўлмаган бир шаҳарда кимнинг бўлса ҳам қизига учрашсин, беш-олти кун ичидаги бу янглиғ ўйқуда ҳам... масалага бу жиҳат билан қараб бекнинг ишқига ишонгиси келмас эди. Аммо иккинчи томондан, қулоғи остида бекнинг ўз оғзидан эшитилган «...кулиб боқишилар, чўчиб қочишилар...» жумлалари тақорлангандек бўлиб, Отабекдаги бир неча кунлик ўзгаришга муҳаббатдан бошқа ҳодиса, деб маъно беролмас эди. Бу икки турли масаланинг ўнг-терисини айлантириб муҳокама қилди ва ўлчади. Ҳасаналининг ўзи тарозининг ишонмаслик палласида бўлса ҳам — «...кулиб боқишилар, чўчиб қочишилар» ҳамон қулоқлари остида тақорланар эдилар. Тун тонг отарга яқинлашгач, унинг уйқули мияси ҳеч бир турли бу муаммони еча билмас эди. Кўп ўйласа ҳам бир қарорга кела олмади. Аммо эртага бекнинг ўзини синааб кўрмоқчи бўлиб, кўзи ўйқуга кетди.

4

МАРГИЛОН ҲАВОСИ ЁҚМАДИ

Эрталабки чой ҳозирланган. Отабек хомуш ўтиради, Ҳасанали эса унинг ҳолини таъқиб этмоқда эди. Орадаги сўзсизлик бир пиёладан чой ичкунча бузилмади. Охирида Ҳасанали Отабекнинг тусига бир неча қайта кўтарилиб қўйди:

— Бир неча кундан бери хомушроқ кўринасизми?

Отабек савол ташлагувчига қараб олди ва тасдиқ ишорасини бериб:

— Билмадим,— деди ва бир оз тўхтаб изоҳ берди,— хомушлигим сизга ҳам сезилдими, билмадим... Марғилон ҳавоси мижозимга тўғри келмаганга ўхшайди...

— Айтганингиздек,— деди Ҳасанали,— Марғилоннинг ҳавоси бузик экан, бир-икки кундан бери мени ҳам аҳволим ўзгара бошлади. Марғилондан тез жўнамасак, мен ҳам ишдан чиқадигон ўхшайман...

Бу гапдан кейин Ҳасаналининг кўзи бекка тикилган эди, агар тундаги уйқусираш Ҳасаналининг ўйлаган эҳтимолига тўғри келса, ўзининг ҳалиги сўзи Отабекка бир ўзгариш беришида шубҳа қилмас эди.

Отабек боши берк кўчада қолгандек бўлди, жавобига қийналди.

— Кетамиз,— деди бир оз ўйлагандан кейин,— мол баҳолари тўғрисида битишолмай турамиз — олғувчилар арzon сўрайдилар. Шунинг учун тағин бир неча кун қолишимизга тўғри келармикан... Билмадим...

Ҳасаналининг синаши ниҳоятига етгандек бўлди, ҳатто юқоридаги жавобни эшитган вақтида нима учундир ўзини бир турли кулгидан аранг тўхтатиб қолган эди. Яна ўртада хомушлик ҳукм суреб, Ҳасанали ишни тузукроқ очиш ва ё шу куйи қолдириб кета бериш талашида эди. Ҳасанали, Отабекнинг ҳар бир сприга ўзини маҳрам ҳисоблаганликдан, дарҳақиқат, Отабекка маҳрам бўлишга лойиқ бир меҳрибонликка эга бўлганикдан, бек билан очиқ сўзлашиб фикрига келди. Бир неча дақиқа муқаддима учун режа қуриб ўтиргандан сўнг, тилга келди:

— Ўғлим, Отабек!

— Сўзлангиз.

— Айтингиз-чи, мен сизнинг кимингиз?

Отабек, Ҳасаналининг мақсадига тушунолмай мажхул унга назар ташлади.

— Сизми? — деб кулимсиради у.— Отам бўлмасангиз ҳам, мени оталик муҳаббати билан севган содиқ ва меҳрибон бир кишимсиз, яъни маънавий отам.

— Баракалла, ўғлим! — деди Ҳасанали.— Жавобингиз ўз ўйлаганимчадир. Энди сиздан шуни ҳам сўрайин: хўжасига содиқ бир қул, сизнинг таъбирингизча, маънавий бир падар, ўз ўғлига ёмонлик согинарми, бу тўғрида жавоб берингиз-чи?

Отабек кутилмаган бу саволдан ажабланди:

— Сўзингизга тушунолмадим, ота! — деди.— Шундօғ бўлса ҳам жавоб бераман; бу кунгача сиз ёлғиз менгагина эмас — бизнинг оиласизга оталик мавқеида туриб, яхшилиқдан бошқани соғинмай келасиз.

Ҳасанали тусини бузмади:

— Илгарироқ балки шундօғ бўлгандир, аммо энди, айниқса, сиз...

— Айниқса, мен... очиб сўзлангиз.
— Айниқса, сизнинг менга сақлаган ишончингиз туталганга ўхшаб, ўзимдан қандоғ камчилик ўттанига ҳайронман!

— Қизиқ гаплар сўзлайсиз,— деди Отабек, таажжу-би ортган эди.— Менга қандоғ ёмоналик соғиндингизки, сизга ишончим битсин? Ва сасаланишининг ўрни йўқ, мундан сўнг ҳам сизнинг хайриҳоҳона кенгашларингизга ҳам вужудингизга муҳтоҷман, амонатим, бошқам мундан кейин ҳам она қорнида сақлангандек сизда сақланишига ишонаман ва бунга сизнинг ҳам амин бўлишингиз керак, ота.

— Лекин... тил билан кўнгил бошқа-бошқадир, ўғлим...

Отабек бу терс ва қўрс муқобаладан тоқатсизланди:
— Янглишасиз, ота!

— Янглишмайман, билъакс билиб, қаноатланиб сўзлайман.

— Тилим билан кўнглимнинг бошқалигини исбот қилингиз.

Ҳасанали гиналиқ қиёфада қошларини чимирди ва:

— Мендан яшириб юрган бир сирингиз бор,— деди.
— Сиздан яширган бир сирим бор?

— Бор, ўғлим, бор,— деди Ҳасанали,— агар даъвонга тўғри бўлса, менга чиндан ўз кишим деб қарасангиз, ўша сирни яширмангиз.

Отабек тўсатдан ўзгариб, бояги асабийлик ҳолатини ўқотди, шундоғ бўлса ҳам ўзини йиғиб, кулган бўлди:

— Ҳали шунақа сиздан яширин сирим борми?
— Бор!

— Бўлса марҳамат қилиб кашфингизни сўзлангиз!

Ҳасанали пиёлани оғзига кўтариб, чойни ҳўплади, қашфини очди:

— Марғилонга келган кунлардан бошлаб сизда қизиқ бир ҳолат бор,— деди.— Сиз бу ҳолатни «Марғилон ҳавоси ёқмади» деб таъбир қиласангиз ҳам, мен мундан бошқа нарсалар пайқайман...

Отабек ўзига қатъий тикилиб турган Ҳасаналидан ўзини четга буришга мажбур бўлди. Гўё бу сеҳргар чол ҳамма сирни бетдан ўқиб олар эди. Ҳасаналини ҳамон ўзига тикилиб турганини билиб манглайини қашиган бўлди:

— Хўш, давом этингиз...

— Бу сириңизни мендан яширмоқчи бўласиз,— деди тамом қаноат билан Ҳасанали, чунки энди ўз кашфига жуда ишонган эди.— Хайр, яширмакка ҳам балки ҳақингиз бордир... Аммо шу кўйи сир сақлаш билан бирор натижага етиш мумкинми?

— ...
Отабек қип-қизил қизариб гуноҳкорлардек ерга қараган эди. Ҳасаналининг юзига падарона тараҳум¹ тузи кириб, кексаларга хос оҳангдор бир товуш билан бекнинг устидаги оғир юкни ола бошлади:

— Айби йўқ, ўғлим,— деди,— муҳаббат жуда оз йигитларга мусасар бўладиган юрак жавҳаридир. Шунинг билан бирга кўп вақтлар кишига заарали ҳам бўлиб чиқадир. Шунинг учун куч сарф қилиб бўлса ҳам унтиш, кўп ўйламаслик керакдир.

Бу кейинги гап билан Отабек кўтарилиб Ҳасаналига қаради ва узоқ тин олиб яна ерга боқди. Гўё бунинг ила «унтиш мумкин эмас» деган қатъий сўзни айтган эди. Орага сўзсизлик кирди. Иккиси ҳам фикрга толган эди. Ҳасаналининг ортиқча берилиб ўйлаган кезда соқолини қайриб тишлайдиган бир одати бўлиб, ҳозир ҳам соқолини ямлаш билан машғул эди. Узоқ ўйлагандан сўнг ишнинг очилмай қолган қисмини ечиши бошқа вақтга қолдирмоқчи бўлди, чунки Отабек шунинг ўзига ҳам яхшигина қизариниб, бўртинган эди.

5

КИРОЙИ КУЁВИНГ ШУНДОҚ БЎЛСА

Пойафзал бозори ва унинг бурчагидаги ҳовли... Үқувчи албатта бу ҳовлининг эгаси билан таниш чиқар. Кўримсиз, чирк босиб қорайган, жуда кўп хизмат қилиб кексайган, очиб-ёпганда анвойи — турли доду фарёд қиладиган, бунда саналган сифатларини бир ерга жамлаб натижа чиқарганда «шарти кетиб, парти қолган» бир дарбозанинг остонасидан уч-тўрт қадам ичкарига кирилса, Бухоро зиндонларидан бирини ҳис этилур ва қоронғу йўлакнинг ниҳоятидаги ёруғликка томон ошиқилур. Қоқилиб-суқилиб йўлак зиндонидан

¹ Тараҳум — раҳм-шафқат.

қутулгач, бир катта ариқ ёқасига, ўрдадек ҳовлига чиқилур ва роҳат тин олинур. Ҳовлиниңг кун чиқарида кун ботишга қаратиб солинган, унча мақтарли бўлмаса ҳам, замонасининг олдинги биноларидан ҳисобланган бир айвон билан бир уйга кўз тушади. Саҳн ва бинолар киши зотидан бўш, шунинг учун бу ҳовли оиласининг ташқариги қисми — меҳмонхона эканлиги англашилур. Саҳннинг тун ва кун ботар жиҳатлари кичкина ҳужралар билан ўралган ва бу ҳужраларнинг барча эшиклари ёпиқ ва қулфланган ҳолда бўлиб, моллар билан бандлиги ва уй эгасининг давлатли киши бўлганилиги билинур. Ҳовлиниңг жануб тарафи дўконлар орқаси, аммо катта туп гилос ёғочлари қоплаб ётадилар.

Энди биз ташқари ҳовлини қўйиб, меҳмонхонанинг ёнидан ичкарига кирамиз. Ичкари ҳовлиниңг йўлаги ҳам наригисидек усти ва бағри ёпиқ — қоронғу, йўлакнинг ниҳоятига бориб ўнгта юрилса ахтахонага, чапга юрилса биринчи мартаба кирганимиздек улуғ бир ҳовлига чиқармиз. Ҳовлиниңг тўрт тарафи турли эҳтиёж бинолари билан ва тўрдаги бинонинг икки биқини катта уйлар билан ўралган бўлиб, шу икки уйнинг орасига ўтирган кошинкор ва нақшин чорхари айвон бу ҳовлиниңг биринчи мартаба кўзга чалинадиган ортиқликларидандир. Шу чорхари айвоннинг ўрта бир ерида, устига атлас кўрпалар ёпилган танчанинг тўрида деворга суюниб, аврасига қора мовут сирилган совсар пўстин кийиб бир киши ўтиради. Бу киши билан иккинчи мартаба танишиб ўтирмаймиз, чунки бу одам ўқувчи билан танишган — Мирзакарим қутидор. Танчанинг икки биқинида икки хотин — булардан биттаси, ичидан атлас кўйлак, устидан одими хон атлас гуппи кийган, бошига оқ даканани хом ташлаган, ўттиз беш ёшлар чамали гўзал, хушбичим бир хотин. Юзидан мулоимлик, эрига итоат, тўғрилик маънолари томиб турган бу хотин қутидорнинг рафиқаси — Офтоб ойим. Иккинчиси, етмишлардан ўтган бир кампир, Офтоб ойимнинг онаси — Ойша буви. Ўзоқ бошида қўполгина, қирқ беш ёшлар чамали яна бир хотин чой қайнатиб юради. Бу хотин эса оиласининг чўриси — Тўйбека. Биз булар билан танишишни шу ерда қолдириб, айвоннинг чаپ тарафидаги дарича орқали уйга кирамиз, ҳам уйнинг тўрига солинган атлас кўрпа, пар ёстиқ қучогида, соvuқдан эринибми ва ё бошқа бир сабаб биланми, уйгоқ

ётган бир қизни кўрамиз. Унинг қора зулфи пар ёстиқ-нинг турли томонига тартибсиз суратда тўзғиб, қуюқ жингила киприк остидаги тим қора кўзлари бир нуқтага тикилган-да, нимадир бир нарсани кўрган каби... қоп-қора камон, ўтиб кетган нафис, қийик қошлари чимирилган-да, нимадир бир нарсадан чўчиган каби... тўлган ойдек губорсиз оқ юзи бир оз қизилликка айланган-да, кимдантир уялган каби... Шу вақт кўрпани қайириб ушлаган оқ қўллари билан латиф бурнининг ўнг томонида, табиатнинг ниҳоятда уста қўли билан қўндирилган қора холини қашиди ва бошини ёстиқдан олиб ўтирди. Сариқ рупоҳ атлас кўйлакнинг устидан унинг ўртача кўкраги бир оз кўтарилиб турмоқда эди. Туриб ўтиргач, бошини бир силкитди-да, ижирғаниб қўйди. Силкиниш орқасида унинг юзини тўзғиган соч толалари ўраб олиб жонсиз бир суратга киргизди. Бу қиз суратида кўринган малак қутидорнинг қизи — Кумушбиби эди!

Кумуш кийиниб уйдан чиқди, Тўйбека томонидан ҳозирланиб берилган иссиқ сув билан юзини ювди. Уйига кириб артиниб, тузатингач, айвонга чиқди. Айвондагиларга салом бериб отасининг ёнига келиб ўтирди.

Қутидор қизини кузатди:

— Тузукмисан, қизим?

— Йўқ, отажон, бошим ҳамон оғриб турадир.

Қутидор қизининг пешонасини ушлади:

— Эй-ҳа... Кумуш, ҳали иссиғинг бор,— деди.—

Ўзингни тежа, қизим, ўрнингни қалин қилиб бурканиб ёт, терласанг ёришасан, қизим!.. Тўйбека, Кумушнинг чойини оқлаб бер-чи.

Офтоб ойим эрининг сўзини кучлаб тушди:

— Иссиғи бор, юзи ҳам қизариб, бўртиб турибдир.

Ўзининг руҳсиз төвуши билан Ойша буви ҳам гапга аралашди:

— Наҳ кечаси билмапсиз, наҳ мени қўрқитиб энкантенкамни чиқарди. Иситмаси аралаш алланучук сўзларни айтиб чиқди...

Кумушбиби ялт этиб бувисига қараб қўйди.

— Ўша ҳарорати ғаризаники,¹ — деди қутидор,— букун бирор ҳакимдан сўраб қарай-чи... Ол, қизим шу пиёладаги чойингни ич-чи,— деди ва тағин бир қайта қизини қузатди.

Чойни ичиб бўлгандан кейин, қутидор фотиха ўқиб ўрнидан турди.

— Мен сизга айтиб қўяй, Кумуш, — деди тураг экан, қутидор Офтоб ойимга,— бу кунга бир меҳмон айтган эдим. Чўрингни чиқариб меҳмонхонани тозалат. Анови янги қоплаган кўрпаларингни бер, танчага ўшани ёпсин. Катта гиламни ҳам чиқар, уйингда меваларинг бор эдими?

— Бор.

— Бор бўлса яхши. Бир оздан сўнг эт олиб кирги зарман, варақи пишириб қўйингиз!

Офтоб ойим варақи пиширишдан бу кунги меҳмоннинг унча-мунча киши бўлмаганлигини билди.

— Қанақа меҳмон эди?

— Сен танимайсан. Тошкентлик бир йигит, тағин шу ердаги уч-тўртта оғайнилар... Тузукми, айтганларимни уқдингми?

— Уқдим, уқдим!

Кумушбиби отасининг сўзига илтифот қўлмади. Қутидор дўконига жўнагандан кейин Офтоб ойим Тўйбекани меҳмонхонага буюрди ва ўзи хамир қилишга ўтироди. Кумушбиби хомуш эди. Бир нарса тўғрисида ўйлармиди, ёки бош оғриғиси кучлимиди, ҳар ҳолда номозшомгул каби ёпиқ эди. Қархисида ўтирган бувисининг ўтган-кетгандан қилган ҳикояларига эринибигина қулоқ берар ва кўнглини очиш учун айтилган қизиқ сўзларига илжайиш билан жавобланар эди.

Кумушбиби ўзининг бир соатча вақтини шу кўйи кечирди, сўнgra ўрнидан туриб, кичкина латиф оёқларига отасининг яқиндагина олиб берган қола кавушини кийди ва ошхона юмиши билан қоришиб ётган онасининг олдига борди.

Кумушбиби энди ўн еттини қўйиб, ўн саккизга қадам босганликдан бўйи ҳам онасига етаёзган, аммо жуссаси онасига кўра тўлароқ эди. Онасининг юмишига бир оз қараб тургандан кейин ташқарига томон кет-

¹ Ҳарорати ғариза — табиий ҳарорат.

ди. Айвоннинг бир четидан меҳмонхонада гилам тўшаб уринган Тўйбекага қаранганд бўлди-да, айвоннинг ўрта устунига келиб суюнди. Энди боягига қараганда бир оз енгиллангансимон, жон оловчи қора кўзлари ҳаракатлана бошлаган, буғриқдан қизил юzlари очилинқираган эдилар. Айвон устунига суюнгач, қора қийиф қошларини чимириб кўча йўлак томонга қаради, бир оз қараб турди-да, айвондан ерга тушиб йўлак томонга, ариқ бўйига кетди. Сув бир дўконнинг остидан чиқиб, бўховлида уч-тўрт қулоч чамаси очиқ ҳавода оқар ва кўпприк-том остига кетар эди. Кумушбиби ариқ бўйидаги бир ўринни кўзлади-да, сакраб нариги юзига ўтди ва чўнқайди. Унинг кўзлари мулойимгина сув устига оғдилар, ариқнинг мусаффо тиниқ суви ёввошгина оқиб келар, Кумушбиибининг қаршисига етганда гўёки ўнинг таъзими учун секингина бир чарх уриб қўяр, ўз устида ўтирган соҳиранинг¹ сеҳрига мусаххар² бўлган каби тағин бир каттароқ доирада айлангач, оҳистагина кўприк остига оқиб кетар эди. Ариқ сувининг ниҳоят-сиз бу ҳаракатини узоқ кўздан кечириб ўтиргач, қўл узатиб сувдан олди ва юзини ювди. Унинг юзини ўпид тушган сув томчилари билан ариқ ҳаракатга келиб чайқалди. Гўёки сув ичиди бир фитна юз берган эди... Иккинчи, учинчи қайталаб юз ювишда бу фитна тағин ҳам кучайди...

Нозик оёклар толдилар шекилли, садаф каби оқ тишларини бир-икки қайталаб чайди-да, ариқ бўйини ва унинг сувларини ташлаб кетди.

Боягига қараганда анчагина енгилланиб ичкарига кирди. Ҳаракатлари ҳам бирмунча ўзгарган эди. Ойша буви ундан бу ўзгаришдан суюнди:

- Енгил тортдингми, қизим?
- Шукур...
- Энди ортиқ уринма, қизим, тинч ўтири!

* * *

Қиши кунлари бир тутам, «ҳа дегунча» кеч бўлади. Бугун ҳам «ҳа дегунча»га ҳам қолмай кеч бўлган. Меҳмонларнинг келишганига ярим соатлаб вақт ўтган эди. Қутидор меҳмонларни ихлос ва самимият билан кутар, зиёфат қуюқ-суюқлари билан тўла-тўкис давом

¹ Соҳира — сеҳричи қиз.

² Мусаххар — таслим бўлган, бўйсунган.

этар эди. Тўйбека ичкари билан ташқарига югуриб дастурхон янгилар, чой ташир эди. Хизмат тугалаёзгандан кейин ўзининг совуб қолган ошини емак учун Офтоб ойимлар ёнига ўтириди.

Сўздан сўз чиқиб Офтоб ойим Тўйбекадан сўради:

— Меҳмонлар қанақа кишилар экан, танидингми?

— Наҳ сиз ёш меҳмонни кўрмабсиз, дунёга келмабсиз,— деди Тўйбека ўнгу терс ош чайнаб,— бир чироили, бир ақлли, тағин ўзи ҳаммадан юқорида ўтирадир; ҳали йигирмага ҳам бормагандир, мўйлови ҳам эндинга чиқа бошлаган... Наҳ бизга куёв бўладиган йигит экан,— деди ва Кумушга қараб кулиб қўйди. Бу сўздан Офтоб ойим ҳам кулимсириб қизига қаради:

— Ана, Кумуш,— деди,— эшиздингми, опантнинг сўзини! Тўйбека сенга эр топган, сен бўлсанг бошим оғрийдир, деб ётасан.

Кумушбибининг сезилар-сезилмас кулимсирашидан ёқутдек иринлари¹ остидаги садафдек оқ тишлари кўриниб кетди эрса-да, бироқ унинг бу ҳоли тезлик билан тундликка² алишинди.

— Колган хизматларингизнинг биттаси энди менга эр топиш эди!

Тўйбека Кумушнинг тундланишини эламади:

— Э, синглим, ҳали сен билмайсан,— деди,— у йигитни бир кўргин-да, ху, деб кета бергин... сен тугул, шу ёшим билан меним ҳам унга текким келди,— деди ва хохолаб юборди.

Кумушбиби чирт этиб юзини Тўйбекадан ўгириди.

— Тезроқ тегиб қолинг!

— Кошки эди теголсам,— деди Тўйбека,— мен унинг бир тукига ҳам арзимайман. Аммо сен бўлсанг унинг билан тенглашар эдинг. «Тенг-тенги билан, тезак қопи билан...» ха-ха-ха!..

Тўйбеканинг шунингдек ҳангамалари бошқа вақтларда Кумушни яхшигина кўлдирса ҳам, ҳозир унга ётишиб келмади шекилли; аччиғланган кўйи ётиш учун уйига кириб кетди. Офтоб ойим «бачча-маччадир» деб ўйлаган эди. Шунинг учун бу тўгрида сўз очмади.

— Ташқаридан хабар олингиз-чи, опа,— деди Офтоб ойим,— чой керак бўлдимикин.

¹ Ирин — лаб, дудоқ.

² Тунд — аччиқ газаб.

Тўйбека нари-бери ошини еб ташқарига чиқиб кетди. Орадан беш дақиқа вақт ўтган, ё ўтмаган эди, ҳовликиб айвонга келди:

— Туф-э, қуриб кетсин, жоним чиқиб кетди-я!

Бир соатдан бери жойномоздан қўзғалмай тасбих ағдариб ўтирган Ойша буви Тўйбекани бошдан-оёқ кузатиб, яна ишига машгул бўлди. Офтоб ойим илтифотсизгина қулимсиб сўради:

— Нима бўлди, нега мунча қўрқиши?

Тўйбека дамини ростлаб устуннинг тагига ўтириди:

— Поччамдан дастурхонни олиб, қоқиш учун гилоснинг ёнидан ўтарманми, аллаким балога туртиниб кетдим. Қўрқанимдан оз қолдики, додлақ юборсан... Чамаси меҳмонларга қараб турган экан!

— Ким бало экан?

— Коронгуда яхши ажратолмадим, тусини ғирашира анови қора Ҳомидга ўхшатдим. Тағин уми, бошқами, ҳудо билсин, шатир-шутир қилди-да, чиқиб кетди.

* * *

Қутидор меҳмонларни жўнатиб, ётиш учун ечинар экан, Офтоб ойим сўради:

— Чиройли йигит, ақлли йигит деб мақтай-мақтай Тўйбеканинг ичаги узилди, у ким эди?

— Меҳмонимиз ўша эди,— деди қутидор.— Тошкентлик Юсуфбек ҳожи отлиғ яқин ошнамнинг ўғли.

— Тўйбеканинг мақтаганича борми ўзи?

— Бор,— деди қутидор ва ҳавасланди,— ҳудо кишига ўғил берса, шундайини берсин-да.

Офтоб ойим кула-кула эрига Тўйбеканинг Отабек тўғрисида сўзлаган гапларини ва Кумуш билан бўлган можаросини сўзлаб чиқди. Қутидор ҳам кулгидан ўзини тўхтатолмас экан:

— Тентакнинг ақли бало, киройи куёвинг шундог бўлса,— деди.

6

ТОШКЕНТ УСТИДА ҚОНЛИ БУЛУТЛАР

Бу кунларда Марғилонда шундай хабар чиқиб қолди: «Тошкент ҳокими бўлган Азизбек Қўқонга қарши бош кўтарган. Ҳон томонидан хирож¹ учун юборилган

¹ Хирож — солик.

девонбекларини ўлдирган!» Иккинчи кун бу хабар янада бошқача түн кийди: «Мусулмонқул Нормуҳаммад қушбегига беш минг сипоҳни қўшиб, Тошкент устига жўнатган!»

Бу хабарлар кўпчилик томонидан жуда оддий, ортиқча совуққонлик билан қарши олинди. Бу воқиага ҳеч ким ажабсинмади ва бунда фавқулоддалик кўрмади. Халқ бунга ҳақли эди, чунки бундай тинчсизликларни энди кўра-кўра жуда ҳам ўрганиб қолган, букун бўлмаса эртага ўзининг ботир бошисининг, офтобачисининг, хуллас, ким бўлса ҳам бекларидан бирининг шундай тинчсизлик чиқаришига «мумкин ва бўладиган иш» деб қарап эди. Аммо Отабек бу хабарга совуққонлик билан қарай олмас эди ва қарай олмади. Бу хабарни эшитар экан, ейиб тургани оғзида, ютгани бўғзида қолди: ўзининг очиқ кўзи, ўткир зеҳни орқали бундай ўзбошимчалик орқасидан мудҳиш, фалокатли манзаралар кўрар, халқини қўрқинч жар, тегсиз жаҳаннам ёқасида, йиқилиш олдида топар эди-да, сесканиб «ўзинг сақла, тангрим!» дер эди. Бу хабарни эшитгандан сўнг, гангид эсини йўқотди, яраси янгиланди.

Шундай қайгулар ичида бўкиб ўтирас экан, Ҳасанали қўлида бир мактуб билан ҳужрага кирди. Мактубни Отабекка узатиб — «Тошкентдан эмиш, отангиздан бўлса керак!» — деди. Отабек хатни очди: катта қогозда, йўғон қалам билан ёзилган узун бир мактуб эди. Ўқиди:

«Хувалбори... кўзимизнинг нури, белимизнинг қуввати, ҳаётимизнинг меваси ўғлимиз мулла Отабекка етиб маълум ва равшан бўлгайким, алҳамдуилло биз дуогўй падарингиз, муштипар онангиз ва яқин дўстларингиз мунда ҳақ таолонинг ҳифзи¹ ҳимоятида сиҳат ва саломат бўлиб, кўз нуримизнинг дуои жонини субҳи шом, балки оладдовом раббулоламидан рижо ва таманинго этмоқдамиз. Жаноб ҳақ бод фурсатларда, яқин ва саъид соатларда тўқис тугаллик бирлан дийдор кўришмакка насиб ва рўзи қилсан, омин ёраббаломин. Баъда² сўзимиз: ўғлим, Марғилонга сиҳат ва саломат етиш мактубингни олиб ҳақ таолога шукурлар қилдик. Бизнинг Тошкентдан аҳвол сўрасанг, балки

¹ Ҳифз — сақлаш, қўриқлаш.

² Баъд — сўнг, кейин.

Марғилонга ҳам эшилганадир, мунда Азизбек қандогдир бир кучга таяниб Қўқонга исёни этди. Хазина ҳисобияни олиш учун келган девонбекларини ўлдириб, ўрда дарбозасига осди, бунга қарши Қўқон ҳам тинч ётмаган бўлса керак, бу кун кировчидан¹ беш минг сипоҳ ила Нормуҳаммад қушбегини Тошкент устига юборилганлигини эшилтидик. Фуқаронинг тағин қандоғ кўргиликлари бор экан, ўғлим!

Кечагина қонли қиличини фуқаро устида юргизиб турган Азизбекка, унинг тиги зулми билан қора қонига белантган ўғлининг, отасининг, онасининг, оғасининг мазлум гавдаси тупроқ остида ҳали чириб битмай туриб, букун ҳалқ яна Азизбекка, ўша қонхўрга ўз қони билан ямин этди; Азизбекни то ўзининг бир томчи қони қолгунчалик ҳимоя қилмоққа онд ичди. Азизбекнинг буйруги билан кеча ўрда тегига барча Тошкент ҳалқи йиғилган, бу йигинда уламолар ҳам бор, фузало ҳам бор, хулоса шаҳарнинг ҳар бир синфидаи ҳам ҳозир эди. Азизбек ўрда қоровулхонасидан туриб фуқароға салом қилди. Азизбекнинг саломига мушарраф² бўлғувчиларнинг кўзларидан ёшлар оқмоқда эди. Ўглим, сен бир қадар оқ билан қорани ажратса оласан, ёзганиларимни диққат билан ўқи.

Азизбек ўрда дарбозасига осилган икки гавдани кўрсатиб сўради:

«— Фуқаро! Кўрасизми бу икки гуноҳкорни, нима учун бу жазога мустаҳиқ³ бўлдилар?»

Ҳалқ:

«— Билмаймиз, тақсир!»

Азизбекнинг ўзи жавоб берди:

«— Булар Мусулмон чўлоқни саркардаларидан, қипчоқларнинг йўлбошчиларидан ва қорачопонининг душманларидан бўлган икки тўнгизнинг гавдалари! Мен буларни сиз қорачопон фуқаром томонидан ўч учун ўлдиридим, сиз қорачопон оғайниларнинг қипчек қўлида шаҳид бўлган қариндошларингизнинг руҳларини шодлантирмоқ учун ўлдиридим! Ёки бу ҳаракатим адолатдан эмасми, фуқаро?»

Ҳалқ жавоб берди:

¹ Кировчи — Қурама билан Телов орасидаги қизлар.

² Мушарраф — шарафга эришиш.

³ Мустаҳиқ — муносиб, лойиқ.

«— Адолат! Хўп қилгансиз, тақсир! Қипчоқларнинг жазолари шундай бўлмоғи керак!»

Азизбек мақсадга кўчди:

«— Сиз қорачопонликларга холисона қилган бу хизматига қарши, албатта, қипчоқлар қасдимга тушарлар, мени Тошкент ҳокимлигидан азл¹ этмоқчи ва қўлларидан келса, ҳатто ўлдирмоқчи бўлурлар! Сиз бу эҳтимолга қандоғ қарайсизлар?»

Халқ ўзининг қуйндаги жавоби билан кўкни кўтарди:

«— Бир томчи қонимиз қолгунча йўлингизда жон берамиз! Қипчоқларда ҳад бўлгаймики, биз тирик турган жойда сизнинг бир тола мўйингизни хам қилсинлар!»

Азизбек халққа ташаккур айтиб, ярасини ёрди:

«— Раҳмат, фуқаро! Эшитаманки, қипчоқлар Нормуҳаммад қушбеги қўл остида Тошкент устига ҳаракат бошлаган эмишлар. Бунга қарши бизнинг ҳозирланишимиз керакми, йўқми, фуқаро?»

Халқ:

«— Керак, албатта керак, тақсир! Агар рухсат берсангиз бу кундан бошлаб қўргонларни тузата берамиз!»

Азизбек:

«— Раҳмат, фуқаро! Орқамда сизнингдек фуқаром турганди менга ҳеч бир қайгу йўқдир».

Халқ:

«— Сиз омон бўлиб осойиш ўлтирсангиз, қипчоққа йўл бермаймиз, тақсир! Қўргон тузатишга фотиҳа берингиз, тақсир!»

Азизбек фотиҳа берди. Халқ уруш ҳозирлигига киришди. Ана, ўғлим бизнинг халқнинг ҳолига йиглашни ҳам билмайсан, кулишини ҳам! Ҳар ҳолда Тошкент устига яна қонли булатлар чиқди, ишнинг охири нима билан тинчланар — бу бир худогагина маълумдир. Бошқа сўзлардан ҳам ортиқроқ эсингга шуни солиб ўтайки, сиёsat тўғриларида ўйланаброқ сўзла! Арзимаган сабаблар билан талаф бўлган жонларни ҳамиша кўз олдингда тут! Сен билан меним кўнгилларимиздаги яратгучигагина маълум бўлиб, аммо Фарғонада мени Азизбекнинг шеригидир, деб ўйлашлари ва сени бир фит-

¹ А зл — бўшатиш, мансабдан тушириш.

пачининг ўғли деб танишлари эҳтимолдан йироқ эмас-дир, шу жиҳатларни мулоҳаза қилиб оёғ бос! Бу тинчсизлик вақтида сен билан меним ҳаётимизнинг таҳлика остида бўлганлигини унумта! Шуни ҳам айтиб қўйяки, бу тинчсизлик босилмагунча Тошкентга келмаслигинг маслаҳатдир. Тошкент тинчлангандан кейин (агар саломат бўлсам) ўзим хабар юбораман. Мунда барча ёру дўст саломат, мендан Ҳасаналига салом айт! Аддои отанг Юсуфбек ҳожи. Тошкент 27 давл ойида, 1264 йилда ёзилди».

Отабек мактубни тугатиб, тушунмай ўтган жумларини қайтадан кўздан кечирар экан, Азизбек воқиаси устига келганда ихтиёrsиз «тулки» деб юборди.

«...босилмагунча Тошкентга келмаслигинг маслаҳатдир» — бу жумлани ўқиганда, — ундоғ бўлса сира «тинчимангиз!» — деди-да, ювошгина илжайиб қўйди...

МАЖБУРНИЯТ

Кўқондан ҳар кун деярли хабарлар келиб туради. «Кўқон сипоҳи томонидан Тошкент ўралди!» деган хабарга энди ўн беш кунлаб вақт ўтган эди. Аммо ҳануз — «Тошкент олинди!» деган гап йўқ эди.

Кечадан бери кишилар оғзида: «Нормухаммад қушбеги яралантган, Кўқон йигитидан бир ярим минги қирилган!» деган хабар юриб кетди. Чамаси Азизбек осонлик билан жон берадиган кўринмайдир.

Анови ярасининг устига Тошкент фожиаси келиб қўшилгач, Отабек тагин ҳам хаёлчанланган, тагин ҳам ҳомушлиги орттан эди. Ҳатто, баъзи кунлар ҳужрасидан ташқарига чиқмас, кишилар билан сўзлашмас, бошқача айтганда, кундан-кунга гўшанишинликка¹ яқинлашиб борар эди.

Букун эрталабки чойдан сўнг Ҳасанали кечаги фикрни чинлаб амалга оширмоқчи бўлди. Чунки Отабекдаги ўзгариш — кундан-кунга рангининг синиқиб бориши, ҳужрадан четга чиқмаслиги, ҳомушлиги ва бошқалар Ҳасаналини яхшигина кўрқувга солган, ўзи-

¹ Гўшанишинлиги — хилватда яшовчи дарвиш.

нинг фақат томошачигина бўлиб юришидан ризосизланган эди. Дуруст, у Отабекниң муҳаббатига воқиф бўлганидан бери бир дақиқа ҳам уни ўзининг кўз ўнидан узоқ тутмаган: маҳбубаси ким, кимниң қизи, бирор эбини қилса мумкинми? — Мана шунингдек масалаларни текшириб, билиб ҳам ўйлаб келган эди. Аммо бу тўғрида Отабекниң кўматига чинлаб бел боғлашдан уни баъзи эҳтимоллар тўхтатиб: «Отабек ёш, ёшлилар муҳаббати — учар қуш, балки, бугун-эрта унутиб ҳам юборар!» каби мулоҳазаларда бўлинган эди. Ниҳоят, Отабекдаги йўчанлик ва ўзгача ҳолларниң кундан-кунга кучайиб бориши Ҳасаналини ҳалиги мулоҳазадан воз кечдириб, бошқа йўсингларни қаратмоққа мажбур этди.

Гарчи унинг қарори бир нуқта устида тўхтаган бўлса ҳам, шу ҳолда тиниб турмай, яна юз турли бошқача йўсингларни ўйлади, минг турли хаёлларга бориб қайтди, аммо уларниң биттасини ҳам Отабек оғриғига эм деб топмади ва ниҳоят:

— Кўрай-чи, қадамим муборак бўлармикин,— деб қўйди.

Кечлиқ ошни ўтказгач, Ҳасанали ўз ҳужрасидан қийиниб чиқди-да, Отабек ёнига кирди. Отабек «Бобирнома»¹ мутолааси билан машғул эди. Баъзи бир эҳтимолларга қарши ўзининг ниятини билдирамай:

— Менда юмишингиз йўқми, бек? — деб сўради Ҳасанали.— Ҳаммомга бормоқчи эдим...

Отабек кўзини китобдан узмай жавоб берди:

— Юмишим йўқ, бораверингиз.

Ҳасанали чиқди. Қош қорайиб, қоронғу тушаёзган эди. Ҳаво булат, аччиқ ел тўрт томонга югурад, онда-сонда қор учқунларини қувлаб зириқтирас эди. Эрув вақтида ярим белдан лой кечишга тўғри келадиган кўчаларниң лойи қатқалоқланган, шунинг учун юргувчи қийналмас, аксинча олачалпоқ қор пағаларини босишдан вужудга келган оёқ остидаги «ғарч-ғурч» товушлари кишига бир турли кайф, мусиқавий енгиллик берар эдилар. Дўконлар ёпиқ бўлсалар ҳам чойхоналар очиқ, кишилар ўртага гулхан солиб чойхонаниң баччасини гоҳи ўзларига хон кўтариб ва гоҳи «хон қизи» деб ҳам қўядирлар. Хон сайлагувчилар ора-

¹ Заҳариiddин Муҳаммад Бобир асари.

сида ёш йигитлар бор бўлганидек, катта саллали мулланемолар, етмиш ёшлик кексалар ҳам кўринадилар. Ҳиш кечалари жуда узун, шунинг учун чойхоналар обод...

Ҳасанали Зиё шоҳичининг ташқарисига келиб кирди-да, меҳмонхона даричасига қаради. Дарича тирқишидан кўрилган ёруғлик меҳмонхонада киши борлигини билдирав эди. Ҳасанали тузатиниб олди ва ичкарига кирди. Зиё шоҳичи номоз ўқимоқда бўлиб, меҳмонхона чет кишидан холи эди. Бу тасодифдан Ҳасанали севинди ва Зиё аканинг номозини битиришини кутиб ўтиреди. Зиё шоҳичи ёнига салом бериб, жойномоздан орқасига қараб қўйди. Фотиҳага қўл кўтарди. Фотиҳадан сўнг, келиб Ҳасанали билан сўрашди:

— Келинг, ота, тинчликми?

— Шукур, тинчлик.

Танча теварагига ўтиришдилар. Бирмунча вақт сўзиз эдилар. Зиё шоҳичи бу вақтсиз ташрифга тушуна олмай, «нима қилиб юрасан» дегандек, бир неча қайта Ҳасаналига қараб олди.

— Ажабланмангиз, бой ака, келишимда бир мажбурият бор.

— Сизни Отабек юбордими?

— Йўқ, ўзим келдим, бой ака.

Зиё шоҳичи яна тушуна олмади. Тўғриси ҳам Ҳасаналининг бу келиши Зиё ака учун ёт бир иш эди. Чунки Ҳасанали Отабекнинг қули. Қуллар билан жиддий муомалада бўлмоқ айниқса, Зиё шоҳичилардек одамларга фавқулодда бир иш. Бунинг устига мажбурият остида ўзича келиши.

Зиё аканинг боши қотиб охирида сўради:

— Мажбуриятингиз?

Ҳасанали кулимсираф олди:

— Мажбуриятимни эшитсангиз, балки ишонмассиз.

— Хўш.

— Ўзингизга маълумки,— деди тузукланиб Ҳасанали,— Маргилон келганимизга йигирма беш, бир ойлар чамаси фурсат ўтди. Шундан бери Отабек дардманд.

Зиё ака ажабланган эди:

— Қандай дардманлик, Отабек соғ-ку?!

— Тўғри айтасиз! -- деди Ҳасанали.— Аммо мен ҳам унинг дардига бир неча кунлаб тушунмай юрган эдим.

- Хўш, дарди?
- Мұҳаббат!
- Мұҳаббат?!

— Мұҳаббат! — деб тақрорлади Ҳасанали. — Шу ийигирма беш кунлик бир муддатнинг ичида у бутунлай одамгарчиликдан чиқаёзди. Бу ўртада қандай ташвишларга тушмадим, сўрасангиз.

— Кимга мұҳаббат қўйган, хабарингиз бўлдими?
— Бўлди... Қутидорнинг қизига!
— Ҳа-а! — деб юборди Зиё ака ва бир оз ўйлагандан кейин сўради.— Буни сиз аниқ биласизми?

- Аниқ биламан.
- Ўзи айтдими?
- Ўзи айтмаса ҳам шунга яқинлаштириди.
- Отабек қизни қаерда кўрган?
- Афсуски, буни била олмадим!

Ҳасаналининг келиши мажбурияти ва нима учун келганлиги Зиё акага яхши англашилди эрса-да, яна сўради:

- Энди нима қилмоқчисиз?

— Ҳузурингизга келишимнинг бош сабаби ҳам шундадир! — деди Ҳасанали.— Бу тўғрида сиз қандай йўллар кўрсатасиз ва нима кенгашлар берасиз, албатта, шунга қараб бир иш қиласиз, деб хизматингизга келдим.

Зиё ака ўйлаб қолди. «Қизиқ гап» деб бир-икки қайта нос отиб олди. Бу орада Ҳасанали бошдан-оёқ ҳикояни сўзлаб чиқди.

— Нозик гап,— деди охирда Зиё ака.— Агар биз Отабекни бу ердан уйлантириб қўйсак, ҳожи биздан хафа бўлмасмикин?

— Кўп яшанг, бой ака! Қулингиз ҳам бу тўғрида кўп ўйлади. Хафа бўлса нима чораким биз шу ишга мажбур бўлган бўлсан. Шунинг билан бирга Юсуфбек ҳожи ҳам унчалик ақлсиз кишилардан эмаски, бу гапга хафа бўлса. Аммо мен қутидор кўнадими, йўқми, деб бу томонни ўйлаб турибман.

- Зиё ака яна ўйланиб бош қашиди.

— Айтганингиздек масаланинг бу тарафи ҳам нозик,— деди.— Аммо, қутидорнинг Отабекка қарашини яхши билсан ҳам, ўртада йироғлик масаласи бор... Қизимни мусоғирга бермайман деб қўярмикин, билмадим...

— Менимча, қутидорнинг олдидан бир йўли ўтилсин! — деди Ҳасанали.— Агарда кўниб хўп деса-ку жайр, кўнимаган тақдирда бу хабарни Отабекка еткизсан, зора шунинг билан кўнгли совуб тушса.

Ҳасаналининг бу сўзи Зиё акага ҳам маъқул бўлиб тушди:

— Бўлмаса, қутидорникига қачон борилсин, дейсиз?

— Бундаги ихтиёр сиздадир.

Зиё ака ўйлаб турди да юзига кулги чиқарди:

— Ҳозир борамиз! — деди.— Биз ҳам умрда бир совчилик қиласлий.

Зиё ака кийиниш учун қўзғалган эди, Ҳасанали ундан сўради:

— Меним ҳам бирга борганим маъқулми, ёки ёлғиз ўзингиз?

Зиё ака қўл силкиб:

— Сизнинг боришингиздан зарар йўқ,— деди.

8

ҚУТЛАУГ БЎЛСИН

...Зиё шоҳичининг кулиб айтган сўзларига қутидор сира ҳам тушунмас ва кутилмаган меҳмонларнинг келиш сабабини сўрамоқдан ийманар эди.

— Оловни қўя туриб, қудаларга дастурхон олиб чиқингиз!

Зиё шоҳичининг бу кулгилигидан сўнг қугидор танчага олов қалашни қўйиб, дастурхон буюриш учун ичкалига қўзгалди. Унинг кетидан Ҳасанали «тақдир битган бўлсин-да» деб қўйган эди, Зиё шоҳичи қатъий қилиб, «иншоолло битар, шундоғ йигитни куёвликка қабул қилмаган бир кишини биз одамга санамаймиз!» деди.

Қутидор қайтиб чиқди... Зиё ака билан Ҳасанали маъноли қилиб бир-бирларига қарашиб олмоқда эдилар. Қутидор айниқса Зиё аканинг оғзини пойлаб, кўнгли чақирилмаган меҳмонлардан тушунмоғи қийин бўлган бир маънони сезмоқда эди. Орадаги сўzsизлик узоқча чўзила бергач, қутидор Ҳасаналидан сўради:

— Бек саломатми?

Зиё ака сўз ўнқови келганини пайқаб, Ҳасаналини жим туришга ишорат қилди ва ўзи жавоб берди:

— Бизнинг сизга чақирилмаган меҳмон бўлишимиз ҳам Отабекнинг соғлиги учундир.

Қутидор бу жавобдан бир нарса тушунолмади ва шунинг учун қайталаб сўради:

— Отабек соғми?

— Бу кунгача Отабек саломат,— деди Зиё ака салмоқлаб,— аммо бекнинг мундан кейинги соғлиги сизнинг қўлингизда қолганга ўхшайдир.

Қутидор яна тушунолмай таажжуб билан меҳмонларга қараб олди.

— Тушунолмадим...

— Яъни Отабек бу кунгача саломат! — деди Зиё ака яна.— Аммо мундан кейинги соғлиги сизнинг қўлингизда.

— Меним қўлимда?

— Сизнинг ихтиёрингизда!

— Отабек каби бир йигитнинг соғлиги ҳар бир аклии киши учун мақсад бўлса ҳам,— деди таажжуб билан қутидор,— лекин сўзингизнинг шуниси қизиқдирким, бир йигитнинг соғлиғи иккинчи бир кишининг ихтиёрида бўлсин!

Зиё ака бояти вазиятини бузмади:

— Ажабланмангиз, ўртоқ! — деди.— Бекнинг мундан кейинги соғлиги сизнинг ихтиёрингизда, бу ўйин эмас, тўғри гап.

Кутидор тўсиндан муддасонинг ким ва нима тўғрисида бўлганлигини пайқаб қолди ва ўзида бир турли ўнгайсизлик сезди. Зиё ака Тўйбеканинг ёзган дастурхини тузатиб, кулчаларни синдириди. Ҳасанали билан қутидорни нонга таклиф қилиб, ўзи мақсадни очиқроқ англатмоқчи бўлди:

— Мұҳаббат деган нарса жуда оз кишиларга насиб бўладиган бир дурри бебаҳодир,— деди Зиё ака.— Қадрдонингиз Юсуфбек ҳожининг ўғли Отабек бир неча кунлардан бўён бениҳоя бир дард билан оғир эди. Кўринишда унинг қули, аммо ҳақиқатда Отабекнинг маънавий падари бўлган Ҳасанали ота унинг маҳфий дардининг асли омилини излайдир, бекнинг ўзи бўлса ўз ҳоли тўғрисида ҳеч нарса сездирмай дардини яширадир. Шундоқ қилиб, хўжасига ихлосли Ҳасаналининг тажрибали кузатишидан бекнинг маҳфий дарди узоққа қочолмай, натижада сир очилади... Шариат ишига шарм йўқ, дейдилар, ўртоқ, агарчи сиз

били менга бирмунча оғирроқ бўлса ҳам яна сўзлаб ўтишга ҳожат бор: кунлардан бир кун тақдир шамоли юрадир-да, бир кимсанинг юзидағи иффат пардаси остида ўтирган қизининг юзибони кўтариб, иккинчи томондан бизнинг Отабекни шу афиғага¹ рўбарў қиладир. Шу дақиқадан бошлаб бекда у афиғага қарши бир ишқ, ҳам чин бир ишқ туғиладир...

Зиё шоҳичи ўз томонидан ҳам яна бирмунча гапларни қўшиб-чатиб сўзини тутатди. Қутидор яхшигина ўнғайсизланган эди. Қутидоргина эмас, совчилар ҳам ўнғайсизланган эдилар. Масаланинг нозиклигига уччовлари ҳам тушунарди ва шунинг учун иттифоқ қилгандек чуқур бир сукутга кетган эдилар.

Гарчи муддао кун каби ошкора бўлган бўлса ҳам, нимес учундир қутидор яна ўзини тағофилга солиб сўради:

— У кимнинг қизи эмиш?

Зиё шоҳичи қутидор тарафидан ўзига бериладиган шу саволни кутиб турган эди.

— Сизнинг каримангиз,— деди.

Қутидор ўзининг жойсиз саволидан ўкиниб ерга қаради. Ўртада тагин сўзсизлик, ўнғайсизлик бошланди. Бир неча фурсат шу йўсин жимгина ўтиришгандан кейин яна Зиё шоҳичининг ўзига гапиришга тўғри келди:

— Биз ўзимизнинг бу келишимизда сизнинг учун дунёга арзигулик бир ўғил ҳадя этганимиздек, иншоолло қайтишимизда ҳам Отабек учун мужассамий иффат бўлган бир рафиқа тухфа қилармиз.

Бу сўздан кейин Ҳасаналининг юраги безиллай бошлади. Чунки, шу дақиқада қутидор оғзидан ё рад, ё қабул жавоби эшитар эди. Иккинчи томондан, кутилмаган бу совчиликка ишонишни-да, ишонмасни-да билмай шошиб ўтирган қутидор ҳам ўзининг оғзига тикилиб турувчи икки кишига қандай жавоб айтиш учун гарансинган эди.

— Отабек каби бир йигитни ўғил қилиш шарафига ноил бўла олсам, ўзимни энг баҳтли оталардан санар эдим,— деди ниҳоят қутидор,— аммо бу тўғридаги ҳамма ихтиёр ўз қўлимда бўлмай, орада кўкрак сути бериб ўтирган хотин ҳам бор... Бу иш учун ёлгиз

¹ Афиға — покиза қаз.

ўзим қабул жавоби берсам-да, онаси бир чеккада қолдирилса, эҳтимол пухта иш қилмаган бўлармиз. Агар маслаҳат кўрсаларингиз, бу тўғрида унинг билан кенгашиб кўрар эдим.

Қутидорнинг жавобидан самимият ва ихлос маънолари томиб турар эди. Жавобни эшитган совчиларнинг томирига умид қонлари югуриб кетди.

— Бу от савдоси эмас, умр савдоси бўлади! — деди Зиё ака. — Янгамиз билан кенгашингиз, Отабек ва отаси тўғриларида билганларингизни сўзлангиз, шундан кейин хўп ўйлашиб бизга жавоб берингиз.

Шу гапдан кейин қутидор меҳмонларни қолдириб ичкарига кирди. Кумушбиби ухлашга ётаётган эди. Тўйбека бўлса ўзининг ўчоқ боши ёнидаги уйчасини титратиб хуррак отар эди. Қутидор уй эшигини очар экан, айвонда ўзини кутиб ўтирган Офтоб ойимга деди:

— Шамни олиб кирчи олдимга.

Уй жиҳозга ғоятда бой, гўё музохона тусини берар эди. Тахмонда турли рангда атлас ва шойилардан қопланган кўрпалар, тахмон токчаларига уйилган пар ёстиқлар, қатор-қатор хитойи жононлар, косалар, кўзалар, чинни чой идишлар, лаганлар, кумуш қинли ханжар ва қиличлар, қолқон ва сипарлар, дорга солинган турли-турли эр ва хотин кийимлари: пўстин, чакмон ва бошқалар, қип-қизил гилам ва шойи кўрпачалар киши кўзини қамаштирар даражада эдилар.

Ошиқиб оғзини пойлаган Офтоб ойимга бир илжайиб қўйди-да:

— Хотин, сен ҳали эшиқдаги совчилардан ҳабар сиздирсан? — деди.

Офтоб ойим эрининг «совчи» хабарини оддийгина қаршилади, чунки энди икки-уч йилдан бери уйларига кун сайин совчилар жамоаси ёғилиб ётганликдан, бу совчилар ҳам ўшаларнинг бирисидир, деб ўйлаган эди.

— Хайрли бўлсин, кимлар совчи?

Қутидор яна бир кулиб қўйди:

— Зиё шоҳичи, тагин сенга номаълум бир киши.

Офтоб ойим бу кунги совчиларнинг қутидорга бошқачароқ ўзгариш берганларини пайқади ва буни эрининг самимият ҳам ошиқишидан сезди:

— Ким учун келганлар?

— Бундан ўн беш кунлар илгари биз бир тошкент-

лик савдогар йигитни меҳмон қилган эдик, балки эснингадир?

— Эсимда бор, Тўйбека мақтаб кирган йигит.

— Ўлма, хотин,— деди қутидор,— ана шу йигит учун келгандар! — Бу сўздан Офтоб ойим безонглаб тушди ва эрига қарши ризосизлик вазиятини олди:

— Мусофирик-ку?

Офтоб ойимнинг бу сўзи билан қутидор бош қашиб олди ва умидсиз бир товушда:

— Мен ҳам шунисига ҳайрон бўлиб қолдим! — деди. — Йўқса, ўзи айни биз қидирган, ҳар тўғрида ҳам етук бир йигит эди.

Офтоб ойим бошқа хотинларимиздек эрининг раъий ва хоҳишини, умуман, бутун шахсини эҳтиром қилувчи бир хотиндири. Шунинг учун эрининг ҳозирги раъини гарчи ўз тилагига бус-бутун зид топса ҳам, ёлғиз «мусофирик» масаласи билангина гапга хотима бермай, бошқа тарафлардан ҳам камчиликлар топиб, асосли суратда қутидорнинг Отабекка томон ҳарорат-лангаёзган юрагига сув сепмоқчи бўлди:

— Ўзи қандай кишининг ўғли, отаси сизга танишми?

Офтоб ойимнинг бу саволи ўзи учун заарли бўлиб чиқди. Чунки қутидор, Юсуфбек ҳожининг қандай киши бўлганлигини, бу кунда қайси ишда эканлигини ва ўзига бўлган муносабатини майда-чуйда тафсилотлари билан сўзлаб чиқиб, сўзи охирида:

— Йигитнинг наслини айбситиб бўлмайдир, тўғрисига кўчгандা, бу йигит наслан биздан аллақанча юқорида турадир! -- деб қўйди.

Офтоб ойим энди иккинчи турли йўл билан кетди:

— Уйланганми, йўқми?

— Уйланмаган. Буни қайсибир бир мажлисда унинг қулидан эшитган эдим.

— Ёши нечаларда бор?

— Кўп бўлса йигирма беш ёшларда бўлур, бўлмаса йигирма икки, йигирма учлардан ошган эмас.

— Нима мажбуриятда бизга куёв бўлмоқчи, Тошкентдан қиз топилмаганми?

— Топилса ҳам ёқтирмас экан,— деди қутидор ва ўнгайсиз ҳолатда воқиани шипшитиб чиқди. Масаланинг бу янглиғ бошланишига ва бунинг устига эрининг мойилланишига Офтоб ойим нима дейишни билмай

қолди. Тузук, эрининг майлини анчагина далил ва сабабларга суюниб бўлган бир майл эканини англаган, куёв бўладиган йигитни ўзларига ўғилликка лойиқ бир кимса эканини ҳам яхши тушунган эди, аммо ҳозир бу гаплардан ҳам илгарироқда «мусофирик» масаласи турад; бир неча йиллардан бери мувофиқ куёв излай-излай ниҳоят тошкентлик бир мусофирига бериши хўрлиги Офтоб ойим учун оғир эди.

— Энди қандай кенгаш берасан, хотин?

Офтоб ойим ўз фикрини очиқ айтишга юраксина олмас, эрининг кўнглини олнишидан қўрқар, аммо «мусофирик» масаласига жону дилдан қарши эди.

— Сиз мувофиқ кўрган бир ишга қарши тушиб, раъйнингизни қайтаролмайман,— деди кўп ўйлагандан кейин Офтоб ойим,— чунки нима бўлганда ҳам сизнинг оталик исмингиз бор, ҳам кўпроқ ихтиёр сизнинг қўлингизда. Мен албатта кўзингизнинг оку қораси бўлган ёлгиз қизингизни ярамас, бўлмағур кишига тутиб берарсиз, деб билмайман. Бу жиҳат билан бу ишга ризолигим билинса ҳам, бироқ қаршилигим шундадирки, куёв тошкентлик бўлгандан сўнг қизингизни ўзи билан бирга олиб кетар ва сиз билан мени ёлгиз боламиздан айирап... Бунга қолганда сизни билмасамда, аммо менинг бундай жудоликка сира тоқатим йўқдир. Мана шу тарафни енгилроқ ўйлаганга ўхшадингиз, жоним.

— Сўзларинг тўғри, хотин,— деди ўйлаб қутидор,— лекин тақдир битганданми, нимадан бўлса ҳам бу йигитга қарши кўнглим жизиллаб турадир. Бу фикрим сенга маъқул тушадими, йўқми, ҳар ҳолда энди узоқ ўлашиб ўтирмалийк-да, ўз хоҳишимиизча қилиб жавоб берайлик масалан, совчиларга ризолигимизни билдириб, аммо Кумушни Марғилондан олиб кетмасликни шарт қиласлийк. Агар шартимизни қабул қиласлар, ёлгиз боламиз икки бўлиб — айни бизнинг муддомиз, йўқ, қабул қиласалар, у вақтда гиналари ўзларидан бўлсин. Мана бу маслаҳатга нима дейсан, хотин?

— Мусофирилиги?

— Биз таънани куёв қилмаймиз,— деди қутидор.— Бизга чин йигит керак, халқ «мусофирига берди» деб сўз қиласа қиласин!

Офтоб ойим эридаги майдани бошдаёқ пайқатан эди, шунинг учун тилар-тиламас «ўзингиз биласиз» жа-

вобини берди. Жавобни олиб қутидор совчилар ғлдига чиқди ва маълум шартни уларга эълон қилди. Бу шартни Отабек исмидан Зиё шоҳичи қабул этиб, қутидорни Отабекдек бир йигитни куёв қилиш билан табриклиди ва шу такаллуфсиз совчилик ила умр савдоси битган ҳисобланди. Икки ёшнинг мухаббатли, ували-жуvalи бўлишларига дуо қилингач, совчиларга заррин тўнлар кийдирилди. Ҳасанали қутидорга ўзининг миннатдор-чилигини айтиб тугата олмас, сўз ораларида уни дуолар, билан ғарқ этмақда эди.

— Тўнлар муборак бўлсин!

— Сизга куёв ўгил муборак бўлсин!

Қутидор ихлос ва самимият билан:

— Қутлуғ бўлсин! — деди.

9

ҚАРШИЛАШ

Буқунги кутилмаган тун Ҳасанали отани гангитган, унинг кекса кўзлари уйқу билан тамом чаплашиб олган эдилар. У бу хабарни эртага эрталаб қайси йўсин билан бекка билдириш йўлларини ўйлар эди. Бу фавқулодда севинч хабарни бекнинг қайси йўсинда қаршилашини ўйлар эди. Бу хабарни эшитиш билан Отабекда кўриладиган ўзгаришларни, ҳолларни, ҳаракатларни... барчасини бирма-бир кўнглидан кечирар эди. Бу гапни эшитгач, ҳафталаб ҳужра ичидан чиқмай ётган, бекни кўчаларда, бозорларда, қутидор уйларида шодланиб, руҳланиб юрганини кўрар эди. Бу ўйларни тугатгандан кейин унинг кўзлари уйқусирай, юмила бошлаб, қаршисига Отабек келиб тўхтар эди. «Ота, мен сизкинг бу қилган яхшилигингизни сира унутмасман!» деб миннатдорлик қилгандек бўлар эди. Ҳасанали уйгониб кетар ва қайтадан шу тўғрида ўйлай бошлар эди. «Бечора! Севганинг тўғрисида ўйлай-ўйлай бошларинг оғриб, оҳлар тортиб ётадигандирсан... Ёрдамчинг йўқлигидан умидинг кесилиб, ҳасратингни кимга айтишни билмайдигандирсан! Қайғурма, бегим! Ҳасанали отанг бу тўғрида ҳам сени ёдидан чиқармади... Бу кеча сенинг қайгули кечаларингнинг энг кейингиси ва ойдинли ҳам шеъриятли тунларингнинг арафасидир. Бегим!»

Ҳасаналининг кўзлари тагин уйқуга кетар, қарши-

сига Отабек билан кўҳли, кўркам бир қиз келиб чиқар ва иккиси унга қараб илжайишар эдилар. «Бизнинг чин отамизсиз!» дегандек бўлар эдилар. Ҳасаналининг яна уйқуси қочар эди.

— Ёшим олтмиш тўртга етди, ўғлим-қизим бўлмади... Дунёдан чароғчисиз бораман... Дарвоҷе Отабек менга ўғиллик қилмасми, хотини менга қиз бўлмасми, уларнинг болалари мени «бобо» деб кетимдан югурмасмиканлар? Тупроқ осталарида унутилиб ётган кезларимда — «бир вақт Ҳасанали отамиз ҳам бор эди» деб ёдласалар, яхшилик билан эсласалар етар менга шу.

Тунлар узок, тонгни отдириб, Отабекни қувонтиришгача сабр ҷидамас, кўз юмишга ҳалигидек хәёллар моне бўлар эдилар. Шу йўсин ярим уйқу ҳолатда тонгни отдириб, севинтириш соатлари ҳам етди...

Чойдан кейин хужрасига чиқиб кетган Ҳасанали қўлтиғида бир нарса билан кириб бек қарисига ўтириди. Отабекдаги сукут, хаёл, фикр каби ҳолатларни юлиб-юлқиб олиб, улар ўрнига чечак доналари экиб, умид сувлари сепмоқчи бўлган Ҳасанали:

— Энди муборак бўлсин, сизга,— деди.

Отабек тушунолмай Ҳасаналига қаради. Ҳасанали илжайган куйи қўлтиғидаги заррин чопонни олиб сандал устига қўйди.

— Бу қандай чопон? — деб сўради бек.

— Муборак бўлсин, дедим-ку!

— Нима муборак бўлсин?!

— Сизга иффатли ва севимли рафиқа билан қутидордек қайната, Ҳасаналига келин.

Отабек қизиқ ҳолатда қолди: бир турли титраб кетди, кўзлари қиндан чиқар даражага етди. Файри ихтиёрий қўзғалиб ўтиргандан кейин сўради:

— Бу нима деган сўзингиз?

— Нима деганимни сўрамангиз ва деганимга ишона берингиз! — деди кулиб Ҳасанали.— Мен сизни қутидорнинг қизига уйлантиришга қарор қилиб, қарорими ҳам букун кечаси Зиё шоҳичи билан амалга оширедим... Яъни қутидорнинг қизига сизнинг учун унашиб келдик.

Отабек гангигб, шошиб сўради:

— Қайси қизига унашиб келдингиз?

— Қутидорнинг ёлғиз қизига! — деди Ҳасанали.— Бундан хотиржам бўлингиз, бек! Зиё шоҳичи эрталаб-

ки чойни ичиб борарман деган эди, биз унинг билан ҳали тўй кенгашларини қиласиз.

Отабекнинг тузида хурсанд ва хафалиги мажхул бир ҳолат бор эди. Унашиши масаласига қарши тушмаганидек, севинчини ҳам ошкор қилмади...

* * *

Кумушбиби уйқудан туриб, фавқулодда бир ҳолга учрайди: бир кечада ҳамманинг тушига «тўй» кириб чиқкан.

Тўй учун янги кўрпалар қопламоқчи бўладилар, пар тўшаклар олмоқчи бўладилар, куёв учун қандай кийим ярашмоги ҳам баҳс қилинар, Офтоб сийм эрига олтин камар олмоқقا буюрадир... Тавба, демай чора йўқ: Офтоб ойимлариниң куёвлари ким, қайси қизларини эрга берадилар, уларнинг Кумушдан ҳам бошқа қизлари борми? Уларнинг қизлари ёлгиз, демак, Кумуш эрга бериладир... Тушунарли гап эмас:

- Эрга ким тегадир?
- Кумуш!
- Кумушбиби куёвни ёқтирадими, йўқми? Бу тўғрида унинг фикрини билиш керакми, эмасми?
- Сўзлашиб ҳам керак эмас, билдириш ҳам.
- Нега?
- Чунки одат шул? Кумуш ота-она ёқтирган кишига рози бўлиш учун мажбур.

Кумушбиби куёвнинг ким бўлганлигини Тўйбеканинг шу сўзларидан сўнг пайқаб олди:

— Мана, бекачим,— деди кулиб Тўйбека,— Тўйбека опангни сен ҳеч нарсага санамайсан. Бироқ унинг нафси ламирда каромати бор! Опанг бир нарсани тилига ва ё кўнглига олдими, дарров фаришталар «омин!» дейдилар. Анови кунги ёш меҳмонни сенга мақтасам аччиғландинг, аммо келиб-келиб букун сени ўшанга бердилар... Энди бундан кейин Тўйбека опангга ихлос қўй, бекачим!

Бу хабарни эшитувчи — Кумушбибининг қора кўзлари жиқ ёшга тўлиб, киприклари ёш билан беландилар.

— Йиғлама, бекачим,— деди Тўйбека,— биз биламиз сизнинг кўз ёшларингизнинг нимага эканини, эрлар сеянганда кулсалар, сизга ўхшаш қизлар йиглайдилар, сизнинг йиғлаганингиз — қувонганингиз. Мени

эрга бергандарида сенга ўхшаш мен ҳам йиглаган эдим, аммо ичимда никоҳ кунининг тезроқ келишини кута-кута ўлган эдим.

— Тоқатим тугади, опа,— деди Кумуш,— ортиқ сўзламангиз!

— Сўзламайман,— деди Тўйбека,— лекин сирасини сўзлайман... Ох, кўрсанг эди, бир куёвни! Қандай чиройли, қандай ақлли эканини билар эдинг, бекачим! Юлдузингиз наҳ бир-бирингизга тўғри тушган экан, иккингизнинг ҳам бир-бировингиздан камлитингиз ўйқ!

Кумушбиби ортиқ чидолмадими, қўрқинч бир товуш билан ҳайқирди:

— Ох, ўламан, кўп сўзлама!

Кумушнинг бу товушига Офтоб ойим билан Ойша кампир уйдан югуришиб чиқдилар:

— Нима бўлди, нима бўлди?

Кумушбиби онаси билан бувисининг уйдан чиқишлиари ила бошини сандалнинг кўрпасига буркаб, ётиб олди. Тўйбека жуда қўрқсанг эди:

— Қаллиғи тўғрисида сўз очган эдим, мен билан уришди.

Офтоб ойим Тўйбекани қарғаб берди:

— Сен ақлсиз ўлгур, Кумушни уялтиргансан! Тинч юрсанг, сени бирор бир нима қиладими? Бор, ишингта бор!

Оналар Кумушнинг бу ҳайқиригини уялганга йўйдилар-да, уйга кириб бисот кавлашга, тўй ҳозирлигини кўришга машғул бўлдилар.

Кумушбиби бир неча фурсатгача шу куйи буркануб ётди. Сўнгра ўрнидан туриб, ташқари ҳовлига қараб кетди. Кўп йиглаганиликдан кўзлари қизарган, қовоқлари шишиган, юзлари бўртган эди. Аммо бу ўзгаришлар унинг ҳуснини, латофатини бир зарра ҳам камитмади, балки ўн қайта оширган эдилар. Ташқарига чиққандан кейин айвоннинг тумшуғига келиб ўтириди ва ўнг қўлининг кафтига юзини олиб фикрга толди. Шу ҳолда узоқ қолди. Шундан кейин у қўлини юзидан бўшатди-да, энтикиб дам олди ва кимнидир излагандек теварагига қараб қўйди...

Ариқ бўйи, сирли ариқ бўйи!

Ёшли кўзлар ариқ бўйига тушиб, нозик оёқлар ариқ бўйи томонга ҳаракатландилар. У ариқ бўйига етгац, маълум ўринга сакраб ўтди-да, чўнқайди. Бир

ховуч сув олиб юзидан тўкиб туширди ва оҳистагина йўлак томонга қараб олгандан кейин, сувнинг оқишига кўзини тикди. Кумушнинг дардини ҳеч ким билмас, унинг хаёлига ҳеч ким тушунмас, магар шу ариқ бўйи тушунгандек, билгандек... Сирли ариқ бўйи унга нималарнидир сўзлар, ундан нималарнидир тинглар, бунга четдан ҳеч ким воқиғ бўла олмайдир-да, бўлмоғи ҳам мумкин эмас.

Кўзларидан оққан марварид томчиларини шу сирли ариқ суви билан ювди, бир мартабагина ювди эмас — қайталаб, қайталаб ювди. Бояги аччиғидан бирмунча тинчланиб, кўз қизилликлари кетган ҳолда битта-битта босиб ичкарига қайтди.

10

ТЎЙ, ҚИЗЛАР МАЖЛИСИ

Кутидорнинг ташқарисига эр меҳмонлар, ичкарисаiga хотин меҳмонлар тўлғанлар, улар қуюқ-суюқ ошлар, ҳолва, нишолдалар билан иззатланадилар. Ташқарида бир қўша соғандалар дутор, танбур, ғижжак, рубоб, най ва амсоли созлар билан дунёга жон суви сепиб,— шаҳарнинг машҳур ҳофизлари ашула айтадилар. Тўй жуда ҳам руҳли...

Ичкарида хотинлар мажлиси: оналарча айтганда улар қум-тупроқдек кўп, бироқ мажлиснинг боришида тартиб йўқ, ҳовли юзи ва уйлар хотинлар билан тўлған, қайси ҳовли юзида бир товоқ ошни еб ўтиради, ким йиғлаган боласини овутиш билан овора, бирор ёр-ёр ўқиб, тағин биттасининг қувончи ичига сигмай хахолаб дунёни бузади, хуллас, бағ-буғ етти қат кўкдан ошади...

Офтоб ойим қайгулироқ, туси бир оз синиққансимон... Меҳмон кутиб чарчаганиданми, нимадан бўлса ҳам жуда қалавлаган; баъзан қиласидиган ишидан ҳам янгишиб кетгани, масалан, уйга кирмоқчи бўлиб таванхонага кириб қолгани кўрилади. Тўйга келган хотинларнинг: «Тўйлар муборак, куёв ўғил муборак!» деб сўрашишларига ҳам ишончсиз бир оҳангда «қутлуғ бўлсин!» дер.

Офтоб ойим донхонанинг эшигидан туриб хотинлар орасидан кимнидир ўз ёнига чақирди. Ёши эллик-

дан ошган, кулгиси ичига тўлиб-тошган бир хотинни даврадан чиқиб, ўзига қараб юрганини кўргандан кейин донхонага кирди. Хотин ҳам ичгарига киргач, Офтоб ойим эшикни қия беклади-да, қайгули бир боқиши билан хотинга қаради.

— Нега қайгули кўринасан, Офтоб?

Офтоб ойим узоқ тин олиб эшикка қаради ва ярим товуш билан:

— Шу чоғда ичимга чироғ ёқсалар ҳам ёримайдир-да, эгачи! — деди ва кўзига жиқ ёш одди.

— Нега?

— Қизим тўғрисидан...

— Қизингга нима бўлди?

— Унашилганига бугун еттинчи кун,— деди Офтоб ойим,— шундан бери Кумушингиз тун ҳам йиглади, кун ҳам; сабабини сўрасам, сира жавоб бермайдир-да, дўлонадек кўз ёшисини оқиза беради. Букун тағин йигиси ошиб тушди. Ҳайтовур ялиниб, ёлпоғланиб аранг ҳаммомга юбордик.

Хотин, Офтоб ойимнинг бу гапидан ҳайрон бўлди ва ўйлаб сўради:

— Нима бало, куёвинг кўрксизми?

— Ўзим кўрмадим,— деди Офтоб ойим,— аммо кўргувчиларнинг сўзларига қараганда, ўхшашсиз кўркам, тенгсиз ақлли бир йигит эмиш... Отасининг ўзи йигитни яхши кўриб куёв қилган эди!

— Кумушнинг ўзи йигит тўғрисида ҳеч нарса билмайдими?

— Биладир,— деди ойим,— унинг олдида биз жўрттага куёвни мақташамиз, лекин бу мақтовларни эшигуси келмай, қайтага йигисинигина орттиради!

Хотиннинг ҳам бу гапдан ҳайрати ортди ва бунда қандай сир борлигига ақли етмади. Офтоб ойимни юпатиш учун ўтган-кетгандан ва бошда йиглаб эрга теккан қизларнинг чимилдиқда йигит билан апоқ-чапоқ бўлишиб кетганларидан ҳикоя қилди:

— Қайғурма, Офтоб,— деди,— куёвинг бунчалик сулув бўлса, гап-сўзда тенги бўлмаса, ҳали чимилдиқда печак гулдек бўлиб эрига чирмашганини кўरармиз!

— Оҳ, опажон,— деди умидсизча ойим,— менинг бунга кўнглим чопмайдир!

— Чопсин, Офтоб! Мен бундай йиглоқ қизларнинг кўпини кўрдим, шундай қизларнинг уялмай, суюлмай

Чимилдиқда, ҳатто, йигитдан ҳам орттириб ҳаракат қилганларини ҳам кўрдим, сенинг қизинг ҳам шуларнинг биттаси, қайғурма, Офтоб!

— Илоҳи шундай бўлсин-да!

— Бўлади, бўлади,— деди кулиб хотин,— шошма-чи, Офтоб! Агар қизинг мен айтгандек ўзгариб кетса, менга нима берар эдинг?

— Сизга бош-оёқ кийим!

— Сўзингдан қайтма, Офтоб! Печак гулдек бўлиб эрига чирмаштанини кўрармиз, ҳали худо кўрсатса; бор, ўйнаб-кулиб меҳмонларингни кут!

Шундан кейин иккови донхонадан чиқиб, хотинлар орасига кирди.

* * *

Қизлар мажлиси — гуллар, лолалар, тўтилар, қумрилар мажлиси! Уйда, Кумушшибининг тоғасининг уйида, қизлар мажлиси, гуллар мажлиси!

Бу уйга ўттиз-қирқ чамалик қизлар йигилганлар, йигилишдан мақсад: қизлар ўзларининг энг латиф, энг гўзал бир аъзоларини букун хотинлик оламига узатмоқчиidlар. Бу узатиш мажлисини жонли, руҳли ўтказмоқ учун барча қизлар ўзларининг энг асл, энг нафис кийимларини кийиб, фавқулодда ясаниб ҳусн оламини яна бир қат, яна бир қайта бежабдирлар. Агар бу уйга кириб, бу мажлис аъзоларини бир марта-ба кўздан кечирсангиз, ҳозирданоқ айтиб қўйиш мумкини, албатта эсингиз чиқиб кетар:

Бу гулми кўҳлий йўқ наригиси? Ундан кўра буниси! Гарисидан ҳам ўттаси!.. Ана шундай қилиб эсдан ҳам а крарсиз, гул танлашда бир қарорга келолмай эл ичидага кулгига ҳам қолурсиз, расво ҳам бўлурсиз!

Мана, мажлис аъзолари шунағанги бир-бировидан ўтоқ малаклар, парилар эдилар, мажлиснинг шоираплари, ўйинчилари, чилдирма ва дуторчилари барчаси ҳам ҳозир бўлиб, фақат Кумушшибигина ҳаммомдан қайтмаган эди. Шунинг учун мажлис очилмаган, очилса ҳам руҳсизроқ, Кумуш келгач, мажлисга руҳ кигишига барча ишонади ва уни тўзимсизланиб кутадир.

Кимdir, орадан биттаси «келишди!» деб юборди. Барча қизлар уйнинг даричаси ёнига уймалашиб ҳовлига қарадилар. Чиндан ҳам у ёнида икки янтаси билан

лан келган эди. Шу чоқда бизга Отабек керак эди! Нега десангиз, у келсин эди-да, севганини бир кўрсинг эди: ҳаммом билан у... фақат жонгина сўрайдир, мажруҳ кўксалрга ўққина отадир... Бошдаги оқ шойи рўмол, ичдаги оқ шойи кўйлак, устидаги оқ кумуш заррин сирилган пўстин, бақбақаларни ўраб ўпиб турган ёқа қундузларининг келишгани, солиниб тушган қора жингалак соchlарнинг бўйин теварагига чирмашгани, нуқра юзларнинг буғриққани...

Янгалар Кумушни ҳовлидан туриб қизларга топширдилар:

— Мана Кумушбиби — сизларга, қизлар! Кумушнинг кўнглини яхшилаб очинглар, қизлар!

Икки-уч қиз чопиб ҳовлига тушдилар-да, Кумушбибидан паранжини олиб, уйга бошладилар. Янгалар Кумушни қизларга топшириб кетдилар. Ҳовли эр ва хотиндан бўш, ёлғиз қизларгагина хосланиб қолди.

Кумушбиби бошловчи қизлар билан уйга кирди, ундан тарапланган атирислири билан уй тўлди. Қизлар ўзларининг бир турлигина сўрашишлари билан Кумуш илиа кўриша бошладилар:

— Эсонмисиз, саруполар муборак?

Кумушбибининг қизларга берган жавоби эшитилар-эшитилмаслик эди:

— Кутлуғ...

Кумушбиби уйнинг тўрига ўтқазилди. Қизлар унинг теварагига ўтиришиб олгандан кейин, орага нима учундир бир жимжитлик кирди. Қизлар маъноли қилиб ер остидан Кумушга қарайдилар. Мажлисда бир хил маъюсият! Қизлар нимани ўйлайдилар ва нима тўғрисида маъюсланадилар, бу эса қизларнинг бизга номаълум бўлган ички сирлариdir.

Қизлар ипга чизилган гулдек уй теварагини олгандар, бунинг устига ёввошлиқ, ўйчанлик уларнинг тусларига маънавий бир ҳусн ва жиёддият бериб, бирга юз ҳусн қўшган эди. Агар биз шу кезда заршунослик учун енг шимарсак, яъни гулни — гулдан ажратадиган бўлсак боягилик эсанкираб, мутарафдид¹ қолмаймиз, чунки Кумушбиби лолалар ичдаги бир гул ва ё юлдузлар орасидаги тўлган ой эди.

Орада ҳамон бояги жимжитлик ҳукм сурар эди.

¹ Мутарафдид — иккиланиш, тараддуланиш.

Ҳар бир мажлиснинг жонлантирувчи, идора қилувчи бир-икки қаҳрамони бор бўлганидек, бу, қизлар мажлиси ҳам шундай қаҳрамонлардан холи эмас эди. Мажлиснинг бунчалик руҳсизланиб, маъюсият ичидаги колишига Гулсинбиби чидаб туролмади:

— Биз нима учун йигилдик-да, нимага ер чизишиб ўтирамиз! — деди.— Биз бу ерга аза очгали келдикми?

Гулсиннинг ёнига Хонимбиби қўшилишиди:

— Кўп ўйлашманг, ўртоқлар! Барibir бу гап ҳам мамизнинг бошимизда бор! Тур, Савра! Ховлиға олов ёқиб чилдирманнин қизит! Аноргул, сен дуторингни ол! Кумушбиби, сиз унча хаёл сурманг, кулиб ўтиринг. Барibir эртага жойсиз чеккан қайғунгиздан ўқинарсиз! — деди-да, мажлисни ост-уст қилиб юборди. Кумушбиби ҳам ихтиёри, ихтиёrsиз бу кулгиликка тортилиб, унинг ёввошгина илжайишидан ёқутлек лаблари остидаги садаф каби оқ тишлари бир оз кўриниб қўйдилар.

Шу гапдан кейин мажлисга кутилмаган бир руҳ кирди. Аноргулнинг қўлидаги дутор «Ўртоқлар» куйини танларга ларза бериб тарона қилди. Хонимбиби қизларга қистатиб ўтирмай, ўрнидан сакраб турдида, ўйнаб ҳам кетди. Дутор ёнига чилдирманнинг чертмаги келиб қўшилгандан кейин, базм тагин ҳам жонланди. Чапаклар ҳам кўтарилди. Ўйин қизиб борар эди, уйнинг дарича эшиклари бекланиб токчаларга шам ёқилгандан сўнг, базмнинг руҳи яна ошиди. Ел билан ўнашиб ёнган шам нури қизларни аллақандай ажиб ҳолатга қўймоқда, мажлис эса «Алиф лайло» ҳикояларидаги «парилар» базмини хотирлатмоқда эди. Дутор уфор куйини чалиб, чилдирма ҳам нозик йўл билан унга қўшилиша борди. Ўйин ҳам бир турли на佐кат касб этиб, Гулсинбиби йўргалай кетди. Дутор кўнгилнинг аллақандай ингичка жойини қитиқладайдир, чилдирма юракни нимагадир ошиқдириб, Гулсин қизнинг йўргалаши борлик аъзони зириллатадир. Базм жуда қизиқ, жуда кўнгилли эди.

Кумушбиби ҳам бу қизиқ базмдан бошқалардек ҳисса оладир, севиниб қувонадир деб ўйланмасин, чунки унинг вужуди қизлар базми ичилада бўлса ҳам, хаёли аллақаёқларда учиб юргандек, кўзлари ўйнагувчи қизларда бўлса ҳам, ҳақиқатда бошқа бир нарсани кўргандек... Кўринишидан натижа чиқариб айтганда,

бу қизиқ мажлис унинг учун базм ўрнини эмас, аза жойини тутгандек...

Икки соатлик қизиқ бир базмдан сўнг қизлар чарчадилар-да, ўйинни тўхтатдилар. Гулсин билан Хонимбibi энди дутор билан қўшиқча ўтирилар. Гулсин ўзининг қўнгироқдек товуши билан «Йигларман» куйидан бошлади:

Ўртоқларим қўлга олсан торимни,
Бештиёр ёллайдирман ёримни!

Иккинчи қайтариб айтишда унга Хонимбиби қўшилишди. Бир турли, бир оҳангли нафис, мусиқавий товушлар кишининг борлиқ вужудига, қон томирларига ажойиб бир ўзгариш берган эдилар. Шу чоққача мўлтайиб хаёл ичида шўнғиб ўтирган Кумушбиби бир сесканди-да, қўшиқчи қизларга қаради.

Қизлар иккинчи байтга ўтдилар:

Бир кўршиб яғмо¹ қилган кўнглимни,
Қайтиб яна кўролмадим норимни.

Шу вақт кутилмаган жойда Кумушнинг икки кўзи жиқ ёшга тўлган эди. Учинчига ўтдилар:

Агар кўрсам эди яна ёримни,
Багишлардим ҳама йўгу боримни!

Тўртинчи:

Билурмикин, билмасмикин, у золим:
Кунлар, тунлар тортган оҳу зоримни!

Кумуш тоқатсизлангандек эди...

Бешинчи:

Чилип айтишг, ўртоқларим, менга сиз,
Қайта бошдан кўраманни ёримни?

Кейинги:

Кетди тоқат, кетди сабрим... кетдилар...
Синдиарман уриб ерга торимни!

Бу кейинги байтга қулоқ солувчи қолмади, чунки ёнидаги қизга осилиб йиглай бошлаган Кумушбигига ҳар ким таажжубда, ҳар кимнинг кўзи, қулоги шунда эди.

- Нима бўлди, Кумуш?
- Нега йиглайсиз, Кумуш опа?

¹ Яғмо — асир, талон-торож.

— Бирор жоёинг оғрийди, Кумуш?

Кумушбиби ўз устига дув йигилган қизларга кўзи-ни очиб қаради-да, ҳушёр тортганлардек бир ҳаракат қилиб қўйди ва тез-тез чўнтағидан рўмолини олиб, кўз ёшисини қуритди.

— Нега йиғладинг-а?

Бу саволни бергувчи Гулсинга Кумуш куч билан илжайиб қаради-да:

— Ўзим...— деди.

— Вой, шўргинангга шўрва тўкилсин, Кумуш! — деди Гулсин, — мен шундай эрни топиб тексам, бошим кўкка етар эди.

Гулсингнинг гапига қизлар кулишдилар. Кумуш жуда хафа кўринганикдан унинг кўнглини очмоққа тўғри келар эди. Шунинг учун бошқа ўйинларни қўя туриб, мажлиснини энг қизиқ тарафи бўлиб саналган лапар айтишга кўчдилар. Гулсин куёв ролини ўйнар, Хонимбиби Кумуш ролида, иккисининг бир-бирисига қараб ўқишиган лапарлари барчани кулдириб ичакларни узар даражада. Бироқ Кумуш тишининг оқини кўриш жуда қийин, унинг ҳамма иши фақат мунғайиб хаёлланишигина...

Қизларга тўйхонадан ошлар, таванлар келиб тортилди. Ошдан кейин янгалар келиб қизлардан Кумушни сўрадилар. Қизларнинг — «йўқ, биз Кумушбибини сизларга бермаймиз!» деб ўйнаб айтган сўzlари Кумушбибига чиндек бўлиб эшитилар, янгалар билан уйдан чиқар экан, кўмак сўрагандек қизларга термулиб қарап эди. Шу йўсин қизлар ўзларининг бир ўртоқларини хотинлик дунёсига узатиб, мажлисдан тарқалишдилар.

11

КУТИЛМАГАН БАХТ

Кумушбибидан ваколат олиш ҳам жуда қийин бўлди. Домланинг: «Сизким Кумушбиби Мирзакарим қизи, ўзингизни тошкентлик мусулмон Отабек Юсуфбек ҳожи ўғлига багишламоқ ваколатини амакингиз Мұхаммадраҳим Йўлдош ўғлига топширдингизми?» деган сўроғи олти-етти қайтарилгандан кейин, шунда ҳам янгалар қистоги осигида, аранг унинг ризолиги олинди.

Кечки соат бешларда қутидорнинг ҳовлиси тўрт кўз билан куёв келишини кутадир. Куёв учун паловлар, қуюқ-суюқ ошлар, неча турли неъматлар ҳозирланаб, булар ҳам куёвнинг интизорида турадилар. Ниҳоят, соат беш яримларда куёв келди. Йигирма-ўттиз чоғли ёш йигитлар — Раҳматнинг ўртоқлари, улар орасида Отабек — куёв кўринди: бошида симоби шойи салла, устида қора мовут сирилган совсар пўстин, ичида ўзининг Шамайда тиктиргани осмони ранг мовут камзул, мобут шим, оёғида қолапойафзали, белида Кумушбибининг уста қўли билан тикилган шісли кийиғ... Юзлар қизил, оғиз ирпайган, кўзлар ўйнаб аллакимни қидирадир. Ошларини еб бўлсалар ҳам, жўрттага, куёв кўриш учун ўтирган маҳалла кишилари бир-бирларини туртишиб: «Тузук-тузук, куёвликка арзигундек, чаки-чаккига тушмабди; олма-ю анор!» дейишдилар. Томда куёв кутиб ўтирган хотинлар орасидан Офтоб ойимнинг эгачиси ошиқиб синглиси ёнига тушди-да: «Офтоб, дарров исириқ ҳозирла, куёвингни ёмон кўздан ўзи асрасин!» деди. Қутидор эшик остида қўл қовуштириб меҳмонларни кутиб оладир, ер остидан куёвига кўз қирини ташлаб, кишига сездирмай ўзича кулимсираб қўядир. Меҳмонхона айвонида оқ соқолли, кўркам сиймо ва оғир табиатли домла билан Зиё шоҳичи, Ҳасанали, қиз вакили ва тағин бир неча кишилар ўтирадирлар. Йигитлар куёвни домлалар қарписига келтириб тўхтатгандан кейин, Отабек вакили бўлган Зиё шоҳичи билан Кумуш қиз вакили Муҳаммадраҳим ораларида маҳр¹ масаласи очиладир. Кўп тортишгандан сўнг, қуйидаги маблағлар маҳр қилиб белгиланадирлар: уч юз олтин пул, бундан кейин олиб бериш ваъдаси билан Марғилондан ўрдадек бир ҳовли, соғиши учун сигир, асбоби рўзгор... Бунга Отабек ҳам ўз ризолигини билдирадир. Домла хутба бошлайдир. Форсча ўқилган «ҳамд, салавот» ва бошқалардан сўнг хутба энг нозик бир ўринга келиб тўхтайдир: — «Сизким Отабек Юсуфбек ҳожи ўғли, Кумушбиби Мирзакарим қизини ўзингизга шаръий хотинликка қабул қиласизми?» — форс тилида сўрал-

¹ Маҳр — эски сдат бўйига куёв томонидан келинга тўланадиган пул, молашё бўлиб, бир қисми нақд, қолгани кейинчалик тўловиб келинган.

ган бу саволдан Отабекнинг кулгиси қистаб, кўнглидан кечирадир:

— Қабул қиласизми-я!

У биринчи сўроқдаёқ — «учиб, қўниб қабул қиласиз!» деб жавоб бермоқчи бўлса ҳам, бироқ ҳалқ-нинг — «ўлиб турган экан!» деб қиладиган таънасидан чўчиб жавоб бермайдир. Яна бир қайта юқоридаги «Сизким фалончи...» жумласи домла тарафидан такрорланадир. Күёвларга учинчи сўроқда жавоб бериш одат ҳукмида бўлса ҳам, Отабек бу такаллуфга чидомайдир. Гўё учинчи сўроқ ўрнига — «энди олмас экан-сиз Кумушбибини...» деб мажлис бузиладигандек сезиладир-да, ҳамма товушини қўйиб, барчага эшилтириб — «қабул қилдик!» деб юборадир.

Домла алҳамдуилло... билан никоҳни тугатиб, мажлис томонидан келин билан куёвнинг ҳақларига дуо бошланадир, ҳамма дуога қўл кўтариб, ҳатто томдаги томошачи хотинларгача «омин»га кўмаклашадилар ва шундан кейин никоҳ мажлиси ёпиладир. Йигитлар куёвни меҳмонхонага олиб кирадилар, зиёфат бошланадир.

Отабекда бир дақиқага бўлсин тўзум бўлмаган бир вақтда, бир неча соатларга қараб чўзилган бу томоқ мажлиси билан албатта у яхши чиқишолмайдир. Хуфтанг яқин банаъжи бир иштаҳа билан ейилиб бўшатилган лаган, товоқлар олиниб, дастурхонлар йигилди. Бизнингча бир ярим соат, Отабекча аллақанча йил ҳисобланган бир фурсат ўтиб, ниҳоят, янгалар куёв сўрадилар. Икки ёшга муҳаббатли умр сўраб фотиха ўқиландан сўнг, Отабек ичкарига узатилди.

Ҳасанали меҳмонхона айвонида бекни кутиб турар эди:

— Энди куёвлик муборак бўлсин, бегим?

— Қутлуғ бўлсин!

Ҳасанали бошдан-оёқ бекни кузатди, оталик муҳаббати билан бекнинг орқасини силади ва ёшли кўзлари билан дуо қилиб унга рухсат берди. Отабек янгалар кутиб турган тарафга юрди. У ҳозир қизиқ ҳолатда эди: бу нима гап, тушими, ўнгцими, нима гаплар ўтиб, нималар бўлмоқда, бўлиб турган иш ҳақиқатми?

Биз ичкарига кирамиз: ҳовлининг икки томони то Кумушбибининг уйигача қатор куёв кутган хотинлар, бола-чақалар билан тўлган. Баъзан куткувчи хотинлар

нинг қўлида ёниб турган шам. Куёв тушадиган уй тўй моллари билан жуда ҳам безалган. Юқорида ёзилиб ўтилган қутидор уйининг аксар жиҳозлари шу уйга, Кумуш қиз уйига кўчирилган. Бир буларгина эмас, хотин-қизлар қўли билан чатиб ишланган турли зийнат чодирлари билан ҳам безалган, шипда катта қандил, қандилда ўттизлаб шамлар ёниб уйни сирли бир ҳолатга қўядирлар. Бурчакда қизлар мажлисида кўрилган оқиийимлар билан Кумушбиби туради... Унинг ҳусни бежалган уйининг оқлари, кўклари, сариқлари ва қизиллари билан товланиб хаёлий бир сиймода... Кўз ёшлирини оқизиб янгасининг сўзига қулоқ солмайдир. Ташибаридан эшитилган «куёв, куёв!» сўзи билан тағин ҳам унинг кўз ёшиси кўпайиб, туси ҳам ўзгарди. Янгаси Кумушни шу ҳолда қолдириб, ўзи юрганича эшикка чиқди. Куёв келар эди: икки томонни сириб олган хотин-қизлар ўртасидан Отабек келар эди. Унинг кетидан Офтоб ойимнинг эгачиси исириғ тутатар эди. Хотинлар қўлларида шам билан бунга қарап ва узатиб қолур эдилар. Куёв уйининг ёнига етди. Унинг юзи уятидан жуда қизарган, қочгали жой тополмас эди. Шу кезда уйининг эшиги очилди-да, янга томонидан қаршиланди.

— Кирингиз, бек!

Отабекнинг юрак уриши эҳтимол янгасига ҳам эшитилар эди... Отабек уйга киргандан кейин янгаси ташқари чиқиб, эшикни ўзи кўрарли қия қилиб ёпди... Уйининг тўрида ёнини Отабекка бериб, рўмолининг учини тугибми, йиртибми Кумушбиби турадир ва ким келди, деб ёнига қарамайдир. Рўмол тугиши билан машғул латиф қўлларни чет қўл келиб сиқди:

— Жоним!

Кумушбиби бегона қўлдан сесканди ва қўлларини қутқазмоққа тиришиб:

— Ушламангиз! — деди ҳам сиқувчи қўлдан қутулиш учун орқага тисланди.

Титраган ва қовжираган бир товушда:

— Нега қочасиз?! Нега қарамайсиз?! — деди бек, Кумушбиби шу чоққача қарамаган ва қарашини ҳам тиламаган эди. Мажбурият остида, ёв қарашиб билан секингина душманига қаради... Шу қарашиб бирмунча вақт қотиб қолди. Шундан кейин бир неча қадам босиб Отабекнинг пинжига яқин келди ва эсанкираган, ҳаяжонланган бир товуш билан сўради:

— Сиз ўшами?

— Мен ўша! — деди бек. Иккиси ҳам бир-бирисига беихтиёр термулишиб қолдилар.

Кумушбиби оғир тин олиб:

— Кўзларимга ишонмайман! — деди.

Отабек кўзларини тўлдириб қараб:

— Мен ҳам! — деди.

Шу вақт икки лаб ўз-ўзидан бир-бирисига қовуди... Кичкина нозик қўллар елка устига, кучли қўллар қўлтиқ остига ёпищдилар.

Кумушбиби Отабекнинг юзига узоқ тикилиб турди-да:

— Кутилмаган бир баҳт! — деди ва ўзининг исмидек бир нарсанинг товуши каби қилиб кулиб юборди. Бу кулиш ҳовлиларгача эштилди. Қия очилиб турган уй эшиги ҳам қаттиқина бекланди. Кумушбиби Отабекнинг қўлидан ушлаб қуйида ёзиб қўйилган дастурхон ёнига бошлади:

— Сиз бўлганингизни илгаридан билганимда бошқача қаршилар эдим,— деди.

— Бошқа деб ўйладингизми?

— Ўилаш қаерда, сиз бўлурсиз, деб кўнглимга ҳам келмаган эди,— деди-да тагин кулиб юборди.

Дастурхон ёнида Кумушбибининг латиф билагига Отабек олтин узук солур экан, у ерга қараган ҳолда эди.

— Мен сизга ҳеч нарса ҳам ҳозирламаган эдим...

— Ҳозирламаганингиз учун ўқинасизми?

— ...

— Ўқинмангиз,— деди бек,— сиздан бир нарса сўрасам, аямассиз?

— Аямайман...

Отабек Кумушбибининг лаблари устидаги қора холига ишора қилиб:

— Шу ердан бир ўпиш берсангиз сиз ҳам катта эсдалик ҳозирлаган бўлур эдингиз,— деди.

Кумушбиби қизаринди...

* * *

Отабек Маргилон келганинг иккинчи куни пойафзал бозорида бўлган эди. Аср номознинг вақти ўтиб борганлиқдан у шундаги дўкондорларнинг бирисидан таҳорат олиш учун сув сўради. Кўчадаги сув ариқнинг тегидан саёз оқар, шунинг учун ундан фойдала-

ниш қулай эмас эди. Дўкондор унга сувнинг қулай ўрнини кўрсатди: «Мана, шу бурчакдаги дарбозадан ичкарига кирсангиз, ариқнинг юза жойини топиб таҳорат олурсиз!» — деди. Отабек дўкондорнинг кўрсатишича қутидорнинг ташқарисига кирди. Шу вақт тасодифан нима юмиш биландир меҳмонхонадан чиқиб келгувчи фариштага кўзи тушди. Кумуш ҳам ариқ ёқасига келиб тўхтаган чингилин йигитга беихтиёр қараб қолди. Ихтиёрий эмас, ғайри ихтиёрий иккиси ҳам бир-бирисидан бирмунча вақт кўз ололмадилар. Охирида Кумуш нимадандир чўчигандек бўлди, енгилгина бир ҳаракат билан ўзини ичкари йўлак томонга бурди. Бу бурилишдан унинг орқа-ўнглини тутиб ётган қирқ кокиллари тўлқинландилар. Кумуш ичкарига қараб чопар экан, йўл устидан ариқ бўйида қотиб турган йигитга яна бир қараб қўйди ва бу қараща унга енгилигина бир табасум ҳам ҳадя қилди... Кумуш ичкарига кириб кўздан гойиб бўлди, лекин Отабек яна бир неча дақиқа ерга михлангандек қотиб турди... Охирида кўзини катта очиб ўтган дақиқада учрашгани хаёлий гўзални истаб хаёлланди. Бироқ ҳақиқат бошқача эди. Таҳорат олмоқ учун ариқ бўйига ўтирди, аммо кўзи хаёл яширини ан йўлакда эди. Таҳоратланиб бўлди, яна кўзини ўша тарафдан узолмади. Артиниб олгандан кейин яна оёқ устида тўхтаб қолди. Яширинган гўзал иккинчи қайта кўриймади, эҳтимолки, Отабекни ипсиз боғлаб, ўзи қайси бурчакдан бўлса ҳам асирини томоша қилар эди.

Кўп кутди, аср номозини қазо қилиб, куч билан қутидор уйидан чиқди ва шу дақиқадан бошлаб унда муҳабbat можароси туғилган эдиким, бу ёғи ўқувчимизга маълумдир. Кумушбибининг юқорида «Сиз ўшами?» деб сўраши шунга биноан бўлиб, аммо унга масаланинг англашилмай қолиши ва чин баҳтини билъакс кутиб олиниши қизиқ эди. Шундай қилиб икки ёшлиниг биринчи ҳам соғ муҳаббатлари қовушиш билан натижаланди.

12

ЧАҚИМЧИЛИК

— Еугун етти кун... Отабек қутидорнинг қизига уйланди!

63

У бу хабарни Қўқондан қайтишда эшигтан эди. Ўзининг қиёфатига яраша қўрқинч йўллар излар экан, қулоқлари тегида «...қизига уйланди!» жумласи такорланниб тургандек бўлар эди.

Унинг Қўқондан қайтиши иккала хотини учун ҳам улуғ бир фалокат бўлди. Чунки арзимаган бир сабаб билан иккаласи ҳам яхшигина таёқ еб олди. Шунинг учун икки кундош унинг олдига киришдан қўрқиб, яна тўғриси унинг совуқ афтини кўришдан жирканиб ҳовлиниг чет-четида юрарлар, икки кундош билиттифоқ унга ўлим сўрарлар: «Қўқонда ўлса, ўлигини итлар еса, биз ачинарми эдик!» деярлар эди.

У ўтирган куйи нима тўғрида бўлса ҳам жуда бош оғритиб ўйлар эди. Шу чоғда унинг тусидан йиртқилич, бир гуноҳсизнинг устига ҳужумга ҳозирланган ваҳшийлик белгилари кўрилур эди. Ҳар ҳолда у яхшиликка эмас, қандоғ ҳам бўлса бир ваҳшийликка йўллар, режалар излар эди. Охири унинг юзида истеҳзоли бир илжайиш кўрилди-да, бир нарсага қарор қўйгандек, бир ҳаракат ясади ва ўрнидан сакраб туриб, қозиқдаги кирлаб кетган салласини қўлига олди ва ҳовлига чиқди. Ташқарисида беш дўконлаб иш тўқиб турган ҳалфа, шогирдларига баъзи таълимотларни бергач, бир улуғ дарбоза орқали кўчага юрди. Ўралиб битмаган салласини тузата-тузата тор, кирди-чиқдили кўчалар билан шаҳарнинг кунботар томонига, беклар маҳалласига қараб кетди.

Беклар маҳалласининг бошланишида, жанубга қаратиб қурилган улуғ бир дарбозанинг ёнида икки нафар милтиқ ва қиличли йигит сўзлашиб турар эдилар. Буларнинг ёнига бизга маълум киши келиб тўхтади ва улардан сўради:

— Бек уйдамилар?

Сўзнинг белига тепгани учун йигитнинг бириси ўшшайиб сўрагувчига қаради, иккинчиси қўллари орасидаги милтифи билан ичкарига ишорат қилиб жавоб берди:

— Бор!

Дарбозадан ичкарига кирилгач, сарой каби бир ҳовли, айвонда ўн бешга яқин яроғли йигитлар тўнқалардан гулхан солиб исиниб ўтирмақда эдилар. У тўрдаги айвон орқали юриладирган уйини эшигига турувчи йигит оғасининг ёнига борди ва қўрбоши билан учраш-

мак орзусида бўлганлигини айтиб, ундан киришга ижозат сўради. Йигит оғасининг раҳбарлиги билан ичкарига кирди: бошига кўк салла чулғаган, эгнига Ўратепанинг босмасидан чакман, белига кумуш камар боғлаб, кумуш қинли қиличини тиззасига босган, қора тавли бўлса ҳам кўкнорими, таряқми истеъмолидән юзи сарғайган қирқ-эллик ёшлар чамали бир киши ёрлиғсизон бир ёзувни ўқиб ўтиromoқда эди. Қўрбоши, келгувчининг саломига эътиборсизгина жавобланган бўлдида, руҳсиз бир товуш билан:

— Нима қилиб юрибсан? — деб сўради.

— Таксир, сизга арз бор!

Йигит оғаси келгувчини қолдириб чиқди. Келгувчи эшик ёнида, оёқ устида қўл боғлаб туар эди.

— Қандай арзинг бор?

— Тақсир... ижозат берсангиз ўтирсам...

— Хўп, ўтир!

Келгувчи кўп тутилиб туси ўнгтан гилам устидан юриб бориб, қўрбоши қаршисига тавозе билан ўтирди. Қўрбоши қўлидаги ёзувни буклаб қўйнига тиқди-да, келгувчини ер остидан кузатди.

— Қаерликсан?

— Тақсир... шу ерлик, марғилонлик.

— Отинг нима?

— Тақсир... Ҳомид.

— Нима касб қиласан?

— Устакорлик.

— Яхши, арзингни гапир?

Ҳомид ўзининг товушига ясама бир оҳанг бериб арзини бошлади.

— Жаноби падари аруси¹ шаҳаншоҳи Мусулмон-қул баҳодир замони адолатларида ҳам,— деди Ҳомид,— қорачопонликлар ҳануз тинч ётмай, юртни қипчоқ оғаларга қарши оёғлантироқчи бўладирлар, ишни яна тадбирсиз қорачопонлар қўлига олиб, мамлакатни бузғинликка солмоқчи бўладирлар... Биз бундай бузуқи́лар ёлғиз Тошкентдаги Азизбек билан унинг йўлбошчиси бўлган Юсуфбек ҳожи деб билар эдик. Бироқ уларнинг уруги бизнинг Марғилонга ҳам сочилган экан.

Қўрбошининг кўзи ола-кула бўлиб кетди:

¹ Падари аруси — қайната.

— Нима дейсан? У ким экан Марғилонда?

— Биттаси — машҳур бузуқи ташкентлик Юсуф-бекнинг ҳозирда Марғилонда турғувчи ўғли — Отабек исмли бир йигит, иккинчиси — унинг ҳаммаслаги ва қайин отаси бўлган Мирзакарим қутидор!

— Ҳали-я?

— Шундоғ, тақсир!

— Сен бу гапни қаёғдан билдинг?

— Шу кунларда уларнинг бир мажлисларида бўлган эдим, тақсир...

— Хўш, хўш, мажлиса?

— Мажлиса кўп гаплар ўтди, тақсир.— деди Ҳомид.— Мажлиснинг бошлиги бўлган Отабек қипчоқларнинг зулм ва таъаддисини, қипчоқлардан ишни олмоқ учун Тошкентла Азизбек ва ўз отаси бошлиқ билфеъл иш бошлаганларини сўзлаб, Марғилоннинг ҳам бундан сўнг оёқга қолқиши кераклигини айтди... Мажлис аҳли, айниқса, Мирзакарим унинг сўзини кучлаб тушди. Агар бу ишнинг олдини олинмаса, ҳукумат ва мамлакат учун натижа қўрқинчdir, тақсир!

— Мажлис кимницида эди?

Ҳомид тарафидан кутилмаган бир савол! Ҳомид ўзига берилган бу савол қаршисида тараддузданиб қолди. Чунки мажлис ўрнини айтса, поччаси билан жияни Раҳматнинг ҳам қўлга тушиблари аниқ ва бунинг билан у ўз оёғига болта қўйган бўлар эди. Шу мулоҳаза юзасидан у тутилиқди:

— Мажлис ўрни ёдимда йўқ, тақсир.

Мантиқсиз бу жавобга қарши қўрбоши аччиғи билан бақирди:

-- Ёдимда йўқ?

Ҳомид гарангсиди ва бир хил синиқ товушда:

-- Эсимда бўлса ҳам нозик бир жой эди, тақсир,— деди.

— Нозик бир жой эдими! — деб қўрбоши заҳарханда қилди.— Агар айтмасанг, ўша муттаҳамлар тиқиладиган чуқурга сен ҳам ташланасан!

— Кечирингиз, тақсир!

Қўрбоши йиртқичлардек бўкирди:

— Кечириш йўқ!

Ҳомид учун энг кейинги чорадан бошқа илож йўқ эди -- чўнтақ кавлашга тутинди ва юз мاشақат билан

Ёнчиғини чиқарди. Ёнчиқдан ўнга яқин олтинларни са-
ноқсизча олиб қўрбошига узатди:

— Тақсир... сизга атаган назримиз эди...

Ҳомид кавлана бошлагандаёқ қўрбошининг усти-
дан совуқ сув сепилган эди. У олтинларни ёнига солиб
жойлагач, товуш ҳам эски ҳолига қайтиб, сўзлар ҳам
мулойим тортди.

— Демак, нозик жой эди дегин, Ҳомидбой!

— Тақсир...

— Бадбахтлар шундай маслаҳат қилдиларми, ҳали?

— Тақсир... Бу ишнинг олдини олинмаса, натижа
ёмон, албатта.

— Албатта, биз ўша бузуқиларнинг жазоларини бе-
рамиз... Мен ҳозир бориб бекка арз қиласай, шу кечадан
қолдирмай қўлга оламиз муттаҳамларни,— деди қўр-
боши.

Ҳомиднинг чехраси очилиб кетган эди. Қўрбоши
ўзининг имо ва ишорасига ўтганликдан унинг кўзида
ўч олиш қувончлари ва ундан кейинги Ҳомиднинг ўзи-
га маълум бўлган бир баҳт умидлари ўйнар эдилар.
Қўрбоши токчадан давот, қалам олиб олдига қўйди-да,
ёзувга ҳозирланиб сўради:

— Айт-чи, Ҳомидбой, муттаҳамлар кимлар эди?

— Биттаси — тошкентлик Юсуфбек ҳожининг ўғли
Отабек!

Қўрбоши ёзди:

— Ҳа, ҳа! Ҳали Юсуфбек ҳожининг ўғли дегин!
Бизнинг Марғилонни ҳам қонга ботирмоқчи экан-да,
муттаҳамлар, иккинчиси?

— Шу кунларда Отабекка қизини берган марғилон-
лик Мирзакарим.

— Пес песни қоронғуда топган экан, учинчиси?

— Отабекнинг қули Ҳасанали.

— Тўртингчиси?

Ҳомид бир оз ўйлаб жавоб берди:

— Билмадим... Ҳозир Марғилондами, йўқми, анди-
жонлик Акрам ҳожи!

Қўрбоши ёзди:

— Иш катта экан, тагин?

— Энди йўқ, тақсир,— деди Ҳомид ва сўзига шуни
ҳам қўшди.— Отабек билан Мирзакарим қўлга олинса-
лар, илоннинг боши янчилган ҳисобланиб, ўзгалари-
нинг қўлидан иш келадирган одамлар эмас, тақсир.

Қўрбоши ёзувни битириб қўйнига тиқди. «Бўлмаса иш битди, эртага эрта билан можарони эшитарсан!» — деди. Ҳомид ўрнидан туриб қўрбошига қуллуқ, қилиб чиқди.

13

ҚАМОҚ

«Ёрмазор» мавзуида шаҳар қўргонига тиралиб солинган ўрда. Ўрда дарбозасининг саҳни ботмонлаб ҳисобланган мевазор бўлиб, бунда олма, ўрик, нок ва тут ёғочлари хийлагина бор эдилар. Дарбозанинг икки биқинини ўраб олган лойига гуллар, нақшлар туширилиб ишланган саккиз газлар юксакликда ўрда қўргони, дарбозанинг икки бурчида алачами, бўзданми узун чопонлар кийиб, бошларига қулоқчин қўндириган, қайиш камар устидан қилич тақиниб, милтиқларига суюнган икки йигит кўринадир — булар навбатчи ўрда қоровули, қоронғу тушишга яқинлашганлиқдан қиё ёпилиб турган дарбозани кимдир, биттаси ичкаридан зичлаб ёпди-да, куч сарф қилиб дарбозанинг зўр занжирини шарақ-шуруқ этиб боғлади. Ҳозир бизга ўрда ичига кириш мумкин бўлмагани учун қўргоннинг ташқари теграсида айланиб турайлик: дарбозанинг сўл биқинига қараб икки юз қадам кетсак, қўргон девори тугалиб бурчакка етиладир. Қўргон бурчига қоровул туриш учун маҳсус манора шекилли жой ясалган бўлса ҳам, ҳозирда навбатчидан холидир. Шундан кейин бир бўшлиқ ер билан қўргоннинг жанубига қараб кетиладир. Тўрт юз одимлаб борилгач, қўргоннинг шарқи-жанубий бурчига етилиб, бу бурчни ҳам анависидек қоровулсиз топиладир. Бу бурдан қараган кишига қўргоннинг ғарби-жанубий бурчи ҳам кўриниб, шу йўсинда ўрданинг тўрт бурчини айланиб чиқилса, бир минг олти юз қадам босилган бўлиб, ўрданинг ғарб томонидан, биз танишган ўрда дарбозасига келинадир.

Ҳозир қоронғу ҳам ўбдан тушганлиқдан киши-кишини танимаслик даражада эди. Бояги дарбоза устида кўринган қоровуллар ҳамон қора ҳайкал каби қотиб турар эдилар.

Шаҳар ичидаги ўрда дарбозасига қараб келмоқда бўлган бир неча отларнинг оёқ товушини эшитиб, қо-

ровуллардан биттаси — «туёқ товушими?» деб иккинчисига савол ташлаб қўйди. Иккинчи қоровул мўралаб-мўралаб йўлга қаради:

— Уч отлиқ кўринадир!

— Бақтсиз келувчи ким экан?

— Бундай вақтда қўрбошидан бошқа киши келмас эди, эҳтимол ўшадир!

Дарвоқе, қўрбоши ўзининг икки йигити билан етиб келди ва отидан қўниб жиловини йигитнинг қўлига берар экан, қоровулларга буюрди:

— Дарбозани очсинлар!

Қоровуллар ичкарига хабар бергандан сўнг, дарбоза очилиб қўрбоши ичкарига кирди. Ўрданинг теварак масофатини биз чамалаб кўрган эдик, шунинг учун ўрданинг қай даража кенг бўлиши ҳам бизга қиёсан маълум. Аммо ўрданинг кўпроқ қисми дарбоза томонидан қолдирилиб, жанубга тортилган хатти мустақим бир девор билан бўлинган эди. Нариги томон ўрданинг ичкари қисмини ташкил этиб, унда бек — ҳоким оиласи турар эди. Ўрданинг ташқари қисмининг уч тарафи (жануб, шарқ, гарб) биносиз, фақат кўргон деворларининг зиналари эди. Аммо иморат қисми дарбоза билан бир қаторда бўлиб, сўл биқинда девонхона, унинг қаторида бўйига қирқ, энига йигирма олчин жой олган ўн беш даричали каттакон чорхари уй, ичида эллик чоғлик бек йигитлари гулхан солиб ўтирас эдилар. Бу уйнинг қатори ошхона, отхона ва шунингдек ҳожат уйларини ташкил этар эдилар.

Қўрбоши дарбозабон ёнида тўхтаб, ундан сўради:

— Бек ичкаридамилар?

Дарбозабон дарбозани кучаниб ёпар экан, жавоб берди:

— Билмадим, тақсир.

Ўрданинг чароғчиси дарбоза яқинидаги машъала ёғочига ўт бериб, бутун ўрда ичи ёриб кетди. Қўрбоши дарбозанинг ўнтарафига қараб юрди. Бу томонда ниҳоятда зийнатланиб бино қилинган олий иморатлар бўлиб, шаҳар усталарининг ҳамма санъат ва маҳоратлари шў биноларда гавдаланар эди. Қўрбоши биринчи эшик ёнида турган ярогли қоровулдан ўтиб кичикроқ, нақшли бир уйга кирди. Иккинчи эшиқдан ўтиб улуғ бир залга чиқди.

Зал жуда нафис ишланган эди: олтин қандилдаги элликлаб шамларнинг нури билан мунаққаш деворларнинг олтин, кумуш, кўк-қизил, оқ-пушти, сариқ-қора гуллари юлдузлардек яшиаб уйга бир хаёлийлик берар эдилар. Уйнинг остига тўшалган қизил лола гуллик гилам кишини гўё чаманда ҳис этдирап эди. Залнинг тўрида, кичкина холдор бир эшикча ёнида, атлас кўрпача устида ўн беш ёшлар чамалик, қизил духобадан кийинган кўркам бир ўғлон палов еб турад эди.

Қўрбоши эшиқдан кирар экан, ўғлонга қараб кулимсиради:

— Ҳа, Аҳмадхон, сиз шу ерда экансиз,— деди.

Аҳмадхон жойидан қўзгалмади:

— Мен ҳамиша шу ерда, қани ошга!

— Раҳмат. Қушбеги ичкаридадирлар?

— Ичкаридалар,— деди Аҳмадхон,— мен тўйиб қолдим, келсангиз-чи!

— Бўлмаса табаррук қўлингиз билан битта ошатингиз!

Аҳмадхон қўлига сиққунча ош олиб қўрбошига тутди, қўрбоши ихлос билан Аҳмадхоннинг қўлидан ошади... У ошнигина эмас, ҳатто Аҳмадхоннинг қўлини ҳам ошайдирган эди.

Кўп фурсат ўтмади. Тўрдаги кичкина эшик очилиб ичкаридан тўла юзли, ўsic қошли, оғир қарагувчи кўзли, сийрак соқол, ўрта бўйли, устидан кимхоб тўн кийиб, белига қилич осган қирқ беш ёшлар чамасида бир киши кўринди. Аҳмадхон билан қўрбошининг ўринларидан туриб таъзим қилишларидан бу зотнинг ким эканлиги билинар эди. Бу киши келиб атлас кўрпача устига ўтиреди ва ўзининг салмоқ товуши билан:

— Қалай, Холиқбек,— деди,— юртларингиз тинчликми, ўтиринг!

— Худога шукур, давлатлари кўланкасида,— деб қўрбоши тавозеланди ва қўл қовуштириб қушбенининг яқинига чўккаланди, Аҳмадхон бўш лаганини дастурхони билан кўтариб қушбеги кирган эшиқдан чиқди.

— Кечаги ўғрилар нима бўлди, қўлга туширдингизми?

— Давлатлари кўланкасида... Ўғрилардан биттаси тутилди, давлатлари ёри берса қолганлари ҳам ушланур, деб ўйлайман!

— Бошқа нима хабарлар бор?

Қўрбоши юзига жиддийлик ҳолати берди:

— Давлатлари ёри берса, ҳукуматимиз учун қўрқинч бўлган бузуқилар уясини топгандекман! — деди.

Қушбеги ўзига ўнгайсизлик бермоқда бўлган қиличини тиззасига олиб, ҳамон совуқёнлик билан сўради:

— Қандай бузуқилар уяси?

— Қандай бузуқилар уяси бўлсин, тақсир,— деди қўрбоши,— дунёда қорачопонликлардан ҳам кучлироқ бузуқилар бўладими?..

Қушбеги кўтарилинироқ олди ва кўзлари бир оз каттароқ очилди:

— Хўш?

— Маълумингиз улардан Азизбек билан Юсуфбек Тошкентда билғеъл исён чиқариб ётадирлар. Бироқ улар шунинг ўзигагина қониқмай Марғилонни ҳам бузиш фикрига тушганлар ва шу мақсадда бу ерга одам ҳам кўндарганлар.

— Одами ким, танидингизми?

— Танидим, тақсир,— деди қўрбоши мағрур бир оҳангда,— Юсуфбек ҳожининг ўғли ва ўзимизнинг Марғилоидан ҳам яна бир неча бузуқилар.

— Юсуфбек ҳожининг ўғли?

— Тақсир... Исми Отабек.

Қушбенининг кўзи ёнди... Манглай этлари тиришиб, сўл қўли билан соқолини тутамлаб фикрга кетди. Бу хабар унга бошқача таъсир берган эди: Тошкентнинг Кўқонга қарши исён қилган бир замонида, исёёнчилардан бири, ҳам биринчиси бўлиб танилган Юсуфбек ҳожидек бир кимсанинг ўз ўғлини Марғилонга юбориб, бунда ҳам исён чиқариш қасдида бўлмоғи унингча жуда яқин ва шубҳасиз эди.

— Ул ҳозир қаерда турадир?

— Мирзакарим қутидор исмли бир кишиникида.

— Мирзакарим билан қандай алоқаси бор эмиш?

— Баракалла, тақсир! — деди қўрбоши.— Отабекнинг Марғилоидан топган энг яқин кишиси шу қутидордир. Бундан бир неча кун илгари Отабекка ўз қизини бериб куёв ҳам қилибдир. Айтишларича, Отабекнинг барча режалари шу қутидор билан кенгашиб бўлар экан.

— Уларнинг теварагига кимлар йигилган?

Қўрбоши қўйнидаги ёзувни олиб қушбегига узатди:

— Ҳозирча менга маълум бўлган бузуқилар шунда!

Қүшбеги ёзувга кўз югуртириб рўйхатдаги кишиларни дарҳол келтиришга буюрди. Қўрбоши қуллук қилиб чиққач, яна бир қайта ёзувни ўқиб фикрға толди.

* * *

Ўтаббой қүшбеги ҳозиргина ичкари ўрдадан қайтиб чиққан эди. Шу орада қўрбоши кириб унга қуллук қилди:

- Келтирдим, тақсир! Бироқ иккисини тополмадим. Қүшбеги чидамсизлик билан:
- Отабекни-чи? — деб сўради.
- Кўрбоши музafferона жавоб берди:
- Тутдим, тақсир; қутидорни ҳам!
- Олиб кирингиз!

Қүшбеги тинчланди, қўрбоши даҳлиздан ташқарига ишорат берди-да, қайтиб қүшбегига рухсат қуллуги адо қилди ва ундан изин олиб ўтири. Эшиқдан икки қуролли йигит муҳофазатида Отабек ва Мирзакарим қутидор кўриниб бекка қуллук қилдилар. Қүшбеги яроғли йигитларни қайтишга буюриб, гуноҳкорларни ёввошгина қилиб ўз олдига чақирди. Отабекда тушунмасликдан бошқа ўзгариш сезилмаса ҳам, қутидор жуда қўрқкан, ранги ўчган эди. Иккиси тенглиқда қүшбегига қарши чўккаладилар. Отабекни ортиқча бир диққат билан кўз тегидан ўткарғач, қүшбеги сўради:

- Отабек деган сизми?
- Тақсир, мен!
- Тошкентлик Юсуфбек ҳожининг ўғлисиз?
- Тақсир!
- Ҳозир Марғilonда турасизми?
- Тақсир!
- Марғilon келганингизга кўп бўлдими?
- Қирқ кунлар чамаси.
- Марғilonга нима юмиш билан келган эдингиз?
- Савдогарчилик билан, тақсир.
- Ўзингиз ёлғизми?
- Бир кишим бор эди.

Қүшбеги қўлидаги рўйхаттага қараб олди ва давом этди:

- Ҳасанали ким бўладир?
- Отабекдаги бояги тушунмаслик бир шубҳага алишниди, аммо парвосизча жавобини бера берди:

- Қулимиз бўладир. Тошкентдан келгандаги йўлдо-
шим шу сиз айтган Ҳасанали эди.
- Ҳасанали бу кунда қаерда?
- Марғилонда.
- Сиз билан бирга турадими?
- Йўқ. Саройда бирмунча молларимиз бўлар эди.
саройда молларга қараб турадир.
- Бу киши кимингиз?
- Қайин отамиз.
- Кўпдан берими?
- Бугун саккизинчи кун...
- Илгари ўзингиз уйланган эдингизми?
- Йўқ.
- Ўзингиз тошкентлик бўла туриб нима мажбу-
рият остида Марғилондан уйландингиз?

Бу саволдан Отабек бир оз ўнғайсизланиб тўхтади,
аммо бу ўнғайсизланишдан қушбегининг олдида бошқа
бир ҳақиқат очилгандек бўлди:

- Жавоб берингиз!
- Тақдир, тақсир!
- Қушбеги бир оз ўйлаб олиб, яна савол берди:
 - Марғилонда кимларни танийсиз?
 - Марғилонда ўч-тўрт кишидан бошқа одамни та-
нимайман!
 - Акрам ҳожини танирсиз?
 - Танийман. У билан бир неча мажлисларда ўти-
ришган эдим.
 - Бу кунда Акрам ҳожи ошнангиз қаерда?
 - Билмадим, тақсир! — деди ва қайин отасига қа-
ради.

Қутидор жавоб берди:

- Акрам ҳожи бу кунларда Андижонда бўлса ке-
рак, тақсир!
- Хўп, Отабек, сиз жавоб берингиз. Акрам ҳожи
билан бўлган мажлисингиз кимникида эди?

Отабек бундай сўроқларнинг бекорга эмаслигини
пайқаб, бунинг тегида қандай бўлса ҳам бир гап бор-
лигига ишонди:

- Биринчи мажлисимиз бундан бир ой чамаси бу-
рун Зиё ака деганинг уйида, иккинчиси (қутидорга
имо қилиб), бу кишиникида бўлган эди. Шу мажлис-
ларда Акрам ҳожи ҳам бор эди.

— Зиё аканикода бўлган мажлисингизга кимлар иштирок қилди?

— Мен, Зиё шоҳичи, бу киши (қутидор),— деди ва бир оз ўйланиб олди,— Зиё аканинг ўғли — Раҳмат, Акрам ҳожи, Ҳасанали, Ҳомид исмли яна бир киши.

Ҳомид исмини эшитган қўрбоши тасдиқ қилгандек бир ҳаракат ясаб қўйди. Қушбеги қўрбошига ер тегидан кўз юбориб олди-да, давом қилди:

— Иккинчи мажлисингизда кимлар бўлди?

— Иккинчи мажлисимида бояги кишиларгина бўлди. Фақат Ҳомид йўқ эди.

— Еоя, Марғилон келганимга неча кун бўлди, дедингиз?

— Қирқ кунлар чамаси!

— Яхши,— деди қушбеги,— айтингиз-чи, қирқ кунлаб Марғилонда қолишингизнинг сабаби нима эди?

— Маълумки, ҳозир Тошкент қамал ҳолатидадир. Шундай вақтда Тошкентта қайтиш ўзи ақлсизлик бўлар эди.

— Қораҷопончи бўлганингиз учун,— деди истеҳзо қилиб қушбеги,— қипчоқ оғайнилардан қўрқингизми?

— Сўзингизга тушунолмайман,— деди кулиб Отабек. Бу гапни оддий кишига айтгандек қилиб сўзлади. Қутидор унинг бу айтган гапидан эмас, кулишидан ниҳоят даражада қўрқувга тушиб, ўзида иссиғлик-совуғлик бир ҳолат ҳис этган эди. Ҳокимларга гарчи тўғри бўлгандага ҳам дағалроқ сўз айтиш ўлимни тилаш билан тенг эди. Ўтаббой қушбеги замона ҳокимларининг тузиги бўлса ҳам, кўп бўлмаса озроқ уларнинг таъсири бунда ҳам бор эди. Отабекнинг бу гапидан қизиши:

— Қипчоқ душмани бўлган отангиз Юсуфбек ҳожини унутдингизми? Отангизнинг сизга берган ваколати қаерда қолди?

— Қипчоқ душмани ким, отам кимга қандай ваколат берган, худо ҳаққи учун очиб сўзлангиз, йўқса ёриламан, тақсир!

— Ўзингизни тағофилга солманг, бек йигит,— деди қушбеги,— отангизнинг ким эканини, сизни Марғилонга нима учун юборганини, қутидор билан бунда қандай ишлар қилмоқда бўлганингизни, барчасини ҳужжатлари билан биламиш. Сиз марғилонлик оғайниларни қипчоқларга қарши оёқлантиromoқчи бўласиз, буни ҳам яхши биламиш...

Отабек. } Ё олло!
Қутидор.

Отабек азбаройи бўғилиб кетганидан кўкимтири товланган, қутидор безгаклардек титрай бошлаган эди. Отабек ўзини куч билан йигиштириди:

— Бунда зўр туҳмат бор, тақсир! — деди.— Отамни қипчоқ душмани ва мени Марғилон оғайниларини исёнга ҳозирлаш учун келган, деб ўйлайсизми?

— Ўйламаймиз, яхши биламиз! Қутидорнинг сизга нима учун қизини бериб куёв қилганига ҳам яхши тушумамиз!

Қутидор суратдек қотиб қолди, Отабек бўлса ўзидаги ҳаяжонни куч ҳол билан тарқатишга тиришар эди. Қушбеги билан қўрбоши бу икки гуноҳкорни таъқиб этар, улардаги ҳар бир ҳаракатни ўзларича бир нарсага йўяр эдилар.

Уч-тўрт дақиқалик сукутдан кейин Отабек тилга келди:

— Биз бу дақиқада, сизнинг фикрингизча гўё бир иғвогар, гўё бир исёнчи бўлиб танилиб турибмиз! — деди бек.— Чиндан ҳам шундоғ кишилармизми, ийқими, буни албатта сизнинг текширишларингиз, ҳақиқатларингиз кўрсатур. Мен сизнинг қиличингиз остида ўлимдан қўрқиб, ёки сизга хушомад учун сўзламай, ҳукумат кишиларимиз орасида тушунадиган бир одам бўлганлигиниз важидан отамнинг ҳам ўзимнинг қандай фикр ва маслак кишиси эканлигимизни айтиб ўтмоқчи бўламан: биз на қипчоқларга тарафдор бир киши ва на шаҳарлик оғайниларга! Бу икки томон бизнинг назаримизда бир-бираисидан мумтоз, идора ишида бири-биридан ортиқроқ ҳалқлар эмасдир. Шунга биноан Туркистон ҳалқларининг истиқболларини бу икки томоннинг биттасига ҳавола қилиш байни қўйни бўрига топшириш қабилидан бўладир. Нега десангиз, ҳар икки томоннинг иш бошига интилган кишиларининг кўкрагига қўл солиб кўрсангиз, бираисининг фақат эл таламак, бойлик орттирмаққагина бўлган ғарзини, иккincinnisinинг кўркли хотинлар, юқори турмушлар учун бўлган мақсадинигина кўриб, икки орадан «элни тинчитай, эл ҳам роҳат тирикчилик қиласин!» деган учинчи бир олий мақсадни чироғ ёқиб ахтарсангиз ҳам тополмассиз. Мана биз, тақсир, шу кейинги ишда кўрилмаса ҳам, фақат ширин хаёллардагина юрган

олий мақсадларга ўзимизда тарафдорлик ҳис этамиз. Отамнинг Азизбеккә яқин туриши қипчоқ душмани, қорачопон тарафдори бўлганидан эмас, балки бояги маслакка бир хизмат қилмоқ учундир. Таассуфки, отамнинг Азизбекдан бўлган умиди бўшга кетди: бугун ул ўзининг ярамас хаёли йўлида хондан юз ўғирди ва орада қанча гуноҳсизнинг қони тўкилишига сабаб бўлмоқдалар. Маним бу сўзларимга ишонинг, ишонманг, ихтиёр албатта сиздадир. Аммо бундоғ энг жўн бўйтон билан қораланишимга виждоним қаршисида сўнг даража муazzабман,¹ тақсир!

Қушбеги Отабекнинг бу гапларидан яхшигина тараддудга тушган эди, аммо «Азизбекнинг оталиғи ва кенгашчиси!» бўлган Юсуфбек ҳожининг ўғли бўлиши унинг миясини қотирган, балки бу гаплар шундай эҳтимолларга қарши дастур қилиб берилган бўлмасин, деган фикрга келган эди. Отабекнинг юқоридаги гапларидан сўнг бўлган ундаги ўзгариш ҳам факат бу ишни яхшилаб текшириш ва ҳозирдан бир ҳукм бермасликкина бўлди.

— Ҳар ҳолда сизнинг яхши ниятли кишилар бўлмаганилигинги кўзимиз ўнгидадир,— деди қушбеги.— Шунинг учун то ҳақиқат ошкор бўлгунчалик ҳар иккингиз зинданда қоларсиз!

Отабек бир сўз айтмай сукут қилди. Қутидор «чора йўқми?» дегандек қилиб куёвига қаради. Қушбегининг ишорати билан йигитлар ҳозир бўлиб, гуноҳкорлар зинданга жўнатилдилар. Қушбегининг: «Эртага уйида мажлис қурилганларни ва бу мажлисда иштирок қилган бошқаларни ҳам қўлга олиб ҳузуримга келтирингиз!» деган амридан сўнг, қўрбоши ҳам рухсат олиб чиқди.

14

НАЖОТ ИСТАБ ТОШКЕНТА

Бугун саккиз кундан берига — «кутилмаган бир баҳт» эгаси бўлиб олган Кумушбиби учун бу ҳол кутилмаган бир баҳтсизлик, кутилмаган бир фалокат эди. Эндиғина — «Бекни уйлантиридим, севганига қўшиб қувонтиридим!» деб бу уйлантиришнинг ҳусни ва қувончини тузукраккина ўйлай олмаган Ҳасанали учун ҳам

¹ Муаззаб — азобдаман.

бу воқиа кичкина гап, озгина қайғу эмас эди. Кўзининг оқу қораси, ёлғиз қизини мақтovли куёвга бериб, қизи билан куёвининг бир дақиқа ҳам бир-бирларидан ажраша олмаганларини кўриб кўйлагига сиғмай юрган Офтоб ойим учун куёвигина эмас, ҳатто эрининг ҳам бу вартага¹ тушмоги чидай оларлик бир ҳол эмас эди. Кумушбиби ўзининг — «кутилмаган бир баҳти» учун ишонмагандай бўлиб юрар эди. Чиндан ҳам бундан кейин қайтадан қовушмогига ишонмай қўйди. Ҳасанали «қутулдим!» деган эди, яна тоғдек қайғуга тутилди. Офтоб ойимнинг севингани ичига тушди.

Кумушбиби билан Офтоб сиймнинг бу фалокатга қарши топган-тутганлари ёлғиз кўз ёши тўкишгина бўлди. Бу фаолиятнинг оғирлиги яна ўзининг тоғдек катталиги билан Ҳасаналининг устига тушди. Кумушбиби эри билан отасининг нажотларини кимдан кутишни билмас эди-да, қора кўзларини жиқ ёшга тўлатиб — «энди нима қиламиз?» дегандек Ҳасаналига термулар эди. Қутидор оиласида бошқа бир эр зоти бўлмаганликдан, Офтоб ойим қариндошларидан «жонкуяр» деб танилган киши Кумушнинг тоғаси Аҳмадбек бўлиб, у ҳам умрининг кўпини Кўқондами, Хўжанддами ўткарар, шунинг учун ундан ёри кутиш ҳам узоқ гап эди. Мана бу жиҳатдан ҳам Кумуш ва онасининг бирдан-бир ишонгандари яна Ҳасаналининг ўзи эди.

Барча оғирлик Ҳасаналининг устида. Ўзингнинг туғилиб ўсган ерингга оға-иниларинг, билиш-танишларинг бўлиб ҳар нечуқда улардан шунингдек оғир кунларда сўз билан, иш билан бир ёрдам ола биласан. Аммо бизнинг Ҳасанали Тошкентда эмас — Марғилонда, кишиларини танимаган бир шаҳарда! Бошда Ҳасанали, Зиё шоҳичи билан унинг ўғли Раҳматдан яхшигина умид тутган, ҳар ҳолда улардан бошқа таянарлик кишим йўқ, деб ўйлаган эди. Баҳтга қарши бу фикридан ҳам тезда қўл ювди: Зиё ака билан Раҳмат ҳам қўлга олиндилар ва Ҳасаналининг ўзи ҳам қидирила бошланди. Ҳасанали ва Кумушбибиларнинг қайғулари яна бир қат ошди, қўрқинч устига қўрқинч қўшилди. Ҳасанали ҳам Отабеклар билан бирликда биринчи кун қўшилиб қамалган бўлар эди, бироқ унинг саройда бўлиши улардан ажralиб қолишига сабаб бўлган эди. Қўрбоши

¹ Вартага — гирдоб, ҳалокатли жой.

йигитлари томонидэн Ҳасанали ҳам қидирилиб бошлангач, улардаги — «...балки бугун, эрта бўшатиб юборрлар» деган умид ҳам бўшга чиқди. Бошда Ҳасанали ўз эрки билан ҳукуматга топширилиб, маҳбусларга жазо келса бирлиқда тортиб, қутулиш мұяссар бўлса, бирга қутулишга йилаб қараган эди. Унинг бу фикрига Кумуш билан онаси қарши тушдилар — «Сизнинг озод юришингиз маҳбуслар учун балки фойдалик бўлар!» дедилар. Ҳасаналининг ўзи ҳам уларнинг раъйини мувофиқ топди. Бироқ унинг ташвиши икки қат ошди, ҳар дақиқа ҳадукда, қўрбоши йигитларидан қочиб яширишишга, ҳар соат жой янгилашга мажбур эди.

Ҳасанали кунларини томоқсиз, тунларини уйқусиз кечира бошлиди: Отабеклар нега қамалдилар, қандай гуноҳлари бор экан? Отабекнинг ипидан-нинасигача бўлган сири унга маълум эмасми? Бу жиҳат билан ўйлаганда — «Қутидорларнинг бирор ишлари балосига қолди-ёв!» деб фикр қиласр эди. Бу фалокатни умумийроқ текшира бошласа, ҳалқ оғзида мақол ўрнида истеъмол қилинган — «Ажалингнинг етиши қилган ёзигингдан эмас — бек акангнинг қонсираши!» деган гап кўнглига тушар эди-да, беихтиёр уфлаб юборар эди.

Орадан беш кунлар ўтди, маҳбуслар зиндан балосидан қутула олмаганлариdek, уларнинг қамалиш сирлари ҳам ҳеч кимга билинмади. Ҳасанали шу беш кун ичida маҳбусларнинг нажотлари йўлида қора пуллик иш чиқара олмаганидек, бундан кейин ҳам бир иш қила олишига кўзи етмай қолди. Чунки қўрбоши йигитларидан сақлана олишнинг ўзи ҳам унга катта вазифа даражасида эди.

Ниҳоят, Марғилонда туриш фикридан қайтиб, Тошкент жўнаш хаёлига тушди. Бу кунларда ҳам Тошкент тинчсизлиги бир тарафли бўлмаган, ҳануз Тошкент Кўёкон сипоҳлари томонидан муҳосара¹ ҳолатида эканлиги тўғрисида хабарлар келиб турмоқда эди. Ҳасанали бу гаплардан хабарсиз эмас, Тошкентта кириб олишнинг қай даража қўрқинч бўлганлиги ҳам унинг кўз ўнгидаги эди. Иш шундօғ бўлса ҳам у Тошкент жўнаш учун ўзида бир мажбурият ҳис этар, нажот йўлларини энди Тошкентдан изламаса, бошқа чора йўқ эди.

¹ Муҳосара — қамал.

Қарорни шунга бериб, бу фикрни Кумуш билан Офтоб ойимга сўзлади. Уларда эпақали бир мия, Ҳасаналига йўл кўрсатадиган иктиёр қолмаган, топганлари фақат йиги эди. Ҳасаналининг — «Сиз билан маним қўллари-миздан бир иш чиқадирган ўхшамайдир. Нима бўлса ҳам мен Тошкент бориб, нажотни ўша ердан изламасам бўлмас!» дейишига қарши Кумушбиби бир хил синик товушда:

— Марғилонда топилмаган нажот Тошкентдан топилсинми? — деди.

— Биз энди шунга мажбурмиз, қизим,— деди Ҳасанали.— Қайин отангиз эҳтимол бунинг бирор чорасини топар!

— Биз энди шундай қола берамизми, агар золимлар...— деди-да, Кумуш, сўзининг охирини айттолмай ўкраб юборди. Ҳасанали ҳам ўзини куч ҳол билан йигидан босар экан, Кумушни юпатди:

— Ундаи бўлмагир хаёлларга тушманг, қизим.— деди,— қушбеги бошқаларга қараганда инсофли ҳокимдир. Худо хоҳласа мен Тошкентдан қайтгунча улар ҳам зиндандан қутуларлар.

Бу кун кечаси у йўл тайёрликларини кўрди. Миниб кетиши учун қутидорнинг саман йўргасини белгилади. Эртаси эрталаб Марғилоннинг Қўйқон дарабозасидан биринчи галда чиқувчи Ҳасанали бўлди.

15

ТОШКЕНТ ҚАМАЛДА

Бу кун Тошкент қамалининг эллик биринчи куни. Совуқ бир оз юмшаб тушган, қуёш очиқ ҳавода ҳаракат этмоқда эди. Ерлар эриб ҳамма ёқ шилт-шилт лой, қўргон кунгираларидағи қировлар буфга айланиб, кўкка кўтарилимоқда эдилар.

Бу кун тонгдан бошлаб Тошкентнинг Самарқанд дарбозаси томонидан бўлган қўйқонликларнинг ҳужумлари ўзлари учун сўнг даража ҳалокат билан тугалган. Қўйқон сипоҳлари эндиги ҳужумгача шикаст, рехтларини тузатиш, яраларини боғлаш, дамларини олиш учун қўргон ёнидан қаёққадир қўшларига кетганлар. Қарамоққагина эмас, сўзлашга ҳам даҳшат: Камолон дарбозаси билан Самарқанд дарбозасигача бўлган қўр-

ғон осталари (бу икки дарбоза оралари беш юз одим келадир) бошсиз ва иштондан бошқаси тұналган инсон гавдалари билан тұлибдир! Бу очиқ мозористонни қүргөн кунгиралари устида мудофаадан сұнг чарчаб, қуёшда исиниб ўтирган саллали, қалпокли ва попоқли Тошкент мудофиълари минг турли шодликтар ичида томоша қиладылар. Бу икки дарбоза орасида икки хил ҳолат ҳукм сурады -- қүргөн осталарида жағаннам дахшати билан яланғоч, боши танидан олиниб қора қонига беланған одам гавдалари ётиб, қүргөн устида иккінчи кишилар дүнё шодлиги ичида сузадылар.

Қүргөн устидаги қаҳрамонлардан биттаси кула-кула бир саркардан отиб үлдиригандын сүзлаб — «Падар лаънатини үзим хұбам отдым-да, отининг устидан уч газ күтарилиб йиқилди!» дейдир. Тагин биттаси үліклар ичидан кимнидир күрсатыб — «...ана, ана, ҳов ана! Үша қипчоққа ўқ тегиб үлиб-үлолмай, юриб-юролмай инграб ётган экан, қиличим билан бошини шартта кесиб, белидаги олтин камари ва устидаги кимхоб пүстинини олиб чиқдым!» дер. Ҳар ким бу кунги урушдаги үзининг эрликлари билан, құлга туширган олтин камари, ёқут күзли узуги, совсар пүстини, кумуш қинли қиличи ва бошқа үлжалари билан мақтанади.

Шу вақтда қүргөн устидан қүшиқ товуши эшлилади:

Замонинг замон бұлсин, ёр,
Азизбегинг омон бұлсин, ёр,
Дардига даво топмай, дүст,
Норматинг¹ ёниб ўлсин, ёр!

Биз энди шу үліклар ёни билан қүргөн бүйлаб бир оз илгарига юрсак олти газ юксакликда, беш газ кенгликда, икки ёни саккыз газли қүргөн девори билан үралған, кунботарға қаратыб қурилған Самарқанд дарбозаси ёнида тұхтармиз. Теварагимиздан душманнинг ҳужум қилиш қүрқинчи бўлғанликдан биз ортиқча чидамсизлик билан дарбозани қоқа бошлармиз:

— Очингиз, бек ака, тезроқ очингиз!

Дарбоза беклари бизга илтифот қилмай, ўтира берадылар. Бизнинг ўн беш дақиқалик жон ачигида қақшаганимиздан кейин дарбозабонлардан биттаси зерикеб секингина қүргөн деворига чиқадыр-да, мўралаб

¹ Нормат — Нормуҳаммад қушбеги.

бизга қарайди. У бизни аниқ тошкентлик бўлганимизга ишонса дарбозага солинган нор түяning бошидек қулфни минг машақат билан очиб, занжирини туширадир. Биз ўзимизни ичкарига олгач, дарбозабон ўзининг ҳазми кўтарган қадар бизга пўнғилладир-да, дарбозани берклаш ҳаракатига тушади. Энди биз дарбозабоннинг ҳайъатига қараймиз: ошланган қўй пўстагидан пўстин кийиб, белига бутун бир бўздан белбоқ боғлаган ва белбоғига ярим газ чамалик калид осган туркман по-поқли бир киши. Шундан кейин биз дарбозанинг ўнг томонига қараб юрамиз. Дарбозадан ўн беш одимлар нарида шийпонга ўхшаш тўрт тарафи очиқ бир бинода дарбоза беклари гулхан солиб, чилим чекиб ўтирадилар. Биз қўргоннинг ости билан илгарилашда давом этамиз. Энди биз бояги мудофиъларни ичкаридан қўрамиз: мудофиълар қўргоннинг энг юқориги погонасида ўзларининг турли тус ва бичиқдаги кийимлари билан, қайсилари шашвар тутиб, қайсилари милтиқ ушлаб, қўргон кунгирасига суюниб, бошларини қуёшга, бериб ўтирадилар. Қўргоннинг Камолон дарбозасигача бўлган қўриқ ўринлари шунингдек мудофиълар билан тўлган бўлиб, ўзига бир турли кўриниш ташкил этадир.

Камолон ва Самарқанд дарбозаларининг ўрта бир ери бўлган қўргон остида кимхоб тўн кийиб, симоби салла ўраган, белига кумуш камар босглаб, қилич таққан бир бек олдидаги бир уйим нарсага ишорат қилиб, ёнидаги бир йигитта ғиманидир уқдирмоқда эди. Биз яна эллик-олтмиш одим юриб ҳалиги сўзлашиб турган беклар яқинига борсак, қўргон ташқарисида кўрган даҳшатларимизни ўзининг кўланкасида қолдиратурган яна бир «даҳшатлар тепаси»га кўзимиз тушадир-да, қўрқувимиздан соатлаб ҳушимизни йўқотиб қўйишга мажбур бўламиз.

Уч-тўрт юз инсон бошидан турғизилган бир тепа!

Қаричга келадиган узун соқоллар, бошдаги хун олуд¹ сийрак соchlар, бўзарган юзлар, қонга беланиб, ярим очиқ ҳолда қорачиқ ўрнини қўрқинч бир оқлик босган кўзлар дунёга ва шу ҳаётга лаънат ўқигандек қарайдилар, айниқса бир бош, эҳтимолки ҳали йигирма ийлни ҳам ўтмагандир, мурути ҳам чиқмаган! Хун олуд

¹ Хун олуд — қонга беланган.

қуюқ қошлари остидаги ярим очиқ кўзлари кимнидир излагандек қарайдир... Ярим очиқ иринлари ичидаги оқ тишлари билан тилини ғарчча тишлаганда, гўё шу турмушда, шу замонда туғилгани учун «аттант» ўқийдир.

Бу бошлар уюми устида турган қўргон бегиси, ёнидаги йигитга бошлар орасидан бирини кўрсатиб, ўз танишларидан бир бекнинг боши бўлганлигини сўзлайдир. Шу пайтда Камолон дарбозаси томонидан яроғланган учта отлиқнинг от чоптириб келганлари кўрилиб, қўргон устида ўтирган мудофиълар ичida олағовур қўпти:

— Ҳудайчи, Сулаймон ҳудайчи,¹ — дейишидилар.

Ҳудайчи қўргон беги қотига етиб бек ҳазратларининг ҳозир етиб келишларига башорат берди, яна отининг бошини буриб, йигитлари билан орқага қайтди. Ҳудайчибошининг хабаридан бу кунги улуг муваффакиятни қутлагали Азизбекнинг келиши маълум бўлар эди.

Ҳудайчи жўнагач, қўргон бегининг пайтавасига қурт тушиб, типирчилаб қолди ва у ёқдан-бу ёққа югура бошлади:

— Ҳой қўргон устидаги азаматлар! Ҳозир бўлингиз, ясов тортингиз, бек келадилар! Ҳой Ҳусайнбек, дарбозонларга югор, ҳозир турсинлар! Ғанибек юзбоши, сиз йигитларингизни тартиблангиз! Ясовулбоши, ҳозир бўлингиз!

Қўргоннинг қўриқ ўрнидаги мудофиълар ҳаракатга келдилар, юқори қўриқдан бир погона қуйига тушиб, саф-басаф тортилар. Шовқин-сурон орасида қўргон беги от устида қўргоннинг у бошидан-бу бошига чопиб:

— Ҳозир бўл, йигитлар! Тартибингни тузат, саломга тайёрлан! — деб қичқириб юар эди. Мудофиълар қўлларидағи милтиқ, шашвар, ойболта, қилич ва найзалари билан тизилишиб одилар. Сафнинг ўрта еридан яшил байроқ кўтарилиди. Шунинг билан Азиз парвоначининг истиқболига лозим ва вожиб² бўлган барча тартиб ва тантанага ҳозирланган бўлиниди.

¹ Ҳудайчи — удайчи, адъютант маъносида бўлиб, одатда ҳон келиш одидан ҳалқни огоҳлантириб ўтувчи бекдир. Азизбек ҳам ўзига ҳудайчи белгилаган эди.

² Вожиб — бажарилиши мажбурий.

Орадан уч-тўрт дақиқа ўтгандан кейин Камолон тарафидан бир юз чамалик саркарда ва йигитлари билан Азизбек кўрийди. Тилла жабдуқли қизил айгирга минган, қуёш ёғдуси билан турли тусга кириб товладиган, ёқа ва этакларига олтин уقا тутилган кимхоб тўн кийиб, белидаги олтин камарга кумуш қинли жазоирий қилич осган, бошига оқ шойидан салла ўраб оёғларини кумуш узангига тираган, сийрак қошли, чўққи соқол, буғдой рангли, қирқ беш, эллик ёшлар чамалик бир киши эди. Унинг орқасидан қора отга отланниб, зангори мовутдан уқалик тўн кийган, кумуш камарнинг ўнг томонига қилич, сўлига тўппонча қистирган, бошига барра попоқ кийиб, жин ялаган деганларидек, қошсиз, қорамтири юзли, туки чакагининг устида бир оз, иягида бир оз сийрак, кўримсиз қора соқолли, кўзлари ичига ботифроқ, аммо қон қўйилгансимон бир киши келар эди. Бу киши Азизбекнинг амири лашкари ва ўнг қўли бўлган Райимбек доддоҳ эди. Унинг қаторидаги иккинчи киши кичикроқ саман отта отланниб, устига Бухоронинг ола-байроқ матосидан чопон кийиб, камар ўрнига чопонини турмаклаган, бошига катта салла ўраб, қамчи сопи билан эгарнинг қошига такя қилган, тўла кўркам юзли, катта малла қўзли, узун мош-гурунч соқолли мулланамо бир зот бўлиб, бу киши яроқсиз эди. Азизбек орқасидан келгувчи бу икки отлиқдан сўнг сипоҳлар туркуми бопланиб, мовутдан тиззагача тушган калта камзул, қизил мовутдан шим, оёғида сағри этик, бошида Райимбек доддоҳнинг бошидагидек попоқ, аммо уст томони қизил мовутдан, оқ қайишдан камар, сўлига қилич осилиб, ўнг томонига тўппонча қистирилган ҳар қаторда тўрттадан отлиқ келмоқда эдилар. Сипоҳларнинг кексаликлари тўғрисидаги нуқсонни эътиборга олинмаса кўриниш муентазам эди.

Қўргон устида ясов тортган қаҳрамонлар қўл боғлаб икки букилгансимон таъзим билан Азизбекни илгарига ўтказа бошладилар. Азизбек уларга қарши олтин сопли қамчисини кўкрагига кўндаланг қўйиб, боши билан жавоб ишораси бериб олдинлар эди. Шу

кезда бошлар уюми ёнида турган қўргон бегиси отдан ерга тушиб жиловини қовуширилган қўллари орасига олди. Бошлар уюми билан Азизбек ораси қирқ-эллик от одими қолган эди. Азизбек мудофиъларнинг саломларига жавоб қайтаришни ҳам унугиб, кўзини кесик бошларга тикди. Азизбекнинг орқасидаги саркарда ва сипоҳлар ҳам бу даҳшат уюмига эгарга қийшиқ ўтириб томоша қилиб келар эдилар. Азизбек кишилари билан бошлар ёнига келиб тўхтади.

Азизбек бирмунча вақт бошларни томоша қилиб турди-да, қаршида қўл боғлаган қўргон бегига қараб илжайди:

— Баракалла ғайратларингизга! — деди Азизбек.— Бугун қипчоқларга рустамона жавоб бериб, ўзларини ҳам итдек қиргансиз! Бунчалик ғайрат кўрсатган фуқароларга раҳмат, дунё тургунча турсинлар!

Азизбек ташаккурини битиргач, ҳудайчи қўргон устидаги мудофиъларга бор товушини қўйиб қичқирди:

— Бек жаноблари бу кунги рустамона ғайратларингизга раҳмат айтиб, ҳақларингизга дуо қиласидилар.

Мудофиълар дунёни бузиб жавоб бердилар:

— Қуллуқ, тақсир, қуллуқ! Тақсиримиз дунё тургунча туриб, сояи давлатлари бошимиздан кам бўлмасин!

Азизбек қамчисини кўкрагига кўндаланг қўйиб мудофиъларга қуллуқ қилди ва ҳудайчига буюрди:

— Қўргон бегига кимхоб тўн, юзбошиларга атлас чопон, бошқа йигитларга уч тангадан пул инъом берилсин!

Ҳудайчининг хабаридан сўнг мудофиълар жавоб қайтардилар:

— Давлатлари зиёда бўлсин!

Хазиначилар сипоҳлар орқасидан икки отни етаклашиб ҳудайчи ёнига етдилар. Бир отнинг устига чопонлар ортилган, иккинчи отдаги катта хуржуннинг икки кўзи лиқ тўла танга эди. Бошлаб ҳудайчи от устидан бир кимхоб тўнни олиб, қўргон бегига кийдириди. Қўргон беги тўнни кийиб Азизбек ҳақига узун дуо қилди. Ҳудайчи бир йигитга тўн қўлтиқлатиб, иккинчи йигитга танталардан олдириб қўргон беги билан бирга мудофиълар ёнига чиқди. Қўргон бегининг кўрсатишича, кимга уч танга пул, кимга адрес чопон улашила бошланди.

Азизбек от устида бошлар уюми теварагида айланып Райимбек додхоҳ ва ола-байроқ түнли кишига ўзининг таниш сарқардаларидан бўлган кимларнингdir бошларини кўрсатмоқда. Тирик вақтларида нима ўшларда бўлиб өа қорачопонлиларга қандай зулмлар қилганинни сўзламоқда эди. Азизбекнинг бу гапларини Райимбек додхоҳ самимий эшитса ҳам, ола-байроқ түнли одам «тақсир, тақсир!» билан жавоб бериб, бошлар уюмидан жиркангансимон эгарининг қошига кўзини тикиб турмоқда эди.

Ярим соатлик бир фурсатдан кейин қўргоннинг бошидан-оёқ ясов тортган мудофиъларга инъомлар улашилиб битди-да, ҳудайчи ўзининг қуруқ хуржуни билан Азизбек қошига келиб қуллуқ қилди. Азизбек қаршисида қўл боғлаб турган қўргон бегидан сўради:

- Иигитларингизнинг барчаси қуруқ қолмадими?
- Давлатингиз соясида, тақсир!
- Қипчоқларнинг бу кунги ҳужуми қай вақтда бўлди?

— Гонг ёрир-ёrimас Оқтепа¹ томонидан тўп ота бошладилар,— деди қўргон беги,— ўн беш дақиқа ўтар-ўтмас отлиқ қипчоқ қўшинлари кўриниб, Самарқанд дарбозасига югурдилар. Шунгача мен ҳам, давлатингиз соясида, икки дарбоза ораларига мерганларни яйратган эдим, бошлаб Самарқанд дарбозаси қўриғидан отишга буюрдим. Мерганлар ўн беш дақиқа орқасини узмай милтиқча ўт бериб турдилар. Қипчоқлар бизнинг томондан отилган милтиқ ўқларига чидолмай Самарқанд дарбозасини ташлаб, Камолон дарбозасига юзландилар. Сўнира, давлатлари кўланкасида, Камолон қўриғидаги мерганларни ишга қўйдим. Бир соат чамаси отишгандан сўнг ёв бизнинг ўқимизга чидолмай, икки дарбоза орасида уч-тўрт юз ўлик қолдириб қочишига мажбур бўлди. Биздан ёлғиз беш киши ўлиб, тўқиз киши яраланди.

Азизбек жуда завқланган эди, яна бир қайта бара-калла ўқиб сўради:

- Нормат қипчоқ кўриндими?
- Йўқ, тақсир, қўргон яқинига йўламади, бўлганда...
- Ўшанга ҳозир бўлмоқ керак!

¹ Оқтепа — Самарқанд дарбозасининг гарбидағи бир мавзу.

— Давлатлари ёри берса, албатта, бизнинг муддао
ҳам шунда...

Азизбек ўз оғзи билан мудофиъларга — «Мен сиз-
лардан рози!» деб қичқирди ва мудофиъларнинг қий-
чув дуолари остида сипоҳлари билан Самарқанд дар-
бозасига томон ҳаракат қилди.

Бугун Азизбек ғолибият далдасида қўргонлардан
бир айланиб чиқмоқчи эди. Шунинг учун Самарқанд
дарбозасидан ўтиб, қўргон ости билан Чақарга қараб
юришдилар. Қўргон Чақарнинг чуқур жарлик аригига
тақалиб тугалар эди. Чақар суви устига қўргон тиклаш
мумкин бўлмай, жарнинг усти қўргондан табиий бўш
эди. Аммо жарнинг нариги томони бир гепадан иборат
бўлиб, жануб биқини маълум Чақар суви билан, гарби
Бўзсув ва Кўкча ариги билан ўралган бурун каби бу
тепа қўргонсиз ҳам душманнинг ҳужумига ўнгайсиз
эди. Тепа устига сипоҳлар туриши учун бир неча бино-
лар солинган, жануби-гарбга қаратиб бир, гарбга қа-
ратиб бир ва шимоли-гарбга қаратиб яна бир; бариси
учта тўп қўйилган эди. Бу тепа устида доимий тўпчи ва
коровуллар турар эдилар.

Азизбек сипоҳлари ила жарга тушди ва сув кечиб
ҳалиги тепага юзланди. Тўпчи, коровуллар кўздан ке-
чирилиб, уларга бир неча тангадан инъом берилди.
Шундан кейин тепанинг кун чиқишига қараб қайтди-
лар. Чунки тепанинг бошқа томонлари, юқорида ай-
тилгандек, бир неча терак бўйи жарлик бўлганликдан
Кўкча дарбозасига ўтиш учун Сузик ота мозори яқини
билан Кўкча аригига тушилур ва ундан кейин Кўкча
қўргонларига қайтиб келинур эди.

Кўкча қўргонлари қўриғида анови қўргонларни-
дек мудофиълар кўп бўлмаса ҳам, йўқ эмас эдилар.
Худайчи Азизбекдан илгарироқда қўриқчиларни огоҳ-
лантириб борар, милтиқ, шашвар тутган ёш ва кекса
муҳофизлар уни саломлаб қарши олар эдилар ва Азиз-
бекнинг — «Раҳмат, фуқароларим!» сўзини эшитиб ях-
шигина талтайиб қолар эдилар. Шу равишда Кўкча, Чи-
ғатой, Сакбон, Қорасарой, Тахтапул, Лабзак дарбоза-
ларини ўтиб, энг кейин Қашқар дарбозасига етдилар.
Қашқар дарбозаси ўрдага яқин бўлгани учун мунда му-
ҳофиз ва сипоҳлар талайгина бор эдилар. Уларнинг
саломларига кўмилиб, Қашқар дарбозасининг муйиши-
га етган ҳам эди, ташқаридан кимнингдир дарбозани

ошибич тақ-тақ ургани эшитилиб, Азизбекнинг оти ҳуркибми, қўрқибми, кетига бурилиб тўхтади. Бошқалар ҳам тўхташга мажбур бўлдилар.

Азизбек қаршисида қўл боғлаб турган дарбоза бегига бақирди:

— Нега қараб турасан, дарбоза устига чиқ, ким экан у ит?!

Дарбоза беги югуриб қўрғон деворига чиқди:

— Тақсир, бир чол!

— Дарбозангни очиб ичкарига ол! — деди Азизбек. Дарбоза очилди, ташқаридан саман отини етаклаб Ҳасанали кирди-да, кутилмаган иш устидан чиққани учун қўрқиб, Азизбекка салом берди.

17

ЮСУФБЕК ҲОЖИ

Райимбек доддоҳнинг ёнидаги бизга таниш ола-байроқ тўнли киши Ҳасаналини кўриши ҳамоно:

— Ҳо-о-о бизнинг Ҳасанали-ку! — деди.— Кел, Ҳасан, кўришайлик, Отабек эсонми?

Ҳасанали келиб кўришиди. Юсуфбек ҳожи кўришар экан, Азизбекка деди:

— Бу бизнинг кишиимиз, тақсир! Марғилондан келадир.

Азизбек лабини тишлаб қолди. Чунки дарбоза тақиллатиб отини ҳуркитган Ҳасаналини жаллодга топшириш нияти, албатта, йўқ эмас эди. Юсуфбек ҳожининг сўзига жавоб бермай йўлида давом этди. Ҳасанали сипоҳлар орқасидан, Юсуфбек ҳожи Азизбек кетидан Ўрдага қараб юрдилар. Ўрда дарбозасига етгандан кейин, кутиб турган ўрда беги Азизбекнинг қўлтиғидан олиб отдан туширди. Азизбек ўрда ичига кирмоқчи экан, Юсуфбек ҳожи отдан қўниб сўради:

— Менга рухсатми, бек?

Азизбек йўл устида ҳожига қаради:

— Рухсат, эртага чойни ўрдага келиб ичинг!

— Яхши, тақсир.

Юсуфбек ҳожи сипоҳлардан бирининг қўлтиқлаши билан отига миниб, нарида кутиб турган Ҳасаналига қараб юрди. Сипоҳлар ҳам ўрда ичига от етаклашиб кира бошлидилар. Юсуфбек ҳожи Ҳасаналининг вақтсиз ҳам Отабексиз қайтишидан ташвишланган ва қан-

дай бўлса ҳам бир фалокат юз берганига ишонган эди:

— Нега вақтсиз келдинг, Отабек соғми? — деб сўради.

Юсуфбек ҳожи Ҳасаналига етмасданоқ бу саволни берди. Ҳасанали эшитмадими, ёхуд эшитса ҳам эшитмаганга солдими, ҳар нучук жавоб бермади.

— Нега индамайсан?

— Отабек саломат...

— Бўлмаса нега вақтсиз келдинг, Отабек қани?

Отабекнинг қамалишилан хабар бериш Ҳасанали учун жуда оғир туюлган эди. Ниҳоят, кўзидағи ёшини артди-да:

— Отабек Марғилон ҳокими тарафидан қамалди! — деди.

— Нега, нега? — деди ҳожи, отидан сачраб йиқилишга етган эди. — Сабаби нима?

— Сабаби маълум эмас.

— Астағфурилло! — деб қўйди ҳожи, ўзини бир оз тўхтатган эди.

Ҳасанали Отабекнинг Марғилон борганидан тортиб қамалишигача бўлган ҳикояларини сўзлаб кетди. Юсуфбек ҳожи бекнинг уйланишини ҳам оддий гаплар қаторида эшитиб ўткарди.

— Марғилонда туриб бир иш чиқаришга кўзим етмагандан кейин Тошкентта келишга мажбур бўлдим, — деди Ҳасанали ва шу гап билан можарони сўзлаб тутгатди. Ҳожи воқиани эшитиб чуқур бир мулоҳаза ичидагорар эди. Унинг қандай киши бўлганини Тошкентнинг етти яшаридан етмиш яшаригача билганликдан гузар ва маҳаллаларда унга дуч келган кишилар жойларидан туриб салом берарлар, ҳожи бўлса жавоб қайтаришни билмас, гўё кишиларни ҳам кўрмас эди. Ниҳоят, шу ҳолда кўп юргач, орқасидан келмоқда бўлган Ҳасаналига қараб отининг бошини бурди ва:

— Отабек билан бирга қамалгандарни неча киши дединг? — деб сўради.

— Уч киши: бири Мирзакарим қутидор, иккинчи Зиё шоҳичи, учинчи Раҳмат.

— Яхши, сен бу тўртовининг ўтиришларида бўлганмидинг?

— Бўлган эдим.

— Нима ва қайси тўғриларда сўзлашдилар. Отабек қипчоқларга қарши сўзламадими?

— Сўзламади. Бошқаларнинг ҳам бу тўғрида сўзлари бўлмади.

— Уларнинг мажлисларида бўлмаган вақтинг ҳам бўлдими?

— Ҳар бир ўтиришларида мен ҳозир эдим.

— Яхши, сен улар билан қай ерларда ўтиришдинг?

— Биринчи мартаба Зиё аканикида бўлдик, иккинчи...

— Тўхта, Зиё аканикида меҳмонлар неча киши эдилар?

— Қутидор, Отабек, андижонлик Акрам ҳожи, мен, Зиё аканинг қайниси — Ҳомид деган бирор. Зиё ака ва унинг ўғли... ҳаммаси етти киши!

Юсуфбек ҳожи отининг ёлини қамчиси билан тарар экан, уч-тўрт дақиқа ўйлаб қолиб, сўнгра сўради:

— Иккинчи ўтириш қаерда бўлди?

— Иккинчи ўтириш Зиё аканикидан икки кун сўнг қутидорницида бўлди. Бу мажлисда ҳам ўша биринчидаги кишилар эдилар. Ёлғиз Ҳомид йўқ эди.

— Тағин қаерда ўтиришдингиз?

— Бошқа жойда ўтиришмадик... Мундана йигирма кундан кейин тўй бўлди. Тўйда, албатта, бундай сўзлар гапиришилмайдир.

— Иккинчи мажлисингизда ким ҳали, Ҳомид дедингми, нега йўқ эди?

— Билмадим, нега йўқ эди... Қутидор айтмаган бўлса керак.

— Қамалғувчилар: Отабек, Қутидор, Зиё ака, Раҳмат, шундоғми?

— Шундоғ, ҳожи.

— Сени ҳам қўрбоши йигитлари қидирдилар?

— Қидирдилар.

— Акрам ҳожи Андижон кетган эди. Шунинг учун уни тополмадилар; шундоғми?

— Шундоғ.

— Ҳомидни-чи?

— Уни қидирмадилар, шекилли... Отабек қамалгандан сўнг аллақаерда кўргандек бўламан.

— Бизга келин бўлмишни гўзал, дедингми?

— Илоҳи Отабек саломат қутулсан, муҳаббат қўйганича бор...

— Келиннинг сулувлиги Марғилонда маълум эканми?

- Маълум экан, тилларда достон экан.
- Ҳомид уйланган йигитми, билдингми?
- Уйланган. Бизнинг ҳужрага келганда икки хотини борлитини ўз оғзидан эшишган эдим.
- Ҳомид сизнинг ҳужрага нима учун келган эди?— деб сўради ҳожи.— Нега буни боя сўзламаган эдині?
- Эсимдан чиқибдир,— деб узр айтди Ҳасанали.— Ҳомид, Раҳмат билан бирга Отабекни Зиё аканикига таклиф қилгали келган эди ва биз уларга ош-сув қилиб жўнатган эдик. Аммо уларнинг ундай-бундай сўзлари бўлмаган, тўғрилиқча келиб кетган эдилар.
- Яхши, ўша Ҳомидни сен қандай одам, деб ўйлайсан?
- Қўланса сўзли, ичи қорароқ бир йигит эди,— деди Ҳасанали, бир оз боргач, сўради.— Отабекнинг ишини оғир, деб ўйламассиз?
- Ҳожи жавоб бермади. У жавоб бергали ҳам қўрқар эди. Унингча, иш жуда нозик, гоятда қўрқинчли эди. Чунки, Марғилон зинданонида ётувчи қипчоқ душмани бўлган Азизбек оталигининг ўғли эди! Тошкентнинг исён чиқарган бир замонида Отабекдек бир йигитнинг Марғилонда, қандай гуноҳ билан бўлса-бўлсин, ушланиши ҳар жиҳатдан ҳам мудҳиш эди.
- У ўғлининг қутулиши йўлида ҳар бир мулоҳаза кўчасига кириб чиқмоқда, аммо ҳар бирисидан ҳам бўш ва умидсиз қайтмоқда эди. Энг сўнг ўғлига ҳужум қилган бу фалокатнинг тадбиридан ақли ожиз қолди, миаси ишлашдан тўхтади ва шундан сўнг: «Парвардигор! Кексайган кунларимда доғини кўрсатма!» деди ва кўз ёшлари билан соқолини ювди.

— Ҳасанали, унинг қамалганини зинҳор онаси билмасин!

— Албатта.

Шундан сўнг отларини етаклашиб ичкарига кирдилар.

...Бугун соат ўн иккода Отабек ила Мирзакарим қутидорнинг исёйчилик гуноҳи билан дорга осилишларини жарчи шаҳарга хабарлаб юрар ва ҳалқ оғзида Отабекларнинг эмиш-мемиш ҳикоялари эди.

* * *

Ҳомид ила биргалашиб кирган миршабни қўрбоши ташқарига чиқмоққа буюрди-да, Ҳомидни ўтиришга имлади.

Қўрбоши ниманидир сўзламоқчи бўлса ҳам, негадир унинг тили осонлик билан ҳаракатта келмас ва ўзи ҳам бир турли ўнгайсизликда эди. Нихоят, қўрбоши ўзига бир турли жасорат берди:

— Боболар «Дунёники мирикам икки!» деганлар,— деди,— тўғриси ҳам шундоғ: ўзингни юз ёққа урсанг ҳам тирикликнинг яна бир бошқа ямоғи чиқиб туради...

Туйғун Ҳомид қўрбошининг нима мақсади борлингини пайқади:

— Тўғри сўзлайсиз, тақсир,— деди,— дунёники ҳамиша мирикам икки, шу етишмаслик балосидан тўйиб баъзи вақтларда кишининг дунёдан чиқиб кетгиси келиб қоладир. Яхшики, дунёда ошна-оғайнин деган кимарсалар бор... Агар шулар бўлмаса-чи, киши аллақачон дунёдан чиқиб кетадир. Шунинг учун мен оғайниларни кўзларим устида тутаман, уларнинг муҳтоҷлик чоғларида кўрсам, ўзимни гаров қўйиб бўлса ҳам эҳтиёждан чиқаришга тиришаман.

Қўрбоши тиззаси устига кўйдаланг қўйилган қиличининг икки тарафидан босиб бир қўзғалиб қўйди:

— Балли, балли, мулла Ҳомид, мундай оғайниларнинг садағаси кетсанг ҳам арзир,— деди, томоқларини қириб қўйди.— Шу кунларда ўғилчаларнинг ёши етиб суннати набиённони бажо келтириш тақозо этадир... Тўй керакларидан кўпининг тадоригини қилган бўлсам ҳам, етишмаган ерлари ҳам кўп. Шуни сизнинг келишингиз олдида ўйлаб ўтирас эдим...

— Бек ака,— деди Ҳомид ва тусиға ясама кулиш чиқарди,— сиз аччиғлансангиз ҳам айтай: беклар зоти кишига сира ҳам ошна бўлмас эканлар. Айниқса, сиз ҳамон ўзингизнинг беклигингизга бориб истигонгизни¹ эскича олиб борасиз.. Бошингизда шунчалик қайғунгиз бўлур эмиш-да, бир оғиз менга айтмас эмишсиз?

Қўрбоши Ҳомиднинг заковатига қойил бўлиб илжайди:

— Йўқ, йўқ, мулла Ҳомид,— деди,— бу ёқда гап

¹ Истифо — такаббурлик қилмоқ.

бор: ҳукумат хизматида турганингдан кейин, юз ёқнинг мулоҳазасини қилар экансан...

— Тузик, бек ака, аммо меним ошначилигим тамом бошқачадир,— деди Ҳомид ва ёнчигини чиқариб, бир қўлидан иккинчи қўлига олтинларни санаб тушира берди. Қўрбошининг кўзи олтинлар устидан ўйнаб, булар баракасида қиласиган суннат тўйисини, Марғилон беклари олдида ортирадиган обрўсини ўйламоқда эди. Олтинлардан йигирматаси ажратилгач, саноққа ишонмай кўриб турганим тушми, деб уйқусиради. Ҳомид олтинларни узатди:

— Мана, бек ака, бу арзимаган олтин холис ошналигимизнинг бошланишидир, яна етмагани бўлса, қараб турмасмиз.

Қўрбоши титраб-қақшаб олтинларни жойлади. Ҳомид ниҳоятда хурсанд эди.

— Хўш, мулла Ҳомид, энди бугунги ҳангомалардан сўзлашайлик,— деди бек.— Поччангиз ила жиянингизнинг бу ишга аралашиб қолганлари ёмон бўлди-да!

Бу сўздан Ҳомиднинг юзига қайғуриш аломати чиқди ва эътибор билан қўрбошининг оғзига қаради.

Қўрбоши давом этди:

— Бу икки бегунохнинг қамалишларига ҳам ўша ярамас сабаб бўлди. Йўқса, уларни қамоққа олишга қушбеги буюрмас эди. Аммо кечаги қушбегига сўзланган сўзингиз Отабек ила қайин отасини ўлимга маҳкум қилгандек, поччангиз ила жиянингизни бир қадар оқлайдилар. Шунинг учун мен борган сўнг бўладиган ҳукм мажлисида эҳтимол қариндошларингизни қутқазишга муваффақ бўлурман. Ҳар ҳолда қариндошларингизнинг қаттиқ жазо тортишлари шубҳалиқдир, сиз пайқадингизми, йўқми, кеча мен жарчига бу кунги осилувчиларни Отабек ила Мирзакарим бўлганлигини тайинлаган эдим.

— Марҳаматингизга қуллуқ! — деди Ҳомид.— Аммо шундоғ бўлса ҳам, қариндошларим тўғрисида ҳавфдаман... Бунинг бошқачароқ бир эпини топиб бўлмасмикин?

Бояги мукофотлар қўрбошини чинлаб бош оғритишга мажбур этар эди. Бу тўғрида у анча ўйлаб олди:

— Кеча, қушбеги олдида Отабекларни қай равишида айблаб сўзлаган эдингиз, тагин бир эшитиб ишнинг режасини олай-чи.

— Қушбегига сўзлаганим шундай эди: — «Отабек айтди: энди бизнинг Тошкент халқи қипчоқларнинг жабру зулми ва тадбирсиз идораси остида ётиб жуда тўйди. Бошлаб Тошкентдан қипчоқ балосини йўқотиш учун Азизбек ва отам бошлиқ исёнга тайёрландилар. Шу мақсадда марғилонлик оғайниларни ҳам қипчоқларга қарши оёқлантирмоқ учун мени бу ерга юбордилар. Биз токай қипчоқлар қўл остида эзиламиз ва бир ҳовуч далатобларга бош эгамиз, деди. Отабекнинг бу сўзига қутидор ва Акрам ҳожилар қўшилишиб, унга бу йўлда ёрдамлашмоқчи бўлдилар. Аммо мен бўлсан бу гапга қарши тушиб, сизларнинг бу фикрларингиз янгишдир, биз уч йил бўйи жаноби Ўтаббой қушбегининг қўл осларида яшаб ҳеч бир зулм кўрмадик, шу ҳолда ҳукумат устига иқдомимиз¹ куфрони неъмат² бўлур, дедим. Отабек менга қаттиқ сўзлар айтди. Поччам ила жияним бўлса маним фикримда эдилар, аммо уйимизга келган меҳмон, деб уларга очиқ қаршилик қилмадилар. Бу мажлисдан кейин мен бир неча вақт Отабек ва йўлдошларининг қонлари тўкилмасин. деб бу гапни ичимга солиб юрдим. Бироқ Тошкентда Азизбек ва Юсуффек ҳожилар исёни бошлангандан сўнг, ўзимнинг бу ишимни ҳукуматимиз учун хиёнат билиб, қўрбоши жанобларига хабар бердим. Ўзимнинг содиқона бу хизматим эвазига жанобларидан ожизона ўтичим шулки, бу сирни сизларга билдиргучи мен бўлганлигимни ўзларидан бошқа кимса билмасин, ҳатто муттаҳамлар ҳам сезмасинлар» — мана, фақирнинг Отабекларни айблашим ва қариндошларни оқлашим хуносаси шундан иборатdir!

— Баракалла,— деди қўрбоши,— сизнинг бу гапларингиз жуда ҳам ўринли тушган. Мен ишонаманким, Зиё ака билан Раҳмат қутулурлар.

— Буни нимага суюниб айтасиз?

— Суянчигимиз маълум,— деди қўрбоши,— қушбегига Отабек ила қутидорни осмоқ фикрини берган бу сўз, поччангиз билан жиянингизни нечук қутқармасин!

¹ Иқдом — қадам босиш, оёқ ости қилиш.

² Куфрони неъмат — қадрини билмаслик, кўрнамаклик, нонкўрлик.

— Поччам билан жияним илгариги сўроқда қандай жавоб берган эдилар, буни хотирлай оласизми?

— Уларниң жавоблари кечаги сизнинг оқлашингизга сира ҳам қарши келмайдир. Чунки улар мажлисда бундай сўз бўлмади, деб тондилар. Бу эса ўз уйларига келган меҳмонларни риоя қилишлари бўлиб чиқадирда, яна иш сизнинг оқлашингизга ёпишиб келадир.

Ҳомид тагин бир мулоҳазага тушган эди. Унинг бу ҳолини кузатиб турган қўрбоши:

— Энди ортиқ ўйламангиз, мулла Ҳомид,— деди,— орада сиз қўрқарлик ҳеч бир иш йўқ!

Ҳомид нимадир айтмоқчи бўлар эди-да, ўнгайсизланиб тўхтар эди. Бир-икки қайта оғзини жўплаб қараса ҳам, яна сўзлай олмади. Қўрбоши унинг бу ҳолидан хабар топди:

— Гапиринг, гапиринг, мунда ёт киши йўқ!

Қўрбошининг бу сўзи далласида Ҳомид жасоратланди:

— Бугун ҳукм мажлисида поччам ила жияним сўзларидан янгилишиб кетсалар нима бўладир?

— Нега янгилишсинлар, улар билгандаридан ортиқни албатта сўзламаслар. Ўлим деган нарса кўз ўнгига келиб тўхтагандан кейин Отабекдек меҳмонлар риояси кўнглидан ювилур, сўзнинг тўғрисини айтишга мажбур бўлурлар ва иш ҳам сизнинг айблаш, оқлашларингиз руҳига келиб тўхтар.

Ҳомид яна ҳам ўнгайсизланиб тушди, ўзининг ички сирига шу чоққача тушуна олмаган қўрбошига лаънатлар ўқир экан:

— Айблаш, оқлаш сўзларимнинг руҳини сиз бир ёққа қўя беринг-да, ишнинг ички томонини мулоҳаза қилинг, қўрбоши ака! — деди.

Хоин ила сотилган кўзлар тўқнашдилар-да, бир-бисиридан маъно олишдилар ва орага бир неча дақиқа сўзсизлик, жимжитлик кирди. Қўрбоши чиндан ҳам бу ўрингача Ҳомиддинг ички сирига муттале¹ бўлмаган, қўлига кирган олтинларни ҳам ёлғиз унинг қариндошларининг қутулишлари йўлидаги чойчақалар деб билар эди. Аммо энди илгари ва ҳозирда киссасига тушган олтинларни Отабек ила қутидорнинг қон баҳолари эканлигини сезиб, виждан тўлқинланаёзди ва бе-

¹ Муттале — хабардор.

зовта бўлди. Қўрбошининг бу ҳоли Ҳомидни маълум икки йўл устида қолдирган эди. Бу икки йўл устида қолган Ҳомид саросима эди. Ўзини жаҳаннамга юбориш ва нажотга чиқариш ихтиёри қаршисидаги бекнинг қўлида эди. Унга тез-тез қарар ва лол тили билан унга яна кўп олтинлар ваъда қилар эди. Бу ваъдаларни Ҳомиддинг юзидан ўқиган қўрбоши — «икки кишининг хун баҳолари!» деб қичқирмоқда бўлган виждан садосини эшитиб ўтиради:

— Энди бунга қарши қандай йўллар кўзлайсиз?

Ҳомид ўзининг нажот томонига оғишганини сезиб энтиқди:

— Қушбегига қилган айлаш, оқлаш йўлларимни поччам ила жиянимга тушунтириш керак, деб ўйлайман.

— Тушунтирсак тагин яхши!

— Раҳмат, бек ака! Ундоғ бўлса вақт қочирмасдан уларнинг ёnlарига тусиб то ҳукм вақтигача уқдира оласизми?

— Мумкин, ўзингиз тушсангиз яна яхши!

Ҳомид бошини чайқади:

— Отабек ила қутидорларнинггина эмас, ҳатто, поччам ила жиянимнинг ҳам маним бу ишда иштироким борлигини билмасликлари керакдир!

— Маъқул. Аммо бунда сизнинг мақсадингизга қарши бир гап борқим, ҳукм чоғида қушбеги сизни йўқласа нима бўладир? Бу тақдирда улар сизнинг бу ишнинг омили бўлганлигинизни билмасларми?

Масаланинг бу томони ҳам Ҳомид учун ёмон эди. Фариштадек соф ҳолда қолмоқчи бўлган Ҳомиддинг бу ҳол сирини очар, юзидаги ниқобини олишга, рақиблар ила юзма-юз келишга мажбур этар эди.

— Ҳукм мажлисида бўлмаслигимни уҳдангизга¹ олмайсизми?

— Уҳдага олмоқ қийин,— деб бош чайқади қўрбоши,— аммо бу бир эҳтимолгинадир, чунки қушбегининг бир нарсага қарор бергач, ортиқ текшириб ўтирадиган одати йўқдир!

Ҳомид узоқ ўйлаб турмади, юзидаги совуқ бир ўзгариш ичиди:

— Майли, башарти юзлашмоқча тўғри келганда ҳам, мен ҳозир,— деди, шундан сўнг ажralишилар.

¹ Уҳда — зимма.

ҲУКМНОМА

Ўткир, қонсираган ханжарини белига осиб, ой болтасини кўтарган жаллод қушбегининг ҳукмига мунта-зир эди. Қушбегининг ўнг томонида қўрбошидан тортиб шаҳар аъёнлари, қаршисида Отабек, қутидор, Зиё шоҳичи ва унинг ўғли Раҳмат — гуноҳкорлар ва уларнинг орқасида муҳофиз йигитлар.

Отабек билан Мирзакарим қутидорнинг гуноҳлари улуғ бўлганликдан қўлларида кишан, Зиё ака билан Раҳматнинг қўлларида бу нарса йўқ эди. Қутидорнинг юзига ўлик туси кирган, Отабек бўлса гарангсиган қиёфада. Ановилар ўзларини бирмунчча тетик тутмоқда эдилар.

Қушбеги ўзининг ёзилиб қўйилган ҳукмномасини қўлига олиб ўқишига ҳозирланди. Ҳамма тип-тинч, ерга қараган эди:

«Менким Марғилон ҳокими Ўтаббой қушбеги ўз ҳукмимни ҳоқон иби ҳоқон жаноби олий Худоёрхон исми шарифларидаи эшиттираман...»

Худоёр исмини эшитгувчи аъёнлар унинг таъзими учун ўринларидан туриб яна ўтирдилар.

Қушбеги ҳукмини ўқиди:

«Эътиомодлик бир кишининг шаҳодатига биноан тошкентлик Юсуфбек ҳожининг ўғли — Отабек, бу кунда хонимизга қарши бош кўтарган Азиз парвоначи ва ўз отасининг ваколатлари билан Марғилон келиб, бу едаги фуқароларни ҳам хон жанобига қарши оёқлантироқчи бўлган. Отабекнинг бу ҳаракати улулъамир бўлган жанобга боғлиқ бўлиб, уни, яъни Отабек Юсуфбек ҳожи ўғлини ўлим жазоси билан жазолаш тақозо этадир. Йиккинчи, Отабекка бу йўлда кўмакчи бўлиб юрган Марғилон фуқароси Мирзакарим қутидор ҳам шу жазота сазовор тутиладир, Зиё шоҳичи билан ўғли Раҳмат бу бояйлик¹ дан хабардор бўла туриб, вақтида ҳукуматга маълум қилмаганлари учун бир йилдан зиндан жазосига маҳкум бўлурлар!»

¹ Бояйлик — фитначилик.

— Ҳақсиз жазо! — деб Отабек кўлимсираб қўйди.:
Қутидор бўлса чин ўлик тусига кирган эди.

Зиё ака билан ўғли зинданга жўнатилдилар за Отабек билан қутидор жаллод қўлига топширилдиларда, шунинг ила ҳукм мажлиси тамом бўлди.

Орадан ўн дақиқа чамаси фурсат кечтган эди, қушбенинг аъёнларга сўзлаб ўтирган ҳикоясининг тезроқ битишини кутмоқда бўлган қўрбоши ниҳоят чидомлай ўрнидан турди ва:

— Дор остига бориб ҳукм ижроси вақтида ҳозир туришимга ижозатлари бўладирми? — деб сўради. У бу сўзни тугатар-тугатмас ўрда қоровули Пирмат кўриндида, қушбегига қуллуқ килди:

— Бир хотин киши арзим бор дейдир, кирсинми?
Кушбеги қўрбошига рухсат ишорасини бериб, Пирматга деди:

— Кирсин.

Ўхшамаган ерда бир хотиннинг арзга келиши қўрбошининг кўнглига шубҳа солди. Мажҳула¹ хотиннинг қандай арзи бўлганлигини билиб кетишини тиласа ҳам, қушбегидан рухсат олиб қўйгани учун маҳкамадан чиқишига мажбур эди. Қўрбоши маҳкамама эшигидан даҳлизга чиқар экан, эскигина паранжига ўралган бир хотин қушбеги тўғрисига тўхтаб, букилиб таъзим қилди. Хотинда ҳаяжон ва энтикиш ҳолатлари бор эди. Шунинг учун қўрбошининг бояги шубҳаси яна кучайди, қушбенинг қўзидан йўқолиб туриш мақсадида ўзини эшикнинг орқасига олиб, кетмай тўхтади.

Хотин шошилиб кавушини ечди-да, эшик остида ниманидир паранжи ичидан ахтаринди. Хотиннинг бу ҳаракатига тушунолмай ажабланган қушбеги:

— Ичкарига кириб арзингизни сўзланг, опа! — деди.

Хотин ичкарига кирди ва қушбеги олдига бориб, унга нимадир берди-да, орқасига қайтиб, эшик ёнига келиб турди. Хотиннинг бериб кетган нарсаси уч-тўрт букланган бир қофоз эди. Қушбеги секин-секин қофоз тахларини оча бошлади...

— Худо ризоси учун тезроқ! Йўқса... икки гуноҳизнинг қонларига ботарсиз!

Хотиннинг бу сўзидан аъёнлар бир-бирларига қарашдилар. Қушбеги тез-тез қофоз тахларини очиб би-

¹ Мажҳула — номаълум, нотаниш.

тирди ва йўғон қалам билан ёзилган узун бир мактубни ўқимоқча олди. Мактубни ўқиб чиқиш узоқча чўзилганинг хотин ниҳоятда тоқатсизланган эди. Охирда қушбеги мактубнинг сўнгрогига келиб тўхтади-да, чақирди:

— Пирмат, Пирмат!

Пирмат югуриб кирди:

— Лаббай, тақсир!

Қушбенинг товушида шу чоққача эшитилмаган бир ҳолат бор эди:

— Дарров ҳалиги осилиш учун юборилган гуноҳкорларнинг орқасидан от билан югор! Дор остидан бўлса ҳам қайтариб кел! Буйруғимни қўрбошига айтсанг унар!

Пирмат қуллуқ қилиб даҳлиз томонга қаради:

— Қўрбоши ҳам шу ердалар,— деди.

— Чақир!

Даҳлиздан қўрбоши кириб қуллуқ қилди.

— Хизмат, тақсир!

— Яхши, сиз кетмаган экансиз! — деди қушбеги,— Пирмат билан бориб дарҳол бояги гуноҳкорларни қайтариб келингиз!

Шубҳасининг бекорга бўлмаганини сезган қўрбоши ёнида тик турувчи хотинга қараб олди:

— Сабаб, тақсир?

— Сабабини суриштирадиган вақт эмас, чоп дедим, чоп!

Қўрбоши қуллуқ қилиб Пирмат билан чиқди. Унинг кейинидан қушбеги «падар лаънат!» деб сўкиниб аъёнларга қаради. Энди хотиннинг ҳаяжони бир оз босилатушган эди. Қушбеги қўлидаги хатни яна ўқишига тутинди. Аъёни шаҳар бунчалик ишга яраган қушбенинг қўлидаги мактубга ва уни келтирувчи хотинга қарашмоқда эдилар. Қушбеги мактубни иккинчи марта ўқиб чиқиб, хотинга қаради:

— Ўтирингиз, синглим,— деди.

Хотин ўтиromoқчи бўлган эди, паранжи ичидан унинг атлас кўйлаклари ва нафис оқ қўллари кўриниб кетди. Қушбеги ер остидан хотинни кузатди-да, қўлидаги мактубнинг орқа-ўнгини текшириб қаради. Мактуб анчагина уринган, қофози шалоқланган эди. Сўнгра хотиндан сўради:

— Қутидор билан Отабекнинг кими бўласиз, синглим?

— Қутидорнинг қизи, Отабекнинг хотини.

Бу сўзни эшитувчи аъёнлар бир-бирларига қарашиб қўйдилар.

— Буни нега илгарироқ олиб келмадингиз?

Қушбегининг бу саволидан Кумушбиби қўрқинч бир маънони англади: гўё «иш ўтган сўнг келибсан!» дегандек тушунган эди. Шунинг учун у титроқ бир овоз билан сўради:

— Энди ярамайдими?

— Йўқ, йўқ, қизим,— деди қушбеги,— мен нега ке-ча ва ўтган кунларда олиб келмадингиз демоқчиман! Кумушбиби бир энтикиб қўйди ва ўзини тўхтатиб.

— Ўзим ҳам бу мактубни шу бугун кўрдим,— деди.

— Мактубни илгари кўрмаган эдингизми?

— Кўрмаган эдим.

— Мактуб қаерда экан?

— Унинг эски камзулининг чўнтағида экан.

Шу гапдан кейин қушбеги мактубни ўзига яқин ўтирган Азим понсадбошига узатди:

— Сиз ҳам ўқиб кўринг-чи, понсад! — деди ва Кумушдан сўради,— ўқиганмисиз?

— Ўқиганман.

— Эрингизнинг ҳукуматга қарши ҳаракатини илгари ҳам билар эдингизми?

— Қанақа ҳаракатини?

— Масалан, биз отангиз билан эрингизни нима учун осмоқчи бўлдик?

— Ҳақсиз, гуноҳсиз!

— Бу мактуб билан эрингизни ўлимдан қутула олишини сизга ким айтди?

— Ўзим билдим!

— Бўлмаса илгаридан эрингизнинг ўша ҳаракатини ҳам билар экансиз-да?

— Йўқ, тақсир,— деди Кумуш, қушбегининг мақсадига энди тушуниб олган эди,— мен онам билан то шу кунгача уларнинг нима гуноҳ билан қамалгандарини билолмай ҳасратда эдик. Фақат буқун кишиларнинг оғзидан эшитиб билдикки, сиз уни Тошкентдан исён чиқаргани келувчи, деб гуноҳкор қилур экансиз. Онам билан маним баҳтимга, кутмаган жойдан муъжизадек бу мактуб топилди-да, мен хизматингизга югурдим...—

Кумуш сўзини тугата олмади. Чопишдан ҳаллослаган Пирмат даҳлиздан кўриниб, бекка қуллук қилди:

— Дор ёнидан қайтишидилар!

Кумушбиби сачраб Пирматнинг юзига қаради ва узоқ тин олиб қўйди. Шу чоққача хат ўқиб ўтирган понсадбоши мактубдан яхши асрланган эди. Мактубни ёнидагига берар экан, қушбегига деди:

— Бу хат тошкентлик Юсуфбек тўгрисидаги фикризни тамом ўзгартадир, тақсир! Унинг Азизбек томонлик бир киши эканлиги Фарғонанинг ҳар бир хос ва оми оғзида нақл қилинса ҳам, аммо ҳеч бир кимса унинг ичига кириб чиқмагандир. Ҳар кимнинг кўнглидагини ёлғиз бир ҳудодан бошқа ким билсин!

«Ёв қочса ботир кўпаяр» қабилидан, шу чоққача лом демай ўтирган шаҳар аъёнлари ҳам масалани англаб сўзга аралаша кетдилар:

— Худо ҳақни ноҳақ қилмади, бечора ёш йигитнинг ҳақсизга қони тўкилмади.

— Қутидордек қўймижоз бир одамнинг бундай зўр ишга аралашганилигига ақл ҳам бовар қилмас эди!

Гўё бу сўзлар Кумушбибининг ўчган чирогини қайтадан ёқарлар, умиқ осмонининг йўқолиб, яшириниб кетган юлдузлари яна қайтадан ўз ўринларига келиб қўнгандек бўлурлар, унинг кўз ўнгида жой олган қораликлар шу ёқила бошлаган нажот шамлари партави билан ўз-ўзларидан йўқолгандек кўринарлар эди.

Даҳлиз эшлиги остида бир дурким оёқ товушлари эшитилиб қўрбоши кўринди.

— Келишдилар, тақсир, кирсиналарми?

Қушбеги жавоб бериш ўрнига мактубни олиб кўрнча остига яширди ва Кумушбибини танбиҳлади:

— Мажлисда маним рухсатимдан бошқа сўзлашингиз отангиз билан эрингизнинг ўлимларини тилашингиздир, тушундингизми? — Кумуш қабул ифодасини бергандан сўнг, қушбеги даҳлизда қараб турган қўрбошига.— Кирсиналар,— деди.

Кумушбиби уларни боя йўл устида йигитлар орасида кўрган бўлса ҳам, бироқ даҳшат ичида фақат ўрдага қараб югурга берган эди. Энди «Кирсиналар» жумласини эшиттач, юраги ортиқча шопириниб кетди, унинг истиқболига туришни ва бўйнига осилиб йиғлашни тиласа-да, қаршисидаги «олабўжилар» бунга моне эди-

лар. Шу вақт йигитлар олдида, қўлларида кишан бўлгани ҳолда Отабек билан қутидор кирдилар.

— Йигитлар, сиз чиқингиз! Қўрбоши, сиз кишаларни ечингиз! — деб буюрди қушбеги.

Ўзининг бундан кейинги қўргиликларини фожилар водисида кўрган қўрбоши бошлаб кишан калидини қутидор қўлига солди. Калидни бурар экан, унинг қўли дир-дир қалтирамоқда эди. Ҳомиднин исмаълум бир ғарази йўлида қурбон қилинаётган ва бу ғаразда ўзининг ҳам иштирокининг борлигига қобил бўлган қўрбоши ишни бу ёғлиқ аксланишидан сирнинг очилганини муқаррар билиб, ўзини шу соат жаллод қўлига топширилишини аниқ кутмоқда эди. Минг бало билан қутидор қўлини бўшатиб, гал Отабекка етди. Отабек қўлларини бўшатувчи қўрбошининг бунчалик титраб-қалтирашидан ўз рақибларидан биттаси шу киши бўлганини ўйлади. Гарчи ўзининг нажоти ҳали қоронғу эрса-да, қўрбошини бир синаб кўриш учун, ҳамма кучини икки қўзига йиғди-да, унга қаради. Фавқулодда даҳшат қасб этган унинг кўзлари қаршисида қўрбошининг гуноҳкор кўзлари чидай олмадилар-да, ерга боқдилар. Отабекнинг бу синаши ўз фикрининг тўғри бўлиши билан натижаланди.

Қушбегининг буйруғи билан икки гуноҳкор тиз чўкиб ўтирилар. Қўрбоши ҳам тўрвасини йўқотган гадойдек қушбегининг чап ёнига, Кумушбибининг юқорисига бориб ўтириди. Отабек ва қутидорнинг кўзлари Кумушбибига тушган бўлса ҳам, ўз қайгулари билан бўлиб унга илтифот қилмаганлар, ҳоким маҳкамасида паранжили хотиннинг нима қилиб юрганлигидаги фавқулоддалик ҳам эсларига келмаган эди. Дор остидан қайтиш сири, қўлдан кишанларни олиниш сабаби уларни жуда шоширган, шунинг учун қушбегининг оғзига қараган эдилар. Қушбеги бўлса негадир узоқ ўйлаб ўтирас, тезда гап очмас эди. Бу ҳолда бутун мажлис аҳли сукутда, қирқ қулоқ бўлиб унинг оғзига тикилган эдилар. Аммо бу ҳолга қўрбоши жону дилдан тарафдор, шу ҳолда бир неча кунлар эмас, йиллаб сўзиз қолишини тилар эди.

— Отабек,— деди қушбеги сўз бошлаб,— қўлга олинган кунингиз менга ўзингиз билан отангизнинг қандай кишилар бўлганлигингишни, яъни маслакингизни сўзлаган эдингиз. Аммо биз ўша сўзларингизга да-

алил ва исботсиз ишона олмаймиз. Сизни дор тагидан қайтариб келишимиз ҳам ўшал даъвонгизга бирор исботингиз борми ёки қуруқ бир гапми, деб ҳукмнинг ижросини бир оз фурсатга тўхтатишидир. Энди сиз ўшал даъвонгизни исбот қила оласизми?

— Ўшал кунги маним сўзлаганларим отам билан маним ички сирларимиз эди,— деди бек.— Албатта, бунга гувоҳ ва исбот топиш қийиндир. Агарда отам келиб маним сўзимни қувватлаганда ҳам барибир сиз ўғлини қутқазиши учун сўзладир, дер эдингиз-да, иғвогарларнинг гапига ишониб, ўз ҳукмнингизни қила берар эдингиз!

Яшиндек сўққан унинг бу сўzlаридан қушбеги аранг ўзини тўхтатди:

— Демак, ўша сўзларингизни исбот қилиш учун ҳужжатингиз йўқ?

— Йўқ... исбот учун виждонимдан бошқа шоҳидим йўқ!

— Яқин орада Тошкентдан бирор нарса олганмидингиз?

— Яъни нима?

— Масалан, хат!

Отабек кўп ўйлай олмади, бутун борлиғи билан ҳаракат қилиб қичқирди:

— Олдим, олдим! Исботим ҳам бор!

Аъёни шаҳар унинг бу ҳолига чидаб туролмай, кўзларига ёш олдилар.

Отабек яна деди:

— Одам қўшсангиз мен келтирай гувоҳимни!

— Тинчланингиз, Отабек! — деди қушбеги, Отабек бир оз ўзини йигиб олгандан кейин сўради.— Нима олган эдингиз?

— Мактуб!

— Кимдан?

— Отамдан!

— Қачон?

— Тошкентда исён бошланиш олдидан!

— Ундан кейин-чи?

— Олмадим.

— Отангиз ўша хатида нималардан баҳс қилар эди?

— Тушуммаган Тошкент халқини Азизбекнинг макрига учганидан, энг охирида...— асрланиб тўхтаб олди,— меним шу ҳолга тушмоғимни каромат қабилидан сўзлаб, менга бирмунча насиҳатлар ҳам қилган эди.

Отабекнинг бу сўзларидан кейин понсадбоши — «энди бўлар» дегандек қилиб қушбегига қаради. Қўрбоши эса Отабекнинг устида ҳали бунчалик тергашлаар борлиги учун ўзини бир оз тўхтатиб қолди. Қушбеги кўрнача остидан хатни олиб Отабекка кўрсатди:

— Бу қанақа мактуб, танийсизми?

Отабек кўрувчи кўзларига ишонмагандек:

— Танийман,— деди,— таърифини сўзлатаним отам мактуби! Таажжуб, буни сизга ким келтирди, тақсир?!

Қушбеги енгилгина илжайиб, Кумушбибига ишорат қилди:

— Нажот фариштаси! — деди. Қутидор билан бек ялт этиб Кумушга қарадилар. Энди Кумуш ортиқ чидааб туролмади:

— Отажон, мен қизингиз!

Отабекнинг қулоғига эшитилган бу товуш унинг юрагини ингичка ерига бориб теккан эди. Эсини йўқотиб қўйган қайнот отасига қарамай:

— Сизми, Кумуш? — деб сўради.

— Мен, мен!

Бу савол-жавоб ила икки вужуднинг ҳамма ҳасратлари, аламлари бир-бирларига англашилган, икки товушнинг бир-бirisига келиб қўшилишидан иккисида ҳам тил билан англатиб бўлмаслик бир ҳол юз берган эди.

— Бу сенми, қизим?

— Мен, отажон!

Бу ўрингача бошқа бир мулоҳазада ўтирган қушбеги уларнинг сўзларини бўлиб, Отабекдан сўради:

— Қулингиз Ҳасаналини нега шу кунгача төпид бўлмади?

— Қамалган кунимдан берига ундан хабарим йўқ, тақсир! — деди-да, Отабек Кумушга қаради.

— Букун ўн икки кун Ҳасанали ота Тошкент кетмишдир, шундан бери ундан дарак бўлмади,— деди Кумуш.

— Тошкент кетишга уни нима мажбур қилди? — деб ўринисиз бир савол берган эди қушбеги, Кумушбиби унинг нима учун кетганлигини айтиб қаноатлантириди.

Масала яна хат устига ўтиб, Отабек қушбегидан сўради:

— Қўлингиздаги мактуб билан эҳтимол биз оқ-ланган чиқармиз? — Қушбегидан тасдиқ ишорасини олиб давом этди.— Ҳозир сизнингadolатли ҳукмингиздан бир нарсани сўраймиз: ул шулдирким, бизнинг тўғримизда ёмон мақсад билан сизга чақимчилик қи-лувчи иғвогар ва ғаразгўйлар бу мажлисга ҳозирлан-синлар-да, ўзларининг машъум кашфларини ва кўрган-эшитганларини исбот қилиб, бизни қайта бошдан дор остига юборсинлар! Билъакс қилолмас эканлар, бизга қазиган чуқурларига ўзлари йиқитилсинлар! Адолатнингиздан бизнинг талабимиз шул! — деди ва қўрбо-шига қаради. Унинг юзида қўрқиш ва изтироб аломатлари кўрди.

— Талабларингиз ўринли,— деди қушбеги,— аммо хасмингизни бу мажлисга ҳозирлаш учун вақтимиз оздир ва лекин букун уни қўлга олармиз ва бириси кун бешовингизни бир ерга жамлаб ўз ҳукмимизни берармиз! — деди. Кумушшибига юзини ўтириди.— Қизим, сизнинг бунчалик заковат ва жасоратнингизга отангиз билан эрингиз ҳар қанча ташаккур айтсалар ва ўзларининг мундан сўнгти умрларини сизнинг баҳ-шишингиз деб билсалар, арзир. Мен ҳам сизнинг бу хизматнинг эвазига эрингиз билан отангизни ҳозирдан бошлаб озод қилдим. Аммо Отабек иш бир тарафлик бўлгунича ўзининг қочмаслиги учун кафил беришга мажбурдир!

Ҳамма мол ва мулки билан қутидор Отабекка ка-фил бўлди ва қушбенинг ҳақига дуо қилиб учковла-ри маҳкамадан биргалашиб чиқдилар.

— Зиё ака билан ўғли Раҳматни бўштингиз, сўнгра ановини қўлга олингиз! — деган амрни олиб қўрбоши ҳам силжиди. Шунинг ила бу кунги ҳукм мажлиси тамом бўлиб, шаҳар аъёнлари таажжуб ичидаги тарқала бошладилар.

20

ИСТИҚЛОЛ ДАРДИ

Етмиш кунлик қамалдан кейин уч минг сипоҳни бир ярим мингга тушириб, бир ярим минг сипоҳни Тошкент қўргонлари остида қурбон бериб, Нормуҳам-мад қушбеги қуруқ қайтишга мажбур бўлди.

Бу етмиш кунлик қамал вақтида тошкентликлар жонбозлик кўрсатиб, ниҳоят, қипчоқларни умидсиз Қўқонга қайтаришга ноил бўлдилар. Ноил бўлдилар, аммо ўзлари ҳам яхшигина бўлиб қолдилар! Етмиш кунлик бир қамал, етмиш кунлик четдан ва энг ози қишлоқлардан муносабатни узиб туриш, албатта, Тошкентни бўлдириб қўйган эди. Бу етмиш кунлик бир қамал Тошкентнинг ҳали йиғишириб кира олмаган донларини, экинларини ёв қўлида қолдирди. Савдо ишлари бутунлай тўхтаб, савдогарлар зўр фалокатга учрадилар. Косиб, факир халқнинг ҳоли жуда ҳам ёмон эди. Нонсиз, донсиз, сувсиз, ало ҳозал-қиёс¹ «сиз, сиз» бўлиб энг охирги чекка етгандагина қамал балосидан «ялтирасин, қалтирасин» музafferият билан қутулдилар. Халқ ўзининг бу етмиш кун ичида тортган машаққат ва азобларини қипчоқлар устидан «чолган ғалабаси» билан бир даража ювди-да, касбиға, экин-тикинига уриниб кўришни ўйлади. Тўғриси ўйлай ҳам олмади...

Азизбек, бундан кейинги Тошкентнинг мустақил ҳукмдори Азизбек! Қипчоқларга чолган ғалабаси учун у терисига сифмайдир... У энди — «қипчоқлар Тошкентни олиб қолсалар...» деган мудҳиши хавфдан қутулган, у энди Тошкент ва атрофнинг хони, хоқони! Энди духоба ва атласлар устидагина ўтиromoққа қаноатланмай, ўз шаънига, ўз қудратига мувофиқ тожлар. тахтлар ясатмоқчи, ўзининг эски маҳрамига кўнгли тўлмай, бошқа бир ўйинчи, ашулачи, ҳусндор бир маҳрам топмоқчи ва ўзининг бу машҳур маҳрами билан ер юзига донг, шуҳрат чиқармоқчи.

Азизбек энди жуда хотиржам эди. Қипчоқларнинг қайтадан Тошкент устига келишларини эҳтимол ҳам тутмас эди. Чунки ўзининг қипчоқларга берган зарбасини уларга юз йилсиз ўнғалиш бермас, деб билар эди.

Ҳамма иш жойида, лекин бир нарсагина кўнгилнинг ингичка ерини жароҳатладир. Азизбек кўзига ҳозир ёруғ дунё қоронғу, бу қоронғулик ичида бояги ширин хаёллар, ишлатиладиган тожу тахтлар ва бошқалар кўринмай қоладилар: етмиш кунлик уруш минг турли йўллар билан йиғилган хазинани бой берган, хазина қипчоқлар устидан ғалаба ва истиқбол маст-

¹ Ало ҳозал-қиёс — шунга қиёсан, шунга мувофиқ.

ликлари йўлида қуриган, фуқаронинг жон отиб, қип-чоқларни қириб йўйганлари учун инъомларга, эҳсонларга ва озиқ-овқатларга қурбон қилинган.

Мана шу эди Азизбекнинг кўз ўнгларини қоронғулатадирган жароҳат!

Бу ишнинг кенгашига эмас, берилган қарорни амалга ошириб беришлик учун Юсуфбек ҳожига йигит юбориб, ҳозир уни тўрт кўз билан кутиб ўтирас эди. Нихоят, ярим соатли бир кутишдан сўнг эшикда Юсуфбек ҳожи кўринди. Азизбек одатдаги қаршилаш ёнига бир навозиши¹ ҳам илова қилиб ҳожига юқоридан жой кўрсатди. Бу фавқулодда навозиш сабабини ўйламоқ-қа ҳожининг вақти йўқ, чунки ўзининг қайғуси ўйлашга, фикрлашга етарлиқдир: «Кўзининг оқу қораси бўлган Оғабекнинг холи нима кечди, қоронғу зиндоnlарда, рутубатлик, зах ер остларида очликдан, ташналиктан, совуқликдан азиз кўкрагани ерга бериб жон бердимикин? Золим кишилар орасида, кекса отасини, муштипар онасини кўролмай дунёдан кетдимикин?» Мана шундай минг турли васвасалар ичида қаршисидаги Азизбекни ҳам унутмоқда эди. Азизбек бўлса «жавоҳир қадалган тожлар, олтин таҳтлар, нозанин паривашлар, донгдор маҳрамлар» ҳақидагина ўйлар эди.

— Ҳожи,— деди Азизбек сўз очиб,— маним сизни ўрдага чақирганим сабабини, албатта, билмагандирсиз?

Юсуфбек ҳожи хаёлидан кўз очди:

— Тақсир... чақиришингиз, албатта, фуқаронинг тинчлиги, раёенинг² роҳати, ҳукуматнинг барқарор турмоги учундир!

Ҳожининг бу сўзи Азизбекни яшиндек урди. Унинг кўз ўнглари қоронғулашиб, ҳалиги ширин хаёллар тагин қоронғуликда яшириндилар. У ортиқча ўнгай-сизланди ва тилар-тиламас:

— Шундоқ...— деди ва бир оз ўйланиб қолгандан кейин,— етмиш кунлик қамал билан хазинамиз жуда гарибланди, ҳатто шу кейинги кунларда сипоҳларнинг озиғи учун ҳам қийналиб қолдик. Мана шу тўғриларда сизни кенгашга чақирган эдим.

— Маъқул, тақсир.

¹ Навозиш — сайлаш, марҳамат, меҳрибонлик.

² Раоё — бир ҳукмдорнинг қўл остидаги ҳалқ.

- Мен бу тўғрида бир қарорга ҳам келиб қўйдим.
— Қарорлари муборак бўлгай.
— Қарорим шундан иборатдирким, эртадан бошлаб юртга ўттиз икки тангадан солиг сочасиз!

Юсуфбек ҳожи юрт бесаранжомлиги ва ўғил қайғуси билан асабийлашган эди. Азизбекнинг бу аблажона қарорига қарши қизишиди. Азизбекнинг бу золимона буйруғига қарши қаттиқ сўзлар айтишга ўйласа ҳам, аччиғини қандай кишига айтилишини ўйлаб, ўзини бир оз йигди.

— Тақсир, амрингизга қарши тушадиган жойим ўйқ,— деди,— лекин шунисини бир оз ўйламак керакки, юрт етмиш кун қамал кечирди. Ондан тугма азоблар, очликлар ўткарди ва ўткармоқда. Менга қолса бу кунларда ўттиз икки танга эмас, ўттиз икки қора пул солиш ҳам оғирдир. Юрт беш-үн кун орқа-ўнгини олсин сўнгра...— Ҳожи сўзини тугата олмади, ҳожининг терс сўзига чидолмаган Азизбек ваҳшийларча ҳайқирди:

— Нима дейсан?

Ҳожи ишнинг бунчалик ёмонга кетишини ўйламаган эди. Шу дақиқада ишнинг олдини олмаса, энди гап фақат Азизбекнинг жаллод чақиришига келиб қолди:

— Тақсир, сиз йиғ, дер экансиз эртага эмас, бу кунданоқ йиға бошлайман. Юрт қани бермасин-чи? Фақат менга сизнинг буйруғингиз кифоядир!

Бу сўз Азизбекка сеҳр каби таъсир қилди, даҳлизда турувчи йигит орқали жаллод чақиришга жўпланган тили ўз зарапига ҳаракатланди:

— Ўрда бегига айт, ҳожига бир кимхоб тўн чиқариб кийдирсин! — деди.

* * *

Юсуфбек ҳожи эгнида кимхоб чопон билан ўрдан чиқди. Ўрдадаги «чопон муборак бўлсин!» деб сўрагучиларга истеҳзо илжайиши остида бир турли муҳмал¹ жавоб берар эди. У ўрда кўпргидан ўтар экан, боягидек қилиб ўзича яна бир кулимсираб қўйди ва телбаларча ўз-ўзига сўзланиб кетди: «Ўттиз икки тангадан солиқ йиғ, эмиш... Бир ҳафтадан кейинга қолмасин эмиш... Солиқ йиғиша қаршилик қилганни даррага ётқизиш, мувофиқ кўрилганда остириш ҳаққи

¹ Муҳмал — ноаник.

ҳам менга берилган эмиш... Гўё Юсуфбек ҳам ўзидек бир қонхўрга, бир золимга айлансин, эмиш... Мен қонхўрлик учун худонинг фарз қилган ҳажини адо қилмадим, олдимда ўғлим бор, менда бошқаларнинг ўғлини даррага ётқизиш чоғида кўндаланг келадиган виждан бор, дин бор, диёнат бор. Бизнинг халқ Азизбекнинг тулкилигига учди-да, унинг кечаги зулмларини унутди, етмиш куналар бир замон жон бериб-жон олиб, ниҳоят хизмат ҳақи учун ўттиз икки танга мукофот. Энг кейинги бурда нонингни ҳам бер!»

21

ИСЁН

Юсуфбек ҳожи, устида бояги кимхоб тўни билан Шайхантаҳурнинг Занжирлигига етиб, гузарда йифилиб ўтирган ва ўзига салом бериш учун ўринларидан турган халқа хитоб қилди:

— Мусулмонлар! Яхши деб йўлида жон берганинг Азизбек бу кун сизларга яхшилигингизни ўттиз икки танга солиқ билан қайтармоқчи бўлди. Ҳозир сизларга икки йўл: ўғил, қизинингни сотиб бўлса ҳам ўттиз икки тангани Азизбек хазинасига тўлаш, ёки эс борида этакни ёпиб, Азизбекни орадан қўтариш... Уйинг кўйди, мусулмонлар!

— Ўттиз икки танга!

Халқ Юсуфбек ҳожидан зарра ёмонлик кўрмаган, ёки бўлмағур бир кенгаш эшитмаган ва шунинг учун у қаёққа юрса шу ёққа боришга ҳозир турар эди. Айниқса, ўттиз икки танга довруғ гузар аҳлининг юраклари ни ўюштириб, буни эшитиш биланоқ исёнга қўл қўйдилар.

Бошлиб Занжирлик халқи кўчаларга чип¹ ташлаш, Азизбекка қарши уруш ҳозирлиги кўриш хаёлига тушди. Юсуфбек ҳожи то Эски жўвага етгунча ўзининг юқоридаги сўзини кўй, гузар халқига такрорлаб келмоқда эди. Эски жўвада азм бир жамоат йигиб, Азизбек билан бўлган можаросини сўзлади ва устидаги кимхобни кўрсатиб истеҳзо тариқасида:

— Солиқни бермангиз демайман, чунки сизнинг итоатингиз менга бундоғ тўнлар берар! — деди.

¹ Чип — гов, барриқада маъносида.

Халқ ниҳоятда қизишиди, түё бириси қуриган түқайга ўт тутди, ҳўлу қуруқ деганлариdek катта-кичик баровар ёнмоқقا олди.

— Яхшилигимизни унуди, түнғиз! Ўттиз икки тангани яхшилаб берайлик биз унга! Ози бир ой ўтмасданми, андишасиз?! — деган сўзлар эшитила бошлади. Дарров уч кишини Себзор, Кўқча ва Бешёғоч даҳаларига хабар учун жўнатилди; ё қирилиб битиш ва ё Азизбекни орадан кўтаришга фотиҳа ўқилди.

Орада бир соат ҳам ўтмади. Бутун дўконлар ёпилиб, Тошкент кўчалари чиплар билан тўлди. Барча яроғланган, урушга ҳозир эди. Шаҳарнинг олаланиш хабари ўрдага ҳам эшитилди. Ишни кичкина деб ўйлаган Азизбек шаҳардан аҳвол олиш учун Райимбек додхони эллик ҷоғли йигит билан буюрди. Аҳвол олгувчилар Занжирликка етиш билан нақ ишнинг қай дараҷага етганини пайқадилар: кўчалар чип билан тўлган, чип орқалари шашвар, милтиқ, ханжар, найза ушлаган оломон билан лиқ тўла эди. Райимбек додхонинг «чипларни йиғишитиргиз, ўзларингиз тарқалишиниз!» деб айтган яхши сўзига қулоқ солгувчи бўлмади. Додхоҳ дағаллик қилган эди, оломондан биттаси милтиқ отиб икки сипоҳни йиқиб ҳам қўйди.

Кечки соат тўртлар, асрдан бир оз эртароқ ҳукумат аскари билан халқ орасида уруш бошланди. Ярим соатли отиш, чопишидан сўнг сипоҳлар Занжирлик оломонларини қочириб, Баланд масжид чипига етдилар. Жон аччиғига учраган Азизбек ўрдага бирмунча сипоҳ қолдириб, бутун кучини йиғишитирган ҳолда Райимбек додхоҳ кўмагига етишиди. Бунинг ила сипоҳлар тагин ҳам кучайиб оломонни Ҳадрага қараб суришга муваффақ бўлдилар. Ҳадра чипида қонли урушлар бошланди. Ўттиз икки танга солиқ хавфида оломон ҳам Бешёғоч, Себзор, Кўқча даҳаларидан ўзига ҳар замон яроғлик ёрдамлар олиб турмоқда эди.

Бу кун кечаси Тошкент қон ичида, маҳаллаларда бўлган ҳукумат кишилари халқ томонидан ўлдириладирлар, ўйларига ўт қўйилиб, моллари толонга тушадир. Шаҳарнинг юракли йигитлари Ҳадра чипига қараб чопадилар, юраксиз ва кексалар гузар ва маҳаллаларга тўнкалардан гулхан солиб, «ўттиз икки танга» қайғусида оломонга музafferият тилайдилар.

Ярим кечалар вақти оломон Ҳадрадан Эски мискарликка қараб сурилишга мажбур бўлди. Кутилмаган бу сурилишлар Юсуфбек ҳожини катта ташвишга солиб қўйди. Бундан сўнг халқнинг ўзига ишониб туролмай, Тошкентни ололмай қайтган Нормуҳаммад қушбегига ёрдамга етиб келиш учун чопар югуртириди.

Эски мискарликда икки тараф ҳам тонг оттирдилар. Эрталаб яна қонли урушлар бошланди. Аммо халқ энди ўзини анча тутиб қолган ва ҳар дақиқа тўрт тарафдан янги кучлар олиб турар эди. Шунинг учун сипоҳлар бир одим илгари босолмай қолдилар. Аммо халқ сипоҳларни босса босгундек товланар эди. Бу холдан ниҳоятда бўғилган Райимбек доддоҳ қилич яланглаб сипоҳлар олдида оломонга қараб югурди. Бироқ унинг бу гайрати ўзи учун ҳалокат билан натижаланиб, Уста Мўъминжон исмли бир милтиқ устасининг отган ўқи билан кўкрагидан яраланиб йиқилди.

Райимбек доддоҳ Азизбек ҳокимиятининг тираги эди. Унинг қатлидан сўнг сипоҳлардан руҳ тушди. Ҳатто Азизбекнинг буйруғига ҳам қулоқ солмай, тўстўста қоча бошладилар. Ниҳоят, Азизбек ҳам ёнидаги қирқ-эллик содик кишилари билан қочиб ўрдага қамалишга мажбур бўлди. Юсуфбек ҳожи бошлиқ еру кўкка сиғмаган музaffer ҳалқ ўрда теварагини куршаб тушди. Азизбек тезда берилмагани учун минглаб ҳалқ ўрда атрофидан силжимай, ҳатто ош-сувларини ҳам шунда еб, хотиржам ётиб олдилар.

Азизбек учун кутилмаган фалокатлар юз берган эди, қочиб қутулиш мумкин бўлгани ҳолда тузоқча тушгандек ўрдага ҳам қамалиб берган эди. Нима қилсин, қаноти йўқки учиб қутулса... Қамалнинг иккинчи куни ўрда томига чиқди, энг кейинги, ҳам энг пастарин чорани кўрмакчи эди, бу хоқон! Бошлаб фуқарога салом берди, сўнгра синиқ ва ожиз қолган бир товуш билан ҳалқа узр айтди:

— Энди мен ўзимнинг қилмишларимдан пушаймон бўлдим... Мен сизларнинг қилган яхшиликларингизни унугтган эканман... Сизлар ўзларингизнинг бу ишларингиз билан меним кетган ақлимни яна миямга ўрнатдингиз... Раҳмат, фуқаро!..

Аммо ҳалқ бундай ёлборишларга, тавба-тазарруларга қулоқ солмади, чунки иш ўтган, ғишт қолицдан кўчган эди.

— Энди эсинг кирдими, ўғри? Бурундан ўйлаб иш қылсанг бошингда бу балолар йўқ эди! Сен бизларга нима ишларни қилмадинг? Кун сайин неча гуноҳсизларни остирган, кестирган, болаларимизни етим, она-ларимизни қон ийғлатган сен эмасмидинг? Ханжарнингни хайф кўриб маҳаллаларга чаён солиғи соглан, сғаларимизни чаён заҳари билан ўлдирган ким эди? Кет, тўнғиз, кет, тавба қилиш замони ўтди. Тақдирингта сен ҳам тан бер! — дер эди ҳалқ.

Ҳалқ шунингдек гаплар билан юз ёқдан унга ҳужум қилиб, ҳатто адабсиз сўзлар билан ҳам сўкар эди. Азизбек ҳамон «тавба қилдим, фуқаро!» жумласи билан узрини айтиб тураган эди:

— Сиз яхшиларим, бу қисқа ўйлашингиз билан ўз оёғингизга ўзингиз болта уриб, яна қипчоқлар қўлига қарам бўласиз! Менинг тавбамни лоақал ўзларингиз учун қабул қилингиз!

Азизбекнинг бу сўзидан кейин оломон тагин қизишиб қуидаги сўзлари билан кўкни кўтарди:

— Икки қайта алданиш йўқ! Сендек итдан бизга қипчоқ яхши!

Халқнинг бу жавоби ишнинг на даражага етганини англатарлик эди. Шу гапдан кейин Азизбек тамом умидсизланиб, дунёларча маъюсият ичида томдан тушиб кетди.

Юсуфбек ҳожининг Нормуҳаммад қушбегига юборган чопари Кировчи яқинида унга етган ва қушбегини тамом сипоҳлари билан Тошкентта қайтарган эди. Аламзада қушбеги бу севинч хабардан учиб-қўниб, Азизбекнинг ўрдага қамалишининг учинчи куни, карнай-сурнай билан етиб келди. Оломон ёнига қипчоқ сипоҳлари келиб қўшилгандан кейин ўрдага босиб кирдилар-да, Азизбекни ушлаб ҳам олдилар. Етмиш кун бир муддат овора қилиб, минглаб киши қонини тўкишга сабаб бўлган Азизбекни Қўқонга олиб бориб топшириш Нормуҳаммад қушбеги учун қимматли эди. У ўрдада ўтирас экан, бундай золим душманни қўлга туширишнинг бош омили бўлган Юсуфбек ҳожига ўз миннатдорчилигини айтиб тугата олмас, унинг бу хизматини хон билан Мусулмонқулга сўзлаб унга катта бир мартаба олиб беришга ваъдалар берар эди. Албатта Юсуфбек ҳожига бу ваъдаларнинг ҳеч аҳамияти йўқ, факат у ўғлининг соғлигини билса ва Марғилон зин-

донаидан унинг қутқарилишига ваъда олса — унинг учун дунёларча мартаба ва ҳурмат эди. Қушбегининг ваъдасига илтифотсиз қулоқ бериб турди-да:

— Илтифотингиз учун раҳмат, қушбеги! — деди.— Мен энди дунёдан ўтаёзган бир киши, эндиги мансабларга унча қизиқа олмайман. Агар менинг қилган хизматим шундай илтифотларга лозим кўриладирган бўлса, хон жанобидан сўрайдирган бир неча тилакларим бор.

— Сўрангиз, ҳожи, хон бермаганде ҳам олиб бе-ришга мен кафил!

— Менинг биринчи холис тилагим, албатта, мазлум ҳалқ тилидан бўладир: бундан сўнг Тошкент ҳокимлигига ҳар қандай бўлмағур одам қўйилмасин!

— Хон жанобининг мақсади ҳам шунда. Чунки биз Азизбек кабилардан ҳалқнигина эмас, балки ўзимизни ҳам қийнатдирмоқдамиз!

Тошкент беклиги тўғрисида кўп музокарадан кейин Юсуфбек ҳожи ўз яраси устида тўхталди. У биринчи мағтаба ўлароқ ўзининг ички касалини Нормуҳаммад қушбегига очди. Сўзлар экан, юраги машъум бир эҳтимолнинг даҳшатидан титрар, тили ҳам осонлик билан ҳаракатланмас эди. Зеро, ўзининг бу ўтинчини қуш учган сўнг отилмоқчи бўлган сопқон қабилидан ҳисоблар ва фойдасиз бир илтимос деб чўчир эди.

— Агар менинг бу хизматим хон жанобининг марҳаматига лойиқ кўрилур экан,— деди ҳожи,— менга энг манзур бўлган мукофот ўғлимнинг озод қилинишидир. Дунё можаросидан қўл ювмоқчи бўлган бир отага кексайган кунларида фарзанд доғини кўрмасликнинг ўзи ҳам улуғ мукофотдир! — деди ва қўзига ёш олди. Бундан қушбеги ҳам насибасиз қолмай мутаассир Юсуфбек ҳожига тасалли берди:

— Қўрқмангиз, ҳожи! — деди.— Марғилон ҳокими ўринсиз қон тўкувчи киши эмасдир. Қўқонга боргач, биринчи ишим ўғлингизни қутқазиш бўлсин, жойсиз қайғуланмангиз, ҳожи!

— Қуллуқ, қушбеги! Агар бу хизматни ўз зиммангизга олур экансиз, устимга катта миннат қўйган бўласиз.. Бироқ мен қўрқаманким, сиз Қўқонга бориб етгунча иш вақтидан ўтсин!

Қушбеги ҳам бу тўғрида ўйлаб қолди ва ҳожининг эҳтимолидан чўчиб, шу соатда бир мактуб билан Қў-

қонга чопар юбормоқчи бўлдилар, бу ишнинг мувофиқ кишиси, албатта, Ҳасанали бўлганликдан чопар бўлиб белгиланди.

Ўн беш кунлардан берига шундай хизматни кутиб ётган Ҳасанали отнинг бошини Қўқон томонга қараб қўйди-да, дақиқа ичидагуларга кўринмас бўлиб кетди.

Бир кун қейин Нормуҳаммад қушбеги ҳам бирмунча сипоҳни Тошкентда қолдириб, Қўқонга жўнаш ҳаракатига тушди. Тошкент оломонининг талаблари билан Азизбекнинг икки оёғидан арқон билан боғлаб, отнинг човига судратма қилдилар.

Сипоҳлар Қўқонга қараб ҳаракат қилар экан, Қўқон дарбозасига тўлган ҳалқ Азизбекнинг от оёқлари остида судралиб кетишига ҳузурланиб томоша қилар эди!

22

«БИР ҒАРИБИ БЕЧОРА»

Бу тарихдаги хон ўрдаси Қўқоннинг бу кунда Хода бозор аталган ўрнида эди. Романнинг ўн учинчи фаслида Марғилон ўрдасининг таърифи ёзилганликдан ва Бу ўрданинг ҳам ташқарига айланаси ўша ўрда каби бир тусда, бир услугуб ва бир кенглика бўлганликдан бу ўринда яна қоғоз қоралаш ортиқчадир. Ўрда дарбозаси, навбатчи қоровул, дарбоза саҳнининг кенглиги, барчаси ҳам ўшал ўрда сингари, аммо бунинг ташқариги кўринишидаги ортиклиги тўрт бурчида қадалиб турган навбатчилар эди. Ўрда дарбозасидан ичкарига кирилгач, бундаги тузилиш Марғилондагидан тамоман деярли бошқача чиқар, шунга биноан бу ер билан танишмоқ эҳтиёжи тушар эди.

Ўрданинг ичкариги ўнг, чап биқинлари сипоҳлар туриши учун солинган бинолар ва саҳнида биз Тошкентда кўриб танишган равишча кийимли сипоҳлар турким-турким бўлиб понсад бошилар қарамогида қилич уруш машқини таълим олмоқда эдилар. Ўрданинг белидан, яъни шимолдан шарққа қараб бир хатти мустақим билан девор ва бу деворнинг икки тарафини бараварлик ташланиб ўрданинг ичкари қисмига, хон саройига кириладирган дарбоза қурилган эди. Бу дарбоза эскиргансимон кўринса ҳам, асли яратилишидаги нафислик, меъмори санъаткорлик учайдиган бўлса ҳам,

113

бироқ ундаги ивир-живир сирлар, ўйма нақшлар ҳали ҳам кишини ҳайрон қолдирарлик эдилар. Айниқса, дарбозанинг икки биқинидаги «ўғирмагул» нарзи билан ишланган гулдасталар, дарбоза равоқидаги ганчдан қабартилиб ясалган бўртма нақшлар, гуллар ҳали ўзларининг нафосатларини унчалик йўқотмаган эдилар. Қуёш ғарбга қараб оққан, гулдасталар устига қўндирилган олтин ҳилол аломатлари қуёш нури билан кўзни элитарли даражада яшнар эдилар. Дарбозанинг икки ёнидаги махсус ишланган қоровулхона — супачаларда икки нафар навбатчи турар эди. Навбатчидан ўтиб дарбозага кирилса, гумбаз равишида йўлак, ўнга бурилса девонхонага, сўлга кетилса хон маҳкамасига чиқиладир-да, маҳкамама бўсағасида яна ҳалигидек икки нафар навбатчига учрашиладир. Марғилон ўрдасида кўрганимиздек бир даҳлиз, аммо бу ўзининг нақшлари, гуллари, анвоъи сирлари, олийлик ва кўрқамлиги билан Марғилонникини кўланкада қолдирарлик эди эрса-да, эскирганлиги унинг ортиқлигига ҳалал бермоқда эдилар. Даҳлиздан ичкарига қаралса, бир мунаққаш ва музайян зал, икки томонида хоннинг шоговул бошилари, ясовул бошилари, дастурхончи ва офтобачилари, тунқотор ва парвоначилари, оталиқ ва меҳтар бошилари ва яна аллақанча вазир-вузоролари қатор тизилишиб ўтирмоқда эдилар. Залнинг учинчи даричасидан нариги томон бир юпқа мунаққаш девор билан ажратилган бўлиб, ичкарига кириладиган эшиксиз бир йўл, бу йўл билан ҳалиги девор иккига ажралиб, ҳар бир бўлим деворнинг ўртасида киши боши сиғарли бир туйнук, бу туйнуклар ёнида қўлига ойболта ушлаган икки нафар жаллод қотиб турар эди. Шу жаллодлар орасидан ўтиб учинчи бўлимга кирилса, қаршида ярим газлар юксакликда, тўрт оёғлик оқ мармардан ясалган таҳт устида олтин камарга тақилган олтин сопли қиличини тizzаси устига кўндаланг қўйиб, қизил духобадан тикилган пўстин камзул устидан адрас тўн кийган, бошига симоби шойи салла ўраган ўн саккиз ёшлар чамалик, чўзиққина юзли, буғдой рангли хон ўтирас эди. Бу Худоёр эди. Хоннинг сўл томонидаги олтин ҳаллик курси устида Ўратепа чакмани устидан қайиш камар боялаб, соддагина қилич тақинган, бошига оқ барра попоқ кийиб, бащарасидаги бурни юзи билан бир қаторда деярли текис

яратилган, ўртача соқол, қисиқ кўз, буғдой ранг, ўрта ёшли бир кимса — Мусулмонқул ўтиарар ва ҳозиргина ҳудайчи тарафидан ўзига топширилган ариза ва мактублардан очиб ўқир эди. Ўқиб турган аризаси аҳамиятсиз бўлса керак, қоғозни иккига йиртди-да, оёғининг остига ташлади ва иккинчи мактубни очди. Буниси Ўш ҳокими тарафидан ёзилган эди.

«Давлатимиз устунни, падари аруси шаҳаншоҳи Мусулмонқул баҳодир ҳузурларига. Номаи ҳумоюн¹ баробари Ўш мадорисотида² таҳсилда бўлнигай факир қирғиз туллобига³ марҳамат буюрганлари ҳадоё⁴ туллобининг даражаси имтиёзан тақсим қилиндилар. Ашаддий факир ва эҳтиёжда бўлган қирғиз муллалари падари оруси шаҳаншоҳининг олтсфи шоҳоналаридан риққатига⁵ келиб оби дийда қилдилар ва ҳақтаоло даргоҳи васиъасидан⁶ адуви⁷ бадкирдорларга зафарёб бўлмоқларини ва золона яшаб Амир Темур Кўрагондек жаҳонгир бўлмоқларига дуо ва ниёз этдилар. Баъда хотири отери олийларига махфий қолмагайким, шаҳар ва атроф элларимиз давлати азима қавиялари⁸ сояий ҳимоятида нобоб бадъаҳдлар хавотир ва хавфидан тинчdir. Нома охирида ёш поҳимиз жансеби хоқони хавоқин сultonин ҳазратларига падари аруси шаҳаншоҳининг паноҳи ҳимоятларида кўп йиллар давр-даврон сўфият⁹ ва саломатлик тилаб навкарлари...»

Мусулмонқул Худоёрга Ўш аҳволини сўзлаб учинчи мактубни очди, бу мактуб хусусий бир кишидан бўлса керак, муҳр ва ўзга такаллуфлардан холи эди:

«Мазлумлар додига, мақҳурлар¹⁰ фарёдига ўзининг адолатли қиличи билан етишувчи Мусулмонқули қипчоқ хизматларига... кўзларим зулм ёши билан жик,

¹ Ҳумоюн — қутлуг, муборак.

² Мадорисот — мадрасалар.

³ Туллоб — талабалар, ўқувчилар.

⁴ Ҳадоё — ҳадялар, совгалар.

⁵ Риққат — кўнгил бўшлик, кўнгил юмшоқлик.

⁶ Васиъ — кенг.

⁷ Адув — душман, ёв.

⁸ Азима қавия — кучли ҳимоя (ҳимояси).

⁹ Офият — соглик, тинчлик.

¹⁰ Мақҳур — қаҳр-газабга дучор бўлган.

кўнглим давлат ҳозилари қўрқинчидан титраган бир ҳолда қалам тебратаман. Давлатнииг содиқ бир фукароси, ихлосли бир йигити давлат устига ўзининг муддиши зарбасини ташлаб турган бир бадаҳд ўғлини, ўшандоғки, отасининг ваколати бирлан иккинчи бир тинч, улуғларга муте, фармонбардор бир шаҳар аҳлини оёғлантиromoқ бўлган эди. Буни исботлари, шоҳидлари бирлан дор остига торткувчи содиқ бир қулни кўкларга кўтариш ўрнига қамамоқ ва оёғига зулм занжирини урмоқ бўладирлар... Мусулмонқул жаноби-дек бир баҳодирдан андиша қилмай, унинг душманла-рыни сарфароз¹ айлаб, дўстларни ғамгин қиладирлар...

Мактубнинг туманини маъносига тушунолмаган Мусулмонқул бу ўринда тўхтади-да, унинг охирига кўз ташлаб одди:

«Бунгача менинг ҳаяжон ва қайfu орасида ёзган йўлларимга балки тушунмагандирсиз, бунинг учун газабланмай, бу гуноҳимни сизга содиқ бир қуллигим йўлига кечиурсиз. Бу кундаги Тошкент исёнининг бошликларидаи бўлган Юсуфбек ҳожи, Азизбек нон-кўрнииг машварати² бирлан Маргилонликларни ҳам жанобингизга қарши оёғлантиromoқ мақсадида ўз ўғлини мунда юборган экан, факир содиқ қулингиз бу иевогар йигитнинг теварагига ўз тарафдорларини йигиб қурғон бир мажлисларига рост келиб ва унинг Маргилонга нима учун келгандигини пайқаб ниҳоят-сиз хавфга тушдим. Унинг сўзлари қипчоқларни йўқотиб, ҳукуматни шаҳарликлар қўлига олиш эди. Қипчоқлар хайриҳоҳи камина қулингиз бу сирни ичимга ютолмай бир неча воситалар билан Маргилон ҳокими Утаббейга билдиридим. Утаббой қушбеги Юсуфбек ҳожининг ўғли бўлган мазкур Отабек билан унинг тарафдори ва қайин отаси Мирзакарим отлик кишини қўлга олиб зиндан қилди. Қушбегининг чақириши бирлан ҳузурига ҳозир бўлиб, Отабек оғзидан нимаики эшитган бўлсан, бир-бир сўзлаб бердим. Холис шаҳодатим сўнгида Отабек билан қайин отаси Мирзакаримни қушбеги осиб ўлдиришга буюрди. Аммо Утаббойнинг киссаи хиёнатига Мирзакаримнинг ҳовлисидан

¹ Сарфароз — юксек, курсанд.

² Машварат — кенгаш, маслаҳат.

келиб тушган бир халта олтиналар баробарига дор остига етган иғвогарларни ўлимдан озод қилди, давлатнинг содиқ қулларидан бўлган камина холисни муттаҳамлар ерига зиндан қилмоқ ва осиб ўлдирмоқ бўлди. Чунки камина қулингизнинг сизга шикоят қилишимдан бениҳоят қўрқар эрди. Аммо давлатлари ёри бериб, садоқатли хизматкорларингиздан бўлган Марғилон қўрбошисининг ёрдами бирлан Ўтаббойнинг чангалидан аранг қутулишга муваффақ бўлдим...»

Мактубнинг шу ерига етганда Мусулмонқул хатдан бош кўтарди. Ҳозир унинг кипраксиз қисиқ, кўзларида ўтлар ёнмоқда эди. Қичқирди:

— Чилим!

«Шуидоғ қилиб сизнинг ўз қишиигиз бўлган Ўтаббой туз ҳақингизни унутди. Бир ҳамён олтин деб душманларингиз тарафига ўтди. Сизнинг хайриҳоҳ қулларингиздан бўлган бири ўз шаҳрини ташлаб Қўқон қочмоққа ва улуг даргоҳингизга сифинмоққа мажбур бўлди. Мен, холис қулингиз ўзимнинг садоқатим эвазига бундай мукофот олганим учун қайтurmайман ва лекин Ўтаббой ва Стабек каби хониларни кундан-кунга куч олиб давлати шаҳриёрга даҳшатли бир фалокат түғдиришларидан қайгураман. Бу мактуб содиқ бир қулнинг холис садоқатидан бир намунаидир. Мен шунинг ила шояд ўз бўйнимдаги вазифани адo этган бўлурман, шояд давлат душманларини ўз оёқларидан ютиб кетишларига сабаб бўлган бўлурман.

Ўзимнинг бу хизматим эвазига бир мукофот олиш муддаосида бўлмаганимдан ва ынмаики жаноблари йўлида машаққат чеккан бўлсам, ўзимнинг бир вижданий вазифам деб билиб, бу мактубда ўз отимни ёзишга ҳам тиламадим. Ёш хонимизга тинч ва шавкатли давр, давлат хониларига ўлим тилаб — бир гариби бечора».

Мусулмонқул ниҳоятда тутақсан эди. Ҳозирги бор аламини тамакидан оладигандек ҳудайчи келтирган чилимга ёпишди-да, шиг...ғ... этдириб сархонани синдириш даражасига еткуриб тортди. Оғзидан пага-пага тутун чиқарап экан, хатнинг мазмунини Худоёрга сўзлади. Тошкент устига юборган сипоҳлари билан Нормуҳаммад қушбегининг ниҳоят Тошкентни ололмай қайтиши хабарини эшитиб, сўнг даражада маъюсият

ичида ўтирган Мусулмонқул учун бу мактуб яра устига туз сепишдан ҳам аламли бўлиб тушган эди.

— Ҳудайчи!

— Лаббай, тақсир!

— Мирзани чақир! — деди Мусулмонқул, сўнгра қўлидаги мактубни тахигасолар экан, Ҳудоёрга деди.— Эшигингизми, ўглим! Азизбек билан Юсуфбек бизга нималар қилмоқчи бўладирлар? Ўзимизнинг содиқ кишимиз деб ўйлаган Ўтаббой ҳам душманларимиз билан биргалаша бошлаган... Хайр, қўлларидан келганини қилиб кўрсинар-чи, биз ҳам бундан кейин ўшандоғ кўрнамаклар билан қиладирган муомаламизни билармиз!

Ўз салтанатига рахна солишдан иборат бўлган бу хабарлардан Ҳудоёрхоннинг мутаассир бўлганлиги белгисиз, у бу гапни эшигасдан илгари қандай бўлса, ҳозирда ҳам шу ҳолда ўзгаришсиз эди. Мусулмонқулнинг ёниб турган ўтдек тутақиб сўзлаган гапини сукут билан кечирмаслик учунгина бўлса керак, қуруқ ва ширасиз қилиб:

— Ҳаммадан ҳам Ўтаббойни айтингиз, абллаҳ бир одам экан,— деди.— Мени сийламаганда ҳам сизни риоя қиласа керак эди.

— Яхшилик қилган кишингдан ҳеч бир яхшилик қайтмас экан! — деди Мусулмонқул.— Жумладан биттаси қўз ўнгимизда Азизбек! Мен уни ёшлигидан бошлаб ўз қўлимда ўстирдим, Тошкент ҳокимлигидан Салимсоқ бекни олиб, унинг ўрнига ҳоким тайинладик. Бироқ шунчалик яхшиликларимизга қарши натижада бизга ёғий¹ бўлди, бўлсин, лекин у Тошкентнинг ўзигагина қаноатланмай Марғилон билан ҳам иш қилмоқчи бўлса, бунисини ҳам биз кўрайлик!

Мирзабоши кириб хонга қуллуқ қилди ва Мусулмонқулга қараб қўл боғлади. Мусулмонқул яна хумори бўлган эди, «чилим!» деб ташқарига қичқирди, сўнгра Мирзабошига деди:

— Ҳозир Марғилон ҳокими ўтаббой қушбегига бир хат ёзиб, чопар билан юбор. Хатни олган замон Юсуфбек ҳожининг ўғли Отабек дегани олиб ҳузуримга келсин!

Мирзабоши қуллуқ қилиб, орқаси билан юриб чиқди.

¹ Ёғий — ёв.

МУСУЛМОНҚУЛ

Аркони давлат¹ йиғилиб Худоёр тахтига минган, Мусулмонқул хон бўлмаса ҳам хонлиқдан-да юқори бир кучга молик бўлган сиёsat курсисига ўтирган эди. Бошлаб оталиқ кириб хонга салом берди ва унинг ҳаққига узун дуо қилиб чиқди. Оталиқдан сўнг ўзга аъёнлар бирма-бир кириб, дуо қилиб чиқа бошладилар. Дуохонларнинг энг сўнгида ҳудайчи кўринди, салом ва дуодан кейин юзини Мусулмонқулга ўгириб:

— Марғилон ҳокими Ўтаббой қушбеги ҳузури ойилларига кириш учун изин сўрайдир,— деди.

Ҳамма фикри-зикри Ўтаббой устидагина қолган Мусулмонқул бу хабарни эшитиш билан кучли бир тин олиб, ҳудайчига қаради.

— Ёлғиз ўзими, ёки ёнида кишилари ҳам борми? — деб сўради.

Ҳудайчи яна бир қуллуқ қилди:

— Ўн чамалик яроғли йигитлари ҳам бор.

— Тағин-чи?

— Яроғсиз яна бир йигит ҳам кўринди.

— Ўтаббойнинг ўзини ҳузуримизга киргиз! — деди Мусулмонқул, қуллуқ қилиб чиқа бошлаган ҳудайчи-ни яна тўхтатиб сўради,— Ўтаббойнинг йигитлари ўр-данинг ташқарисидами, ичкарисида?

— Тақсир, ичкарисида!

— Яхши, қушбеги бизнинг ёнга киргандан сўнг ўрда йигитлари уларга ҳозир бўлсинлар!

Ҳудайчи қуллуқ қилиб чиқди. Унинг кетидан Мусулмонқул товушига музafferият оҳанти бериб хонга деди:

— Ўғриларнинг иқкиси қопқонга тушди, хон!

— Толеимиз!

Қушбеги кирди. Хонга икки букилиб таъзим қилгач, келиб унинг қўлинини ўпди. Ўтаббойнинг мулоқоти² учун Мусулмонқул ҳам гўё ҳеч нарса кўрмагандек ўридан туриб, унинг билан қучоқлашиб кўришди. Ўтаббой Мусулмонқулнинг кўрсатиши билан хоннинг чап томонидаги курсига ўтирди. У, Мусулмонқулнинг

¹ Аркони давлат — давлат арбоблари.

² Мулоқот — учрашиш, кўришиш.

самимий мулоқотидан қўрқувли юрагини бир қадар тўхтатиб олган эди. Курсидан яна туриб, хонга қуллуқ қилиб боз ўтирди. Мусулмонқул қушбегини ер тегидан кузатар экан, сўради:

— Ўртларингиз тинчликми, ўзингиз ҳам соғмисиз?

— Алҳамдуилло, ёш шоҳимизнинг давлатлари ва ҳусни таважжуҳ¹ лари соясида юртимиз тинчлик, фуқаромиз жаноби олийнинг дуои жонлари билан машғуллар!

Худоёр озгина ишорат билан унга ташаккур билдириди. Бунга қарши қушбеги курсидан қўзгалиб қуллуқ қилди. Мусулмонқул муртини силаб ниманингдир мулоҳазасида эди. Унинг бу ҳоли бирор дақиқага чўзилганликдан Худоёр билан қушбеги унинг оғзига тикилган эдилар.

— Сизнинг хабарингиз бўлдими, йўқми, биз Тошкент устига юборган Нормуҳаммад қушбегидан жуда ярамас бир хабар олдик,— деб Мусулмонқул Ўтаббойга қаради, ундан хабарсизлик жавобини олгач, сўзида давом этди.— Нормуҳаммад қушбеги. уч минг сипоҳ билан етмиш кун Тошкентни қамаб ётиб, ниҳоят бир иш чиқаролмай одамлари билан қайтмоққа мажбур бўлибдир. Азизбек билан Юсуфбек ҳожиларнинг азтаҳидил қаршиликлари бизнинг кишиларни қуруқ қайтишга мажбур қилибдир. Мана шунинг учун бундан кейин бизнинг бошқа бир йўл билан иш кўрмагимиз тақозо қиласди... Кеча биз кимдандир Юсуфбек ҳожининг ўғли бўлган Отабек деганни сизнинг Марғилонда деб эшитдик. Бундан сўнгти Тошкент тўғрисида кўрадирган тадбирларимиз учун унинг кераги бўлур деб ўйлаб, сиз билан бирга уни ҳузуримизга чақирган эдик...— бу жойда қушбеги Мусулмонқулни тўхтатдида, кулади, сўнгра Худоёрга деди:

— Отабек устида анча можаролар бўлиб ўтди! Бунинг ҳикояси узун, алҳол мингбошининг раъйларини эшитайлик... давом қилингиз-чи!

— Отабек ўзингиз билан биргами? — деб сўради Мусулмонқул, биргалик жавобини олиб тамом хотиржам бўлган ҳолда давом этди.— Юқорида айтганимдек, минбаъд² тадбир йўли билан Азизбекни йўқотиш-

¹ Таважжуҳ — юзланиш, хайриҳоҳона қараш.

² Минбаъд — бундан кейин.

дан бошқа чорамиз йўқдир. Бизнинг бу кейинги режамиз йўлида иш берадиган киши бўлса, у ҳам менга қолса, шу Отабек бўлур. Чунки бошқаларга қараганда унинг Тошкент бориши ва Азизбекнинг яқин одамининг ўғли бўлгани учун, унинг билан алоқада бўлиши, заҳар бериш ва ё бошқача бир йўл билан уни орадан кўтара олиши унга энг қулай бир ишдир. Оғриқнинг тузалгиси келса эмчи ўз оёғи билан келур, деганларидек, Отабекни Марғилонда бўлиш хабарини эшитиб хон билан мен жуда қувонишдик... Мана сизни чақиришдан бўлган мақсадимиз шудир. Яна сизнинг бу ҳақдаги раъйингиз нима бўлса эшитамиз.

Мусулмонқулнинг бу сўзларига Ўтаббой қушбеги тамом ишонган, аммо Худоёр эрса унинг илгариги мақсадини яхши билганликдан бу сўнгги гаплар билан ниҳоятда тарафдудга тушган эди. Тўғриси ҳам Мусулмонқулнинг бу кейинги гапи кишини мутарааддид¹ қилмай қўймас эди.

— Бу фикрингиз менимча ҳам маъқул,— деди қушбеги,— аммо бунда бир гап бор, ул ҳам: Отабек бу вазифани ўз бўйнига оладими, йўқми масаласидир. Чунки Отабекнинг Азизбек тарафдори бўлганлигига шу ўртада ўзим текширган бир иш мени шубҳага туширадир. Шундоғки, бундан йигирма беш кунлар илгари қўрбошимнинг хабар бериши билан Азизбек тарафидан Марғилонда тўполон чиқаргали келганлар, деб ўйлаб, ёнидаги бир неча кишилари билан зинданга солдирдим. Унинг Юсуфбек ҳожининг ўғли бўлиши ҳам ўша мулоҳазамнинг тўғрилигига мени ишонтирас эди. Яна қўрбошига Отабек устидан шикоят қилувчи-нинг шаҳодати билан бу шубҳамга ишониб, бундан беш кун илгари Отабек билан унинг қайин отаси Мирзакарим деган марғилонликни ўлим жазосига ҳукм қилдим. Гуноҳкорларни дор остига олиб кетганларига бирмунча фурсат ўтган эди, маҳкамага бир хотин ҳозир бўлиб, қўлимга бир мактуб берди. Ўқиб қарасам, Азизбек Тошкентда Кўқонга қарши исён чиқармоқчи бўлиб юрган фурсатда Юсуфбек ҳожи томонидан ўғли Отабекка ёзилган бир мактуб бўлиб, менинг қўл-оёғимни бўшаштирди. Чунки бу мактуб Юсуфбек ҳожининг Азизбекка тамоман қарши бир киши бўлган-

¹ Мутарааддид — беқарор, тарафдудланувчи.

лигини англатар эди. Гуноҳкорларни дор остидан қайтаришга мажбур бўлдим. Мен фақат бу мактуб далолатига бовар қилиб, гуноҳкорларни бўшата бермай, қўлимдан келганча яна текшириб-тергадим. Отабекнинг сўзлари кишини тамом ишонтирасли даражада, мактубга мувофиқ эди. Шундоғ бўлса ҳам фақат Мирзакаримни озод қилиб, кейинги тергашлар тамом бўлгунчалик Отабекни кафилга бердим. Ўзинияг бирор адовати учун бундай гапларни кузатиб юрган бўлмасин, деб ҳалиги шаҳодат берганни ушлаб Отабек ва бошқалар билан юзлаштиromoқчи бўлганимда, нима сабабдандир, ул қочди. Шу кунгача уни топиб бўлмали. Мунинг қочиши гарчи бу шаҳодатнинг бирор адоват юзасидан бўлган сиёsat эканини англатар эди эрса ҳам, мён яна ҳануз Отабекни кафолатда сақлар эдимки, жаноби олийдан бу хабар етди; дарҳол Отабекни йигитлардан ўратиб саодатхонаи шаҳаншоҳига жўнадум. Отабекнинг Марғилон можароси шундан иборат бўлиб, менимча Отабек устида ҳали шундай терговлар бораётган бир вақтда унга бундоғ жавобгарлик вазифаси топшириш қалай бўларкин, дейман...

Мусулмонқулдек маккор тулкининг ўйлаганларини күшбегининг тўғри сўзлари ост-уст қилиб, унинг Ўтаббой тўғрисидаги суйй занлари бирмунча озайиб тушди. Аммо Мусулмонқулнинг икки киши устига йўналган қаҳру ғазаби ўзининг борлиқ даҳшати билан фақат Отабек устига тикилди ва Тошкент қўргонлари остида қурбон бўлган сипоҳларининг қонини Азизбекнинг ўнг қўли бўлганинг ўғлидан олмоқчи бўлди.

— Юсуфбек ҳожининг мактуби ёнингиздадир?

— Тақсир! — деди қүшбеги мактубни олиб Мусулмонқулга узатди. Мусулмонқул ўнда-сўнда мактубга кўз югуртириб чиқди-да, заҳарханда ичида Ўтаббойга қаради:

— Юсуфбек ҳожининг қурган ҳийлаларига тушунмовчи эҳтимол Марғилондан топилгандир! У тулки ўз ўғлини Марғилонда тўполон чиқариш учун, деб юборишидаёқ, ҳар бир эҳтимолга қарши бу мактубни ёзиб берган, бунга Марғилон калваклари тушунмасалар ҳам, биз тушуна оламиз! — деди ва мағрур бир тусда Ҳудоёрга қараб қўйди. Күшбеги унинг бу истеҳзосини ютишга мажбур эди. Чунки озгина тилдан тойса, ўзи-

нинг ҳам Отабек қаторига киритилишини яхши англар эди. Сукут қилди.

— Ҳудайчи!

— Қулингиз!

— Ҳалиги қушбеги билан бирга келган йигитни ҳузуримизга ҳозирла!

Мусулмонқулнинг апти ортиқ даҳшатли бир ҳолга кирган, таҳт устига қўндирилган жонлик Худоёр ҳайкал ҳам сукутда, ўзининг нима бўлишига тушунмаган Утаббой ҳам борлиқ, йўқлик ҳолатда...

Отабек ҳудайчи орқасидан кириб хонга таъзим қилди ва қўл боғлаб тўхтади. Отабек Мусулмонқул отини, унинг йиртқичлигини яхши билса ҳам, аммо шахсан ўзини кўрмаган, шунинг учун хоннинг ёнидаги хоқонга илтифот этмади. Унинг бу илтифотсизлиги Мусулмонқулга асарсиз қолмади-да, аччиғи устига аччик, кек устига кек қўшилди ва шулар ичидан ясалаб чиққан бир истеҳзо илжайиши ва бир товуш билан:

— Менга қаранг, бек йигит,— деди. Отабек ўзига қарагач,— сиз ким бўласиз? — деб сўради. У ҳануз бояги масхара ҳолатда эди.

— Мен Отабек!

— Дунёда Отабекдан кўпи борми, сиз қандай Отабек?

— Отабек Юсуфбек ҳожи ўғли!

— Ҳа-а-а шундоғ дeng-чи... Тошкентлик Юсуфбек ҳожиким, Азизбегимизнинг гумаштаси бўлган зоти шарифнинг ўғиллари?

Отабек бу чўлтоқ супургини таниди ва унинг истеҳзоларини пайқади. У бундан сўнгги кўргилигини тамом маъноси билан англаб, маъносиз бу саволларга жавоб бериб ўтиришдан сукутни хайрлик топди. Гўё ўзининг бу сукути билан Мусулмонқулга маънолик бир жавобни ифода қиласди. Чиндан ҳам Мусулмонқул бу сукутдан таҳқирланди, тутуни кўкка кўтарилиур экан, бақириди:

— Нега жавоб бермайсан?

— Сиз мени қандай таниган бўлсангиз — бўлингиз, мен ўшандоғ кишининг ўғли! — деди бек.— Мен билан отам сиз билан қушбегига бир неча турли бўлиб танилсақда, ўз виждонимиз олдида бир турлигинадирмиз!

Шунинг учун сиз тилаган тарафингизга ҳукм қилингизда, буйруғингизни бераверингиз!

Мусулмонқулнинг юзидағи бояги аччиғлар ерини бир завқданиш вазияти олди. Кулимсираш ичида Отабекни кузатар экан:

— Дов юрагинг бор экан, йигит... Хайфки, гуноҳинг бўйнингда,¹ — деди ва чақирди,— жаллод!

Эшик ёнида кутиб турган ойболталиклар ҳаракатландилар:

— Ханжаримиз қонсираган!

Жаллодларнинг олдида кирган ҳудайчи хонга арз қилди:

— Тошкентдан бир чопар бор, ҳузурингизга кириш учун изин сўрайдир!

Худоёр Мусулмонқулга қаради. Мусулмонқул эрса Отабекни жаллодга топшириш учун ўнгланган тилини қисишига мажбур бўлди:

— Кирсин! — деди ва ўзидан амр кутиб турган жаллодларга.— Бир оздан сўнг! — деди, чиқиб турмоққа ишорат қилди. Негаки, чопарнинг Тошкентдан бўлиши бу ҳукмда бир оз шошмасликни истар, чопар воситаси билан ҳам бу ҳукм эҳтимол ҳақли бир ҳукм бўлиб чиқар ва Мусулмонқул ҳам лоақал ўз умрида бир марта-ба бўлса-да ўринли қон тўккан бўлар эди.

Отабек гарангсигансимон деворга суюнган, бундаги аллақандай маъноларни англатган таҳт, тож, хон, бек каби лаш-лушлар унинг кўз ўнгидага қора пуллик қадру қийматсиз... Тўғриси ул ажиб бир табиатга кирган, унинг вужуди қуруқ ва ҳиссиз... Йўқ, ул сезса-да, билса-да, гўё оёқ-қўли боғланиб бўғизланишга ҳозирланган бир қўй каби қайралаётган пичоққа бутунлай парвосиз, қўрқувсиз томоша қилар эди. Бу турмуш, бу ҳокимият, чеки кўринмаган бу қоронгулик... унинг учун сира қизиқарли эмаслар: ул йўқ эди — тинч эди, ул келди — тинчимади, ул яна йўқ бўлса эҳтимол яна тинчир эди! Мана шунинг учун ҳам ул безрайган эди. Фа-

¹ Мусулмонқулнинг ўзи ҳам фавқулодда юраклик эди. 1853 м. тарихида Мусулмонқул қўёнликларга асир тушиб уни тўпдан отиб ўлдириш учун дордек бир нарсанинг устига ўтқизирлар. Иккинчи томондан тўпга ўт бериш кутилади. Шу вақтда кишилар Мусулмонқулдан сўрайдилар: «Энди қалайсан, чўлоқ?» Мусулмонқул кулибина жавоб беради: «Алҳамдуиллоҳ, ҳали ҳам сизлардан юқори бир ерда ўтирибман!..»

қат... фақат шу турмушдаги бироргина унинг кўнглидан тезроқ ювилмас ва ювилиши ҳам қийинде! Ниҳоят, бундан ҳам қутулгандек бўлди! Аммо, аммо сўнг нафасида унинг билан видолашса, бўғзига ханжар ботар экан, унинг юзига қарабгина кўзи нурсизланса... Унинг ҳамма орзуши шу эди ҳозир!

Худайчи чопарни бошлаб кирди. Чопар номани тиз букиб Худоёрга топширгач, орқасига қайтиб, кўзини девордаги безрайганга ташламасинми... ул ўзининг хон ҳузурида бўлганини ҳам унутди-да, ўзини Отабек устига ташлади, Тошкент чопарининг бу кутилмаган ҳаракати хонни, Мусулмонкулни, қушбеги ҳам ҳудайчини ва олдинги залда ўтирган аъёнларни бир ҳайратда қолдирган эди. Отабекнинг тасалли бериши билан Ҳасанали ундан қўл торғди эрса-да, бироқ ундан ҳаяжон, ийғи ҳали аrimаган эди.

— Адаб! — деб қичқирди Мусулмонқул, сўнgra ўзига қараб қўл боғлаган Ҳасаналидан сўради.— Сен кимнинг чопари?

— Нормуҳаммад қушбенининг!

— Қаердан?

— Тошкентдан, тақсир!

Мусулмонқул таажжуб ичидага ўзига Худоёр томонидан узатилган номани олди. Очиб киши эшитарлик қилиб ўқиди:

«Ёш хонимизга ва падари оруси шаҳаниюҳ Мусулмонқули баҳодир ҳузурларига. Ёш шоҳимизнинг баҳт ва толелари руҳсиз танларимизга қайта бошдан руҳ, маъюс кўнгилларимизга қайтиб чиқмаслик умид бағишлади. Фақир қуллари, бундан тўрт кунлар илгари Тошкентдан сипоҳлар билан умидсиз қайтишга мажбур бўлиб, ул тўғрида ҳузурларига хабар ҳам юборгай эдим. Шу ҳолда биз сипоҳлар билан Кировчи яқинига етган ҳам эдик, орқамиздан бир чопар етиб, Тошкентда Азизбекка қарши исён бошланганини, бизни кўмак учун Юсуфбек ҳожининг Тошкентга чақирганлигини сўзлаб, унинг исмидан бир мактуб берди. Мен дарҳол сипоҳларни Тошкент қайтишга буюрдим-да, хабар олганнинг иккинчи куни Тошкентга етдим. Биз Тошкентга кирганда Юсуфбек ҳожи бошлиқ оломон Азизбекни ўрда ичига қамаб ётар эканлар. Оломон, айниқса Юсуфбек ҳожи бизни жуда яхши қаршиладилар. Биз

боргандан кейин ўрдага босиб кирдик-да, Азизбекни ушлаб олдик. Бошда мен Юсуфбек ҳожини балким Тошкент беклиги учун тамаъланур, деб ўйлаган эдим. Аммо унинг бутун ўрда ва хазина ашё-яроқларини меним қўлимга топшириши бу фикримни бўшга чиқарди. Юсуфбек ҳожи ниҳоятда тамаъсиз, ҳалқ манфаатини кузатувчи бир одам экан. Биноан алайҳи унинг тўғрисидаги бизнинг суйй заноларимиз хато бўлиб чиқадир. Унинг Азизбекка қарши ҳалқни оёқлантириши ҳам, бизнинг Тошкентдан жўнашшимизнинг иккинчи куни Азизбекнивг нечоғлиси сиқилган ҳалқ устига ўттиз икки таангдан сочган солиги бўлибдир. Тошкент ҳалқи Азизбекнинг ҳийласига алданиб, бизга қаршилик қилгани учун пушаймси ва унинг зулмидан қутулгани важидан хурсанддир.

Мен Юсуфбек ҳожининг бунчалик катта хизмати эвазига хон ҳазратларидан улуғ бир мартаба олиб беринга ваъда берган эдим. У бунга қарши узр айтиб, Тошкентга инсофли бир бек белгиланса, меним учун кифея, деди. Унинг хон жанобидан кутган бир марҳамати бор экан: шу яқинда савдо билан Марғилонда юрган ёлғиз ўғлини номаълум бир сабаб билан Ўтаббой қушбегининг қамаганлигини эшишибдир. Унинг бу хизматини бирор мукофотга арзигулил кўрсалар, ўша қамодда бўлган ўғлини озод этмак учун хон ҳазратлари-нинг қилатурган иноятлари ҳар бир нарсадан ҳам унга азизрәқ бир мукофот бўлур. Фақир қулингизча ҳам, Юсуфбек ҳожининг давлатимиз устига қўйган бу миннати кичкина гап эмасдир. Биноан алайҳи унинг ўғли гарчи ўлим жазосига сазовор бўлса ҳам, марҳамати шаҳонанинг жўшга келтирилиши, биз навкарларича ҳам мувофиқ кўриладир.

Рақтинча Тошкент беклигига Қўшдодхони белгилаб, ёнига бирмунча сипоҳлар бердим. Ўзим Азизбекни олиб тезда хизматларига юрсан керак. Нормуҳаммад қушбеги, муҳр».

Мусулмонқул мактубни тутатди-да, уятсиз равишда Отабекка қараб илжайди ва ҳудайчига буюрди:

— Иккита заррин тўн келтир!

Отабекнинг мўъжиза қабилидан сўнг дақиқаларида иккинчи қайта қутулишини кўрган Ўтаббой қушбеги беихтиёр ёқасини ушлади. Худоёрхон ҳам йиртқич

қайин отасининг чангалидан қутулғанлигини табрик қилғандек Отабекка кулиб боқди.

Мусулмонқул оқсоқланиб ўз қўли билан Отабекка заррин тўн кийгизар экан:

— Отангизнинг катта хизмати соясида ўлимдан қутулғанингиздек, заррин тўнли ҳам бўлдингиз,— деб яна бир қайта уятсизланди.

Яна бир неча кун туриб келмоқ учун Отабек Марғилонга, Ҳасанали ота Юсуфбек ҳожини тинчлатиш учун Тошкентга жўнадилар.

ИККИНЧИ БЎЛИМ

* * *

Азизбек Тошкентдан жўнатилди. Унинг ўрнига
Қўқондан Нормуҳаммад қушбеги белгиланиб келди.

Азизбекни қўлга тушириб бериш билан қипчоқлар
наздида ҳам Юсуфбек ҳожининг қадру қиймати
юқориланган эди. Аммо ўзининг мансаб севмаслиги
важидан яна эскича «Юсуфбек ҳожи» бўлиб қола
берди. Шунинг билан бирга, Азизбек ёнида қандай
мавқе тутган бўлса, Нормуҳаммад қушбеги олдида
ундан ҳам юқорироқ ва маънолироқ эътибор қозонди.
Унинг ҳар бир раъйига Нормуҳаммад қушбеги
қонунан мажбур бўлмаса-да, маънан бир мажбурият
ҳис этар эди: ўринсизга киши ўлдиришлар, вақтсиз
ҳам ўринсиз солиқ солишлар, бехуда ўрда исрофотла-
ри, бўлмагур тақиқлар ва ортиқча диний такаллуфот-
лар бирмунча эпга олиндилар.

Уч йиллаб Азизбек истибодода эзилган Тошкент
халқи эркин нафас олди: савдо-сотик, экин-тикин ва
касиб кор кўтарилиб бошлади. Одамлар жонланган-
дек бўлиб, бу ҳолни:

«Замон-замон дориламон,
Нормат тўрам бўлсин эсон!»¹

деб бошланган уларнинг ашуналари ҳам ифода қилас
эди.

¹ Нормуҳаммад қушбегининг Тошкентдаги беклиқ даври тахмити
нан 1270-73 йил ҳижрийгачадир. Замона бекларининг қушёргэгидир.

ОТА ОНА ОРЗУСИ

Ўзбек ойим эллик беш ёшлар чамали, чала-думбул табиатли бир хотин бўлса ҳам, аммо эрига ўткирлиги билан машҳур эди. Унинг ўткирлиги ёлғиз эригагина эмас, Тошкент хотинларига ҳам ёйилган эди. Ўзга хотинлар унинг соясига салом бериб, тўйларида, азаларида, қисқаси тиқ этган йигинларида уйларининг тўрини Ўзбек ойимга атаган эдилар. Бир бугина эмас, қиз чиқарадиган, ўғил уйлантирадиган, суннат тўйи қиладиган хотинлар ўз тўйларини Ўзбек ойим кенгашидан ташқари жўната олмас эдилар. Ўзбек ойим аралашган тўйли хотинларнинг кўнгилларидағи орзу-ҳаваслари ҳам эрлари томонидан камчиликсиз бажарилар, чунки «Ўзбек ойим шундоғ буюрдилар» деган сўз эрлар учун ҳам фарз каби эшитилиб, Ўзбек ойимнинг айтганича ҳозирлик кўрила бошланар эди. Бу томондан қараганда Ўзбек ойимнинг ўткирлиги эрлар томонидан ҳам тасдиқ этилганлигини иқрор қилишга тўғри келади.

Ўзбек ойим унча-мунча тўю азаларга «кавушим кўчада қолган эмас» деб бормас эди. Шунинг учун хотинлар ўз тўйларини Ўзбек ойим иштироқи билан ўтказиб олсалар, ўзларини шаҳарнинг энг баҳтли хотинларидан санаб, «менинг тўйимни бек ойим ўз қўллари билан ўтказдилар» деган жумлани мажлисларда ифтихор ўрнида сўзлаб юрар эдилар. Ўзбек ойимнинг обрўси ёлғиз шулар билангина чекланиб қолмас, уни ўрда хонимлари ҳам эҳтиром қилиб, ўзларининг «онахонлари» деб билар эдилар. Шунга кўра, қайси бир вақтларда ўрда ясовуллари Юсуфбек ҳожининг эшигига арава кўндаланг қилиб, «ўрда беги ойим буюрдилар» деб Ўзбек ойимнинг ясаниб чиқишини кутар эдилар. Бу томон билан қайси бир мажлисларда Ўзбек ойим хотинларнинг эсларини ҳам чиқариб юборар эди: «Кеча ўрда бек ойимдан менга арава келган экан, феълим айнаб турган эди, бормай аравани бўш қайтардим... Бо худо, ўрда бекачи бўлса ўзига, дедим» дер эди. Иккинчи вақтда: «Ўтган кун ўрдага борган эдим, хонимлар ётиб қоласиз, деб қўймадилар, ноилож бир кечада ётиб келдим» деб сўз орасига қистириб кетар эди. Бу сўзларни эшитувчи хотинлар ўзларининг қандоғ бир хотинларнинг эсларини ҳам чиқариб юборар эди:

тиннинг суҳбатига ноил бўлганларини ўйлаб, Ўзбек ойимнинг эҳтиромини тағин ҳам кучайтирас эдилар.

У ўз уйида ўтирганида ҳам устидаги атлас кўйлак билан адрес мурсаги, оқ шойи дакана билан қаҳрабо тасбиҳни қўймай, қиши кунлари танчада пар ёстиқса суюлиб, ёз кунлари айвоннинг тўрига ясланиб Ҳасаналининг хотини бўлган Ойбодоқقا, чўри қиз Ҳанифа га хамирни ачитмасликни, паловни қирмоҳ олдирмасликни танбижлағина ўтирас эди.

Отабекнинг Марғилонда уйланиб қўйиши отаси учун унча ризосизликка мужиб¹ бўлмаса ҳам, аммо унинг ўғил тўйисидан бошлаб, Тошкент қизларини остоуст қилиб, «бунинг қизи яхши бўлса ҳам, уй-жойлари ярамас экан, бунинг үй-жойлари тузук бўлса ҳам, қизи кўрксиз экан, бунинг қизи-да, уй-жойлари-да тузук, бироқ зоти паст экан!» деб қиз, қуда, уй, жой, насл ва насаб текшириб юрувчи Ўзбек ойимнинг Отабекни уйлантириб бунинг орқасидан кўратурган орзу-ҳавас, тўю томошаларини шартта кесиб қўйган бу уйланишга нима дейиши ва қандай қараши албатта маълум эди. Биттаю битта ўғли Марғилон деган жойда, аллакимнинг қўлида, асли номаълум кишиларнинг қизига уйлансин-да, бугун-эрта ўғлимнинг орзу-ҳавасини кўраман деб энтишиб ўтирган ва ўғил боқиб катта қилган она — Ўзбек ойим икки қўлинин бурнига тиқиб қараб қола берсин...

Бу хабарни Ҳасаналидан эшигтан кунлари у бу ишга чидаб туролмади: «Энди менга мундоғ ўғил керак эмас... Оқ сутимни оққа, кўк сутимни кўкка соғдим... Энди Тошкентга келмасин у ўзбошимча бетийиқ!» деб бақириб-чақириб, йиғлаб-сихтаб, дарду ҳасратни бошига кийиб олди.

Орадан ўн беш кун ўтар-ўтмас Марғилондан Отабек келди. Уч ойлаб кўрмаган ўғлини қучогига олиб кўришмак ўрнига ундан юзини ўтириб, сен кимсан, келдингми, деб сўрамади ва саломига алик ҳам олмади, гўё ухламоқчи бўлган товуқдек ҳурпайиб олди. Отабек онасининг аразига аллақачон тушунган, ҳам шу ҳолни

¹ Му жи б — сабабчи, бир иш ва ҳолнинг юзага келишига сабаб бўлувчи.

Марғилондаёқ кутган эди. Бир-икки қайта узр айтиб кўргандан сўнг Ўзбек ойимнинг эпақага келишига ишонмай қолди ва шунинг учун у ҳам гўё билмаган-түшунмаган кишидек юра берди.

Тўғри гап: Отабекнинг Марғилонга узоқ бормай туриши мумкин эмас эди. Ўртадан икки ҳафта ўтар-ўтмас отасига аллақандай баҳона кўрсатиб, йўл ҳозирлигини кўра бошладир ва онасига билдирмаёқ Марғилон жўнайдир. Ўзбек ойим ўғлининг «ўлганнинг устига чиқиб тепиш» қабилидан бўлган бу ҳаракатидан тутуни кўкка чиқиб, борлиқ қаҳр-ғазабини эри устига тўқади: «Сиз қариб эсингизни еб қўйибсиз, ўғлингизни марғилонликка топшириб қўйиб, яна эл ичида бoshингизни кўтариб юрмакчи бўласизми?..» дейдир.

Юсуфбек ҳожининг қизиқ бир табиати бор: хотини билангина эмас, умуман, уй ичиси билан ҳар қандай масала устида бўлса-бўлсин узоқ сўзлашиб ўтирумайди. Отабекми, онасими, Ҳасаналими, ишқилиб, уй ичидан бирортасининг сўзлари ва ё кенгашлари бўлса, келиб ҳожининг юзига қарамасдан сўзлай берадилар; мақсад айтилиб битгандан сўнг секингина кўтарилиб унинг юзига қарайдилар. Ҳожи бир неча вақт сўзлагувчини ўз оғзига тикилтириб ўтиргандан сўнг, агар маъқул тушса «хўп» дейдир, гапига тушунмаган бўлса «хўш» дейди, номаъқул бўлса «дуруст эмас» дейди ва жуда ҳам ўзига номаъқул гап бўлса, бир илжайиб қўйиш билан кифояланиб, бундан бошқа сўз айтмайдир ва айтса ҳам уч-тўрт калимадан нарига ошмайдир. Уй ичи унинг бу феълига жуда яхши тушунганликларидан кўпинча бир оғиз жавоб олиш билан кифояланадилар. Аммо Отабек билан бирор тўғрида сўзлашмакчи бўлса, уни аксар меҳмонхонага чақириб ёки чақиритириб оладир. Ўзбек ойим юқоридаги ўзининг итоб ва хитобига эридан бир илжайиб қўйиш жавобини олиб, дами ичига тушадир ва чор-ночор ўттиз кунлаб бир замонни ўзича марғилонликни қарғаш билан кечираадир. Отабек Тошкентга қайтиб келиб, «энди араз битгандир» деган ўйда онасига салом берадир. Араз битинш қаерда, Ўзбек ойимнинг ўғлига қарши кинаси тагин бир неча қат ортган, аммо бу гал салом бергувчига бир қарайдир-да, «ўғлим, менга салом бериб нима қиласан, марғилонлик онангнинг дуосини ол!» деб юзини четта ўтирадир. У онасининг бу киноясини култилик билан

кечириб, яна эскича аразда қола берадилар. Отабек яна ўн беш кунни ўтказиб, тағин бир нозик сабабни ўртага ташлаб, онасининг рухсатисиз Марғилонга жўнаб соладир. Тағин Ўзбек ойимнинг ранги ўчган, қони қочгани, товоқни косага, чўмични пиёлага уриб доду фарёд... «Сиз отамисиз, нимасиз ахир, ўғлингизни тийиб олиш сира эсингизга келадими? Ўғлингизнинг бу иши бежиз эмас: марғилонлик сеҳр қилдими, жоду қилдими, ҳайтовур сиз шу йўсинда юра берсангиз эрта-индин ўғилдан ажраласиз. Бу қалвак ўғлингиз марғилонликнинг эшитига қул бўлиб ётиб оладир...» Аммо Юсуфбек ҳожи хотинининг сўзини бу гал ҳам эламайдир, фақат: «Қўя бер, хотин, ўзи соғ бўлса, бир кун эсини топар» деб қўядир. Бир ярим ойлар вақтни Марғилонда ўтказиб, Отабек Тошкентга келадир. Тағин она-бала ораларида кина-кудурат... Тағин араз... Ўн беш кун ўтмасдан яна Андижон сафари, яна Ўзбек ойимнинг фигони фалакка. Марғилонликнинг сеҳрчисига ўлим тилаш, мени ўғлимдан ажратса, ўзи ҳам севганидан ажрасин, деб қарфиш...

Ниҳоят, орадан бир йил чамаси вақт ўтиб, Марғилонга қатнаш етти-саккизгача етгач, Ўзбек ойимнинг ғиди-бидиси билан бўлса керак, Юсуфбек ҳожида ҳам бир ўзгариш кўрила бошлайдир. Хотинининг: «Ўғил ўстиришни, ўғил тийишни билмайсиз» деб силталашига: «Нима қил дейсан энди?» деб сўрайдир.

— Биз Отабекни Тошкентдан уйлантириб бошини боғламасак, кун сайин унинг Марғилон югуришидан кутула олмасмиз. Тошкентда уйланса, сув қуйгандек тийинар-қолар, Марғилон балосини эсидан ҳам чиқарар... — дейдир Ўзбек ойим, яъни ҳамиша юрагини шопиртириб, миясини машғул қилган муддаони айтиб солиш фурсатини қочирмайдир.

— Ўғлинг қайтсан-чи, бўлмаса...

Эрининг бу сўзига Ўзбек ойим ортиқча қизишади, лаби-лабига тегмай бобиллаб беради:

— Сиз шу кунгача барча ихтиёри ўғлингизга топшириб болани бола қилмадингиз, бир худбин қилдингиз... Ўғил ўстириш бу турда бўлмас; у тиласин-тиласин шартта-шартта тилаганингизча қилингиз-да, қараб тура берингиз. Сиз ўзингизнинг шу «ўғлинг билар» деган гапингиз билан қанча яхши жойлардан қолиб, ниҳоят марғилонлик балосига йўлиқдингиз... Эндиғи

иҳтиёр манда, у келгунча бир яхши жойга унашайин-да, келгандан сўнг тўйни ҳам жўнатиб юборайлик!

— Тура тур-чи...

Ҳожининг бунчалик бўш келиши Ўзбек ойимга қа-
нот-қўйруқ бергандек бўлди ва бундан сўнг тини-
бинчиб туролмади. Шу гапнинг иккинчи куни Ҳасана-
лини қўярда-қўймай арава қўшдириб, шаҳарнинг тўрт
томонига қиз кўриш учун юриб кетди. Марғилонлик ке-
линнинг таърифини Ҳасаналидан кўп эшигтан эди.
Отабекнинг кўнглини ўша гўзал марғилонликдан сову-
тиш йўлида ундан ҳам кўҳли, ундан ҳам сулув қиз то-
пиш кўйига тушди. Шунга кўра, унга унча-мунча қиз
ёқмай, шаҳардаги кўп эшикларни санашга тўғри келди.
Еттинчи мартаба кўчага чиқишида Олим понсад деган-
нинг қизи ёқа тушиб, ҳожига арз қилинди. Ҳожи бош-
да хотинининг бу гапига кулди, ундан кейин «тура тур,
ўғлинг келсин» деди. Ўзбек ойимнинг бобиллаши кучая
бергач, «Нима қилсанг, ўзинг бил, башарти ўғлинг кўн-
маса, мен зўрламайман» деди. Ўзбек ойим эрига ялина
бошлади:

— Бир сўзлигинизни қўйинг, эр, ўзи аслзода. Лоа-
қал бир оғиз ўғлингизга айтиб ўтишга ваъда беринг-
чи,— деди.

— Яхши. Баъда ҳам берайин, аммо сан унашмай тур!

— Унашмайман, лекин ўғлингизга унашдик, деб
эшигтиармиз... Тузукми?

— Маъқул.

Шу ўтиришдан сўнг Ўзбек ойим жуда ҳам жонла-
ниб кетди ва эртасига Олим понсадникига қараб яна
арава қўшдириди. Бу иккинчи — совчиликда гўё қуда-
чалардек қарши олинди. Олим понсад бошилар: Юсуф-
бек ҳожига қуда бўлар эканмиз, деб жуда ҳам типир-
чилашиб қолган ва иззат-икромни ҳаддан оширган эди-
лар. Еган оғиз уялар қабилидан Ўзбек ойим ҳам муома-
лани қудаларча қилди, ҳатто: «Бек отангиз билан мен
сўзни бир жойга қўйдик. Фақат иш Отабекнинг кели-
шига қолди» деб қўйди. Кечқурун уйга қайтиб бу айт-
ган сўзини ҳикоя қилган эди, ҳожи лабини тишлаб қол-
ди ва: «Сенга сира ақл битмай кетар экан-да» деди.

Бир ойлаб кечиккандан сўнг Отабек қайтиб келди.
Бу келишининг виждан азоби ва тиламаган бир так-
лифни эшитиш учунгина эмас, балки қабул қилиш учун
бўлганлигини пайқади. У бу гапни онасининг илгариги

ачимсиқ сўзларини ва аразларини тугалганидан ва ўзига сучук сўзлар, силлиқ муомалалар битиб, «эсон-сөғ келдингми, болам»лариданоқ сезган эди. Бундай бўлмагур таклифни эшитмас учун ўзини четта олиб, отаси, айниқса онасига йўлиқишидан қочиб юришга мажбур бўлди. Икки орадаги бу қочиш-қувиш иши узоқча чўзилмай, бир кеч меҳмонхонада ота-ўғил сўзлашиб ўтирганинг устига Ўзбек ойим келиб киради ва ўтирмасданоқ ҳожига имлаб қўйди. Бу имқўқни Отабек пайқамаган бўлса ҳам, лекин анави гапни аниқ шу мажлисда очилишига кўзи етиб, чиқиб кетишнинг иложини қиолмади. Ўзбек ойим келиб киргандан сўнг, Юсуфбек ҳожи бир неча вақт ўйлаб қолди. Ўзбек ойим депсиниб-депсиниб эрига қараб олар эди. Анчагина сўзсиз ўтиргандан сўнг ҳожи мулоимона сўз очди.

— Ўғлим, ҳали сен эшитдингми, йўқми, ҳайтовур биз сенинг устингдан бир иш қилиб қўйдик...

Отабек маълумки, уларнинг «қилиб қўйган ёки қилмоқчи бўлган ишларини» албатта билар эди. Шундай ҳам бўлса билмаганга солинди:

— Ақлли кишиларнинг ўғиллари устидан қилган ишлари албатта, номаъкул бўлмас,— деди.

Ҳожи, ўғлининг бу жавобидан ерга қаради ва нима деб давом қилишини билмай қолди. Истеҳзо аралаш хотинига қараб олди. Яна орага жимжитлик кирди. Бу сўзсизлик маъносига Ўзбек ойим тушуна олмаган эди. Бир оз қараб ўтиргач, юраги қайнаб кетгандек бўлди:

— Биз сенинг учун Олим понсадбошининг қизига унашиб қўйдик... Энди сенинг билан тўй маслаҳатини қилмоқчи эдик...

Отабек онасига бир оғиз сўз демай, маъноли қилиб отасига қараб олди. Ҳожи уятликсимон «шундоғ» деб қўйди.

— Сизларни ранжитиб бўлса ҳам бир мартаба уйланган эдим-ку. Энди...

— Сен уйлансанг биз ранжирмидик? — деди кулиб ҳожи.

— Ранжимасаларингиз....

Ҳожи тузукланиб ўтириб олди:

— Бу ранжишдан эмас, ҳожатдан, ўғлим.

— Нима ҳожат?

— Ҳасаналининг сўзига қараганда, қайин отанг қизини Тошкентта юбормас экан. Ўғил ўстириб катта

қилган онангнинг бўлса олдига келин қўйгуси келадир...

Отабек онасига қаради:

— Бу кунгача келинсиз ҳам яшаб келдингиз, бундан кейин ҳам шусиз туриб бўлар-ку! — деди.

Ўзбек ойим марғилонлик томонидан сеҳрланган ўғлига қарши қизишиб кетди. Бир йиллардан бери ичига йиғиб келган кинасини тўкиб берди:

— Мен сени бу умид билан боқиб катта қилмаган эдим... Сен бизнинг наслимизни кўтариш ўрнига, ерга уриб булғадинг. Биз сени Марғилон андисига бунчалик муккадан кетишингни ўйламаган эдик, адабсиз... ўзинга қолса, шу марғилонликни хотинга ҳисоблаб кета берар экансан-да, уятсиз!..

Отабек ҳам қизишиди:

— Хотин бўлмаса нима, ахир?!

— Қошли, кўзли бир анди!

— Анди, деганингиз нима, ўзи?

Юсуфбек ҳожи ўғлини босиш ўрнига, жавоб бер, дегандек қилиб илжайган ҳолда хотинига қаради. Ўзбек ойим «анди» маъносини билдириб, андиларнинг сехрини рад қилиш учун бир оз тутилиқиб қийналди:

— Анди... анди... ўзи хитойми, нима бало... ўзи қалмоқдан тарқаган бўладир... Тушунмаган бўлсанг, лўлиларнинг бир тоифаси...

Бу жавобга Юсуфбек ҳожи ўзини хохолаб кулишдан тўхтата олмагандек, Отабек ҳам кулиб юборди. Хотинининг тирноқ остидан кир излаб ва даъвосининг исботи учун ғўлдирашидан ортиқча кулиб кайфланган Юсуфбек ҳожи кўзига чиққан ёшларни артар экан, жиадият билан ўғлига деди:

— Ўглим, сен онангнинг гапига аччиғланма. Ул ҳар нарса деса, фақат Марғилоидан уйланганингга қаршилигидан айтадир. Аммо мендан сўрасанг, Марғилоондаги на қудамиз ва на келинимизни ҳеч бир важ билан камсита олмайман, балки бизга қуда бўлмоққа энг мувофиқ кишилар эди, балли, ўглим, дейман. Сенинг тиниб-тинчишинг, ўсиб-унишинг учун қувонмаган ота-она соққа ҳисобланмайдир. Сен бунга яхши ишон. Аммо бизнинг ҳозирги баъзи бир раъйиларимиз сенга ётишиб келмас экан, бунга ҳаққинг ҳам бор, лекин иккинчи тарафдан бизни ҳам ҳақсиз ташлаб қўйма, ўглим. Биз-

нинг сендан бошқа умид нишонамиз, ҳаёт қувончимиз йўқ. Дунёда кўриб ўтатурган барча орзумиз, ҳавасимиз фақат сенгагина қараб қолган. Биз худои таолога минглаб шукур айтамизки, сен бошқаларнинг фарзандидек эсли-ҳушли бўлдинг; кишилардек сен билан ифтихор қилмасак-да, сен орқали хижолат чекмасимизга ишондик. Айниқса, онангнинг сенинг туфайли кечиратурган умидлари тобора ортиб боради. Бу кун онанг сенинг олдингта тиз чўкиб ва онанг кўнгли учун мен ҳам орага тушиб сендан сўраймиз: сен ўз ҳоҳишинг йўлида уйланган экансан, рафиқант сенга муборак бўлсин. Эслилик даъвосида юрган ота-онанг тилаги, албатта, шундан бошқа бўлмис. Шу билан бирга, сенинг сабаби вужудинг бўлган бир киши ўз ҳаёти ичида боласи орқали бир орзу-ҳавас кечирмакчи... Унинг бу орзусига ҳақ берасанми, йўқми, яна ихтиёр ўзингда...

Ҳожининг бу сўзи Ўзбек ойимга нечоғлик ёқсан бўлса, Отабекни шу қадар ерга қаратган эди. Ҳожи, ўзидан ошириб сўзлаган бу сўзларини шу гап билан тамомлади:

— Билган топиб сўзлар, билмаган қопиб деганларидек, онангнинг айтмоқчи бўлган сўзи фақат шу эди. Бояги гаплари бўлса, ўз ҳаққини ҳимоя қилиш йўлида, унинг пўписаларигина бўлиб, мендан ҳам кўра онангнинг феълини ўзинг яхши биласан...

Отабек ҳамон сукутда, Ўзбек ойим бўлса боши билан «шундоғ» ишорасини берар эди. Юсуфбек ҳожи юқорида ўтган гапларни қуруқ ва асоссиз сўзламаган, балки шу турмушнинг рукин ва асосини бир даража айтиб ўтган, Отабек эса буни шу муҳитнинг бир ўғли бўлиб эшитган эди. Тўғриси ҳам у дадаси томонидан сўзланган ҳалиги қонунга қарши чиқиш учун лозим бўлган кучга молик эмас, бас кучсизликнинг натижаси эса сукут эди. У бир томондан шундай орзу-ҳавас учун бола ўстирган ота-онани мукофотлантиրмакчи ва отаси айтган хижолат чектирмайтурган ўғиллардан бўлмакчи эди эрса ҳам, иккинчи ёқдан ўзини асир этган шаҳло кўзлар унга нафратланиб қарагандек бўлурлар, гўёки вафосиз, ваъдасиз деб қичқиурлар эди. Тўғриси ҳам, уни ота-она мукофотига қарши оёқлантироқчи бўлган нарса ҳалиги кўзларгина, аммо бунинг бу исёниамо ҳаракатидан бошқа унсурлар қидириш ва чақириш, албатта, ўринсиз тушар эди. Ота-она орзусини ифода

этицдан бир сония ҳам ўзининг кўз ўнгидан хаёли кетмаган анов илохий муҳаббат учун ҳеч бир турли камчилик қилмасига ишонса ҳам, ҳозир унинг юрагини бошқа бир ҳақиқат тирнай бошлаган ва виждонини фақат шу масалагина ўраб олган эди. Отабекча энг нозик саналган бу масала қаршидаги жавоб кутиб ўтирувчиларни ниҳоят зериктириди.

— Бизни кутдирма, ўғлим!

Отабек мағлуб бир боқиш билан у сўзни айтувчи отасига қаради ва ялинчоқ бир оҳангда жавоб берди.

— Мен сизларниңг орзуларингизни бажаришга, агар хурсандлигингиз шу билан бўлса, ҳар вақт ҳозирман. Аммо бир бечорага кўра-била туриб жабр ҳам хиёнат...

Ҳожи, ўғлининг мақсадига дарров тушуна олмади ва сўради:

— Кимга, хотининггами?

— Йўқ, сизнинг олатурган келинингизга. Ўғлинингзининг вужуди билан орзунгизни қондириш осон бўлса ҳам, келинингиз қаршисида мени бир жонсиз ҳайкал ўрнида тасаввур қилингиз!

Юсуфбек ҳожи ялт этиб хотинига қаради. Ўзбек ойимнинг бўлса олатурган келинига эътимоди юқори-лигидан ўйлаб-нетиб турмади:

— Майли, болам, бу ёқни ҳозир сен ўйламай қўй! — деди.

Отабек бир оғиз сўз айтмай, сукут қилди. Юсуфбек ҳожининг эса ўғлининг сўзини тўғрилигига, кейиндан юз кўрсатадиган кўнгилсиз ишларга ақли етса ҳам, аммо бир мулоҳаза юзасидан истиқболнинг қоронғу ишларини ҳозир унча мулоҳаза қилиб кўрмади:

— Жуда тўғри айтасан, ўғлим, бироқ онангнинг бир мулоҳазасизлигига бошдаёқ мен лабимни тишлаб қолған эдим. Ҳозирда ҳам шу ҳолда қолмоқقا мажбурман,— деди.--- Биз ҳозир андишанинг бандаси, мен эмас, онанг бирорни ишонтириб қўйган; бизнинг оиласдан лафзсизлик чиқиши менга маъқул кўринмайдир.

Отабек ота-она орзусига, ўз таъбирича, жонсиз ҳайкал бўлиб ризолик берди. Аммо ўз ризолигининг шарти қилиб тўйдан илғари Марғилон бориб келишни ва бир даража уларга айтиб ўтишни, шундан сўнг тўй бўйлашни аҳд қилди. Ишнинг енгил кўчишига севин-

ған сна, Отабекнини шу шартига лом демасдан кўнди ва орзули тўйни тез бошлаш учун ўғлини Марғилон қетмакка қистай бошлади.

2

УНУТМАЙСИЗМИ...

Унинг бу галги Марғилон йўлига қўзғалиши ортиқча бир оғирлик билан, иккиланиш билан ўралган эди. Кумушбиби учун дунёга сифаслик бир шодликни кўргўвчи кўзларига ишона олмаслик бир бахтнинг бу гал кўтариб бўлмайдиган бир қайғу, чида бўлмайдиган бир ҳасрат бўлиб боришини у яхши тушунар эди. Ҳар бир гал Марғилон борганида олиб борадиган нафис совғалари бу гал жуда заҳарли, ортиқча аламли бир совғага айланган. Кумушбиби бу совуқ кундош совғасини кўрганда эҳтимол... нималар бўлар ва қандай ҳолларга тушар эди. Бу мудҳиш совғани, эҳтимолки, унинг ота-оналари ҳам қабул қиласлар; бирдан-бир ёлғиз қизлари учун бундай гапнинг ярашмасини айтиб: «Совғанг ҳам керак эмас, ўзинг ҳам!» деган жавоб билан юзига ҳам урарлар. Мана, унинг бу галги оғир ҳаракати ва қўзғалишига нималар сабаб эди.

Бу оғирликка орзу эгаларининг қистоқлари ниҳоят берди, яъни чор-ночор бу тутуриқсиз совғани кўтариб йўлга тушишга мажбур бўлди.

Отнинг бошини ўз ихтиёрига қўйган, илгаригидек юрак ошиқишлиари ичида отни тез юришга қистамай, сувга тушган ноңдек бўкиб-бўшашиб, юз хил совуқ, ярамас хаёллар қўлида эзилиб, ўзининг дунёда борми-йўқлигига ҳам тушунмай кета берадир.

Хозир кўклам кунлари: қирлар, тоглар, сойлар, кўк-қизил, қора-оқ, сарик, зангор, пушти, гўлас ва тағин аллақанча рангли чечаклар билан устларини бежаб, қиши билан тўнгигиб аранг етишган ошиқларига янги ҳаёт, янги умид берадилар. Қиши бўйи аллақайси гўр остларида жунжиб чиққан қуш зотлари: чумчуқлар, читтаклар, тўргайлар, саъвалар ва бошқа аллақанча қуш туркумлари ўз тўплари билан вижир-вижир, чугур-чугур сайраб-куладилар, ер юзини туттган чечак ги-ламлари устини ўпид яладилар, ётиб чўқийдилар, сап-

чиб учадилар... узоқ-узоқдан қакку құш ҳам арзі вұжуд қиласы: «қакку-қакку».

Поёнсиз қирларнинг ниҳоятсиз вижир-вижир күриб түймаслик күк гиламлари ва уларнинг димогларга мажбурый искаттан даво ислари, ёқимли ҳидлари ҳар қандай ишдан чиқаёзган ҳаёт эгасини озгина бўлса ҳам эпга ола биладилар. Шунингдек бу чечак қирлари ўз бағрида сузуб борган бизнинг Отабекни ҳам ўзига қаратмай қўймайдир. Унинг фикри анови қоронгуликлар ичida сузса ҳам, кўзи чечак ва сабзалар томошасида, димоги ҳидлар истишомида, қулоғи қушлар нағмасида бўладир. Нима бўлса ҳам теварагидаги кўклам безакларини кўздан кечира борадир. Бора-бора фикри ҳам шу кўринишлардан ҳисса олмоққа бошлайдир:

— Ҳов ана бир қалдирғоч, тўғрига қараб ўқдек отилиб борадир, учган йўлида вижир-вижир сайраб ҳам қўядир. Қалдирғочнинг қайғуси йўқ, севганининг олдига тезроқ етиш учун шошадигандир, сайроғи ҳам севганининг кўриш шодлиги учундир... Бахтли қалдирғоч олган совғаси ҳам қўрқинч эмасдир, ота-онасининг ҳам орзу-ҳаваслари йўқдир! Уларнинг турмуш қонуналари жуда енгил, иков-иков, севган севганни оладилар-да тоғларда, ерларда, кўкларда учиб юра берадирлар... Мен ҳам шу қалдирғочдек, унинг сари отилиб, вижир-вижир сайраб учар эдим.

Унинг қалдирғочлик қаноти ота-она мукофоти билан қайрилган. Унга учгали эрк бермайдилар. Лекин ҳайвон, унинг қайрилган қанотига қарамасдан, ўзининг эски одим ташлашида қирлар, тоғлар ошиб, сувлар кечадир; етти-саккиз қайта бориб келган таниш шахрига интилгандан интила берадир. Бу ошишлар, бу кешишлар ўзга вақтларда Отабек учун ҳузур ва ошиқиши багишилган бўлсалар, бу гал уни нафратлантирадилар, бормай қайтиш фикри ҳалидан-ҳали кўнглига келиб турадир.

Узоқда қўш ҳайдаб юрган йигитнинг ашуласи эши-тиладир: «Икки ёрни ажратувчи бу фалакнинг гардиши!» — руҳли, кучли кўкракдан чиққан бу ашула теваракни зир эттириб юборгандек Отабекка ҳам бошқача бир таъсир берадир. Гўё бу деҳқон унинг истиқболидан ҳикоя қилгандек бўладир. Бу байт деҳқоннинг өғзидан яна такрорланиб, тагин теваракни янгратадир. Энди Отабекнинг кўнглидан бир гап ҳам ўтиб кетадир:

«Икки ёрни ажратувчи бу фалакнинг гардиши эмас, ота-онанинг орзуси!» Ўзининг сирли маъносига Отабекнинг истиқболини олиб кўринган бу байт ниҳоят уни йиғлатадир. Кўз ёшлари юзи орқали эгарнинг қошига ва отнинг ёлига тома бошладир...

* * *

Марғилонга тўрт қўниб кирар эди, бу гал олтинчи қўнишда етди. Теваракдан аср азони эштилган вақтда отдан қўнди. Отини қутидорнинг йўлагига етаклар экан, негадир юраги йўнаб кетди. Бу гал ўз одатидан ўн кунлар чамаси кечиккани учун, «балки кутиб ўтиргандир» деб ўйлаб, ҳалиги юрак ўйногиси тағин ҳам кучайди ва йўлакдан меҳмонхона ҳовлисига чиққа, ихтиёrsиз отининг бўйнига суялиб тўхтамоққа мажбур бўлди.

Чиндан ҳам у айвоннинг олдида кутиб ўтирган эди. Хаёлот ичida Отабекнинг келиб кирганини сезмай ҳам қолди. Ниҳоят, қора оҳу кўзларини тўлдириб бунга қаратиб олгач, ўрнидан турди-да, ичкари ҳовлисига бурилиб кета берди. Бу бурилиш маъносига Отабек аллақачон тушуниб қолган, бу ўзининг кечикиб уни зориқтиргани учун... Кечикиш учун бунчалик араз қилган бу гўзалнинг кундош учун қандоғ ҳолга тушмоғи маълум эди. Отабек тамом бир эсанкирашда қолди. Отини ахтахонага боғлаб, совға тўлдириб келган ипак ҳуржунни кўтариб, ичкарига кирди. Севикли куёвни йўлакда кўрган Офтоб ойим, қилиб турган юмишини улоқтириб Отабекнинг олдига югурди, жонини минг тасаддуқ қилиб кўришгач, кечиккани учун нечоғлиқ ташвишлар тортиб ва қандоғ тушлар кўрганини лаби-лабига тегмай сўзлай кетди. Аллақаёқларда юрган Тўйбека ҳам югурга келиб, сўрашмоққа уялса ҳам «чиройли йигит»нинг қўлидаги ҳуржунни олди.

Офтоб ойим югурга-югурга қат-қат кўрпачалар солиб куёвни ўтиришга таклиф қилди ва қаршилашни ҳар галгидан ҳам ошириб юборди. Лекин Отабек бу қарши олинишларга жуда ишончсиз қарап, бу кун бўлмаса эртага «ота-она орзуси» билан бу сийланишларнинг бирдан ўзгариб кетмагига имон келтириб, қайси йўсимида ўтириб олганини ҳам пайқамас эди. Офтоб ойигининг бир қанча яхши тилаклар билан қилган дуосига ҳам ишончсиз қўл кўтарди ва машъум «орзу»нинг бул-

доғ яхши дуоларни ост-уст қилишини ўйлади. Фотиҳадан кейин Офтоб ойим товоқни хурмага, хурмани төвоққа уриштириб күёвга қатиқ олиб чиқди ва Отабекнинг ичмаганига ҳам қўймай, «ичингиз, йўл ғуборини оладир» деб қистай бошлади. Сўнгра Тўйбекани чой қайнатишга буюриб, ўзи күёв билан сўрашди:

- Отангиз, онангиз саломатларми?
- Шукур, сизга салом айтдилар.
- Ҳасанали отам соғми, нега сиз билан келмади?
- Шукур, соғ! Бальзи ишлар билан бўлиб келолмади,— бу жавобни бериш ҳамона кўнглидан кечди: «...Нега ёлғон гапирасан, Ҳасанали тўй ҳаракатлари билан машғул эмасми?...»

Отабекнинг кириб ўтирганига бир неча дақиқа фурсат ўтган бўлса ҳам, ҳамон Кумуш уйдан чиқмадида, аразини қаттиқ ушлаганча ўтириб олди. Офтоб ойим күёви юзида кўрилган ўйчанликни Кумушнинг уйдан чиқмаганлигига йўйиб қизини чақирди:

- Кумуш! Қаллиғинг келдила-я, чиқиб сўрашишни ҳам билмайсан.

Офтоб ойимнинг шу йўсин чақириши уч-тўрт қайтаб бўлса-да, Кумуш эшитмаганга солиниб, арзимаган нарсалар билан шуғулланган бўлиб чиқа бермади. Отабекнинг юзидағи ўйчанликка разм қўйган сайин Офтоб ойимнинг ҳалиги шубҳаси улгая борди. Күевнинг кўзини шамфалат қилиб қизининг олдига кирди ва шивирлаб Кумушни уриша бошлади: «Эсингни едингми, қизим, эринг сени деб Тошкент деган шаҳардан келса-ю, сен ким келди, деб олдига чиқмасанг! Тур, чиқиб сўраш, аразлаб кетиб қолса, нима қиласан?» — Офтоб ойимнинг бу кейинги сўзи чиндан ҳам Кумушни ўйлатиб қўйди, «...кетиб қолса нима қиласан?» деган жумлани кўнглидан кечирди-да, онасидан илгарироқ, гўёки айвон токчасидан бир нарса оладигандек бўлиб, ўзига термулиб турган Отабекка ер остидан секингина бир кулиб боқди ва токчадаги кераксиз бўлган бир пиёлали олиб, яна уйга кириб кетди.

Ўзбек ойимнинг сехрчи-жодувчи деб қарғаши ҳам ҳикматсиз бир гап эмас, Кумушбибининг бу кулиб қараши Отабекда ажиб бир инқилоб ясаган эди. Ундаги айни бу ўзгариш жуда қизиқ ва сира ишонмаслик эди. У бу ер тагидан бир кулиб боқиши таъсири билан устидаги тоғдек босиб ётган «орзуни» ағдариб солган ва

қушдек енгил тортган эди. Унинг оний бу ўзгариши шундан иборат эди:

«Уларнинг орзу ва ризоликлари, бу ризолик шарофати билан топиладиган савоб, юртнинг юқори-қўйи гаплари — барчаси ҳам Кумушнинг ёлғиз шу биргина кулиб қараши олдидан ўта берсин!»

Оний бу ўзгаришдан сўнг тараддуғисиз шу қарорни кўнглидан кечирди: «Уларнинг орзуларини буларга сўзламайман-да, Тошкентларига ҳам бормайман!»

Ундаги бу ўзгариш оний бўлганидек жуда жиддий ҳам эди, кўнглига неча кунлардан бери узала тушиб ётган чигил «бир кулиб боқиш» сеҳри билан ечилаш ва Марғилонда доимий турғуналикка, деб тугилган эди... Бу ўзгаришдан кейин онадан тутма бўлиб енгил тортди, гўёки мундан сўнг ўзиники бўлгандек қилиб ишонч ва сокит кўзлари билан уйга қаради. Шу вақт уй ичидаги ситамгар пари ўзининг сеҳрли кўзлари билан Отабекка яна кулиб қараб турар эди-да, гўёки шу кулиш билан ўз сеҳрининг қайси даражаларда кучли бўлганини сўзлаб фахрланар эди.

Ўртадан ўн беш кунлар вақт ўтди. Кумушнинг қайталаб сўрашига:

— Чиндан, чиндан, бундан сўнг Тошкент бормайман! — деган жавобни берар эди. Кумуш бу гапга ажабланар, тўғриси, шодланар эди.

* * *

Марғилон келганинг йигирманчи куни. Отабек ҳозиргина қаёққадир чиқиб кетсан эди. Қутидор одатига карши бозордан кундуз соат учларда қайтиб келди-да, Отабекни сўради, йўқлигини билгандан сўнг хотинини меҳмонхонага бошлаб чиқди.

— Тинчликми? — деб сўрагувчи Офтоб ойимга севинч ва қувончлиги билинмаган бир вазият билан жавоб берди:

— Тинчлик.

Меҳмонхонада эру хотин ёнма-ён ўтиришдилар. Офтоб ойим бу боши-оёги йўқ ишдан ёрилар даражасига ета ёзган эди.

— Отабекдан ҳеч бир сўз эшитдингми? — деб сўради қутидор.

— Қандай сўз эшитай, ҳар қачон сўзлайдир, албатта, мен эшитаман.

- Тошкент тўғрисида ҳеч гап айтмадими?
- Тошкентта бир гап бўлганми?
- Тошкентга ҳеч гап бўлмаган,— деб кулимсиради қутидор.— Менинг муддаом бошқа тўғриларда. Қизингдан ҳам ҳеч гап эшифтадингми?
- Ҳеч гап... Ҳа, айтгандек кеча, эрининг мундан кейин Тошкентта бормаслигини сўзлагандек бўлган эди.
- Қутидор бир ишга тушунгандек кўзини ўйнатиб олди ва сўради:
- Энди Тошкент бормас эмишми?
- Билмадим, чинми, чин эмасми, ҳайтовур қизингиздан эшифтандек бўлган эдим. Нима, ота-онаси билан уришиб келганми?
- Йўқ,— деди қутидор ва чўнтагидан бир нарсани ола-ола айтди,— мен бугун Тошкентдан қизиқ бир хат олдим.
- Кимдан?
- Қудангдан,— деди қутидор ва хатни оча-оча,— шуни сенга ўқиб бермоқчиман,— деди.
- Ахир ўзи нима гап? — деб сўради Офтоб ойим.
- Эшитсанг биласан.
- «Қудамиз Мирзакарим қутидорга ва қудачамиз хонимга етиб маълум бўлгайким, бизлар бунда соғ-саломатдирмиз ва ул жонибдаги сиз ҳурматли ва иззатлиларнинг ҳам парвардигори оламдан сиҳатларингизни салоти ҳамса олдида сўраб турмоқдамиз. Баъда маҳфий қолмагайким, куёв ўғлинигиз хизматларига юборилган эрди. Иншоолло, саломат етган бўлса керак.
- Сиз ҳурматлиларга маълумдир, бизнинг шу Отабекдан ўзга фарзандимиз бўлмай, дунёда ўзимиздан кейин қолдирадиган туёқимиз ва кўз тиккан орзу-ҳавасимиз, умид ҳадафимиз¹ фақат шул Отабекдир. Мухтарам сиз биродаримизнинг шул ягона ўғлинигизни фарзандликка қабул қилиб, аммо бизнинг келин боламизни Тошкентга юбормаганлари, бизнинг жанобларидан бўлган миннатдорлигимизни ва яна ўғлинигизга бўлган марҳаматларини бир оз тугаллай олмайдилар. Аммо каминналари айни сизнинг устингизга бутунлай юклай олмаймиз, зероки, бизнинг бошимизда бўлган «ёлғиз туёқлик» савдоси сизнинг ҳам бошингизда бордир.

¹ Ҳадаф — нишон.

Начукким, Отабекнинг кўп умри Марғилонда ўтиб, бизларни ҳам сиз ўйлаган оғирлиққа солмоқдадир. Биродари азиз, сиз меним бу сўзларимдан хафа бўла кўрмангиз, зероки фақирингиз бу сўзларни бир йўсини келиш важидан ёзиб ўтдимиз. Дунё — орзу-ҳаваси уйи, дерлар. Юқорида баён қилингандек ва ўzlари билганларидан, айниқса қудачаларининг дунёга келиб кутгани шу ёлғиз ўғилнинг орзу-ҳавасидир. Жаноблари бул ишга ҳақ берурларми йўқми, аммо азизларнинг рухсатларини олмасданоқ Отабекни Тошкентдан ҳам тааллуқдор қилмоқчи бўлиб, бу маънига баъзи бир ҳаракатларни қилиб қўйган эрдик. Аммо бизларнинг бул раъйимизга ўғлингиз қарши тушиб ҳарчанд рад қилса ҳам, ниҳоятида онасининг сўзини ерда қолдирмаслик учун қабул қилган эрди. Аммо бул тўғридаги сиз жанобларининг рухсатларингиз бъядида жавоб бермакчи бўлиб хизматларига кеттан эрди.

Сиз ҳурматлилар бул маънини савоб топасизларми, йўқми, бу жиҳати яна марҳаматларингизга bogлиқdir. Bu мактубни ёзишдан қасдимиз шулким, Отабекнинг бу иккинчи тааллуққа асло раъий бўлмай ва яна сизларга айтмай бул тарафда бизларни хижолат чекдириб қўярми, деб ўйладик. Биродари киром, сиз дунё кўргани бир кишисиз, онасининг бу талабини кўп мулоҳаза қилиб кўрингиз, бу тўғрисидаги раъий, ўғлингизга қараганда ҳам, фақирларича, сизларда бўлгани важидан, албатта кўндиришига саъй ва кўшиш¹ қилурсиз, деб ишонамиз. Отабекнинг иккиячи тааллуқи тўғрисида келин боламизга билдирилмаса хўп эрди. Бизларнинг хурсандчиликларимиз йўлида Отабек билан бирга Тошкент тушиб, ўз қўллари билан тўйимизни ўтказишингизга ишониб — Юсуфбек ҳожи ва қудачалари. 17 савр ойида, 1265 ҳижрияда ёзилди».

Қутидор хатни ўқиб битирди-да, хотинига қаради. Офтоб ойимга бу хат музлик сувга шўнгитиб олиш таъсирини берган ва ўтирган ерида сира бўлиб қотиб қолган эди. Оталар учун бундай гаплар унчалик ёмон таъсир бермаса-да, хотинларга қандай асар қилиши белгилидир. Офтоб ойим учун гўёки қизининг бирор айби учун бу ишга мажбур бўлгандек, Кумуш эса энди эрига севимсиз, ишдан чиқсан ва бурчакка тиқилган

¹ Саъй ва кўшиш — ҳаракат қилимэқ.

увададек бўлиб кўрина бошлаган эди. Мактубни эшиг-
ган қулоқлари янгиш эшигтгандек бўлар эди.

— Тағин ўқиб кўрингиз-чи...

Қутидор хотинининг сўзидан кулди:

— Қайтариб ўқишининг фойдаси йўқ, хатнинг мақ-
сади сен англагандек,— деди.

Офтоб ойим боши янчилган илондек тўлғанди:

— Қизим устига кундош?!

Қутидор, қафасга янги солинган қушдек урина бош-
лаган хотинини босмоқ бўлди:

— Ортиқча уриима, илгари ҳақиқатга тушун-чи...

— Ҳақиқати нимаси?

— Бунда гап бор.

— Нима гап бор?

— Агар бу ишда куёвингнинг ҳам изи сезилганда
эди, сен эмас, мен ҳам бу гапга чидамас ва қизим устига
тушган бу оғир масалани тинчлик билан қарши олмас
эдим. Аммо бунда куёвингнинг иштироки кўрилмай,
шунинг ила менинг дамим кесилиб қолди. Ҳали унинг
қизингга: «...Бундан кейин Тошкент бормайман» деб
айтганини сўзлаб эдинг-а?

— Ёғонми, чинми,— деди Офтоб ойим тилар-тила-
мас,— эшигтандек бўлган эдим.

— Эшигтандек бўлган бўлсанг ҳам бу сўз чиндир,—
деди қутидор.— Нега десанг, мазмунидан ҳам англаши-
ладирким, бу иккинчи уйланишга Отабек бутунилай қар-
ши бўлиб, фақат бу гап қудаларнинггина ишлариdir.
Шунинг учун куёвингнинг уйланишини қизинг устига
чин маъноси билан кундош деб бўлмайдир.

Офтоб ойим кутмаган жойда қутидор тамоман От-
бекни иккинchi уйлайтириш тарафида туриб сўзлар ва
ўлганнинг устига чиқиб тепар эди.

— Агарда Отабек бу иккинчи уйланишга ризо бўлса
эди, биринчидан, рухсат олиш учун Марғилонга келиб
юрмас...

— Шошманг-чи,— деди Офтоб ойим,— ўзингизча
нимани сўзлаб ётибсиз?

— Бу иккинчи уйланишда Отабекнинг ризосизли-
гини.

— Куёвингизнинг ризолиги бўлмаса худо хайрини
берсин, вассалом!

— Гап унда эмас-да! — деди кулиб қутидор.

— Нимада? — деди қизишиб Офтоб ойим.— Қи-

зингиз устига кундош балосини ўз қўлингиз билан юкламоқчи бўласиз, шекилли!

Қутидор совуққина қилиб кулиб қўйди:

— Тушунмай ётибсан, хотин.
— Ҳамма гапга тушуниб турибман.
— Тушунган бўлсанг, бу хатга нима деб жавоб берамиз?

— Бизга маъқул эмас, денг.
— Маъқул эмас, дейиш билан иш битмайдир, бирорта далил кўрсатиш керак.
— Топарсиз, ахир, далилини.

Қутидор тамоман тўнни тескари кийиб олган хотинига қараб бошини қашиб олди:

— Хатда иккинчи уйлантириш учун бўлган сабабни қизимизни Тошкент юбормаганлигимизда кўрсатиладир,— деди қутидор.— Сен айтганча, куёвинг Тошкентдан иккинчи уйланмасин-да, Кумушни қудаларинг олдига турғун қилиб юборайлик, тузукми?

— Нега мен ёлғиз қизимни Тошкентга юборай,— деди кўзини олалантириб,— биз қизимизни беришда Марғилондандан ташқарига олиб кетмас ваъдаси билан берганмиз.

— Бу гапинг тўғри-я,— деди қутидор,— мен ҳам Кумушни Тошкент юормоққа қаршиман. Гап бу ерда, биз Отабекдан бу ваъдани олган чоқда, «ота-онангдан кечасан, иккинчи уйланмайсан» деган ваъдани ҳам олганми эдик?

— Бундай ваъдани берган бўлсин-бўлмасин,— деди энтикиб Офтоб ойим,— севиб олгандан сўнг, иккинчи уйланиш сўзини ҳам оғзига олмасин!

— Ким айтди сенга, оғзига олди, деб?

— Ҳеч ким айтмаган бўлса ҳам, сиз орага тушманг дейман, ўз оёғингизга ўзингиз болта қўйманг, дейман!

— Пичоқни ўзингга ур, оғримаса бошқага, деган бир гап бор,— деди жиддий вазиятда қутидор,— мёндан ҳам сен яхшироқ тушуниб турибсанки, агарда бизнинг ризолигимиз бўлмас экан, Отабек сира ҳам иккинчи уйланмайдир. Масалан, биз иков қудаларнинг ўрнида бўлиб, ёлғиз ўғлимиз бошқа бир шаҳарда биз танимаган бир қизга уйланиб қолганда, ўйлаб қара, чидай оларми эдик? Ўғлимиз кўнмаганда ҳам ўз шаҳримиздан иккинчи уйлантиришга киришмасми эдик? Бу тилагимизга қарши тушиб ўғлимизни ўз шахри ва

ўз уйида олиб ўлтиргуевчи қудаларимизга лаънат ўқиб, ўлим тиламасми эдик?

Бу сўз Офтоб ойимни бир оз ўйлатиб қўйди, лекин ҳали ҳам оёқ узатмаган эди.

— Энди нима қилмоқчисиз?

— Нима қиласи эдим,— деди қутидор, энди ҳамма ихтиёрни ўз қўлига олиб қўйган эди,— Отабек кўнмагандага ҳам кўндириб ўзим биргалашиб Тошкент тушаман...

— Қизингиз бечорага...

— Қизимга ҳеч гап йўқ, ҳали ҳам иззат-ҳурмати ўз қўлида.

— Қуриб кетсин шу дунёнинг ишлари!

— Қизингни Тошкент жўнатишга кўн, бўлмаса.

Офтоб ойим жавоб бериш ўрнига ўкириб-ўкириб ийглади.

* * *

Қайин ота, қайин она, куёв... Бу уч бурчакли ўтиришдан Отабек кўнглида неча турли шубҳа туғилмоқда эди. Бу одатдан ташқари чақириқ нега меҳмонхонага бўлди. Нега Кумуш бу ўтиришга чақирилмади, қайин онаси нега унга термулиб боқадир?.. Қутидор томонидан шу орада у кутмаган бир савол ҳам ташланаб қўйилди.

— Отабек, уялмай, тортинмай жавоб берингиз, бу гал Тошкентдан чиқишингиздаги асл мақсадингиз нимага эди?

Отабек тарафидан кутилмаган бу савол уни шопширди ва нима деб жавоб беришни билмай қолди:

— Ўзим... сизларни кўриш учун.

— Тўгрисини сўзлангиз, бек! — Қутидор бу гапни ярим жиддий қилиб кулиб айтди. Чунки Отабекни шу йўсин баъзи ёқлардан таъмин этмакчи ва унга бу тўғрида жасорат бермоқчи эди.

— Айтдим-ку.

— Тўгри айтмадингиз...

Отабек шошган ҳолда эди:

— Тошкентдан чиққанимдаги мақсадни сўзлаш сизларга бир беҳузурлик берганидек, ўзимга ҳам оғир... У тўғрида қатъий бир қарорга келганим учун сизларга сўзлаб ўтириш ҳам фойдасиз,— деди.

Офтоб ойим эрига қараб олди, қутидор ёввошина бир товуш билан сўради:

— Сўзлаш оғирми?

— Менгагина эмас, ҳаммамизга ҳам оғир...

— Агарда биз ризолик берсамиз-чи?!

Эрининг бу жасоратига қарши Офтоб ойимнинг юзига ризосизлик белгиси чиқди. Отабек эрса сесканиб уйқудан уйғонгандек бўлди ва иккиланиб сўради:

— Сиз нимага ризолик берасиз?

— Бу гал Тошкентдан нима мақсадда чиқсан бўлсангиз — ўшанга.

Отабек хижолат билан тер чиқарди:

— Тошкентдан нима мақсадда келганимни биласизми?

— Биламиз,— деб кулди қутидор.

— Сизни бундай ишга ризолик учун ким ва нима мажбур этади?

— Ҳеч ким мажбур қилмайди,— деди кулиб қутидор,— мажбур қилган нарса: шундай кунлар учун ўғил ўстирган ота-онанинг ризоликларигина, балки сизни ҳам шу гап мажбур қилар!

— Отам билан онамнинг ризоликлари учун шундан бошқа сабаб қуриб қолганига нима дейишимни ҳам билмайман. Гарчи Тошкентда экан чоғимда, бу ризолик йўлига бел боғлаган бўлсам ҳам, энди бу бел боғлашни бутунлай ўринисиз бўлганига тушундим...

Офтоб ойим оз қолдики, «тўғри!» деб қичқирсин. Аммо қутидор хотинига хўмрайиб қаради.

— Қисқароқ ўйлайсиз, Отабек! — деди.— Отангиз бизга мурожаат қилмаганда эди, биз бу ишда бетараф қолсак бўлар эди. Ҳозирда биз ҳам сизнинг сўзингизга қўшилсак, сиз эмас, ёмон отлиқ биз бўламиз.

— Унинг мулоҳазасини қилманг.

— Нега қилмайлик?

— Ҳамма айни менинг устимга юклаб жавоб ёзингиз.

Қутидор кулди ва сўради:

— Тошкентда экан чоғингизда отангизнинг таклифини қабул қилган эдингизми?

— Қабул қилған эдим.

— Бизнинг рухсатимизни олгани Марғилонга ҳам келган эдингиз, шундоғми?

— Шундоғ...

— Баракалла, Марғилонга келиб бу гапдан айнадингиз-а?

— Айнадим...

— Энди Тошкентта Марғилондан айнаб борасиз?

— Мана, кўрдингизми, фақат бу ишда бизгина ёмон отлиқ бўламиз. Ўзингизнинг шу хатонигуз учун ҳам бу гапни қабул қиласа мажбурсиз!

Отабек нима деб айтишдан ожиз қолди ва ўзининг болалик ҳаракатидан сесканди ва хижолат орасида сўради:

— Отам сизга қачон хат ёзган эди?

— Кеча олдим. Демак, кўндингиз?

— Мен бу гапга дурустлаб ўйламасдан жавоб беролмайман.

— Қанча ўйласангиз ҳам жавобингиз биргина бўлиши керак, яъни ризолик!

Қутидорнинг бу сўзи жуда ҳам қатъий эди. Бу қатъиятни англагувчи, кўнглидан чиқараёзган бу масалани чинлаб ўйламоққа мажбур эди. Нима бўлганда ҳам кўнглининг бир чеккасини кирлатиб ётган бу «отона орзуси» бир томондан қаралганда, жуда енгил кўчган эди. Аммо иккинчи томондан масаланинг етишмаган ўринлари ҳам бор.

— Яхши,— деди,— мен сизнинг таклифингизга кўнайин, аммо кўнишнинг ва ризоликнинг зарури қизингизда эмасми?

Шу чоққача мўнгайиб ўтирган Офтоб ойим ялт этиб эрига боқди, яна чексиз бир меҳрибонлик назари билан Отабекка қаради.

— Сиз, қизимизнинг андишасини қилиб ўтирмангиз, бек! — деди қутидор.— Бу ишни, энг яххиси унга билдирамасликдир, кейинроқ ўзи кўнишиб кетар, бу тарафлардан ташвиш лозим эмас!

— Йўқ,— деди бек,— мен бу ишга башарти кўнганимда ҳам қизингиздан яширмайман.

— Нега?

— Негаки, унинг ризолигини олмасдан туриб, бу ишга оёқ қўйишим мумкин эмас.

— Агар кўнмаса-чи?

— Кўнмаса, мен ҳам кўнмасликка мажбурман!

Бу узил-кесил сўздан қутидор ўйлаб қолди. Офтоб ойим бўлса, қизининг қадрини бунчалик аршларгача кўтармакда бўлган йигитга ўзида чексиз муҳаббат, поёнсиз эҳтиром сезмоқда ва нима учундир йиглагиси ва куёви юзидан ўпкиси келмакда эди.

— Тузук,— деди қутидор,— унинг ризолигини ўзингиз олмоқчимисиз?

— Йўқ, негаки, қизингиз учун ҳақорат бўлган бу сўзни айтиш менинг қўлимдан келадиган иш эмас! — деди. Эру хотин бир-бирларига қарашиб қўйдилар. Кейинги сўзни айтиб битиргач, Отабекнинг кўзига ёш келган эди. Ўзининг ҳолидан уялди шекилли, уларнинг олдидан туриб ташқарига чиқди. У чиққандан сўнг, эру хотин яна ярим соатча жанжаллашиб ўтиридалар.

* * *

Хуфтан номозидан сўнг янгиланган ташвишларни бир оз унудирар умиди ила пойчироғ ёнига ўтириб, Фузулий девонини варақлар эди. Аммо Фузулийнинг ранг-баранг шеърлари устида қаноатланиб тўхтамас, ҳамон варақлагандан варақлар эди. Шоирнинг нафис шеърлари ҳозир унинг учун тузсиз сўзлар йигиндисидан бошқа бир нарса ҳам эмас эдилар. У шу вақт тўсатдан китобни ёпди-да, айвонга қулоқ солди. Чунки ҳозиргина сўзлашиб ўтирган Кумуш билан онасининг товушлари ўчган эди. У бу ҳолдан шакланди. Айвондан она-боланинг қаёққадир йўқолгандарини пайқагач, тусида ўзгариш бўлгани ҳолда қайтиб келиб ўтириди. Нима учундир ҳозир унда бирор фожиага тушкувчининг ҳолати бор эди. Киши изтиробга тушган кезларда тилаб эмас, ихтиёrsиз баъзи бир йўсисиз ишларга уринадилар. Шунингдек у ҳам жиддий бир равишда Фузулий мутолаасига берилиди.

У ўзининг шубҳасидаги гапга қонеъ, орадан ярим соатлаб эмас, бир соатлаб вақт ўтиб борган бўлса ҳам, бу унга зерикарли эмас, тез келгандан келмагани яхши; яхшиликми, ёмонликми, хайтовур бўладиган кўнгилсиз гапнинг кечиккани яхши... Фузулийни яхшилаб ўқиши керак! Шунинг учун ҳам маъноли шеърлардан бошини кўтармайди-да, гўёки айтарсиз китобга михланган...

Кумушнинг уйга келиб киргани ҳам унга сезилмай қолди. У қушлар каби латиф товуш чиқармаслик қилиб гилам устидан юриб келди-да, секингина шам ёнига — Отабек қаршисига ўтириди. Унинг кўйлагининг чиқарган енгилгина шамоли билан ёниб турган шам «лоп» этди-да, кўришгандек, ўйнашгандек бўлди. Бу ҳолдан китоб устига муккадан кетиб ўтирувчи чўчиб кўтари-

либ қаради, қаршисида, Фузулий таъбирича, себи за-нахдони¹ негадир қизариб, навоки мижгони кўз ёшлари билан Акуфтланган, ҳалиги пари эди... Биринчи қарашдаёқ кутган ишнинг тўғрилигига инонди ва осийлар каби кўзини ерга тикди. У, Кумушдан итобомиз сўзлар, аччик хитоблар кутар, биринчи итобдаёқ отона гуноҳига тавба қилишга ҳозирланар эди. Аммо иш у кутганича чиқмади. Кутимаган жойда, гўёки уни бу оғир ҳолдан қутқармоқчи бўлгандек:

— Фузулий яхши китоб,— деди Кумуш,— мен ҳам ёлғиз қолган кезларимда бу китобдан бошимни ололмас эдим, сизам-ми?

— ...
Отабек гарангсиб қолган, ўзини овутмоқчи бўлган бу олижаноб гўзалга нима дейишни билмас, қаердан сўз бошлишга ҳайрон эди:

— Ким йифлатди сизни?
— Йиглабманми?!
— Кўзингиз, кипригингиз...
— Ўзи шунаقا...
— Йиглатган мен эмасми?
— Китобни нега ёпдингиз? Очиб ўқинг, мен эшитай!

— Ота-она ризолигини бир томчи кўз ёшингизга арзитдим-ми?

— Мен рози, мен кўндим! — деди дафъатан Кумуш, бу сўзни нимадандир қўрқандек шошиб айтди.

— Кўндингиз... нега, а?

Отабек таажжуб ва ҳайрат ичиди эди.

— Негаки,— деди Кумуш,— мен сизга ишонамаи...

— Шунинг учун...

— Шунинг учун кўндим...

— Кўнглингиз фаришталар кўнглидек!

— Сизнинг ҳам кўнглингиз!

Икки жон, икки юрак гўёки биттадек бир-бirisини англар, бirisidan-birisiga ўтиб юрар эди шу вақт.

— Бўлмаса нега йигладингиз?

Бу саволдан Кумуш бирмунча ўнгайсизланиб, уят аралаш бир табассум билан:

— Ўзим...— деди ва кейиндан ўзининг ҳамма тилак ва шартлари маъносининг жами бўлган,— мени унугт-

¹ Себи занакдон — бағбақа.

майсизми? — деган сўргини берди. Отабек нима деб айтишга сўз тополмай қолди. Чунки, юрак сирини ифода қиласлик жумла топиш мумкин эмас эди. Жавоб бериш ўрнига ўзича сўзлади:

- Ота-она орзуси...
- Биламан,— деди овитувчи товуш билан Кумуш.
- Менинг орзумни ҳам биласизми?

Кумуш Отабек яқинига сурилди ва тирсаклари билан унинг тиззасига ёнбошлаб эркаланди...

Қутидор тарафидан эртага Тошкент жўнаш эълони берилди. Иккисининг ҳамма вақтлари шам ёнида сўзлашиб кечди...

3

ҚОВОҚ ДЕВОННИНГ БЕЛБОГИ

Оч қоринга саримсоқ ейиб, кўк чой ичишдан зериккан кишилар чойхонага Қовоқ девонанинг кириши билан унга сўз қота қолдилар.

- Келинг, келинг, девона!
- Бир коса чойларинг борми, хўвари?
- Бор-бор, авлия, битта бачча бўлсангиз идиши билан сизники.

Қовоқ девсна деганимиз ўрта ёш, сийрак соқол, қотма, кун иссиқлигига қарши ўчакишгандек бошига эски телпак, эгнига пахтасидан бошқаси тўзиб кетган гулпи чопон кийиб, белита янги бўз белбоқни беш-олти айлантириб боғлаган ва унга беш-олтида чилим қовоқдан тортиб то сув қовоқ ва томоша қовоқларгача осган; қовоқларниң оғирлигидан аранг ҳаракат қиладиган, ўз замонасининг машҳур бир девонаси эди.

Бу девона Тошкентнинг барчасига маълум; беклардан, бойлардан, қисқаси, шаҳарнинг катта-кичигидан ўзига ихлосманлар орттирган ва кўпларнинг тарафидан қилган кароматлари ривоят этилган бир мажнун эди. Шаҳардаги ҳар қим унинг ошнаси, каромати билан беларво бўлганлар ҳам унинг қизиқ ҳаракатларига ва тутал сўзларига қизиқар эди. Бу чойхонадагилар ҳам шу кейинги синфдан эдилар.

Бирорта ихлосман қўёлидан боплаб тóмоқ еган бўлса керак, ҳозир ўшанинг чанқовини босмоқ фикрида эди.

— Баччанг ким, баччанг? Онам мени баччалик учун туғмаган... Чойингдан бер, чойингдан!

— Онангиз сизни, нима учун туққан?

— Хоннинг қўйини боқиши учун, қовоқларни белга тақиши учун, чойингдан бер-чи, хўвари!

Девонага бир пиёла чойни ичишга ҳам тинчлик бермадилар. Эрмакчилардан бири кўзини шамғалат қилди-да, белидаги қовоқдан биттасини юлиб ҳам қочди. Иш ёмонга айланди. Қувлаб тутолмади. Сўнгра келиб яна бир коса чойни ичди ва унга-бунга қовоги тўғрисида илтимос қилиб қаради. Бўлмагач, қовогини қумсаబ ҳўнгир-ҳўнгир йигламоққа олди. Эрмакчиларнинг кутгаки ҳам фақат унинг ёши мишиғига, мишиғи тупуғига қўшилиб йиглаши эди.

Қовоқни юлиб қочган томдан келиб супанинг устидаги сўрига қовоқни осди ва ўзи тушиб девонанинг ёнига келди:

— Қовоқ ўғрисини ушладингизми, девона?

— Йўқ, ука! Қовоғимдек шишиб ўлсин, қочганча кетди!

Бирор, Эски жўвада кўрганлигини ва қовоққа мениб кетаётганини сўзлади. Иккинчиси «зап қовоқ эдида» деган эди, учинчиси «аттанг-а» деб қўйди. Девонанинг ўпкаси шишиб кетди, эрмакчилар унинг юрагига галма-гал ўт ёқар эдилар.

— Қовоғингизнинг ўзи бу иқлимда йўқ нарса эдида! — деди бирор. Девона қовоғининг таржимаи ҳолини сўзлаб берди:

— Дадам мусаллас қовоқ, ойим ош қовоқ, мен бел қовоқ... — деди. Кулишдилар. Эрмакчилардан биттаси юқорида осилган қовоқни кўрсатиб ажабланди:

— Ийи-ийи, анови кимнинг қовоғи-я?

Девона, севикли қовоғини сўрида кўриб қувона кетди:

— Вой хўварингни... жиннилар, вой эси йўқ хўварилар! Қовоғим бер, жиннилар!

— Тузук, тузук, авлия! Қовоғингизни тушириб берсам, нима берасиз?

— Сўраганингни ол, жинни... Ойим қишлоғига бек бўл, тентак; тилла жабдиқли от мин жинни...

— Мен Ойим қишлоғининг беклигининг уддасидан чиқолмайман. Қовоқларингизнинг касбини айтиб берсангиз бўлади менга.

Девона бу шартга кўнди, қовоқ туширилиб девонанинг қўлига эсон-омон тегди. Маҳбуба, ортиқча бир эҳтиёт ва эътибор билан белга бошқа йўлдошлари ёнига тўгилди.

— Қани, энди бўлсин, девона!

Қовоқ девона, белидаги қовоқлардан битта этри маймогини кўрсатиб, «манови Мусулмон чўлоқ!» деди, унинг ёнидаги кичкина томоша қовоқни туртиб, «бунов, Худой бачча» (Худоёр бачча) деди, сув қовоғини эркалаб, «Нор калла» (Нормуҳаммад қушбеги) деди. Қолган иккита силлиқ қовоқчаларни «носқовоқ, юпқа томоқ» деб қўйди. Эрмакчилар кулишдилар. Бу қовоқ ўғрилари ичидан тезроқ қочиб қутулиш учун кетишга интилган эди, бирори ушлаб қолди.

— Тўхтанг ҳали, гап бор,— девона сўкиниб тўхтади,— манови белингиздаги белбоқни қаердан ўғирлаб олдингиз?

— Қўй, жувонмарг бўғур!

— Ўтган куни ўғирлатган белбогинг шу эмасми, Каримқул? — деб ёнидагига қаради эрмакчи.

— Ҳа, ҳа, худди ўғирлатган белбогим — тутдик ўғрини!

Қовоқ девона худди белбогидан ажрайтургандек икки қўли билан белига ёпишди.

— Сеники бу эмас, тентак!

— Йўқ, худди меники шу, еч, бўлмаса миршаб чақираман.

— Ҳўварингни... нима дейди бу!

— Тўғри айт, буни қаердан ўғирладинг?!

Девона белбогининг тугунига астойдил ёпишгани ҳолда:

— Ўғирламадим, тентак, ҳожи поччангни тўйидан олдим, жинни! — деди.

— Ҳожи поччанг ким? Ёлғон сўзлама, ўғри!

— Ҳожи поччангни танимайсанми, тентак?

— Тошкентда ҳожи поччадан кўпи борми, ўғри?

— Эсинг кетибди, жинни... Юсуфбек ҳожинг-чи ахир; тўй бўлди, базм бўлди, ўғил уйланди... қўй, жувонмарг бўғур!

Девона эрмакчилар қўлидан аранг қутулиб чиқди, аммо уларнинг ичидаги кўзини боғлаган бир киши, нима учундир, девонанинг орқасидан эргашди. Чойхонадан анчагина узоқлашган эдилар.

— Девона,— деб чақирди ҳалиги эргашувчи.

Девона, ўзига қараб келувчи бу кўз оғригини таниди, севикли қовоқлар устига келган бало бўлмасин учун кетар экан, қовоқларини эҳтиётлаб ушлади:

— Нима дейсан, кўз оғриги?

— Қўрқмангиз, девона! — деди кўз оғриги ва одимларини тезлатди.

— Нима ишинг бор?

— Тўхтанг.

Девона аранг тўхтади. Кўз оғриги уни чўчитмас учун наридан туриб ёнчигини кавлай берди.

— Сизга назрим бор.

Бу сўзни эшитиб девона йўлга тушди. Кўз оғриги унинг кетидан югурди ва:

— Манг! — деб пул кўрсатди. Девона илтифотсиз кета берган эди: — Тўхта дейман! — деб дўйқ урди. Девона нарида тўхтади:

— Келма, келма, кўз оғриги!

Кўз оғриги ўн одимча нарида турди:

— Ҳали, ким ўғлини уйлантирди, дединг?..

— Ким уйлантирди, дединг?

— Айтдинг-ку чойхонада...

— Айтдинг-ку чойхонада...

— Белбогни қаердан олдинг?

— Бувинг берди.

— Тўғри айт!

— Тўйга келдингми?

— Тўйга келдим...

— Юсуфбийникигами?

— Юсуфбийникига.

— Белбогинг йўқми?

— Йўқ.

— Тўй ўтганда келибсан.

— Юсуфбек қайси ўғлини уйлантирди?

— Нечта ўғли бор?

— Неча ўғли бор?

— Битта... Қоратегиндан келдингми, опанг омонми?

— Омон... Қачон уйлантирди?

— Ўзинг уйланганмисан?.. Қоратегиндан неча кунда келдинг?

— Беш кунда. Қачон уйлантирди?

— Эшакка минибми, яёв?

— Эшакка миниб.

- Нашанг борми?
 — Бор.
 — Қитта бер-чи.
 — Бераман, олдин айт, қачон уйлантириди?
 — Тўй ўтганда келибсан, тентак... Манга-чи, бир тогора ош тегди.
 — Бозордан ош олиб берсам, ейсанми?
 — Юзингга қачон чечак чиқди?
 Кўз оғриғи бу тутал сўзлардан асабийлашиб кетди:
 — Қачон уйлантириди дейман?
 — Тўй ўтганда келибсан дедим-ку... Бир ҳафта бўлди, ўн кун бўлди, бир ой бўлди... Ҳа, ҳа, чарлари энди бўлар эмиш... чарларга бор, Қоратегин!
 — Тошкентдан уйлантиридими?
 — Хи-хи-хи аҳмоқ. Тошкентдан бўлмай, Қоратегиндан уйлантирсинми?
 Шундан кейин кўз оғриғи чойхонага қайтди...

4

ЖОДУГАР ҲИНДИ

Қайнин отасининг оғриған касалидан тузала олмай ва ё тезроқ ўлиб тирикларни қутултирумай, «чарлар» балоси билан ўзини ипсиз боғлангани учун Отабек сўнг чекда сиқилган, шунга кўра онасиға ачитиб сўзламоқда эди:

— Ўйлаб боқинг, онажон! Бир бечора сизнинг орзунгизни деб, қизи устига қундош юклади ва биргалашиб тўйингизни ўтказишиди. Иш-кучидан қолиб, ўн кунлаб Тошкентда юрди. Нима бўлганда ҳам бирорвнинг яхшилигини билиш керак эди.

Ўзбек ойим ўзининг бир ҳафталик сўзини такрорлар эди:

- Энди нима қил дейсан, болам, ўткизмай кетишинг уят!
- Уят дейсиз-да, уятга ўзингиз тушунмайсиз!
- Ўзбек ойим ўглининг терс сўзидан қизишиди.
- Жуда ҳовлиқа берма, ўғлим! Чарлар ҳам ўтар, андининг юзини ҳам кўрарсан!..
- Онажон,— деди Отабек,— сизнинг заҳарли сўзларингизга нима дейишга ҳам ҳайронман... Биллоки, менинг ҳовлиқишим сиз айтганча бўлса... Хотиним-

нинггина эмас, унинг ота-оналарининг андишасида шошаман. Уларнинг кўнгилларига гап келмасин деган мулоҳазада ҳовлиқаман! Мен сизнинг орзунгизга бутунлай қарши тушиб, Тошкентингизни тилга олмаслик-кача борганимда, ўна бечоралар сизнинг риоянгиз билан мени бу ерга судрагандек қилиб олиб келдилар. Уятни билсангиз, энг ози шунинг андишаси керак эмасми?

— Бўлмаса чарларни кутмагин-да, югура қол! — деди Ўзбек ойим,— марғилонликнинг ўқчангдан урганилиги аниқ экан!

Отабек камоли бўғилганидан сукут қилишга мажбур бўлди, чунки бу орзу-ҳавас онаси ярани ҳар замон каттароқ оча боришга жуда ҳам уста ва бу усталик Ўзбек ойимнинг барча кутганларининг кундан-кунга бўшга чиқа борганилигидан эди. Айниқса, унга ҳозир бутун маъноси билан сир англашилиб, марғилонликнинг «жоду»сини жуда ҳам кучли эканига имон келтириди. Ўғлининг орзу-ҳавасини кўрди — кўриш бўлса — орзулагандан ҳам ортиқ. Бироқ бу орзу-ҳавас орқасидан кутилмаган марғилонлик балосидан ўғлини қутқариш масаласи унинг тилагича бўлиб чиқмади-да, яна марғилонликнинг сехри ўткирлик қилди... Никоҳ куни Отабекнинг кийимларини жуҳуд домладан ўқитишлилар, марғилонликдан совутиб тошкентликка иситишлилар — барчаси ҳам ҳозир ўз ожизликларини унга икрор қилар эдилар. Кейинги «беш-бош домла»нинг берган тутатқи, эзиз ички, дуо туморлари ҳам негадир таъсир асарини сездирмадилар...

Ўзбек ойим марғилонликнинг домласини кучли эканида шубҳа қилмаса ҳам, аммо бир ишга жуда ҳайрон эди: жуҳуднинг қилган жодусини — жуҳуд, мусулмон домланикини — мусулмон даф қила олур эди; нега булар асар қилмайдир сира? Ҳозир Ўзбек ойим бунинг сирини ўйлаб тополмас эди. Бу боши берк кўчада у узоқ қамалиб қолмади — бунинг сирини дафъатан топди, ҳам жуда тўғри топди: «Марғилонликнинг домласи жуҳуд ҳам эмас, мусулмон ҳам эмас — ҳинди! Ҳиндиларнинг ҳам ҳанноси¹, бас, ҳанноснинг сехрини на мусулмон домласи қайтарсину, на жуҳуд. Ўша ҳиндинг ўзи қайтармаса, ўзга иложи йўқ!»

¹ Ҳаннос — қасамдан қайтган.

Нима қилмоқ керак! Тошкентда бирорта ҳинди домласи йўқки, иложини қилиб берса... Энди хотин боши билан Марғилонга мурожаат қилсинми?!

Бошга тушганни кўз кўрар, деган сўз бор. Ўзбек ойим ҳам бошига тушган бу кулфатни кўришга мажбур эди: «Шу галдан қолдирмай Отабекнинг ёнига Ҳасаналини қўшиб Марғилонга юбораман; Ҳасанали у ердаги ҳинди домлага учрашиб Отабек устидаги сеҳр-жодуларни ечдирсинг... Ҳинди ҳар қанча олса ҳам майли, бисотдан у-буни сотиб пул қилиб бераман».

Отабек онасининг қархисида бояги сукутга кетганича жим ўтирад эди. Ўзбек ойим ҳалиги кашфиётдан қутулиб, бу тўғрида сўнгти қарорни ҳам бориб бўлгач, Отабекка деди:

— Ўғлим... янги уйланган отинг бор! Менинг олдимда ўтириб нима қиласан? Бечора ёлғиз ўтирибдир!

Отабек онасига бир қараб олди-да, жавоб бермади.

— Бор, болам, бор! Яхши эмас бу ишинг...— Ўзбек ойим сўзини бўлиб, дарича ёнига қелиб тўхтаган Ойбодоққа қаради.

— Сут чой тайёр бўлди, сузиб кирайми?

— Икки косани келинлик уйга бер, мен билан Ҳасаналиникуни шу ерга келтир!

Ойбодоқ кета бошлаган эди, Отабек уни тўхтатди:

— Менини ҳам шу ерга олиб келинг,— деди. Ойбодоқ Ўзбек ойимга қаради. Ўзбек ойим ўғлига хўмрайди... Отабек хўмрайишга илтифот қилмай, Ойбодоққа «шундоқ қил» ишорасини берди.

— Бўлмаса, келинникуни ҳам шу ерга бериб, ўзини чақир, Ҳасанали уйида ичсин,— деди Ўзбек ойим. Ойбодоқ кетгач, ўғлидан сўради,— бу нима қилик, болам?

— Қилиқ эмас.

— Келин билан ичсанг, нима бўлар эди? Бирорвнинг боласини мунчалик хўрлаш яхши эмас.

— Бундан хўрлаганлик чиқмайдир. Ўзини шу ерга чақирдингиз иш битди.

Ўзбек ойим тағин нимадир айтмоқчи эди, Ойбодоқ дастурхон кўтариб кириб қолди.

— Келинга айтдингми?

— Айтдим.

Дастурхон ёзилиб, тушлик чой келди. Ўзбек ойим косасига нон ташлаб кўзи эшиқда, яъни келинни кутар

эди. Келин эшиқдан кўрингач, ўғлига «қарши ол» дегандек қилиб қараб қўйди. Ўн етти ёшлар чамали, кулча юзли, оппоққина, ўртacha ҳуснли Зайнаб, қайин онаси ning тилак ва шаънига лойиқ тавози-одоблар билан битта-битта босиб дастурхон ёнига келди. Қайин она томонидан «ўтиринг!» рухсати берилгандан сўнг, қисилиб-қимтиниб товуш чиқармайгина ўтириди. Ўзбек ойимнинг кўзи ўғлида. Ўғли бўлса чойга нон ҳўллаб ёмоқда эди. Бир-икки қайта хўмрайиб-хўмрайиб ўғлига қаради-да, унинг кўзини учраштира олмагандан кейин, унга сўз қотишга мажбур бўлди:

— Чарларинг ҳам бўла қолмадики, қайин отангни бориб кўрсанг, ёки чарларсиз ҳам кўра қоласанми?

Зайнаб кўзини эрига тикиб қолди. Отабек салқинги на онаси жавоб берди:

— Кўрсам бўлади... — деди ва кулимсирагансимон Зайнабга қаради. Зайнаб ҳам кулган бўлди. Шу кичкинагина кулимсираш. Ўзбек ойимни анча тинчитди. Аммо мусоҳаба шунинг билан тўхталиб, орага яна бояти жимжитлик кирди. Ўғлининг миридан-сирини ажратиб ўтирувчи она яна олазарак оғриғига йўлиқди. Зайнабнинг кўзи тез-тез Отабекка тушар, у бўлса хўр-хўр чайни ичар эди... Бу ҳолдан Ўзбек ойим ич-этини еб, юғлан лукмасининг мазасини ҳам билмас, қисқаси ўтириш сўзсиз, гўё тузсиз ва маъносиз эди. Бу маъносизлик тадбирини кўриши яна Ўзбек ойим устида:

— Келин пошшога тилла узук буюрдингми?

— Буюрдим, эрта-индин битиб қолар.— Отабек сўзни чўзмоққа йўл қўймади, аммо онаси гапдан-гап чиқариб, сўзга сўз уламоқчи эди:

— Тилла сочполугингиз бор эдими?

Зайнаб эрига қаради ва ийманибгина жавоб берди:

— Йўқ.

— Йўқ бўлса олиб бераман! — деди Отабек. Ўзбек ойим анчагина жонланиб олди. Тағин ундан-бундан сўз уринтироқчи эди, унча муваффақиятли чиқмай бошлиди. Сут чойдан сўнг қумғонда чой келди. Зайнаб биринчи пиёлага қўйиб ўрнидан турди ва қайин онаси га икки қўллаб узатди, иккинчи пиёлани тўлдириб ўрнидан турмоқчи бўлган эди, уни Отабек тўхтатди.

¹ Тошкентликлар одатicha «чарлар» бўлмасдан туриб, куёв қайин ота, қайин онага кўринмас эди.

— Бундан кейин чой беришда ўрнингиздан туриб ўтирган,— деди,— ўтирган ерингиздан берсангиз ҳам бўладир.

Лекин бу гап қайин онага ёқмади, эътироғ қиласди:

— Нега ундоғ дейсан, бола! Ўрнидан туриб чой бериш одамзоднинг зийнатидир, келинларнинг бор-йўғи келинлиги ҳам шунда-ку!

— Сизнинг учун ҳам ўтириб чой берсин демайман, аммо бу такаллуфнинг менга кераги йўқ,— деди ва қўлидаги чойни тез-тез ичиб бўшатди. Фотиха ўқиб ўрнидан туарар экан,— албатта, сизга ўрнидан туриб чой бериши лозим...— деди ва чиқди. Бу гапни Зайнаб чинга ҳисоблагани учун бошқа нарса пайқамаган, аммо Ўзбек ойим бўзариб қолиб, дарров эсига ҳиндининг жодуси келиб тушган эди.

Шу ўтиришдан бир соатча кейин Ўзбек ойим уйни ҳолилатиб, Ҳасаналини ўзи олдига чақиртириб кирди. Ҳасанали бу чақиртириқдан бир нарса ҳам сезмаган, чунки хўжабекасининг ички сирига уича ошна эмас, чарлар маслаҳатидир, деб ўйламоқда эди. Ўзбек ойим уйнинг эшигини беклаб келди-да, Ҳасаналининг яқин-роғига ўтириди ва ярим товуш билан муддаони оча бошлиди.

— Энди иш Тошкент домлалари билан битатурганга ўхшамайдир... Ўйлаб қарасам, марғилонликнинг домласи ҳинди экан. Шунинг учун поилож сени олдимга чақиртирдим. Сен ҳам одамсимон гапимга тушуниб, бу тўғрида аклинг етканча зеҳнингни югуртиргин... Ўзинга маълумки, қундан-кунга марғилонликни унугаш ерига, ҳар соат унга эси борадир. Бу ҳолларнинг барчаси ўша ҳиндининг жодусидан бўлиб, муаккиллар Отабекнинг бўйнидан сиртмоқ солиб, Марғилонга тортадирлар...

Ҳасанали, хўжабекасининг кўпдан бери домла-хўжа билан саргарден бўлиб юришини билса-да, аммо унинг «ҳинди, сиртмоқ солиб тортиш» каби сўзларига тушунмади. Бекасининг феълини яхши билгани учун, яъни унинг қарғишидан қўрқиб тушунмаганлигини билдирамади-да, «қани гапнинг теги қаерга борар экан» деб жим, қулоқ солган бўлиб ўтира берди. Аммо Ўзбек ойим сўзини ҳалиги ерда тўхтатиб, «сен шунга нима кенгаш берасан?» деган савонни берди.

— Мен нима дер эдим... Сиз нимани маъқул кўрсангиз, шу-да! — деди. Ҳасаналининг тушунмаслик орқасида берган бу жавоби Ўзбек ойимга ниҳоятда ётишиб келди:

— Баракалла, Ҳасан! Ана шунинг иложини ўзинг қиласан!

— Яхши...

— Эрта-индин чарлар бўлиб ўтса, албатта Отабек Марғилонга югурадир. Шу вактда сен ҳам бир нарсани баҳона қилиб бирга Марғилон борасан-да, қаердан бўлса ҳам ўша ҳиндини топасан ва назрини бериб, яхшилаб қайтариқ қилдирасан...

— Кимни?

— Кимни бўлар эди, Отабекни-да!

— Нега?

— Тушунмадингми?!

— Тушуниш бўлса — тушундим... Шунчаки аниқлаб олмоқчиман-да.

— Марғилонлик-ку Отабекни ҳинди домладан ўзига боғлатиб қўйибдир, ана шуни сен ҳам пайқаб юргандирсан-ку?

— Пайқамаган бўлсам ҳам, аммо мақсадингизга энди тушундим,— деди кулиб Ҳасанали.— Ниятингиз Отабекни марғилонлик келиндан совутиш!

— Баракалла,— деди Ўзбек ойим,— совутишгина эмас, унинг чангалидан Отабекни узил-кесил қутқариш.

Ҳасанали ҳайрон бўлди. Чунки хўжабекасининг марғилонликка мунчалик адовати бор деб ўйламас эди.

— Нега энди?

— Ўғлимни марғилонликларнинг қўлига бериб қўймайман-да, ахир! Бурун Тошкентда хотини бўлмаган бўлса — энди бор, бундан кейин анди келинга бизнинг муҳтоҷлигимиз йўқ...

— Хайр, энди нима қилмоқчисиз?

— Нима қилишим кундан ҳам равшан,— деди Ўзбек ойим ва тамом қаноат ва ишонч билан бояғи мақсадни тақрорлади.

— Ўзингга айтганимдек, Марғилондаги ҳинди домланинг ўзидан бир мартаба қайтариқ қилдирсан, марғилонликнинг сеҳр-жодулари ботил бўлиб, Отабек ўзидан андини талоқ қилиб юборадир...

— Сиз марғилонлик ҳинди домланинг ўғлингизга қилган жодусини қаердан билдингиз?

Ўзбек ойим бу савол билан ўзининг кашфидан бир оз шубҳаланди-да, ишончсизроқ қилиб:

— Ўзим билдим,— деди.

— Ўзингиз қаёқдан биласиз, ахир, бирор айтгандир сизга?

— Ўз ақдим билан топдим.

Ҳасанали ўзини тутолмай қулиб юборди:

— Лекин шунга қолганда, ақлингиз бир оз янгишибдир...

— Нега?

— Негаки, икки ўртада сеҳрчи ҳинди ҳам йўқ, сеҳр қилдирувчи марғилонлик ҳам, Отабек ҳам сеҳрланган эмас!

— Нега бўлмаса Отабек ҳадеб, уйланса ҳам, Марғилонга ошиқа берадир?

— Бунинг сабабини ҳали ҳам билмайсизми?

— Биламан, сеҳр-жоду қуввати!

— Жодуни ким қилдирадир?

— Қайин отаси, қайин онаси, қола берса хотини.

— Янглишасиз, ойи!

— Нега янглишаман?

— Сеҳр-жоду қилишдан уларнинг мақсадини нима, деб биласиз?

— Калвак ўғлимнинг ақлини ўғирлаб, пулини емакчилар.

— Пулини емакчилар? — деб кулди Ҳасанали.— Марғилонлик қудаларингизнинг давлати олдида бизники йўқ деса бўладир. Ундан кейин мен яхши биламанки, улар Отабекка уч пуллик ҳам рўзгор қилдирмайдилар. Буни ўзим яхши билганимдек ўғлингизнинг ўзидан ҳам «уларнинг рўзгор қилдирмаганларидан жуда сиқиламан» деган сўзини неча қайта эшитдим. Шунни ҳам яхши билмоқ керакки, ўша жодугар қудаларингиз ёмон кишилар бўлганларида Отабекни Тошкентдан уйлантириш сиз ўйлаганча қулай иш бўлмас эди. Ўғлингизнинг Марғилон боргандан сўнг ваъдасидан айнаганини, албатта, ҳожидан эшитган бўлсангиз керак.

Ўзбек ойим енгилаёзган бўлса ҳам, айниқса Ҳасаналидан тил қисиб қолгуси келмас эди. Гўёки шунча ўтган гапларга қиймат бермагандек.

— Мен бунинг сирини энди хўп билиб олдим! — деб қўйди.

Ҳасанали кулди:

— Билсангиз ҳам янгиш англабсиз, чунки бунинг сири сиз ўйлаганча эмас.

— Қандоғ?

— Ўғлингизнинг ҳар замон Марғилонга ошиқмоғи... Айниқса, бу ғал қайин ота, қайин оналаридан андиша қилганлиги учундир. Ундан кейин...

— Ундан кейин?

— Ундан кейин катта келинингиз ўғлингизнинг қўз очиб кўргани!

— Кўз очиб кўргани? — деди Ўзбек ойим ва истеҳзоланиб кулди.— Зайнаб ўша марғилонликча бўлмабди дегин?

— Мен қаёқдан билай... Эҳтимол ўғлингизча шундайдир...

— Ўзинг уларнинг иккисини ҳам кўргансан, индалло сўзла: улардан қайси бирисининг ҳусни ортиқ?

Ҳасанали бу савол қархисида нима деб айтишга билмай қолди...

— Муҳаббат деган нарса ҳуснга қарамайдир.

— Қарайдирми, йўқми, сендан уни сўраётганим йўқ. Қайси бириси кўҳлироқ деб сўрайман?

Ҳасанали қийналди ва гапни бошқага чалғитиш учун:

— Энди маслаҳат нима бўлди? — деб сўради.

— Олдин сўзимга жавоб бер-чи, ер юткур!

— Саволингиз қизиқ, нима деб жавоб беришга ҳайронман... Тўғрисини айтами?

— Тўғрисини!

— Тўғрисини индалло сўзласам,— деди ва қийналиб тўхтади,— ҳар бир гулнинг иси ўз йўлига.

— Тўғрисини дейман!

— Анови келинингизнинг ўлса-ўлиги ортиқ...

— Гапирма-гапирма,— деди Ўзбек ойим,— бошда шу марғилонлик балосига ўзинг сабабчи бўлганмисан, ҳали ҳам ўшанинг томонини олиб сўзлайсан! Сайдек соқоли узун, ақли қисқадан кенгаш сўраб ўтирган меч ҳам аҳмоқ!

Ҳасаналининг чалғитиши ва ҳайрон бўлиши Ўзбек сийманинг табиатини яхши билгани учун эди. У ўз хоҳишига тескари келган ҳақиқатни кўрмайдирган қизиқ бир табиатга молик эди.

— Ўзингиз тўғрисини сўзлатиб, тағин нега мендан хафа бўласиз, ойи! — деб муқобала қила бошлаган эди, Ўзбек ойим яна гуриллаб кетди:

— Бўлди, бўлди... тузингни ичиб тузлиғингга тупурганин худой қўтарсан! — деди.

Ҳасанали хўжабекасининг қарғиш ва койиши остида кула-кула уйдан чиқди.

Бу мусоҳаба кўринишида Ўзбек ойимга унча ўзгариш бермагандек сезилса ҳам, лекин руҳан уни анча бўшаштирган эди.

* * *

Шу гапдан бир ҳафта чамаси кейин ва ҷарлар кутишнинг ўн бешинчи кунлари эди. Отабек меҳмонхонада токчадаги китоблар орасидан қандайдир бир китобни ахтарар экан, Ҳасанали унинг ёнига кирди. Пайшанба кун ҷарлар эмиш ҳабарини бериб кетди.

Отабек китоблардан бирини сугуриб олди ва варақлар экан «ҷарлари ҳам қурсин!» деб қўйди. Кўнглидан кечирди: «Бу қун душанба бўлса, тағин орада тўрт кун бор».

— Мана бу ҳат ҳам сизга эмиш,— деди-да, Ҳасанали унга бир мактуб узатди,— боя бирор бериб кетган эди,— деди ва шошиб-пишиб қазо бўлаёзган аср номозини ўқиш учун жойномоз ёди. Отабек мактубнинг унвонига кўз ташлади: «Тошкентда... маҳалласида турғувчи Отабек Юсуфбек ҳожи ўғлига тегсин». Ким томонидан ёзилганлиги унга маълум бўлиб, қўлидаги китобни токчага қўйди ва шоша-шоша ҳатни очди.

Катта қоғозда туссизроқ сиёҳ билан ёзилган узун бир ҳат. Унинг кўзи ёзув устида сузди. Сузган сайин негадир унинг тусида улуғ бир ўзгариш ва вужудида бир титроқ воқе эди. Бу ҳат унга севинч берар эдими, дәҳшатми, ўзидан бошқага мажхул эди. Шу мажхул ўзгаришларнинг сўнг чекига бориб етгандан кейин ҳатдан кўзини олди ва ихтиёрикми, ихтиёрсизми, ҳайтовор бор товушича «қўрқитмоқчи!» деб юборди. Бу сўз билан Ҳасанали ҳам нари-бери номозини битирди-да, жойномоздан бурилиб қаради:

— Нима гап?

— Ҳеч гап йўқ,— деди Отабек ва эсанкираш вазиятида унга қаради.

— Қўрқитмоқчи, дедингиз-ку, ҳат кимдан?

— Ҳатми? — деди ва шунинг ила бир оз эсини ўзига

йигиб олгандек бўлди.—Хат келинингиздан... Қўрқитмоқчи бўлиб баъзи бир кинояларни ёзибди! — Бу гапни айтгандан сўнг хатни буклай берди. Ҳасанали фотиҳа ўқиб Отабек ёнига келди.

— Киноялар ёзиши кечикканингиз учундир,—деди. Отабек тасдиқ ишорасини бергандек бош силкиб қўйди.

— Айниқса шу гал кечикишингиз бечора келинга оғир тушиб, киноялар ёзишга мажбур бўлган,—деди Ҳасанали.—Аниги ҳам бечорага жуда оғир, «кундош — хотин зотининг ўлими» деганлар. Энди, нима бўлгандা ҳам орангизда оз қолди, чарларни ўтказа жўнайсиз-да! — Отабек жавоб бермади, чунки Ҳасаналининг кейинги сўзидан ризо бўлмаган эди. Ҳасанали уни тинчтиши учун: — Агар кўнглингиз тинчимаса,— деди кулиб,— сиз ҳам кинояли бир хат ёзиб берингиз! Хат келтирувчи эртага хабар олиб ўтишини билдирган эди!

Отабек бу сўздан бир оз жонлангандек бўлди. Чунки унинг кўнглига бу кинояли мактубни жўрттага ёзилган бўлганилиги келиб тушган эди.

— Бу гап тўғрими? — деб сўради.

— Тўғри, эртага эртага билан келиб, хат бўлса олиб кетмакчи эди.

— Яхши,— деб кулимсиради Отабек,— эрталаб келса, хат бераман!

Ҳасанали меҳмонхонадан чиққач, ўзини тўхтатиб олгани ҳолда иккинчи қайта хатни кўздан кечирди:

«Вафосизга. Мен ўзимнинг бу мактубимни кўз ёшлиларим билан ёзаман. Негаки, ҳозирда менинг кўз ёшлиларимгина эмас, бутун борлиғим сиёҳдир. Мен энди оғизлардаги вафо сўзига ишонмайман. Чунки мен ўзимнинг вафосига ишонганим бир йигитдан улуғ вафосизлик кўрдим. Уятимдан кўзларимни очолмайман. Негаки, еру кўклар, тогу тошлар ва дунёдаги барча нарсалар менинг алданганим учун кулиб масхара қилгандек қарайдилар... Бу кунимдан бу ҳасратимдан қутулиш учун ўзимга ажал чақираман. Лекин ажал ҳам мен шўрлиқдан нафратлангандек, гёй ул ҳам менга вафосизлик қиласадир.

Бегим, гарчи аччиқлансангиз ҳам айтишга мажбурман: сизда виждон, инсоф, раҳм, ваъда, вафо, яхши-

ликни билиш, борияг-чи, одамгарчиликдан ҳеч гап йўқ эмиш. Билъакс сиз: ҳийлакор бир тулки, оғзи қон бир бўри, раҳмсиз бир жаллод, уятсиз бир йигит!

Сизни ҳийлакор дедим: эсингизда борми, содда отамни, гўл онами қандоғлар қилиб алдадингиз? Ёдингизда борми шам ёнида мени алдаб айтган сўзларингиз, берган ваъдаларингиз, «Менинг орзум» деб қилган хитобларингиз, тўккан кўз ёшларингиз?.. Бас бу ҳийлалар, бу макрлар сиздан бошқа кимдан топиласин?..

Сизни оғзи қон бир бўри дедим: чунки сизда раҳм йўқ, сиз ўзингизнинг заҳарли тишларингиз билан мазлумлар кўксини, боёвлар бағрини чок этасиз; янги очилган гулларни, энди бош тортган лолаларни вақтсиз сўлдирасиз, очилиб битмай ўлдирасиз!

Сизни уятсиз дедим: илгариги ваҳшатингиз билан ўзингизнинг ҳаққингиз битганлигини била туриб ҳам яна уялмай-қизармай виждонисизлар амрини берасиз ва уятсизлигингизни яна бир қат орттирасиз!..

Мен сизнинг баъзи бир даъволарингизга ҳайрон қоламан: отам Тошкентда экан чоғда бу гапни айтишга уялган эмишсиз... гўё бунинг ила номуслик бўлиб кўринмакчисиз шекилли?! Онам баъзи вақтларда:

«Янги ёр топганда, дўстлар, эскидан кечмоқ керак,
Эскини ўлган санаб, латта кафан бичмоқ керак!»

байтини ўқиб қўяр, мен бўлсан ул вақтлар бунинг маъносига тушунмас эдим. Аммо... энди бу байтини кимга айтилганига ва унинг маъноларига хўп тушунмакдаман. Ташландиқликнинг сўнг ўтинчи қилиб сиздан шуни сўрайман: учинчи ёр топганда, иккинчи бечорага ҳам шундай уятсизлик қилинмаса эди! Бу тилагим учун ажабланмангиз, чунки, «пичоқни ўзингта ур, оғримаса ўзгага сол!» — дейдирлар.

Сизга янги ёр, меңга уятсизликнинг қурбони бўлиши муборак! Кумуш эмас, Тупроқбиби ёздим, 17 жавзо 1265 йил. Марғилон.»

Қутидорнинг Тошкентдан ёлғиз қайтиб келиши Кумушни анча энтиқдирган эди. Аммо Отабекка воқе бўлган узр масаласи бир қадар уни тинчиди. Ишонар-ишонмас шубҳа ва васвасалардан бир оз ариди: «у ме-

ни унутмаган, ваъдалари чин, сўзлари тўғри... У ҳам мени севар экан...» деб, бурунги одати билан гөҳи эрининг йўлига чиқиб кутмакка ҳам бошлади.

Отасининг келишининг сakkизинчи куни эди. У бу кечаси кўрган баъзи бир тушларини Отабекнинг бу кун келишига йўйди-да, эрталабдан туриб соchlарини ечди. Соchlари орасидаги чигилларини дикқат билан тараб жом ёнига ўтири. Унинг нафис қора соchlари орқа-ўнгига тўзгиб ажиб бир манзара бердилар. Сочини қатиқлаб, совунлаб ювгач, онасидан иккита қилиб ўрдирди. Офтоб ойимнинг: «Нега қирқ кокил қилмайсан?» деб сўрашига: «Қизингиз энди қизлик давридан ўтиб, келинлик даврига кирди. Қизингизнинг бундан сўнг куёвингиздан бошқа совчилари ҳам йўқ» деб кулди. Аммо бу икки ўрим соч, қирқ кокилта қараганда, жуда ҳам ўзига келишиб тушиб, унга яна бир қайта улуғворлик ва олийлик бағишладилар. Сочини ўрдиргандан кейин ўйига кирди-да, кийимлар тажланган токча ёнига тўқтади. Равоқлик токчада унинг ўн беш чамали асл кўйлаклари уйилган эди. Сариқ рупоҳ атласини кийишга чоғлаб кўрган бўлса-да, бироқ кўйлакни олган ерида бу фикрдан қайтди. Қизилни... кўкни... олма гулини... қисқаси қайси бирисини кийишга тараддуланди. Кўйлаклар ичida ўзига ярашмайдиргани йўқ: оқ олма учун барги ҳам, гули ҳам бир... Унинг ўзига сариқ атлас хуш келса-да, бироқ ҳозир ўз хоҳишини бир ёқقا қўя туриб, Отабек кўнглича кийинишга қарор берди. Чунки Отабек кўпинча қора кўйлак кийишга қистар эди. Совсар гулли қора атлас кўйлагини кийиб, бошига зангор шоҳи рўмолини солди ва марварид кўзли кичкина олтин ҳалқани қутидан олиб қулоғига тақди. Шу соддагина ясанишдан сўнг иккинchi токчада тироғлик турган кўзги ёнига борди. Кўзги ичидан тўзгиб, чувалиб кўринган соч толаларини тўғрилаб ўзини кузатди. Кўзги ичидан кўринган малак, ўз эгасини ҳам кайфлантириб секингина илжайиб қўйган эди. Нариги ёқдаги фитнаи даврон ҳам садафдек оқ тишлигини ёқут каби иринглари орасидан кўрсаттандек бўлди. Бу ҳуснга оналик вазифасини ўтагандек кўринган латиф бурни ёнидаги қора холини табиийлигига ишонмагандек қашиб кўрди ва кўзги ёнидан жўнади. Жўнар экан «... чиройли бўлса ҳам меникидеқ холи йўқдир» деб кўнглидан ке chirди.

Кечки олов вақтида ташқари ҳовлисида у-буға овора бўлиб юрар эди. Бу кунги кўрган туши уни ортиқ ишонтирган, шунинг учун Тўйбеканинг ташқари ҳовлида қилатурган юмишини ҳам ўзи бажармоқда, Тўйбекадан сув сепдириб ўзи ер супурар экан, қулоқлари йўлак томондан эштиладиган оёқ товушларида эди.

Ховлидаги икир-чикир ишларни тамомлагач, айвоннинг олдига ўтириб тузатинди, тузатинар экан йўлакдан юриб келмакда бўлган бир оёқ товушини эшитиб, юраги нима учундир ошиқиниб шопириниб кетди. Оёқ товуши ичкарига яқинлашган сайин у ўзида гитроқ аралаш бир ҳол сезар эди. Ниҳоят йўлакдаги оёқ товуши тугалиб, Кумуш кутмаган жойда паранжили бир хотин келиб чиқди. Кумуш узоқ бир энтикиб қўйди.

Хотин Кумушга қараб келар эди. У ердан бичиб олгандек пак-пакана, бурни юзи билан баравар, деярли теп-текис, қўзи қоқсан қозик ўрнидек чуп-чуқур, оғзи қулоги билан қошиқ солишар даражада жуда катта, юзи қирқ йиллик оғриқларнидек сап-сариқ, қирк беш ёшлар чамасида бир хотин эди. Кумушбиби ўзига томон келувчи бу даҳшатли хотинни үмрида биринчи мартаба кўрар эди. «Нима қилиб юрибди бу оч арвоҳ?» деб ўйлади. Хотин ўн одимлаб узоқдан юзига совуқ ва тушда қўрқарлик бир кулги тус берди. Димоги билан «қих» этиб қўйди.

— Хи-хи-хи, айланай сиздан, пошиша қиз! Мирзакарим бойнинг ҳовлилари шуми? — деб сўради. Кумуш «шу» жавобини бергандан сўнг, ўзи билан кўришмакчи бўлган бу хотин олдига икки одим юриб тилар-тиламас елкасини тутди. Унинг тўғри мавзун¹ қоматига ердан бичиб олинган мудҳиши хотиннинг қўллари зўрға етдида, «эсонмисиз, пошиша қиз» деб сўрашди. Хотин паранжиси билан айвоннинг олдига ўтириб олгач, «уфф» деб чайқалди ва «анча йўл экан, тинкаларим қуриб кетди-я!» деб шикоятланди.

- Мирзакарим бойнинг ҳовлилари аниқ шуми?
- Шу.
- Сиз кимлари бўласиз бойнинг?
- Мен қизлари.
- Қих... сизга берсам ҳам бўлар экан,— деди хотин ва ёнчиғидан бир хат чиқарди.— Ўғлим Тошкент билан

¹ Мавзун — келишган, хушбичим.

Марғилон орасида қатнаб олиқ-сотиқ қиласыр. Бу гал Тошкенттән қайтишида бирор унга шу хатни берис, Мирзакарим бойнинг ҳовлиларига тез еткузиб берасиз, деб илтимос қилибдир. Қих, хи-хи, айланай сиздан, пошша қиз. Қих... Мақтандулик бўлмасин, ўғлим ҳам ўзимга ўхшаш бирорнинг йўлида ўлиб қутуладир: бугун туш вақтида Тошкентдан келди-да, онаси билан сўрашишни ҳам билмай, шу хатни қўлимга тутқизди. «Жон она, ўзим йўлда жуда уриниб келдим, сенга адаб-сизлик бўлса ҳам дарров Мирзакарим бойникини сўроғлаб шуни элтиб бер, берувчи тез берасиз деб ўтингани эди» деди. Мен ҳам кўнгилчангман, айланай пошша қиз, касалдан яқинда турганим учун бир қадам босишга тоқатим бўлмаса ҳам савобдан қуруқ қолмайин, деб сургала-сургала ҳовлингизни сўроғлай-сўроғлай топганимча ўлиб бўлдим... Қих... — деди. Кумуш хатни хотиннинг қўлидан олиб раҳмат айтди ва хатнинг унвонига кўз ташлади «Марғилон шахрида сокин¹ Мирзакарим қутидор ҳовлисига».

— Янглишмабсиз, ойи!

— Нега янглишай, айланай сиздан, пошша қиз! Улуғ даргоҳларингизни кўчалаги ҳар ким билар экан! — деди хотин ва ялтоқланиб ўрнидан турди.— Энди мен кета қолай, болагинам йўлдан оч келиб, бир қошиқ иссиққа зориқиб ўтиргандир.

— Ичкарига киринг, чой қайнатайлик.

— Раҳмат, пошша қиз! Анчон ичармиз чой бўлса... қих. Бир кўрган билиш, икки кўрган таниш, дейдилар...

Кумушбиби хотинни ортиқча қистаб ўтирмади-да, йўлаккача кузатиб борди. Хотин йўлакка бурилар экан, қайрилиб тўхтади:

— Бу дунёда шунақа ҳожат чиқаришлардан топганимиз, агар Тошкентгами, Қўқонгами отангизнинг хат-патлари бўлса, ўғлим бажонидил олиб кетадир. Шу ўрталарга келиб қолсам хабар олиб ўтайми? — деб сўради. Кумушнинг «ийқ» дейишга оғзи бормай «майлингиз. оғир келмаса» деб жавоб берди. Хотин йўлакка бурилди. Кумуш айвон томснга қайтар экан ошиқиб хатни очди. Хат кичикроқ қофозда ўлчовлик сўзлардан иборат эди.

¹ Сокин — турувчи.

«Кумушбиби бинт Марзакаримбойга — завжи¹ тошкентлик Отабек Юсуфбек ҳожи ўғлидан. Оғангиз Тошкентда экан вақтида мен бу ишни очмокқа оғирсинган, тўғриси уялган эдим. Маълумингиз Тошкентдан уйланганимдан сўнг, ёлғиз бошимга ҳам Тошкентдан, ҳам Марғилондан икки хотин ушлаб туриш оғирлик қила бошлади. Шувинг учун бу икки хотинниг бирисидан кечишга тўғри келиб, ниҳоят турмушим учун енгил ва орзумга мувофиқ бўлган бир нарсага қарор бердим. Ул ҳам тошкентлик хотиним билангина қолиб, сизни талоқ қилиш эди. Мактубни олган кунингиздан бошлаб ўзингизни мендан бегона ва никоҳимдан ташқари ҳисобласангиз бўладир. Менинг бу талоқ хатимни албатта шариат пешволари шаръий ҳисоблаб, иддангиз² битиш билан сизга бошқа эр қилмоққа ихтиёр берсалар керак. Отабек Юсуфбек ҳожи ўғли.

13 жаво, 1265 йил. Тошкент»

...У бу мактубни ўзининг сўнг томчи кучи билан ўқиб тамом қилди-да, жонсиз бир товуш ила «ўятсиз!» деб қичқирди ва ерга йиқилиб ўзидан кетди... Йиқилишда қўлидан чиққан қоғоз парчаси шамол билан учиб бориб боши ёнига тушди. Йўлак панасидан мудҳиш башара чиқиб, бир-икки қайта унга кулиб қарагач, йўқолди...

Бозордан қайтган қутидор ерда ҳушсиз ётган қизи устига даҳшат ичида югуриб келди. Чеккасини зах ерга бериб йиқилган ва кесак каби ҳиссиз қизини жон ҳолатда қучоғига олди. «Қизим... Кумуш... кўзингни оч!» аммо Кумушдан жавоб йўқ эди. Даҳшати юз даража ортган ҳолда Кумушни кўтариб олиб ичкарига юрди. Уйда Офтоб ойим билан Тўйбека қий-чув кўтардилар. Айвонга ётқизган бўлсалар ҳам, Кумушни ўзига келтириш чорасини билмай, тўғриси нима чора кўришни эслари топмас эди. Баракат берсинки, эси яrim бўлса ҳам Тўйбека умрида биринчи иш қилди: совук сув келтириб Кумушнинг манглай ва кўксига сепган эди, сесканиб ўзига келди. Ҳущдан ажralаёзган бечоралар бу ҳолдан сўнг, бир оз жонлангандек бўлдилар. Кумушни совуқ тер босиб, бир неча вақт жим ётди,

¹ Завжি — куёв.

² Идда — шариат қонуни бўйинча эрдан чиққан аёл, орадан олти ой муддатни ўтказмай, иккинчи эр қилишга ҳақсиз ва бу муддат иdda (сақланиш) деб аталар эди.

шундан кейин оҳистагина ўнгланиб ётиб олгач, қўзини очди.

— Нима бўлди, қизим, қўзингга бир нарса кўриндими?

Кумуш қўзини юмди-да, энтикиб қўйди. Жавоб бермади. Бу савол отаси томонидан ҳам берилгандан сўнг:

— Мени ташқаридан ким олиб келди? — деб сўради.

— Мен, қизим!

— Ёнимда ҳеч нарса кўрмадингизми?

Қутидор бу саволдан бошқа гап тушунди:

— Йўқ, қизим, сен ўзинг ёлғиз ётар эдинг.

— Шундоқ ё... — деди. Сўзининг сўнгини айтольмади.

— Гапир, гапир, қизим!

— Ёнимда бир хат бор эди... Мени бу ҳолга қўйғувчи шу хатдир, — деди, бу сўзни ниҳоятда кучланиб айтди.

Вақт хуфтангя яқинлашган эди. Қизининг ҳалиги жавоби билан сабрсизликка тушган қутидор қўлига шам олиб ташқарига чиқди ва ердан хатни олди. Қизини бунчалик фалокатта солган ҳатни, олган еридан қўзғалмаёқ ўқиб чиқди. Хат ҳақиқатан жонсиз эди. Қутидорнинг ҳам оз қолдики ҳуши бошидан учсин... Сўнг чекда хўрланган ва фавқулодда чайқалган юраги билан ихтиёrsиз «маккор, инсофсиз!» деди. Кўз ўнглари қоронгуланиб бир неча вақт серрайганча қолди. Яна «яхшиликни билмаган ҳаромзода!» деб қўйди. Боя бу хатдан хабарсиз эди. Энди қизининг олдига кириб, унинг бетига қарааш унга жуда ҳам оғирлашган, чунки бу фожианинг бош омили деб ўзини таниган эди. Бориб айвоннинг олдига ўтирди ва бошини қўллари орасига олди. Бу хўрлик, бу одатдан ташқари уятсизлик бечора қутидорни жуда эзгани; нима қилмоқقا — хўрланган, таҳқир этилган қизини не йўсинда юпатишга, бу қора кунларни қандоғ қилиб ўткаришга билмас эди. Шу ҳолда не вақтгачадир қолди. Эрининг кечикишидан хавфга тушиб, Офтоб ойим унинг ёнига чиққанда ҳам у бояги ҳолда эди.

Эру хотин қизларининг ёнига кирдилар-да, унинг оёқ томонига ўтиб секин-секин ўтиришдилар. Анчагина бир-бирларига қарашиб қолгач, Офтоб ойим олган таас-суротини ичига юта беришга чидолмади-да, ёмғирдек кўз ёшини тўка берди. Қутидор ҳам хотинини кутиб

тургандек кўз ёшлари билан соқолини ювмакка олди. Кўзи юмуқ бўлса ҳам, уларнинг ҳозирги ҳолларини се-зизб ётган Кумушнинг да қайнаб чиққан кўз ёшлағ и икки чаккасидан ёстиққа оқиб туша бошлади. Шу чоҳ-да на учундир токчада ёниб турган шам ҳам лин-лип қилди-да, ўди... Шунинг ила бу ҳовлини чин маъноси билан қоронгулик босди...

Бу воқианинг учинчи куни Кумушбиби йиллаб ётувчи оғриқлардек сарғайиб озган, эндигига ғунчадан чиқаёзган бу ёсимон гулни хоин қўлларнинг заҳри сў-литган, фасод ўчогининг уятсиз мақсадлари ҳусн боғли-нинг бу янги эркасини ишонган ва кўз тиккан жиҳати исмидан таҳқир қиласириб, умидсиз бир вужуд ёки жонсиз бир ҳайкал ҳолига қўйган эдилар. Унинг кўзла-рида доимий бир маъюсият, аrimas бир ҳузн ҳар онча бир энтикиб чайқалиш эди. Офтоб ойим ҳам сўнг чекда хўрланган эса-да, лекин унга бу хўрлиқдан бурун у-бу билан қизини овутиш, унинг кўнглини очиб бу совуқ, уят гапни унутдириши, ҳар ҳолда кўзининг оку қораси бўлган Кумушни бирор касалга чалинмаслиги йўлида тиришиш муҳимроқ эди. Ва икки гапнинг бирида «ор-тиқ ўйлама, қизим... Эсиндан чиқар, энди хафа бўлга-нинг билан сира фойдаси йўқ!» дер эди. Кумуш бўлса ҳушсизларча онасининг оғзига ағраяр ва ҳар қачон маъюс эди. Кумушнинг бу ҳоли бечора онанинг юраги-ни эзар, юз хил васбасаларга солар эди.

— Кумуш,— деди Офтоб ойим тушлик чойдан ке-йин,— қайтага тогангникига бориб келмаймизми?

— Нима қиласиз, тогамникида?

— Нима қиласиз, тогамникида?

Кумуш онасининг сўзига нима учундир кулди ва «майли» деди.

— Тур, бўлмаса, юз-қўлингни ювиб отлан, худо ўлим берсин, уятсиз эрингта!

Кумуш мулойимгина қилиб онасига қараб олди. Ўр-нидан туриб Тўйбека ҳозирлаб берган обдаста ёнига ювениш учун ўтириди.

Улар тамоман йўлга ҳозирланган эдилар, йўлак то-мондан ўтган кун ҳат келтирган хотин кўринди. Кумушнинг кўзига бу хотин офат каби кўринса ҳам, аммо иккинчи тарафдан у севинди. Онасини келувчи хотин билан таништириб, ким бўлганлигини сўзлади.

— Хи-хи, айланай бойвуччалардан... Шундоғ қизим-никига ўтган эдим, қиҳ... алваддайн¹, деб йўл устидан бурилиб кирдим...— деб пучук хотин сўзланиб келар эди. Она-бала қўлга олган паранжиларини ерга қўйишга мажбур бўлдилар.

Хотин Кумуш билан кўришгач, ачингансимон сўради:

— Ҳа айланай пошиша қиз, сизга нима бўлди, жуда ўзингизни олдириб қўйибсиз?

Пучукقا жой кўрсатиб, Офтоб ойим жавоб берди:

— Бир-икки кундан бери тоби йўқ.

— Худой сақласин, худой сақласин! — деди хотин,— қиҳ... бевақт келиб сизларни йўлдан тўхтатдимми, хайр, худо синглимни ёмон кўздан асрасин! — деб фотиҳа ўқиди.

— Хуш келибсиз,— деди Офтоб ойим.

— Хушвақт бўлинглар, айланай, пошиша қиз...— деди хотин ва Кумушга қараб давом этди,— ану кунги сўзингиз билан йўлдан қайрилиб кирган эдим. Эртага ўғлим Тошкент жўнамоқчи, отангизнинг хат-патлари бўлса... қиҳ...

Кумуш жавоб бериш ўрнига онасига қаради. Қизининг қарашидаги маънога тушунган Офтоб ойим «юборадиган хатимиз йўқдир» деб жавоб берди.

Бу сўз билан пучук хотин ғилт этиб Кумушга қараб қўйди. Кумуш онасини унга хабарсиз кўрсатиб жавоб берди:

— Отамнинг хатлари йўқ, меники бор, озгина кутишга вақтингиз бўлса, ёзиб берар эдим.

Пучукнинг келишдан максади фақат шу ёзиб бериладиган хатгина эди. Кумушнинг ўтинчи унга мой каби ёқиб тушди:

— Ёзиб беринг, айланай, пошиша қиз, борадиган жойимдан кечиксам-да, савоби бор-ку, қиҳ...— деди. Кумуш хотиндан миннатдор бўлиб, уйга хат ёзиш учун кирди.

Юқорида Отабек томонидан олинган мактубнинг ҳақиқати мана шу йўсун хиёнатнинг натижаси эдики, биз энди хиёнат қаҳрамонлари билан ўқувчини таништирамиз.

¹ Алваддайн — гаъдасиз бўлмайин.

ИСИТМА ОРАСИДА

Саратоннинг иккинчи куни... Марғилоннинг шимолида бўлган Б... маҳалласининг кунчиқар томонида жанубга қараб бурилган тор кўчанинг юқори бурчагида отининг тизгинини ушлагани ҳолда бир йигит кийимиға ўтирган чанг-тўзонларни қоқар эди. Йигитнинг узоқина йўлдан келганлиги унинг киприк ва қошлирига, ҳам эндиғина чиқа бошлаган соқол-муётларига ўтирган тўзонлардан билғили эди. Йигирма икки ёшлар чамасида бўлган бу йигит сариқ танли, уккининг кўзидек чақчайиб ўйнаб ва ёниб турган қизил кўзли, юзига парчинлангандек юза (пучук) буруни. манглайи қанча ташқарига ўсиб чиқсан бўлса, юзи ўшанча ичкарига кетган, қисқаси вақтсизроқ яратилиб қолган бир махлук эди. Бурчакда ердан икки ярим газлар юксакликда кун ботишга қаратиб қурилган иккита кўримсиз бир бетлик эшиклар юзларига ёпиқ ҳолда эди.

Маълум йигит бошидаги қалпогини қўлига олди-да, ҳалиги эшикларнинг ўнг томонидагисини очиб, оти билан ичкарига кирди. Эшик ортиқча тор бўлгани учун от сиқилибгина ўтди-да, энди узунгина усти очиқ йўлак бошланди. Йўлақдан сўнг ҳовли эди. Ҳовлининг шарқ ва жануб томонлари бузилиб-ёрилиб ётган эски хароба иморатлар бўлиб, ҳовли юзи турли ахлатлар билан булғанч, гўё йиллардан бери тозаланмаган, супурги кўрмагандек эди. Ҳовлининг ўрта ерида паканагина балиқтут ўсиб, остига кул ва бошқа ахлатлар тўпланган эди. Ҳовлининг кунботар томонида харобаликдан озгина берида бўлган бояги йўлакка тираб солинган икки даричалик бир уй, бу уй қаторида бир айвон бўлиб, шунинг ила бу ҳовлининг тиккайган биносининг ҳисоби тамом эди. Бу хонадоннинг ошхонаси бўлмагани учун бўлса керак, ҳалиги айвоннинг бир бурчагига ўчоқ қурилган. Тутунлар билан айвон деганимиз қоп-қора ис, гўё айвон бўлганига онт ичмақда. Бунинг устига ўчоқ бошидаги товоқ-қошиқлар, тоғора ва қозонлар тартибсиз равища ифлос ётарлар, қозон теварагида уймалашмоқда бўлган уч-тўртта товуқлар бундаги ифлосликни яна бир қат оширмоқда эдилар. Ай-

воннинг нариги ёнидаги дарича орқали уйга кирилур эди. Уйнинг ярмиси қуруқ ер-қора шипдан иборат бўлса-да, аммо тўрида соқич боғлаб йилтирамакда бўлган кир, юлдуз қаби имла-тешик жафокаш оқ кийиз, ҳам тахмондаги эски сандиқ устига йигиб қўйилган бир тўда пахтаси чиққан увадалар кўрпа-ёстиқ отини ўз устларига олур эдилар. Битта токчадаги чети учган, қони қочган уч-тўртга пиёла ва бир қора қумгонни, иккинчи токчадаги умрида ювуниб кўрмаган қора мис баркашни, бўш қозиқлар кўнгли учун осилган биттагина кир дастурхонни тилга олиш билан бу ҳовлининг бутун жиҳоз-амлок¹ рўзгорини ёзиб чиқилгая бўлинуру, бурчакдаги токчада қаттиқ нон мужиб ўтирувчи сичқонни кўрсатиб ўтирмаса, бу уйда бошқа жонли зот ҳам кўринмас эди. Қаршидаги бўғоти тушиб ўртаси емирилган, деворларидан бақа салласи ўсиб чиққан хароба биноларнинг ўнда-сўнда кўрилмоқда бўлган эски нақшларидан ва сирларидан бу оиласнинг илгарида давлатли бир хонадон бўлганлиги, бу кунда ортиқча фақирликда яшаганлиги англашилур эди.

Йигит отини тут ёғочига боғлаб, уйга томон юрган ҳам эди, бурчакдаги хароба уйдан ўзини тузатиб, ўқувчининг қутидор ҳовлисида кўргани, пакана хотин гўё оналарнинг «зиёндош алвости»лариdek хунук қиёфатда йигитга қараб югуриб кела бошлади. Хотин йигит билан эсон-соғлик сўрашгач, иккиси уйга кирдилар. Йигит тўнини ечиб уйнинг тўрига ирғитди, бошидан қалпогини олиб қозиқча илди. Шундан сўнг, иккиси ҳам ўтиришдилар.

— Қалай,— деб сўради хотин,— ишинг ўнгиданми?

— Чакки эмас!

— Ўзи ҳозир шу ерда эди. Эплаб келса шу эди, деб ташвишланиб ўтирди. Сен келур олдингдангина чиқиб кетган эди.

— Уйига кетдими?

— Билмадим, келиб қолса керак. Ўзи ҳам қатнай-қатнай ўлаётиди, кечча уч қайта келиб-кетди, қих...

— Нимадан ташвишланади?

— Ишни айтганимдек қилмаса ҳамма меҳнат тўрт пул, дейди.

¹ Амлoк — мулклар.

Йигит кулимсираб олгач, сўради:

— Ўзимизнинг ишлар қалай?

Бу саволдан хотиннинг юзига умидсизлик туси кирди:

— Билмадим, дўстданми, душманданми, ҳайтовор олдинг очилмай турди; совчиликка чиқмаган куним йўқ, қих... Ёмон қўшнини ер ютсин, Марайим кудинг-чи бўшашгандек бўлган эди, уни ҳам қўшилар үлгур айнитибдилар... Ҳомидбой бўлса бугун унашсаларинг, эртага тўйни бошлаймиз, дейди, қих...— Бу сўздан йигитнинг кўзлари олайиб, алланечук тусга кирди.

— Қайси қўшни экан, у?

— Қуриб кетсин, ёмон қўшилар, қих... Мен сенга қайси бир қўшнини тутиб берай, ҳаммаси ҳам айнитар эмиш.

— Сен менга ўша... ни кўрсатиб бер, тобини олиб қўяй ўша онангни...

Иккиси шу можарода эдилар, йўлақдан кириши-даёқ тутга боғланган ўзининг отидан одамининг келганини билган Ҳомид, айвондан айланиб киришга сабри чидамай даричадан ошиб уйга кирди-да, йигит билан қуchoқдашиб кўриша кетди. Ўтирас-ўтирас Ҳомид ундан сўрай бошлади:

— Хўш, Содиқ полвон, ишлар қанақа, Тошкентда нима гаплар бор?

— Нима гаплар бўлсия, Тошкентда тинчлик. Баҳона билан Тошкентни ҳам кўриб олдик.

— Эшигини¹ топа олдингизми?

— Топдим. Айтганингиздек унинг эшигини Тошкентда ҳар ким билар экан.

— Бўйласа, ҳатни ҳам топширгандирсиз?

— Топширдим.

— Балли, шер, ҳатни қўлингиздан ким олди?

— Бир чол.

— Юзи чўзуқроқ, чеккаси сиқиқроқ чолдир.

— Худди ўзи.

— Ҳатини ҳам олдингизми? — деди ва сабрсизланиб Содиқнинг оғзига тикилди. Содиқ юзига мағрур бир тус ва овозига музafferият оҳанги бериб, «ҳатни ҳам олдим» жавобини айтди. Бу жавобдан сўнг Ҳомиднинг оғзини таноби жуда ҳам қочган ва Содиқнинг ел-

¹ Фарғонада ҳовалини эшик дейдилар.

касига қоқа бошлаган эди. Содик қўйнидаги хатни олар экан, ишлатган ҳийласини ҳикоя қилди:

— Хатни чолга бердим-да, эртага Марғилон кетаман, хат берсаларингиз бемалол, дедим. Чол бир оз ўйлаб олгандан кейин, ҳозирча хатимиз йўқ, сизга малол келмаса эрта билан бир хабар олиб ќетмайсизми, ўзингиз ҳозирда қаерда турибсиз, деб сўради. Мен оғирсингансимон ўйланиб олдим ва хўп, қўшхонам узоқ бўлса ҳам бир хабар олиб ўтарман,— дедим. Ишнинг ўнгланишига қувониб, бир кечани чойхонада ке-чириб, эртасига ваъда вақтига яна бордим. Имон топкур отам хатни муздек қилиб тайёрлатиб қўйган экан. Марғилон қаердасан, деб бир от, бир қамчи жўнай солдим.

Ҳомид хатни олур экан, Содикнинг елкасига қоқиб «раҳмат, раҳмат!» деб қўйди ва: «Биз ҳам сизнинг ҳаракатингизда», деган сўзни ҳам қўшди. Хатчи очар экан, Ҳомиднинг юзида қувонч аралаш бир жиддият мушоҳада этилар эди.

«Умидим юлдузи, орзум чечаги, ҳаётим тираги Кумушинга!

Киноя ва аччиқлар билан тўлиқ бўлган мактубингизни олдим. Хатни ёзган чоғингизда тамом бир ўт ичида, ғазаб денгизида сузганилигинги гавдаланиб кўз ўнгимдан ўтдилар. Ўтдиларгиа эмас, ҳатто менга шунчалик таъсир этдиларки, гўё маликасининг ғазабига учраган қул қай даражада эс-ҳушидан айрилса, қиласар ишидан, ўйлар ўйидан янгишса, менинг-да ҳозирги ҳолим бунинг юз даражага юқорисига етди. Тўғриси заҳар олуд мактубингизга одамларча тушуна олмадим ва тушунишга ҳам лузим кўрмадим, чунки ғазаб устида айтилган сўзлар ақлли кишиларга лойиқи муҳокама ва мутолаа бўломас, гулхандан сўнг аланга ҳисобини ҳеч бир вақтда олинимас, лекин мактубингизнинг бир ўрнига нима маъно бериш учун тамоман ожиз қолдим: «...илариги сўзингиз билан ўзингизнинг ҳаққингиз битганлигини била туриб ҳам яна уялмай-қизармай виж-донсизлар амрини бериб қўясизда, уятсизлигингини яна бир қат ортирасиз!..» ва «...отам Тошкентда экан кезда бу гапни айтишига уялган эмишсиз... гўё бунинг билан иномусли, уятчан бир йигит бўлиб кўринмакчисиз шекилли?!..» — Бу сўзларингиз билан нима демакчи

бўласиз, танингиз согми? Дуруст, мен отангизга бирга кетолмаслигимни, чарларни уч-тўрт кун кутиб қолишимни бир неча вақт айтломай юрдим ва ниҳоят отангиз кетишга рухсат сўрай бошлагач, отам орқали узримни айтдирдим, бас, бунда қандай уятсизлик бўлсин, гумонимча, иситмангиз қаттиқ ушлаган кўринәдир ва бу телбаларча мактубингизни иситма орасида ёзганга ўхшайсиз...»

Ҳомид мактубнинг бу ўрнига етганда ихтиёrsиз ха-холаб юборди-да, «вой аҳмоқ» деб қўйди. Пучук хотин билан Содик кулиб унга қарасалар ҳам, у илтифотсиз ўқишида давом этди:

«Мактубни иситма орасида ёзганингизга тамоман қаноат ҳосил қилдим. Шунинг учун сизни айлашга ҳаққим йўқ, ҳам сиз маъзурсиз. Бу киноя ва заҳарли мактубни ёзишга сизни мажбур этган, мени ҳийлакор тулки, оғзи қон бўри, уятсиз йигит... ва тагин аллақанча мартабаларга миндирилишларимнинг бош омили, албатта отангиздан ҳам эшитган бўлсангиз керак, шу кунгача чарлар балоси билан тутқун бўлишим, орзу-ҳавас, қайин стасининг оғриб ётиш шумлигидир. Ниҳоят сизнинг аччиқ хатингиз баракасида букун чарлар хабари ҳам келиб қолди. Сиз менинг бу хатимни ўқиб, гуноҳларимни ёрлақаб турган кезларингизда, албатта, мен Марғилон йўлида бўлсан керак. Онангизнинг ўқийдиган байти менинг шаънимга тамоман тескари, чунки ота-она орзуси ҳеч бир вақт янги ёрлик вазифасини ўтай олмас ва ҳамиша бошқаларнинг орзу-ҳаваси бўлиб қола берар. Сиз ўзингизни тупроқ билан тенглаштирмакчи бўлгансиз, лекин мен ҳозир Кумушга ҳам қансатланмай Олтинбиби деб атамоқ фикрига тушдим...»

Борлигим муҳаббатингиз алангаси билан туташгани ҳолда завжингиз Отабек.

26 жавзо, 1265 йил. Тошкент»

Мактубнинг бош томонини ўқиганда Ҳомиднинг юзида кўрилган шодлик ўзгаришлари хатнинг охири билан иегадир булғангандек ва шодлик ўрнини чуқур бир мулоҳаза олгандек бўлди. Бир-икки дақиқали фикрдан сўнг Отабекнинг: «Сиз менинг бу хатимни ўқиб, гуноҳларимни ёрлақаб турган кезларингизда,

албатта мен Марғилов йўлида бўлсам керак...» жумласини кўзидан ўтказди-да, Содиқдан сўради:

- Тошкентдан чиққанингизга неча кун бўлди?
- Олти кун.

Содиқнинг жавоби унинг устидаги юкни тағин ҳам огираштиргандек сезилиб, у бошини қуига энгаштириди ва чувоқ соқолини тузатиб фикрда қолди. Ҳомиддаги кейинги ўзгаришдан хабарсиз, тахмондаги увадаларни тузатиш билан овора бўлиб юрган пучук хотин Ҳомиднинг ёнига ўтириб, хунук бир илжайиш орасида сўради:

— Қалай, Ҳомидбой, ишлар ўнгиданми, пошшаниса-га энди совчиликка бораверамизми?

Ҳомид умидсизча бошини чайқади ва салмоққина қилиб жавоб берди:

— Ишимиз ҳали у даражага етган эмас, биз ҳозир фақат совчининг йўлидаги биринчи ғовнигина буздик.

Ҳомид пучук хотин орқали Кумушнинг хатини олдириш билан ўзининг биринчи мартаба юборган хиёнатномасини фавқулодда бир муваффақият билан натижаланганинги сезиб, Отабек кўкрагига ҳам қўл солиб кўрмак ва унинг Кумушшибига бўлган муносабатини билиб ҳам шунга қараб иш юритмак учун Кумушнинг мактубини Содиқ орқали Тошкентта юборган; Содиқ эса ўқувчига маълум мактубни Отабекка топшириб, Отабекнинг Кумушга ёзган мактубини ҳам олиб келган эдики, юқорида бу хат Ҳомид томонидан ўқилиб ўтди.

Отабекнинг бу мактуби ортиғи билан ўзининг Кумушга бўлган муносабатининг ҳамон эски ҳолида бойкийлигини эълон қиласар ва ўзининг осонлик билан рақибга берилмаслигини сўзлар эди. Бу йўлда биринчи қадамини муваффақият билан босган Ҳомид кейингиларини биринчидек кетиши учун қайғуланар эди. Бу кун-эрта Отабек келар-да, Кумуш билан топишар, хиёнатноманинг ўзиники бўлмаганинги исбот этиб, Ҳомиднинг ўйлаган ишини яна кейинга силтар, ёки бутунлайга Ҳомиднинг умидини узар. Мана бу очиқ кўриниб турган эҳтимол эмас, ҳақиқат олдида у ҳайрон ва бунга қарши тадбир ўйлаш билан гаранг эди. У бу тўғрида узоқ ўйлаб турмади, бир нарсага қарор қўйган каби фикрдан кўзини очди ва пучук хотинга деди:

— Жаннат опа, бир чилим берингиз-чи,— Жаннат опа чилим солиш учун кўзгалгач, Содиққа деди: — Иним Содиқбой, ишимиз жуда хом ҳали!

Содиқнинг қизил укки кўзлари ўйнаб жавоб берди:

— Фам еманг, ака, хом бўлса ўбдан етиширамиз, ўлмасак!

Содиқнинг бу жавоби Ҳомиднинг ишончини мёйлагандек бўлди, тўпписини бошидан олиб наматга ташлагач, миннатдорлик оҳангни билан:

— Сен билан Жаннат опам тирик бўлсаларингиз пиширамиз, албатта! — деди ва Жаннат опа қўлидаги чилимни олиб, такир-тукур қилиб пишиитди ва шиф-ғ этдириб сархонани синдириб юборар даражада ичига торугтач, оғзидаи чиққан пага-пага тутунлар орасида чилимни Содиққа узатиб, Жаннат опага деди.— Опа, сиз тагин бир мартаба қутидорнинг уйига хат олиб борадиган бўлдингиз...

— Қих... жоним билан, айланай, Содиқ олиб келган хатними?

Ҳомид кулди.

— Йўқ, опа, агар бу хатни олиб борсангиз, шунчалик қилган ишларимиз бир шул деган гап бўладир. Илгариги гал ёздириб берганимдек ўз режамизга мувофиқлаб Отабек тилидан яна бирини ўмартириб бераман.

— Хи... хи... хи... айланай, қих... Мен бу ишларни қаёқдан билай, Ҳомиджон!

— Албатта билмайсиз. Лекин бундан сўнг яхши билмоғингиз керак, озгина янгилишиб кетсангиз ҳам, ҳамма қилганларимиз шамолга учадир, ундан сўнг...— тўсатдан бу ўринда Ҳомиднинг эсига ўзининг бир хатоси келиб тушди: биринчи гал Отабек тилидан ёзган сохта хатини унинг қўл ёзувини мулоҳаза қилмасдан юборган ва бу кунгача бу сирни Мирзакарим қутидор, Кумушшибилар томонидан сезилиб қолишидан қўрқиб келмоқда эди. Энди бу иккинчи сохта хатни ёздиришда, гарчи ҳозир Отабекнинг қўл ёзмаси ўз қўлида бўлса ҳам, яна қўрқинчи йўқ эмас эди. Эндиги хатни ниқоятда эҳтиёт билан нусхага қараб ёздиришни кўнглидан ўтказди-да, яна қайси тўғридадир узоқ ўйлаб өлгач, Содиққа деди:

— Иним Содиқбой, сизга ҳам яна катта бир хизмат бор, башарти..

— Кишининг хизматидан қочган йигит эмасман! Ҳомид Содиқ билан Жаннат опага қараб олди ва:

— Шундоқми? — деб ишонмагансимон такрор сўради, ундан ижобий жавоб олгач, ёнини кавлаштира бериб,— Жаннат опа, Содиқ ҳориб, қорни очиб келган кўринадир, мен ҳам эртадан бери томоқ еган эмасман. Биз Содиқ билан сўзлашиб ўтирасак-да, сиз мана шу пулга гузардан чиқиб бир чорак¹ эт келтириб, шўрва қилиб берсангиз! — Жаннат паранжисини ёлиниб этта кетди, сўнгра Ҳомид Содиқдан такрор сўради:

— Кишининг хизматидан қочган йигит эмасман, денг-чи? — негадир Ҳомид Содиқнинг такрор: «Қочган йигит эмасман, синамасдан хизматни айта беринг» дейишига ишонмас эди, ниҳоят: — Башарти сизга буюрадирган хизматим бу кунгача қилган ишларингиздан тамоман бошқа ва оғир бўлса-чи? — деди, Содиқ Ҳомиднинг мақсадига тушунгандек бўлди ва ўйланиб турмай:

— Одам ўлдиришми? — деб сўради, Ҳомид Содиқقا ишонмагани ҳолда бир дақиқа чамаси қараб турди, сўнгра теварагига аланглаб олгач, ҳазил тариқасида:

— Башарти одам ўлдириш бўлса-чи? — деб сўради.

— Бу кунгача иккитасини жойлаштирдим, учинчига ўтса, нима қилади? — деди Содиқ ва мағрур кулиб қўйди. Бу сўздан сўнг Ҳомид устидаги юкни олгандек сўлиш олиб қўйган эди.

— Мен кишининг хизматини унутадиган йигит эмасман,— деди Ҳомид ва давом қилди,— ўғил бола учун ўғил болалигим, ёмон учун ёмонлигим бор. Башарти, шу хизматни бажариб беришни бўйнингга олсанг, онт билан айтаманки, давлатимнинг ярмиси сеники бўлсин!

Содиқ ўтирган жойдан қўлини Ҳомидга узатиб «Қайтмайсизми?» деб сўради. Ҳомид қўлини олиб «сўз ҳам бир, худо ҳам бир» жавобини берди.

Шу куннинг эртасидан бошлаб, Содиқ Мирзакарим кутидорнинг эшик олди теварагида Отабекни кутмоқчи, у келиб йўлакка кирди дегунча, орқадан бориб унинг ишини саранжомламоқчи эди. Содиқнинг фикрича бу ишни дарвозадан ташқарида бажариш муво-

¹ Бир чорак — уч ярим-тўрт қадоқ чамаси тошдир.

фиқ бўлса ҳам, нима учундир Ҳомид бунга кўнмай қутидорнинг узун қоронғу йўлагини қулай билмиш эди. Содикнинг «қай вақтда келар экан?» саволига:

— Албатта, шаҳарнинг дарбозаси эрталаб очилиб, шом билан ёпиладир, гумонимча, эрталаб Қўйондан чиқса, аср вақтларида Марғилонга кирадир,— деди ва сўз охирида орада сўзланиб ўтилган шартни яна таъкидлади:

— Яхши ўйла, Содик! Оlam ходис қўлга тушиб қолсанг, сўроқ кезида айни фақат ўз бўйнингга олиб, орага мени қоришиштормайсан!

— Хотиржам бўлинг, Содик деганингиз бундай хумсоликни жаллоднинг қўлида ҳам қилмас, азбаройи худо!

— Ундан сўнг, иккинчи шарт: бу сир фақат иккимизнинг орамиздагина қоладир, ўзинг ҳам сезган бўлсанг керакким, Жаннат опани этга овора қилишим уни ҳам бу сирдан ташқарида тутиш учун эди.

— Кўнглингизни мендан жуда тўқ тута беринг, ака! Афғоний ханжарингизни бераман деган эдингиз-а?

— Шўрва пишгунча келтираман,— деди Ҳомид ва кетди.

7

ҚУВЛАНИШ

Учинчи кундан бу ёққа қутидорнинг эшиги теварағидан Содик айрилмас эди. Ҳозир кечки соат еттилар бўлиб қолгани учун букун ҳам унинг келмаслигига қарор берган ва кетишини чоғлар эди, лекин узоқдан келувчи бирор отлиқни кўрса, балки шу бўлмасин, деб яна кутиб қолар эди. Аҳвол билиш учун бўлса керак, Ҳомид ҳам отига қийшиқ миниб ўтиб кетди. Савол назари билан қараган эди, Содик бошини чайқаб жавоб берди. Ниҳоят, қутидор ҳам кундаги вақтда бозордан қайтиб уйига кирди. Вақт шомга яқинлашиб қолганликдан битта-яримта дўконлар ҳам ёпилиб, ўткинчилар ҳам сийраксиб қолдилар. Шунча кутганинг ўн дақиқаси деб бўлса керак, у ҳамон шу ўртада айланиб юрар эди.

Пойафзал растасининг шарқа қараб тортилган кўчаси бошидан бир тўда йигитлар бунга қараб келар эдилар. Бошда у келувчиларни танимаган эди, йигит-

лар яқинлашиб келгач, ўзининг ўртоқлари эканини билib ўнгайсизлана бошлади. Ўзини улардан яшириш учун қутидорнинг йўлагини мўлжаллаган ҳам эди, йигитлардан биттаси: «Бу ерда Содиқ нима қилиб юрибди» деб юборди, иккинчи йигит «Содиқбой, Содиқбой!» билан чақиришга тутуниб, шунинг ила Содиқ бурилган жойида тўхтаб қолишга мажбур бўлди.

— Нега бу ерда тегирмончининг ишсиз қолган эшагидай жунжайиб ўтирибсан, Содиқ? — деди бир йигит. Бошқалар бунинг сўзига кулишдилар. Содиқ ҳам кулгига иштирок қилиб, йигитларнинг яқинига келди.

— Бирорда ишим бор эди, шуни кутиб ўтирибман.

— Содиқ,— деди ҳалиги йигит ва Содиқдан «ҳавобини олгач,— бурнингми Рисолат холамнинг ра-пидасими? — деди. Йигитлар кўчани бошларига кўта-риб кулишиб юбордилар.

— Юр, базмга!

— Қанақа базмта?

— Шамшодбекнинг базмига, ҳали Шамшодбекнинг тўйидан хабаринг йўқми? Юр, Содиқ жияним, башарангми дўлда қолган таппими?

Содиқ иккиланиб жавоб берди:

— Мен кейинроқ бораман.

— Эҳ хумсо,— деди йигит ва ариқдан сакраб Содиқнинг ёнига ўтди,— Андижондаги Қаймоқхон ҳам келибди, базми жамшид десанг-чи, юр! — йигит Содиқни судрай бошлади. Бошқалар ҳам унинг орқасидан итара кетдилар. Содиқ ўртоқларининг жабри остида иложисизгина борса ҳам, лекин иккинчи томондан кутганини букун ҳам келмаслигига қарори ҳам йўқ эмас эди. Ўн-үн беш отламдан сўнг ўртоқларига итаририб ўтирмасдан ўз ихтиёрича юра бошлади. Кўчанинг жанубига қараб борар эдилар. Орадаги ғарбга қараб тортилган кўчани ҳам босиб тўғрига ўта бошлаган эдилар, узоқдан от елдириб тўғрига келувчи отлиқни кўрган Содиқ кўчанинг ўргасида тўхтади. Ҳалиги муштумзўр йигит уни бир туртди-да: «Юр, юр, итвачча, жинни-минни бўлдингми?» — деб судрай бошлади, бошқалар ҳам унга тўрт томондан чугурчиқдек ёпишдилар. Шундай қилиб «бечора» Содиқни ўз ҳолиға қўймай, кўчадан анчагина нарига сургаб кетдилар. Улар бу кўчадан ўттиз-қирқ одимлаб узоқлашган ҳам эдилар, ҳалиги узоқда кўрилган отлиқ тўриқ йўргасини қарсллатиб

катта кўчага чиқди ва йигитлар келган томонга — шимолга бурилди. Солик кетар экан, отлиқча бурилиб қарди. Ҳасанаидан ҳат олгани борганида отхонада кўргани қора тўриқ отни танигани он қўлтиғига кириб олган рўдаподан қутулишга тиришиб боқди, лекин уддасидан чиқолмагач, кўзини йиртқичларча чақчайтириб «ит эмган даюс!» деди, қўлтиғидаги жонли кишангаг...

* * *

У ёқ-бу ёқдан шом азони эшитила бошлаган эди, маълум отлиқ қутидорнинг дарбозасида отини тўхтади-да, ўнг оёғини узангидан узди. Шу вақтда шом номозидан қолмас учун шошилиб қутидор ҳам йўлақдан чиқиб келди. Отини кўчанинг ўртасида қолдириб, қайнотаси билан кўришмак учун юргурган куёви олдида номозини ҳам унугтган қутидор, даг-дағ титраб тўхтаган эди. Кўришмак учун ўзига узатилган қўлни бўш хавода қолдириб, дарбозаси ёнига борди. Бундай муомала олдида Отабекнинг қандай ҳолда қолиши изоҳга унча муҳтоҷ бўлмаса керак. У турган жойида қозикдек қоқилиб қолган эди, қутидорнинг олдига юришинда билмас, сўзлашга ҳам тили келмас эди.

— Бу қандай ҳаракат, ота?

Қутидор титроқ ва ҳаяжонли бир товуш билан:

— Уятсизга менинг уйимдан ўрин йўқ, уятсиз билан сўзлашишга ҳам тоқатим йўқ... Борингиз, эшигим ёнида тўхтамангиз! — деди-да, ўзини ичкарига олди ва дарбозани ёпиб шилдир-шилдир занжирини боғлай бошлилади...

Отабек эсини бошига йигиб михланган еридан қўзғалганда, шом номози ўқилиб битган, кишилар уйларига қайта бошлаганлар эди. У мосинавори келиб отига минди ва «чух» деди, лекин от қўзғалмади. Иккичуч қамчидан сўнг толга боғланган тизгин шарт этиб узилиб кетгач, боя юриб кетган отини ўткинчилардан биттасининг боғлаб турганини эслади. «Чух» деди, от кўчанинг шарқига қараб кетди.

Бу кетишда унинг ҳуши ўзида деб айтиш қийин, шунинг учун отнинг бошини қаёқча согани ҳам белгили эмас, эҳтимолки унга ҳозир от юрса бас бўлгандай, от кўчанинг айрилишига етиб, «энди қаёқча юрамиз» дегандек тўхтаган эди, эгаси яна «чух» деб жавоб

берди. От шимолга қараб бурилди. Бу кўча билан узоқ юргач, олтинчи фаслда ўқувчи билан таништирилган Б... маҳалласига чиқиб, от яна қай томонга юришни сўраб тўхтади.

— Чух!

От кўчанинг шарқига юриб ўқувчига маълум бурчакдаги иккита эшиқдан ҳам яна шимолга бурилиб тор кўча бўйлаб узоқ кетди. Вақт хуфтанга яқинлашиб қолганликдан қоронғу ўбдан тушган эди. От ўзининг бу галги тўхташидан эгасининг «чух-чухи»га ҳам сирт бериб туриб олди ва Отабек кўзини очиб йўл қаравшга мажбур бўлди. Отнинг тор кўчанинг ниҳоятига етиб, йўлсизликдан тўхтаганини англагач, ўтган ишлардан ўзига ҳисоб бера бошлади. Қайнин отаси эшигида отини йўлга солганини бир оз эсласа ҳам, бошқасини билмас эди. Ҳар ҳолда Марғилоннинг четроғидаги боши берк бир кўчада ва катта бир дарбоза ёнида турганлигини тушунди. Отнинг Сэшини буришни-да, бурмасни-да билмай бир оз ўйлаб тўхтади. У ўйлаб турганда дарбоза ичкарисидан икки кишининг хайрлашиб ажралишганлари сезилар эди. Ичкаридаги оёқ товуши дарбозага яқинлаша бергач, у чиқувчига халақит бермас учун отининг бошини четга бурди. Отабек тўхтаган ўрин тўрт томондаги иморатлар билан ўбдан қоронғу, шунинг учун дарбозадан чиқувчининг фақат бошидаги оқ салласидан ўзгаси кўзга илинмас эди. Чиқувчи дарбоза ёнида турган отлиқдан чўчибми ва ё ўзичами сўради:

— Ким отда турган?

— Мен,— деди Отабек ва ўзининг мантиқсиз жавобидан ўнгайсизланиб, тузук жавоб беришга оғзини ростлаган ҳам эди, чиқувчи «сиз кимсиз?» деган саволи билан уни тўхтатиб қўйди.

— Мен... бир мусоғир ғариб,— деб жавоб берди-да, негадир томишга интилган кўз ёшини куч билан тўхтатиб қолди.— Марғилонга шом вақтида кирган эдим, кўзлаган жойимни тополмай адашдим...

— Қани бўлмаса, юринг бизникига, меҳмон! — айтuvчининг сўз оҳангидан ўртоқлик бўйи келиб Отабекнинг димоғига урса ҳам:

— Раҳмат сизга, ака! — деди, лекин унинг бу сўзи ҳам ўринисиз кетган эди.

— Ўзингиз адашдим, дедингиз-ку, тагин қаёқقا бормоқчи бўласиз?

— Сизга оғир келмаса...

— Оғирлиги йўқ, юрингиз,— деди ва олдинга тушиб Отабекка йўл бошлади: — Мен ҳам сизга ўхшаган бир гариб!

Отабек киши орқасидан кетди, олдинма-кейин сўзлашмасдангина кўчанинг оёғига қараб борар эдилар. Анчагина юргач, бошловчи «отингизга ҳам жой бор» деб қўйди. Отабек жавоб бермади. Шу кўйи сўзсизгина кўчанинг бурилишига етдилар-да, киши Отабекни тўхташга буюрди, ўзи шошилиб ўқувчига маълум Жаннат опа эшигининг чап томонидаги иккинчи эшикни очиш учун қулфни тимискилади. Эшикни очиши билан:

— Отдан қўнингиз, меҳмон,— деди, отни Отабек қўлидан олгач,— сиз хуржинингизни олиб йўлақдан тўғрига кира берингиз,— деди. Отабек хуржинни кўтариб эшикка кирди, усти ёпиқ қоп-қоронғу йўлақдан ўтиб каттагина бир ҳовлига чиқди ва хуржинни ҳовлининг ўртасига элтиб қўйди. Киши отни бурчакдаги усти ёпиқ охиргами, супагами бўғлагач, келиб хуржинни олди.

— Қани айвонга! — деб йўл бошлади. Киши Отабекни ўтқизгач, токчадан сопол лаган билан қовунни олиб чақмоқ суртди. Шам ёқилди. Бу киши қирқ ёшлар чамали, қонсиз юзли, сийраккина соқолли, қўй кўз, кўп вақт мадраса риёзатини чекканнамо қотма, узун бўйли бир одам эди. Айвоннинг полос ва асбобларида унча бойлик кўрилмаса ҳам, пухта, озода, чирк юқтирилмаган йўсинда йигиштирилганлигидан эгасининг ринд¹ табиатли эканига шаҳодат бермакда эди. Айвоннинг сўл томонида қурилган бир эшик ила уйми, ҳужрами борлиги билинар эди.

Үй эгаси Отабекни яхшилаб кўз остидан ўтказгач, сўради:

— Қорнингиз, албатта очдир, меҳмон? — Отабекдан жавоб кутиб турмай, ўзи ҳукм ҳам бериб қўйди.— Йўл билан албатта очиққансиз, сабзи-пие́з ва гўштларим ҳаммаси тайёр, фақат ўчоққа олов ёқсанам бас, ўзим ҳам ҳали ҳўрак қилганим йўқ, кўп эмас озгина, бир чимдимгина қиласман.— Отабекнинг узрига қулоқ бермай, ошга уннашга бошлади.

¹ Ринд — нозик.

Отабек энди ўтган ишларни кўз ўнгидан ўтказа бошлаган эди. Бу кунги беш дақиқа орасида бўлиб ўтган воқиани ҳеч бир йўсинг билан миясига сифдира олмас, чиндан бўлган иш деб ўйлашга ақли бовар қилмас эди. Лекин қулоқлари остида ҳозиргина айтилган «Уятсизга менинг ўйидан ўрин йўқ... Борингиз, эшигим ёнида тўхтамангиз!» Сўзининг садоси қандай бўлса ҳам унга бир ҳақиқатни очиқ сўзлар, нафсида сезилган хўрланиш ва ҳаяжон буни тасдиқлар, бугина эмас, юзига ёпилган дарбозанинг шилдир-шилдир қилиб боғланган занжирининг садоси ҳам бу ҳақиқатни таъкидлар эди. Бундан сўнг Кумушнинг заҳарли муаммо мактуби бир сидра кўз ўнгидан ўтиб кетди. Мактубдаги тушуниши қийин бўлган нуқта ва ишоралар яна бир қайта заҳар сочиб ўтгандек бўлдилар. Лекин буларнинг барчасини йигиб очиқ-оидин бир натижа чиқариш кучидан ожиз, гўё иситма вақтида бўладиган тутириқсиз, боғланишсиз алжи-билжи ҳолатни кечириб, ипни бир-бirisига боғлай билмас эди. Аммо ҳозирги дақиқада унга энг аччиқ таъсир этган нарса: «Борингиз, эшигим ёнида тўхтамангиз!» жумласи бўлиб, тўлқинланган иззат-нафси ҳамиша «қора оҳу кўзларни» кўришга ўрганимиш юрак кўзини хўрлик пардаси билан яширишга тиришар эди. Воқиан туғилиб эркалидагина ўсган, ҳаётнинг дағал муомаласидан бегона, фақат унинг сучук сўзларинигина тинглаб келган Отабекка бу хўрлик турмушдан биринчи зарба эди. Шунинг учун Кумушга бағишлиланган юрак тугунини ечишган ҳолда кўтарар, гўё марварид тутилган ҳарир рўмол ўғирлангандан сўнг оёқ осларида бўм-бўш ётгандек ва эгаси шу ўғирланган жавоҳиротнинг аламини чекиб тургандек эди.

Үй эгаси ошга сабзи босиб, Отабек ёнига келди, у бошқа ҳиссият ва фикрларни вақтинча унутиб, ўзини тетикликка олди. Үй эгаси Отабек ёнига ўтирап экан, сўради:

- Сизники қаерда, меҳмон?
- Тошкентдан, мулла ака.
- Исмингиз?

Отабек манглайнини қашиб олгач, жавоб берди:

- Шокирбек...
- Марғилонга биринчи келишингизми?
- Биринчи келишим..,

— Савдо важи билан келгандирсиз? — уй, эгаси Отабекнинг қиёфат ва уст-бошидан савдогарга ўхшатган эди.

— Йўқ... Мен асли Қўёнга келган эдим, аммо Марғилонда отам танишларидан биттасида озроқ оласимиз бўлиб, шу кишига учрашиб қетайин, деб Марғилонга ўтган эдим,— Отабек ўзининг ёлғонлашидан ўнгайсизланиб бир оз тўхтаб олди,— бу кишининг қаерда туриши менгэ очиқ маълум эмас эди ва Марғилонда бошқа танишим бўлмаганликдан ва вақтнинг кечлигидан адабишиб қолдим...

Уй эгаси кулди:

— Насибдан қочиб бўлмайди, Шокирбек, бу кун өчкаси меникига меҳмон бўлишингиз бор экан. Учрападиган кишинингизнинг оти нима?

— Комилбой...

Уй эгаси ўйлаб турди-да:

— Бизнинг бу яқинларда бундай киши йўқ, эҳтимол нариги даҳададир,— деди ва туриб ошига қараб кетди. Отабек ўзининг қип-қизил ёлғонлашидан виж-дони олдида қизаринди. Аммо у бир томондан бунга мажбур ҳам эди, чунки унинг қутидор билан қамалиш ва ўлимга маҳкум этилиш тарихи бутун Марғилонга машҳур бўлиб, ҳақиқий исмини яширмай айтганда, эҳтимолки, бошқа сирларни ҳам очмоққа тўғри келар эди. Уй эгаси қозон ёнига кетгач, у ҳам ўрнидан туриб ҳовлига тушди. Айвоннинг нариги ёни билан шарққа қараб кириладиган бир йўлак орқали бир боқчагами, майдонгами чиқилишини билиб шу ёққа юрди ва кичикроқ бир мевазорга чиқди. Кечанинг қоронгулиги устига меваларнинг қуюқ япроқлари қўшилишиб, бу майдон айниқса Отабекнинг ҳозирги кўнглига яқинлашиб келар эди. Унинг кўнгил меваси бу кунги қора воқиа билан қандай ўралиб, йўқолиб кетган бўлса, бундаги дараҳтлар ҳам ўз меваларини кеча ранги билан бўяб, яшил япроқлари ила кўмган эдилар, яъни бунда ўсган дараҳтлар қандай мева берадир — ажратиш қийин эди. У шу қоронгузор билан қўшилишиб кетган-дек ва қоронгуликнинг қучоғига кира боргаңдек мевазорнинг ичкарисига юра борди. Ниҳоят, бу тоқлари бағрига солиниб тушган бир дараҳтнинг остига ўтириди ва бу ўтиришда узоқ фурсат қотиб қолгандек ҳаракатсиз эди. Ўн беш дақиқалардан сўнг ичиғига ел қамалган пуф-

фақдек уфф этиб юборгач, ўрнидан турди. Боқчанинг кунботари билан харобазор иморатларни ёнлаб юрди.

Отабек айвонға қайтиб келганда, уй эгаси ошни дамлаб бўлиб, айвонда уни кутиб ўтироқда эди.

— Отингизга озроқ жўхори бериб қўйдим.

— Раҳмат, мулла ака,— деди Отабек, уй эгаси нимадир сўзламакчи бўлса ҳам ўнғайсизлангансимон Отабекка тикилиб-тикилиб қўймоқда эди.

— Касбим тўқувчилик, Шокирбек,— деди уй эгаси. Отабек сўзини тугалмаганлигини билиб, унинг оғзига қараб туради.

— Доим заҳда ўтириб ишлаганимданми ёки ўзимнинг табиатимда заифлик борми — ишқилиб нима бўлса ҳам кўп вақтдан бери бедармон тортиб юрибман,— деди ва давом этди.— Гоҳо кўкрак ҳам оғриб қўядир. Яқинларда табибларга кўрсатган эдим, қонингиз оз, қимиз ичинг, хўрак олдидан мавиз¹ истеъмол қилинг, деб кенгаш бердилар. Уларнинг кенгаши бўйича уч-тўрт кун қимиз ва мавиз истеъмол қилиб боқсан эдим, воқиан бирмунча фойдаси ҳам маълум бўлди. Сизга буни сўзлаб шуни айтмоқчиманки, ош олдидан бир-икки пиёла мавиз ичиб юборсам, албатта, бунга сизнинг қаршилигингиз бўлмас-а? — деди ва кулди.

— Қандай қаршилигим бўлсин, сиз маъзурсиз².

Уй эгаси илжайган ҳолда ҳужрага кириб, ўзининг таъбирича май эмас, бир кўвача мавизни олиб чиқди, токчадан пиёла олгач, келиб Отабекнинг ёнига ўтиреди. Мавизни пиёлага чулдиратиб қуяр экан, меҳмонига ер остидан мўралаб кулимсираб қўйди:

— Сизнинг ҳам ичканингиз борми?

— Йўқ.

Тўғриси ҳам Отабек ичкилиқдан қаттиқ ҳазар қиласар ва бу кунгача майни ўзига душман каби кўриб келар эди. Уй эгаси қуянган пиёласини симириб юборгач, сездирмаслик қилиб сесканиб қўйди ва «аниқ ичмаган-мисиз?» деб сўраган эди, Отабек бошини чайқаш билан кифояланди.

— Қаттиқ узр бўлмагандага ичмаган ҳам маъқул,— деди ва иккинчи пиёлани тўлдирав экан, давом қил-

¹ Мавиз — майиз (узумдан ясалган май).

² Маъзур — узрми.

ди,— лекин бу нарса бир томондан кишининг саломатлигига фойда берса, иккинчи жиҳатдан тирикликтининг қайғу ва аламларини-да унугдириб туар экан. Бошимга ўлгунча унута олмаслик қайғу-ҳасратлар тушди, Шокирбек! Айниқса, кейинги йилларда ўзимга ҳеч бир қаерда овунчоқ тополмай, ниҳоят шу аччиғ сув билан овунадиган ҳолга келиб қолдим,— деди ва узоқ тин олиб тўлғизган пиёласини олдига қўйди. Иккиси ҳам бир неча вақт сукутда қолдилар. У иккинчи пиёланни ичгач, Отабекни диққат билан кузатиб чиқди.

— Агар янглишмасам сиз ҳам бир оз қайғулироқ кўринасиз, меҳмон, бир пиёланни ичиб юбормайсизми?

— Раҳмат, мулла ака! — деди Отабек, аммо ўзида таърифи сўзланиб ўтилган нарсага бир эҳтиёж сеза бошлиган ва ўзини ҳам маъзурлар қаторига қўяёзган эди. Унинг бу ҳолини уй эгаси сездими ёки синааб кўрмакчи бўлдими, ҳайтовур учинчи пиёланни тўлдириб Отабекка узатди:

— Қўлимни қайтарманг, меҳмон, иккимиз ҳам маъзур кўринамиз.

Отабек узрини айтиб, пиёланни олмай турган эди, у ҳам пиёланни узатганича кулиб тура берди:

— Мен мавизни тамом шаръий қилиб тайёрлайман, тунов кун маҳалламизнинг охунлари ҳам ҳалоллигига фатво бериб кетдилар.

Отабек пиёланни олишга мажбур бўлди. Уй эгасининг айтганидек мавиз жуда ҳам тиник, яхши чиққан кўк чой каби мусаффо эди. Пиёлага узоқ қараб турмай ичиб ҳам юборди. Оч қоринга тушган ўткир май виз еттириб меъданни қайнатди-да, томоқ остини ловиллатмоққа олди. Отабекка биринчи пиёланни ичиргандан сўнг, уй эгаси ошни сузишга кетди.

БАХТ ВА БАХТСИЗЛИК

Ошни сузиб келтиргач, меҳмонни ошга таклиф қилишдан бурун яна токчадаги кувачани олиб, бир пиёланни тўлдириди ва Отабекка узатди.

— Ичинг буни ҳам, сўнгра ошни еймиз! — деди, бу гал унча қистатишга тўғри келмади, биринчи пиёла

билан унинг кўз ўнглари жимирилашмакка, ўзида бир енгиллик ҳис этмакка бошлаган ва бу иккинчи пиёла гўё «мени иссанг, тағин ҳам енгил тортасан» дер эди. Отабекнинг иккинчи пиёласидан сўнг ошга ўтирдилар. Битта «дон» ҳазмини ҳам тасаввур қилимаган унинг меъдаси кетма-кет тушиб турган луқмаларни эътирозсиз қабул қилмоқда эди. Бундай иштаҳани, эҳтимолки, у ўз умрида биринчи мартаба кўргандир. Томоқ орасида уй эгасининг берган саволларига яхши жавоб бергандек, ўзи ҳам баъзи сўзларни тўқиб юбормоқда, бояти оз сўзликлари ўринини эзмалик бўлмаса ҳам мұтадил бир ҳол олган эди.

Ошдан сўнг лаган ва дастурхонни йиғишириб олувчи уй эгасига сархуш ва қизарган кўзлари билан узоқ қараб қўйди. Бу қарааш унга миннатдорлик ва ташаккур қараши эди. Уй эгаси Отабекнинг ёнига иккита ёстиқ олиб қўйди ва биттани ўз ёнбошига ҳам олди.

— Ёнбошлангиз, бек,— деб бошлаб ўзи ёнбошлади. Отабек ҳам унга эргашди. Иккисининг орасидаги шам ел билан ўйнашибгина нур сепар, иккиси ҳам сўз қўйгандек шамга кўз тикиб қандай ўйгадир берилишандек кўрниш эдилар. Бир неча вақтдан сўнг уй эгаси кўзини шамдан олди ва ер остидан Отабекни кузатгач, сўради:

— Уйланганимисиз, бек?

Отабек кайфи кучликми эди, ёки англамай қолдими, ҳайтовур шу онда жавоб беролмади.

— Уйланганиман.

Сўрагувчи бир оз тўхтаб олгач, яна сўради:

— Хотинингизга муҳаббатингиз борми?

Отабек бу савол қаршисида гарангсиб қолгандек бўлди, воқиан орага оғир савол тушган эди: билинтирмаслик қилиб уфлаб олди:

— Муҳаббатим... ийқ.

— Яхши экан,— деди уй эгаси. Отабек унинг бу сўзига тушуна олмай, «нега?» дегандек қилиб қараб турар эди.

— Сўзимга ажабландингиз, шекилли?

— Йўқ,— деди Отабек, лекин унинг таажжуби уй эгасига очиқ кўриниб турар эди.

— Балки муҳаббат баҳтли кишилар учун яхшидир, лекин ўз тажрибамча, баҳтсиз киши учун бадбаҳтиликдир. Масалан сиз агар чиндан ҳам хотинингизга муҳаб-

батсиз бўлсангиз, ўзингиз ҳам иқрор қила оласиз: уйга кирсангиз хотинингиз бордек, кўчага чиқсангиз йўқдек, бас, сизга хотиннинг оғирлик ва енгиллиги бирдак. Шундоқ эмасми?

— Шундоқ,— деди Отабек, аммо муҳаббат тўғрисида сўзланган бу сўзлар унинг кайфли кўзини очаёздилар.

Уй эгаси давом қилди:

— Мен бу сўзларни ўз ҳолимдан чоғлаб айтаман, эҳтимолки мен янгишарман,— деди ва узоқ тин олгач, сўради.— Сиз уйланган чоғингизда, ўзингиз ёқтириб уйландингизми ёки орадагиларнинг ёқтиришлари биланми?

Отабек сўрагувчининг қандай муддаоси борлигига тушунмай қолди.

— Онамнинг ёқтириши билан.

— Баракалла,— деди уй эгаси ва,— менимча, ҳамма бало ўзинг кўриб, севиб уйланишда,— деди ва эши тувчиси кутмаган жойда сукутга кетди. Отабек бир кўйлакни ўзидан бурун йиртган киши тўғрисида, гўё ўз саргузаштининг эски тарихини мулоҳаза қила бошлаган, қархисида ўтирувчини-да, қайин ота эшигидан қувланган киши деб билган эди. Қайин отанг сени ҳам қувладими, деб айтмаса ҳам шунга яқин бўлган «севган хотинингиз сизни ташлаб кетдими?» деган савонни берди. Уй эгаси бошини чайқади.

— Ташлаб кетишга-кетди, лекин ўз ихтиёрича эмас,— деди.

Отабек бу сўздан сўнг бунинг ҳам қайин отаси ёки қайин онаси томонидан зулм кўрганига ишонган эди.

— Ёмон одамнинг юзи қурсин,— деб қўйди, бу сўз уй эгасига тушунарли бўлмади шекилли, Отабекка савол назари билан қараб олди.

— Эзмалик бўлса ҳам бошимдан ўтганларни сўзлаб берайми, меҳмон? — деди.

Ўз саргузашти билан фарқсизга ўхшаб кўринган бу ҳикояни эшитишга унинг иштиёқи ортган эди:

— Сиз сўзламасангиз-да, мен сўзлатмоқчи бўлиб турар эдим.

— Менинг саргузаштимда сиз кутган қизиқлик йўқ, лекин шундай бўлса ҳам сўзлаб берайин,— деди ва ёстиқни кўкрагига қўйиб олгач, ҳикоясини бошлиди:

«Мен ўзим асли қўқонликман. Ота-онамдан ёшлигда-етим бўлиб, тоғамнинг қўлида ўсдим. Ёшим 17-18 ларга боргандан сўнг ўз куним ўзимга қолиб, бир ўртотимнинг кенгаши билан бундан йигирма йиллар бурун Марғилонга келиб, бу кунги устакоримнинг отасига тўқувчилик ҳунарига шогирд тушдим. Тўрт йил чамаси қилган хизматимдан сўнг ҳалиги устакорга халфа бўлиб ишлай бошладим. Бошқа йигитлардек ортиқча ўринсиз сарфларим бўлмагани учун, оз замон ичидагуч-тўрт тилла пуллик ҳам бўлдим. Ишимга ихлос билан қараганим учун, менинг тўқиган ишларим ўзгаларницидан қадрли юрар ва халқ орасида ҳам отим «уста Олим кичкина» бўлиб шуҳратланган эди. Маълумки, бофандалар¹ олдига кўпинча хотин-қизлар келиб, янги нусха қидириб юрийдилар. Менинг тўқиган ишларим ва чиқарган янги нусхаларим ҳаммага мақбул, айниқса, хотин-қизлар учун машхур бўлиб, ҳар доим тўқув дўконим ёнидан хотин-қизлар аrimас эдилар...

Кунлардан бир кун ҳали кишидан қочар даражага етмаган ўн уч-ўн тўрт ёшлар чамали дўндиққина бир қиз келиб, мен чиқарган янги нусха шоҳидан сўради. Қизнинг сўраган нусхаси тўқилиб ва сотилиб кетгган эди. Шунинг учун «йўқ» деб жавоб бердим. Қиз кўзини жовдиратиб туриб, «менинг учун тўқиб беролмайсизми?» деб сўради. Мен қизнинг юзига қараб, «мумкин эмас, опа, бир кийимлик шоҳи деб нусха бўяш оғир» дедим. Қиз сўзни айлантириб мендан ваъда олишга тиришар эди. Мен сўз орасида яна унга қараб олдим. Ёнимдаги халфалардан биттаси қизга ўла, «тўқиб беринг, уста, опани хафа қилманг!» деб қўйди. Учинчи қарашда ўзимда қизга қарши бир яқинлик ҳис этган, унга узоққина қараб қолишга мажбур бўлган эдим. Гарчи қиз айтган нусхани тайёрлаш оғир бўлса ҳам, қандайдир бир куч таъсирида ҳалиги қизга ваъда бериб юборибман. У чиқиб кетгач, қандай ваъда берганимни ўйлаб кўриб, ваъда куни келса тўқий олмадим деярман, деган сўзни кўнглимдан ўтказдим, лекин қизнинг гуноҳсиз ўйнаб турган қора кўзлари, қизил олмадек тарам-тарам юзлари ҳамон кўз ўнгимда кўриниб турар эдилар ва «менинг учун тўқиб беролмайсизми?» сўзи қулоқ остимда такрор айтилгандек бўлар эди.

¹ Б о ф а н д а — тўқувчи.

Бир неча кун шу йўсин иккиланиб юргач, ниҳоят ўзимга тушунилмаган бир савқ остида ваъдамни ифога ҳам бошлабман, бир кийим шоҳи, деб ўттиз кийим бўладиган ипакни бўяши, танда, арқоқ, гула машаққатлари кўзимга ҳеч кўринмабдири. Ваъдамдан икки кун илгариёқ шоҳини тўқиб, унинг келар йўлини пойлар эдим, ул келмас эди. Ниҳоят, ваъда куни ҳам келиб ўтди, яна келмади. Сизга шуни ҳам айтиб қўйяки, бир кўрган кишингизнинг тусини, албатта, узоқ фурсат хотирингизда тутолмайсиз, лекин бу қиз тўғрисида мен тамом бошқача ҳолатда бўлдим: шундоқки, унинг қошини, кўзини, тусини, қўғирчоқдек қаддини кўз ўнгимда тута-тута тамом бир йиллик билишлардек бўлиб қолибман.

Унинг товуш оҳанглари қулогум хотирасида у даражада яхши сақланмаган бўлса-да, аммо «менинг учун тўқиб беролмайсизми?» сўзини ҳозиргина эшитгандек бўлар эдим.

Ваъда кунидан уч-тўрт кун ўтиб кетган бўлса ҳам ҳануз ул келмас эди. Мен унинг кўчасини сўраб қолмаганимдан хафа бўлар эдим, чунки шоҳини ўзим элтиб беришга ҳам энди ҳозирланиб қолган эдим. Бу кутиш кунларимда на учундир ёнимдаги халфа шогирдлар билан бўладиган муомалаларим ҳам ўзгара бошлаган, яъни сўзларим дағал ва тундликка айланган, гўё бунинг ила Алининг кекини Валидан олар эдим.

Ниҳоят, ваъданинг бешинчи куни қиз келди. Қизни кўриш билан мен борлиқ-йўқлиқ ҳолатда қолган, бир неча замон менинг учун сўз топиш ҳам қийинлашган эди. Қиз шоҳини сўрамай менга термулиб турар эди. Унинг миннатдорчилигини фақат шоҳи билан олмоқчи бўлганим учун, бу ҳол менга оғир келди.

— Нега ваъдага келмадингиз? — дедим, қиз ўнгайсизланиб, гуноҳкорларча кўзини ерга тиккани ҳолда сўради:

— Шоҳини сотиб юбордингизми?

Ёнимга қўйиб ўтирган шоҳини қизга узатдим. Ул шоҳининг орқа-ўнгини ағдариб кўрди ва: «яхши тўқибсиз» деб менга умидсизча қараб қўйди. Шоҳини менга бериб қўлидаги майда чақаларни олдимга тўқди.

— Шоҳингиз қанча пуллик?

Мен жавоб ўрнига, чақаларни санааб чиқдим, битта олтмиш пуллик тангасидан бошқаси, бир пуллик, беш

пуллик занг босган чақалар бўлиб, кўп вақтлардан бери йигилиб келганлиги маълум эди. Берган пули шоҳининг ярим баҳосини қоплар-қопламас бўлганлигини айтдим.

— Тагин қанча керак? — деб сўради.

— Уч танга,— дедим. Қизнинг ўйчан юзини яна қайғу босди, мен унинг юзидан катта ҳусндор қизларда кўриладиган бир улуғликни томоша қилар эдим ва унинг ўз ваъдасига кела олмаганини сирини англар эдим. Бу ёш фариштани бу ҳолда қолдиришга кўнглим бўлмади ва дедим:

— Қолганини қачон олиб келасиз? — бунга ҳам тез жавоб бермади ва жавобсизлик билан яна ўз ҳолини менга арз қилгандек бўлди.

— Пул топганда келтирасизми? — дедим-да, унинг жавобини кутмай қўлига шоҳини тутқаздим. Қиз менга ишонмай бошлаган эди:

— Менга ишонасизми?

Мен ишонч билдириб ўлтирмадим:

— Уйингиз қаерда?

— Ч... маҳалласида.

— Кимнинг қизисиз?

— Шариф милтиқчининг қизиман.

— Отангиз қариб қолганми?

— Үлган, онам бор.

— Акангиз йўқми?

— Йўқ. Битта кичкина ўғил укам бор.

— Исмингиз нима?

— Саодат.

Шундан сўнг Саодатни шоҳи билан жўнатиб юбордим. Саодат менинг бу ишимга ишонмайгина чиқиб кетди. Халфа шогирдлар, тузиксиз-ку уста, деб менга пичинг отишдилар. Аммо мен Саодат учун ҳар бир оғирликни кўтаргундек кўринар эдим...»

Уй эгаси бўлган уста Олим ҳикоясини тўхтатиб, Отабекдан сўради:

— Ҳикоям узайиб кетди, шекилли, зерикдингизми?

Отабек уни ортиқча бир эътибор билан эшитар эди, сархушчасига:

— Сўзлай берингиз! — деди.

Уста Олим давом этди: «Менга уч танганинг аҳамияти йўқ эди. Аммо Саодат билан боғланиб туришим учун бу уч танга минг танганинг ишини қилар эди.

Орадан ўн кунни ўтказиб, уч танга баҳонаси билан Саодатнинг уйига бордим. Саодат холасининг уйига кетган экан, онасига ўзимни танитиб, девор орқали анчагина сўзлашди: эри ўлиб эркаксиз қолганидан, ип йигириб овқат ўтказганидан ва қизининг кенгашмасдан шоҳи буюрганидан ҳасрат қилиб кетди; сўзининг охирида яна бир ҳафта кутиб туришимни илтимос қилди. Бир ҳафтадан сўнг алоқамни узиб қўйиш менинг тинкамни қуритадиган бўлгани учун ишни бошқа режада юргизмакчи бўлиб айтдим: — «Ўзингиз ип йигириб, кун кўриб турган бўлсангиз, сизга уч танга эмас, уч пул бериш ҳам оғир экан, агарда сизга маъқул бўлса, кўнглимга бир гап келадир, шундоқки, сиз эркаксиз бўлганингиздек, мен ота-онасиз ёлғиз йигитман... Кўпинча кир ювдириш ва йиртиқ-ямоқ важларидан қийналаман. Ўша сиздаги пул эвазига бир неча вақт кир-пиrimга қараб, йиртиқ-ямоғимни ямаб берсангиз, қандоқ бўлар экан...» Кампир бу сўзимни мамнуният билан қабул қилди ва эртаси кунга кирларимни олиб келиш учун Саодатни юбормоқчи бўлди. Шундай қилиб букун боғланишни яхши асосга қуриб қайтдим. Эртасига Саодат келиб кирларимни олиб кетди. Уч кундан сўнг ювилган кирларни келтириб, тўқув дўконимнинг ёнида анчагина қараб ўтирди. Мен унинг келиши учун ҳар ҳафта пайшанба кунини белгиладим. Кундан-кун Саодатга қаттиқроқ боғдана борганимни англар здим. Пайшанбани ҳайит сингари қаршилар здим. Орадан уч-тўрт ҳафта ўтгандан сўнг, қўлига «ойингга элтиб бер» деб йигирма-ўттиз чаقا пул ҳам бердим. Саодат билан алоқа қилганимнинг тўртинчи ойида рамазон ҳайити келди. Фитир рўза баҳонаси билан Саодат учун саккиз тепки хон атлас, онаси билан укасига бўз кўйлак қилиб, Саодатларнинг уйига ўзим чақириб бордим. Саодат мени йўлакда қаршилади ва гуноҳсизча қўлимдан тутиб ичкарига бошлади. Мен:

— Саодат, эсингни едингми, онанг мендан қочмайдими? — дедим. Саодат тортишида давом этиб:

— Қочмайди, ўзи менга устаканг келса қочмайман, деган.— Мен Саодатнинг йўлбошчилиги билан ичкарига кирдим. Айвоннинг олдида Саодатнинг онаси ип йигириб ўлтирас экан, қизининг қўлида бегона йигитни кўргач, ҳайрон бўлиб қолган эди. Саодат мени ҳовлиниг ўртасида қўйиб, онасининг олдига югурди ва:

— Уста акам-ку! — деди. Онаси нари-бери даканасини тузатиб ўрнидан турди. Салом-алиқдан сўнг сўрашдик. Саодат тегимга кўрпача ёзи, мен қўйнимдагини олиб, ўртага қўйдим. Фотиҳадан сўнг бир оз ётсирашиб, уялишиб очилишолмай қолдик. Сўнгра кампир Саодатнинг менинг тўғримда айтадиган сўзларидан муқаддима қилиб деди:

— Саодат сизни худди ўз акасидек яхши кўрадир, тунов кун ироқи совун олгил, деб ўттиз пул берган экансиз. Совунни олиб келгач, ётиб уйқуси келмади,вой уста акамдан айланай,вой уста акамнинг умрини худо баҳтимга узун қиссин, деб бутун тонгни тонг отдириб дуо қилиб чиқди.

Бу сўзни кампир сўзлар экан, мен ўнғайсизланиб кетиб ер остидан Саодатга қараб қўйдим. Саодат қизарип-бўзариб четга бурилиб олган эди. Кампир давом этди:

— Мунчалик бизнинг ҳолимизга қайишганингиз учун беш вақт номознинг олдида мен ҳам ҳаққингизга дуо қилишни унутмайман ва ҳафта сайин қилиб турган марҳаматингизни кўриб ўйлайман: худо бандасига меҳрибон, ҳолимизнинг раҳмини еб саҳоватли бу йигитни бизга учратди, деб. Кўнглингиздаги ҳарна тилагингиз ўзига аёндир. Сиз етимларнинг раҳмини есангиз, сизнинг ғамингизни ўзи есин,— кампир бир уфлаб олгач, деди.— Манглайим шўрли экан, болам, Саодатнинг Қаюмжон отлик бир акаси бор эди, ёши еттига чиқиб, отаси раҳматлик эндигина тўй қиласман деб турганда, қизамиқ деган бир фалокат касал билан оғриб дунёдан ўтди, бунинг устига Саодатнинг отаси ҳам марҳум бўлиб бизларни аро йўлда қолдириб кетди. Лоақал шу бола бўлганда ҳам эди, биз бу йўсун оғир кунларга қолмасми эдик, деб ўйлайман,— кўз ёшисини артиб сўзини битирди.— Бандасининг қўлидан келадигани оҳ-воҳдан нарига ўта олмас экан, болам!..

Мен кўнгил кўтарган бўлдим:

— Олдингизда ёш бўлсалар ҳам қизингиз ва ўғлингиз бор экан, бугун бўлмаса эртага — ахир, сиз ҳам ёруғлик кунга чиқиб қоларсиз, она,— дедим ва келтирган нарсамни кампирнинг олдига суриб.— Шу арзимаган нарсани Саодат билан укасига ҳайитликка олиб келган эдим, бу айбим учун, албатта, мендан койимассиз,— дедим.

— Одамгарчилигингиздан ўргилай! — деди кампир ва оғзига келган сўзлар билан дуо-миннатдорчилик қила бошлади. Бояғи сўздан кейин уялганича биздан узокроқда ўтирган Саодат секингина бизнинг ёнга келди ва қоғозга ўралган кийимликни очиб атласни олди, «бу менгами?» деб мендан сўради ва жавобимни кутиб ҳам турмай йўллик бўзни олди, «бу Сайфига» деди. Унинг орасидаги одми бўзни кўриб «бу ойимга» деди. Саодат бу нарсаларни жуда оддий қилиб кўрди ва соддacha ҳалиги сўзларни айтиб қўйди. Гўё бу нарсаларни илгаридан кутган эди. Атласни яхшилаб кўриб чиққач, ёқтиргандек бўлди, бир менга, бир атласга қараб туриб нимадир айтмакчи бўлса ҳам айтолмади. Мен нима демакчи бўлганлигини сезган эдим. Бу орада биз кампир билан ҳасратлашиб турган эдик, ул келиб сўзни бўлди:

— Уста ака! — деди, мен қарадим.— Рўзамисиз?

— Рўзаман.

— Рўза бўлмасангиз чой қайнатар эдим! — деди.

Онаси кулди.

— Чойни ҳайитда келганимда қайнатиб берарсан! — дедим.

— Ҳайитда келсангиз, ош ҳам қилиб берар эдим,— деди ва онасига қаради.

— Акангта ҳар нарса қилсанг ҳам арзийди, қизим,— деди кампир ва на учундир кўзига ёш олди, мен ҳам аранг кўз ёшимни тўхтатиб қолдим.

— Бўлмаса, бу кун ифтор қила қолинг! — Саодатнинг бу сўзига онаси ҳам қўшилишди. Мен узр айтдим. Лекин ҳақиқатда эса, Саодат билан бирга ўлтириб ифтор қилишни кўнгил истай бошлаган эди. Узоқ сўзлашиб ўлтиридим, бу уйдан чиқиб кетким келмас, бир соат орасида тамоман очилиб-сочилиб кетган Саодатнинг болаларча қилигини кўриб тўймас эдим. Саодат тоҳ мен билан, тоҳ атлас билан машгул, бояги уялиб туришини бир ёққа йигиштириб қўйган. Онаси билан мени кулдириб, анчагина кўтарилиб қолган латиф кўкраги устига «сенгинадан айланай!» деб атласни босиб қучоқлар эди. Мен бўлсам, гўё атлас эмас, қу-чоқлангувчи ўзим бўлгандек кайфланар эдим.

Мен кампир билан хайрлашиб чиқа бошлаган эдим, Саодат «Пайшанба кун борайми» деб сўради. Мен кампирнинг олдига қайтиб бордим-да, айтдим: — Саода-

тиңгизнинг бўйи чўзилиб қолган кўринадир, бундан сўнг мактабдан бўшаган вақтида Сайфини юборсангиз қалай бўлар экан ва қўлим бўшаган кезларда ўзим ҳам келиб турарман,— дедим. Гўё кампир ҳам мендан шу сўзни кутиб турган экан, ҳамиятимга ва ақлимга таҳсин ўқиди ва қизига қаради. «Ана эшиздингми уста акангнинг сўзини, энди вақт-бевақт кўчага ҳам чиқа берма!» деди. Мен чиқа туриб Саодатга қараган эдим, мендан ўпкалагансимон кўринди. Аммо менинг бу сўзим бекорга эмас, балки ҳалфа шогирдлардан баъзиларининг унга ёмон кўз билан қараганларини пайқаганим учун эди.

Шу йўсиnda Саодатнинг онаси ҳам мендан қочмай қўйиб, алоқамиз тагин ҳам қаттиглашди. Кутмаган бу муваффақиятим бир неча кунгача кўзимдаги уйқуни ҳам қочириб қўйди. Уч-тўрт кун гўё бугун-эрта Саодатга уйланадиган каби ҳовлиқиб ҳам юрдим.

Унча-мунча нарсани аямаганим учун бўлса керак, тез замонда гўё Саодатлар оиласининг бошлиғи ҳолини олиб қолдим. Жумз кунлари масаллиғни кўтариб Саодатларнига борар, Саодатнинг қўлидан ош қилдириб еб қайтар эдим. Саодат кундан-кунга ўсиб борар, шу нисбатда ҳуснига-ҳусн қўшилар ва мен бадтар унинг мафтуни кесилар эдим. Шу ҳолда орадан икки йил чамаси фурсат ўтиб кетиб, Саодат ҳам ўн олти ёшларга етиб қолди. Энди менинг ошиқона термулишларим маъносини англай бошлаган, негадир «ака» деб қилатурган хитобларни-да тарк этган эди. Икки йилдан бери кампирнинг олдига совчи киргизишни уйлаб келган бўлсам-да, аммо нима учундир Саодатдек қизга уйланиш бахтига эришмакни ўзимга тасаввур қилолмас эдим. Бу тўғрида бўлган ҳамма умидим Саодатнинг онасидан эди, балки ўзи сўз очар ва ёки орага киши қўяр, деб кутар эдим. Орага бошлаб ўзим совчи қўйишдан ўнғайсизланар, тўғриси ўзимга тушунолмаган бир хавф остида бу жасоратдан маҳрум эдим.

Бир кун одатимча Саодатлар уйига борган эдим. Ош-сувдан кейин кампир Саодатни ўchoқбоши юмушига юбориб, менга қараб кулди:

— Саодатга бир яхши жойдан куёв чиқиб қолди. Кеча унашсак унашкундеқ ҳам бўлган эдик, бироқ сизнинг маслаҳатингизни олайин, деб совчиларни қайтардим,— демасинми, устимдан бир чеълак совуқ сув қуй-

гандек энтикдим, қандай жавоб беришга тилим келмай қолди. Узоқ вақт кесак каби ҳаракатсиз қолгач, куч орқасида тилимни базур сўзга ҳаракатлантирдим:

— Жойи яхши бўлса, ўйлаб кўриш керак...

Куёвнинг кимнинг ўғли бўлганлигини ва қандай қасб қилишини шарҳ қила бошлаган эди, сабрим тамом битди:

— Ундей бўлса кеча совчиларни бекор қайтариб-сиз,— дедим, кампир менинг бу киноямга тушумаган эди.

— Куёвнинг теги-тахти менга маъқул бўлишга бўлди-я, фақат энди иш сизнинг кенгашингизга қараб қолди. Сиз Саодатга ота бўлмасангиз ҳам, лекин оталикдан юқори ишларни қилиб келасиз. Эндиликда Саодатни узатишда ҳам оталигингизни аямангиз! — деди. Бу сўз билан яна ўлганнинг устига чиқиб тепилгандек бўлдим. Чиён каби мени заҳарламакда бўлган кампирнинг тўғри сўзини эшлитиб туришга ортиқ тўзолмадим-да, эртагача ўйлаб жавоб беришни айтиб кампирнинг олдидан чиқдим.

Чиққач, оёғи куйган товуқдек тўрт томонга югура бошладим. Эпақали бир гап эсимга келмас эди. Ниҳоят, ақлимни бошимга йигиб, сиримдан воқиф бир ошиамга кенгаш солдим. У узоқ ўйлаб турмай, эртаси кунга менинг томонимдан совчи бўлиб кампирнинг олдига бормоқчи бўлди. Лекин бутун туни билан кўзимга уйқу келмай, тиканга оғнаган каби азобланар эдим ва сустлигим учун ўз-ўзимни сўкар эдим...»

Уста Олим ҳикоясини бу ерга етказгач, шамнинг сўхтасини миқрозилади ва оғзини пойлаб турувчи Отабекдан «зериқмадингизми?» деб сўраб олиб, давом этди:

«Совчини юбориб тинчий олмадим, ишга қўлим бормас ва бир жойда тўхтаб туролмас, у ердан туриб, бу ерга ўлтирас, минг турли хаёл билан довдир сифатига кирган эдим. Юборган кишим тезда қайта бермагач, бир-икки бора Саодатлар эшиги ёнига бориб келдим. Ниҳоят, миям шишиб Саодатнинг уйи яқинида бўлган бир ёнгоқнинг соясида бекиниб турган эдим, совчим чиқиб қолди-ку: юрагим орқамга тортиб кетди ва олдинга тушиб юрий бердим, чунки совчига учрашиб ҳақиқатни эшлиши ҳам менга душвор келган эди.

— Шошма, шошма, ҳой куёв! — деди совчим. Ҳа-

зилманд бўлгани учун ишнинг чаппа кетганига ишонган, унинг бу «куёв» деган сўзини кинояга йўйған эдим, кета бердим. У орқамдан тез юриб етди:

— Қани, тўнни еш! — деди ва тўнимни ўзига торта бошлади.

— Юрагим ёрилишга етди, ҳазиллашма! — дедим.

Ҳақиқатан сўзи чин экан, оғзидан ўпдим. Жиқ тўлган кўз ёшимдан ҳам уялиб турмадим. Совчим йўл бўйлаб кампир билан бўлган ҳикоясини сўзлаб кетди: Саодатга бир йилдан бери ҳар кун деярли совчилар қатнар, кампир ҳаммасига ҳам боши боғлиқ, деб жавоб бериб келар экан. Шунинг баробарида менинг оғзимни пойлар, ёки киши кўйишимни кутар экан. Ниҳоят, бир тарафини чин ва бир тарафини сўз олиш муддаоси билан кечаги сўзни менга айтган ва шунга қараб иш қилмоқчи бўлган. Узун сўзниң қисқаси, кампирнинг жавоби: бир қизим эмас, юз қизим бўлганда ҳам уста Олимга назир тордим — бўлибdir.

Теримга сиғмас эдим, икки йиллик юрак дардим ниҳоят ҳозиқини топган эди. Бир неча кун уялиб кампирнинг олдига бормай юрган эдим, ўғли орқали йўқлатди. Бордим. Лекин боришимдаги сезгиларимни сизга бу тил билан тушунтиrolмайман. Мен борлиқ-йўқлиқ эшиқдан кирганимда, Саодат кир ёяр эди. Мени кўргач, қизариниб кетди ва ёйилган кир ортига яширинар экан, шаҳло кўзларидаги сезилар-сезилмас табассумнинг фарқига бордим.

Кампир билан уялишибгина тўй тўғриларини сўзлашдик. Кампир ортиқча такаллуфлар қилишга йўл қўймаса ҳам, аммо ўзим Саодатнинг кўнгли ўксимасин учун тўйни катта қилишга тарафдор эдим. Кампир билан тўй ва никоҳ кунларини муқим қилгач, мен кетишга турдим. Саодат кир ёнида менга бир кўрингандан сўнг, қайтиб кўринмаган эди, аммо мен бўлсан яна уни бир кўрмакчи ва ўзига бир-икки оғиз сўз айтмакчи эдим. Ўчоқбошида қозон ювар экан, тўғри олдига юриб бордим. У мени сезмадими, ёки сезса ҳам билмаганга солиндими, ҳайтовур орқаси ўгуруғлик энгашган ҳолда ишига машғул эди. Бир ўрим бўлиб тушган узун қўнгир сочи унинг ҳаракати билан қўлтиғи остида ўйноқлар эди. Анчагина орқасидан томоша қилиб тургач:

— Саодат! — дедим. Қаради. Ўчоқда ёнган олов иссиғиданми, ёки уятиданми унинг юзи қип-қизил олма

Эди. Қўлидаги сочиғи билан олдимга яқин келиб тўхтади.

— Эшитдингми? — дедим. Ерга қаради. Уни ортиқча уялтирмас учун эшикка қараб юрий бошладим-да, «майлими?» деб сўрадим. Жавоб ўрнига: «Ош емай кетасизми!» — деди. Бу унинг иккинчи турли қилиб айтилган «майли» жавоби эди. Бир бугина эмас, қирқ йиллик қадрдан хотин томонидан эрига қилинадиган меҳрибончиликнинг энг лаззатлиси эди. Чиқар эканман, «Ош емай кетасизми!» сўзининг кайфига тамом маст бўлган эдим».

Уста Олим шу сўнгти сўзларини айтиб битирар экан, Отабекнинг қошлари чимирилиб, гўё ўзининг ҳам шу йўсин хотираларининг абадий қайтиб келмаслик — йўқликка чиққанлигини яна бир карра англар эди. Уста Олим давом этди:

«Ўн кун орасида ҳозирликни битириб тўй қилдик. Нихоят, Саодат меники бўлиб, саодатли кунларим бошланди, Саодатга бўлган муҳаббатим бир даража сизга маълум бўлганликдан у кунлардаги масъулиятимни ҳам шу ўлчовга солиб била оласиз.

Рафиқам Саодат чин саида¹ эди. Бу йил ўзимга кутмаган даражада бир куч ва истиқомат орттириб, тўй билан тугалган бойлигимни қайтарган эдим. Туришга Саодатлар уйи ортиқ торлиқ қила бошлаганликдан шу ҳовлини (Жаннат опа ҳовлисига ишора қилиб) ҳозирги қўшнимиздан сотиб олишга муваффақ ҳам бўлдим. Қайин онам, қайнам ва эру хотин шу ҳовлига кўчиб келиб тура бошладик. Кундан-кунга Саодатга бўлган муҳаббатим ошгандек, касбим ҳам унумли бўла бошлаган, уйланишимнинг иккинчи йили ҳалиги қўшнимиздан ўзингиз кўрган боқчани ҳам сотиб олган эдим. Уйланишимнинг учинчи йили Саодат юклик бўлди. Эру хотин биримиз ота ва биримиз она бўлмогимизни ўйлаб қувонар эдик. Кечалари ётиб уйқумиз келмас эди. Нихоят Саодатнинг ой-куни яқинлашди... — Уста Олим узоқ тин олишдан сўнг давом этди, — ...яқинлашди... лекин абадий баҳтисизлик кунларим, манҳус² соатларим ҳам яқинлашди...» — деди ва сўздан тўхтади.

— Давом қилингиз,— деди Отабек, уста Олим бир уфлаб олгач:

¹ Сайд — баҳтиёр, кутли, баҳтли.

² Манҳус — иши юришмаган, иши олдинга босмаган.

— Саодат боладан қийналиб уч кунгача азобләндида, тўртинчи куни ўлди,— деди.

Отабекнинг кайфи тарқагандек бўлиб, кўзларини зўрайтириб очди ва ўзини ёстиқдан олиб ўтиргач, сўради:

— Ўлди?

Уста Олим кўз ёшини артиб:

— Ўлди! — деди ва давом этди,— дунёга келиб кўрган бирдан-бир қувончимдан айрилган эдим. Ҳаётнинг ҳамма умримга кифоя қиларлик мудҳиш зарбасини шодлик ичидা қаршилаган эдим... Ойлар бўйича кўз ёшимни ёмғир каби тўқдим, чунки менга бундан бошқа бир овунчоқ қолмаган эди. Кўз ёшларимнинг тийилмаганини кўрган қайин онам Саодатнинг вафотини иккинчи йили мени зўрлаб уйлантирди. Лекин бу иккинчи хотин менга Саодат бўлолмади. Ҳақиқатан саодатим кўмилган эди. Кейинги йилларда футурдан кета бошлаган қайин онам қизидан йигирма ой сўнг, ўн бир ёшлик ўғлини менга ташлаб дунёдан ўтди. Қайин онамнинг вафотидан сўнг, бойлик ўз қўлига қолган кейинги хотиним фоҳш суратда рўзгоримни тўзита бошлади. Ўғирлика ва тўғриликча қиморбоз акасига инъом қилишга киришди. Кундан-кунга ишим кейин кетиб, ишлаганим рўзгорга учурвоқ ҳам бўлмай бошлади. Ёмон хотиннинг шум қадами билан уйимдан барака кўтарилганлиги ва барча баракаларимни рафиқам Саодат билан бирга кўмилганлигини англаб, кейинги хотинимни талоқ қилдим. Энди учинчи йилдирки, хотинсиз яшайман ва уйланишни ҳам ўйлаб кўрмайман. Чунки марҳума Саодат билан кечирган кунларимнинг тотли хотиралари менга абадий лаззат бағишилаганларидек, ҳам аччиғ-аччиғ йиглатадилар. Уйланишимга кенгаш берувчи ўртоқларга: «Мен энди дунёдан ўтган киши, букун бўлмаса эртага ёр қабри устида ёнган шамда ўзини ҳалок қилувчи бир парвона»,— дейман.

Эндики ўлаганим фақат қайнимни уйлантириш, сўнгра... сўнгра, юзни ёруғ қилиб Саодат қучогига кириш...— деди ва дармонсизланган каби ёстиққа ёнбошлади. Устанинг бу сўнгти сўзи Отабекни ортиқ асарлантирган, кўз чуқури бир-икки қайта ёш суви билан тўлиб чиққан эди.

Иккиси ҳам узоқ жим қолдилар. Отабек ўз қайғуси-

ни бутунлай, деярли унугиб қўйган, қаршисидаги ерга сингибгина ётган мужассам ишқдан кўз узолмай бошлади. Устанинг мозийсида эмас, ҳолида улуғ бир маъно кўрар эди. Аммо унинг истиқболида бир бўшлиқдан ўзга ҳеч гап учратса олмаса-да, яна улуғ бир маъно кўргандек бўлар эди. Ўз истиқболини ҳам шу устанини қабилидан кўрмакчи бўлса-да, бунинг учун бир нарса камдек, етишмагандек келар, иккинчи уста Олим бўлиш учун бир «ўлди» сўзинигина орадан тополмас эди. Кейинроқ бу «ўлди» сўзини қўшган билан ҳам уста Олим бўлиш қийинлигини англай бошлади, чунки Отабек Кумуш томонидан сўклилган ва ташланган эди. Ҳолбуки, Саодат сўкмаган ва ташламаган, балки эрининг бир гуноҳи сабабидан ёш умрини хазон қилган ва уста Олим қайнотини отаси томонидан ҳайвонча қувланмаган... ва қайнотини отаси томонидан куёв йўлига тузоқ қўйилиб, Саодатни чиқариб олиш фикрига тушйлмаган, яъни орага шайтанат ораламаган... Бу сўнгти фикрни у ўйламаган жойдан илҳом қабилидан тўқиб олган эди, яъни ўзининг Тошкентдан уйланишига қутидор томонидан розилик берилишини, ҳатто унинг тўйини ўз қўли билан ўтказиб келишини илгаридан ҳозирланиб келинган тузоқ деб тушунган эди. Муҳокамаси шу ергача келиб етгач, уста Олим даражасига етиши учун ўзида ҳеч бир муносабат кўрмади... Уста Олим ёзиг берган ўринга кириб ётар экан, ўз-ўзига айтар эди: «қувланишга, таҳқир этилишига лойиқ кўрилган Отабек, уста Олим бўлишга ҳам сазовор эмас!» У уйқуга кетар экан, юраги болаларини учирив кетган каррукнинг уясидек бўм-бўш эди...

Отабек эртаги номозга турганда кўзи Шамшодбекнинг базмидан аzonда қайтиб келиб, донг қотиб ухлаб ётган Сайфига тушди. Ўн беш ёшлар чамасида бўлган бу йигит ўзининг ўткир ҳусни билан Саодатдан хабар берар эди.

Отабек бир-икки пиёла чой ичган бўлди-да, уста Олим билан хайрлашди.

9

УНУТОЛМАСА НИМА ҚИЛСИН..

Бу гал Отабекнинг кутилмаган равишда Марғилондан тез қайтиб келишини Ўзбек ойим ўзининг жуҳуд домладан қилдирган жодусининг ҳинд сехрини

енгтанлиги, деб севинган эди. Бироқ Отабекнинг кўпинча меҳмонхонада ётиб қолиши уни бу тўғрида шубҳага тушириб қўйган ва бунда қандай ҳикмат борлигини бевосита билиб олиш учун бирорта ромчи домлага бориш фикрига тушган эди. Юсуфбек ҳожининг бўлса бундай майда ишларни текшириб юриш учун фурсати ҳам йўқ, унинг Нормуҳаммад қушбеги ёнидан бўшаган вақти понсад ва бекларни кида кенгаш ва зиёфатлар билан тугалар эди. Унинг диққатини жалб этган нарса бўлса, у ҳам Отабекнинг тадбирсиз сиёsat ва аҳмоқ бошлиқлар мавзуидан олиб қиладиган шикоят ва ҳасратини кейинги кунларда жимжит бўлиб кетганлиги эди. Бу кунларда Отабекка энг яқин турган киши Ҳасанали ота эди. Чунки Отабек бу кейинги кунларини меҳмонхонада ўтказганликдан Ҳасаналига ҳам унинг ёнига киришга ва бирмунча сўзлашиб ўтиришга тўғри кела бошлаган эди. Шунинг учун Отабекнинг қайғули ҳоллари, уйқусиз мутолаада ўтган тунлари ва умуман ундаги ўзгаришлар Ҳасаналини ўйлатса-да, сабабини сўрашга ботирлиги етмас ва сўрашни ҳам фойдасиз билар эди. Чунки у Отабекдаги бу ҳолларнинг сирини билгандек, муҳаббати орасига чўп бўлиб тушган кейинги уйланishi аламидан деб қарор қўйган эди.

Отабекнинг орзули келин олдига кирмаслиги важидан Ўзбек ойим аччиғланди, ниҳоят аччиғига чидай олмаган бир куни меҳмонхонада Отабек ётар ўрнини ёзиб турган чокда кириб келди ва ёзилган ўрнини бузиб йиғиб ташлади:

— Меҳмонхонада ёта бериб нима қиласан, ичкарига кириб ёт! — деб жеркиди. Лекин ўғли энди илгариги Отабек эмас эди, онасининг жеркувига қулоқ солмади-да, қайтадан ўрнини ёза бошлади. Ўзбек ойимнинг ғазаби тағин ҳам аланга олди:

— Сўзимни эшитасанми, кар?

Отабек совуққина қилиб жавоб берди:

— Кар эмасман, лекин сизнинг бу таклифингиз олдида ҳам кар, ҳам кўрман. Бу тўғрида сиз энди ортиқча бош оғритманг!

— Инсофсиз,adolatsiz!

Отабек заҳарханда билан сўради:

— Мен бошда сизга нима деган эдим?

— Нима деган эдинг?

— Келинингиз мендан яхшилик кўрмас, демаганими эдим? Сиз билан отам бунга кўнмаганими эдингиз, сиз буни инкор қиласизми?

— Ота-онамдан ваъда олганиман деб, шундай хотинга жабр қилиб юра берасанми?

— Келинингизга жабрни хоҳламасангиз ва ўзингиз айтган инсофга қайтсангиз энг осон бир йўл бор,— деди ва онасидан маълум «нима?» деб бериладиган савонни кутиб тўхтади, аммо Ўзбек ойим сўроқ ўрнига лабини тишлаб бошини икки елкасига тебратди.— Сиз сўрашни тиламасангиз-да, мен айтай: келинингизга жабрни хоҳламасангиз мендан талоқ қилдирингиз ва бир бечорага бу йўсин азоб бериб юрмангиз! — деди ва бир оз тўхтаб давом этди.— Сиз билган инсофни мен ҳам биламан. Бир бечорани фақат сизнинг кайфингиз учун азоб эмас, чеккан хўрлигини ўйлаб ҳар куни бир қат этдан тушаман... Агар ўз кайфингиздан кечсангиз яхши билингизки, бир эмас, икки жонни азобдан қутқарган бўласиз, онажон! — деди. Ўзбек ойим ўғлиниң бунчалик қатъий кетишини кутмаган эди ва бу йўсин қаттиқ муомалани-да Отабекдан биринчи мартаба кўтар ғандарни тополадими ва ё жанжалнинг улғайишидан қўрқдими, ҳайтовур узоққина истеҳзоланиб қараб тургач, «эсингни ебсан, болам!» деди-да, меҳмонхонадан чиқди.

Отабек ёлғиз меҳмонхонада ётиб кун кечириш билангина қолмади. Кечалари аллақаёқларга кетиб йўқоладиган одатлар ҳам чиқарди ва бир-икки қайта ортиқча маст бўлган ҳолда қайтиб, Ҳасаналини тамом ҳайратда қолдирди. У Отабекка насиҳат қилишни ҳам билмас ва бу сирни бирорвга айтиш учун ҳам ҳайрон эди.

Бир кун кечаси у янги одати бўйича аллақаёққа кетган эди. Ҳасаналининг кўнгли бугун ҳам бир ишга гувоҳлик бергандек бўлиб, ичкарида ётгуси келмади. Ўрнини меҳмонхонага ёзиб, дарбозани занжирлаб келди. Агар бугун ҳам у ўша ҳолда қайтса, бир нарса демакчи, яъни қўлидан келган насиҳатини қилмоқчи эди. Ухламай кутиб ўтириди. Аммо у тунги соат ўн бир бўлса ҳам келмас, ўн иккida ҳам дараксиз эди. Ниҳоят, кута-кута уйқуси танг қилгач, ўрнига чўзилиб кипрагини кипрагига улаб ётди ва ухлаб кетганини ўзи ҳам сезмай қолди. Орадан номаълум муддат ўтиб дар-

бозанинг сўнақайсиз тақиллашидан чўчиб уйғонди ва йўлакка юурди. Қоронғуда занжирни тимискилар экан, «ким?» деб сўради ва жавобига «мммман» деган сархуш товушни эшилди. Бу товуш унинг юрагини ўюштириб юборган ва «бу кун ҳам шунаقا» деган сўзни кўнглидан ўтказган эди. Занжирни тушириб дарбозанинг бир табақасини очиши ҳамона шу табақага суюлиб турган Отабек Ҳасаналининг оёғи остига йиқилиб тушди. Ҳасанали бу кунги кайфнинг ўтча кетганилигини пайқаган, йўлакни тутиб кетган ичклик исидан ўқчиёзган эди. Отабекни суюб меҳмонхонага келтирап экан, икки кўзи ичкари ҳовлининг эшигида, чунки Юсуфбек ҳожининг тунлари ташқарига чиқадиган одатининг шу вақтга тўғри келиб қолишидан юраги така-пука эди. Отабекни ечинтирап экан, ризосиз бир оҳангда деди:

— Ўғлим, сизга шу шайтоний ишнинг нима зарурати бор!

Отабек мастрларча кулди:

— Ммменга зарурати бўлмаса, кккимга бор?!

— Нима бўлганда ҳам мен бу ишингиздан рози олмасман! — деди Ҳасанали ва қандай жавоб эшитишини кутиб турди. Отабек ўрнига ётиб олгач, кучли қилиб бир уфлаб олди. Ҳасанали ундан жавоб кутар экан, бир оздан сўнг жавоб ўрнига хуррак товушини эшилди... Отабекнинг кутилмаганда бу янглиғ ярамас кўчаларга кириб кетишига ҳеч бир турли маъно беролмай боши қотса ҳам, аммо, унинг кўз ўнгидан игнага зўрлаб тақилган иш нарига кетмас эди. Ундан сўнг икки ойлардан бери Марғилонни тилга олмаслик-да уни бир оз шубҳага тушириб, «ораларидан бирор совуқчилик ўтдимикан» деб ҳам кўнглидан кечирди. Отабек билан бирга чой ичиш мақсадида, эрталаб Ойбодоқнинг дамлаган чойига бормай, Отабекнинг уйғонишини кутиб юрди. Отабек тушга яқин уйғонгач, Ҳасанали чой ҳозирлади. Дастурхон ёзиб кутиб ўтирган Ҳасанали ёнига қисилиб-қимтиниб Отабек келди. Тундаги ҳоли эсига тушиб бўлса керак, бошини ердан кўтариб Ҳасаналига қарамас ва бир оғиз бўлсин сўз айтмас эди. Отабекнинг бу ҳоли Ҳасаналининг ингичка юрагига қаттиқ таъсир этган ва ўйлаб қўйган насиҳатларини унугиб, бекни бу оғир ҳолдан қутқазиш фикригагина тушган эди.

— Ёшлик — бебошлиқ, деган экан машойихлар,— деб кулиб қўйди Ҳасанали ва,— уй ичидан битта-яримтаси сезиб қолмасин, деб жуда хавотирда бўлдим... Ҳайтовур ҳеч ким пайқамабди,— деди. Отабек ташаккур этгансимон Ҳасаналига кулиб қаради ва ўзининг бу кетишидан ризосизлик билдирган каби энтикиб тин олди. Ҳасанали сўзни уринтириб Отабекни ўз ҳолига қўймас эди. Унар-унмасдан баҳс қилиб, ниҳоят бу унар-унмаснинг охирига шу саволни ҳам улаб юборди:

— Бу гал Марғилонга кечикдингизми?

Биз юқорида ҳам туртиб ўтган эдикки, Отабек на Юсуфбек ҳожига, на Ўзбек ойимга ва на Ҳасаналига Марғилондан тез қайтиб келиш сабабини айтмаган. Марғилон билан узил-кесил алоқаси узилганлигини чурқ этиб сўзламаган, сўралмаган сўзга жавоб берилмас қабилидан, жимжит аламини ичкилиқдан олибгина юрган эди. Икки ойдан бери биринчи мартаба Марғилон тўғрисида сўралган савол ҳам фақат шу Ҳасаналининг кейинги сўзи бўлиб, сирни очиш ўнқови-да келгандек эди. Лекин жавоб тамом ҳақиқатга муғойир¹ ва кишини ҳайратга соларлик бўлди:

— Бугун жўнамоқчи бўлиб турибман! — деди.

Ҳасаналининг шубҳаси бўшга чиқди. Чойдан сўнг у ўзининг сўзини амалда кўрсатиб, отасидан ҳам рухсат олиб қўйди ва пешиндан кейин йўлга чиқиш учун ҳозирлик ҳам кўра бошлади. Унинг сирини билувчи ва «энди Марғилонда нима қиласан?» деб сўрагувчи орада бўлмагандек, у бу сўроқни ўз-ўзига ҳам бериб қарамаган, гўё бурунгидек Марғилон йўлига ошиқиб ҳозирланар эди...

Йигирма кун ўтар-ўтмас Марғилондан қайтиб келди. Бу борищдан бирор иш чиқара олдими, йўқми бу тўғрини биз келаси фаслларнинг бирида ўрганармиз.

Келиб Тошкентда бир ҳафта чамаси турди, сўнгра ёнига Ҳасаналини олиб Оқмасжи² шаҳрига жўнади. У икки йилдан бери тўхтаб қолган савдогарчилик ишини қайтадан бошламоқчи эди...

¹ Муғойир — қарама-қарши.

² Оқмасжид — Қизил Үрда.

Гайри машруъ талоқ хати текканига олти ойларча фурсат ўтиб кетган эди. Кумушнинг гўзаллик таърифини гойибона эшитиб, оғзининг суви келувчи хотинли ва хотинсиз орзумандлар «ётиб қолгунча, отиб қол!» сўзига амал қилиб, қутидорникига совчиларини турна қатор юбора бошлаган эдилар.

Албатта, бунда шубҳа йўқдирким, Кумушнинг эрдан чиққан хабарини Кумушнинг ўзидан ҳам илгари тушунган ва Отабекдан ҳам илгари сезган Ҳомиднинг совчиси бошқа совчиларнинг муқаддимаси, ёз бошида келадиган қалдирғочларнинг йўлбошчиси эди. Ҳомиднинг совчиси бир мартаба келиш билангина қаноатланмади; уч-тўрт қайталаб келиб қутидорга Ҳомиднинг куёв ўғил бўлиш ниятида эканлигини арзу ниёз қила бошлади. Натижада Ҳомидбойнинг совчисига берилган жавоб шу бўлди: «Биз Ҳомидбойни ўзимизга куёв ўғил қилишдан ҳеч бир монелик кўрмаймиз. Аммо қизимиз бундан сўнг эр қиласликка қаттиғ исрор этадир. Шунга кўра Ҳомидбой бизни кечирсин!» Бошқа совчиларга ҳам жавоб шу эди. Қутидор билан Офтоб ойманинг бу жавоблари ўзларича эмас, балки Кумушнинг кўнглига қараб берилар эди.

Бироқ Кумушбибининг: «Мен энди эр қилиб бўлдим. Бундан сўнг эрга эҳтиёжим йўқ!» деган қатъий жавобига улар узоқ қулоқ солиб турмадилар, чунки унинг бу исрорини «чидамаснинг сўзи» деб англар ва тузукроқ жой чиққанда, эрга беришга ҳам ҳисоблари йўқ эмас эди. Шунга кўра, келган совчиларнинг ўзларига ёқмаганига гуноҳнинг барини Кумушнинг бўйнига ағдариб жавоб берар, аммо иккинчи ёқдан тузукроқ жойни кўзлар эдилар.

Кутимаган ерда шаҳарнинг энг олдинги аъён ва сарватдорларидан бўлган Салим шарбатдор деганинг Комилбек исмли ўғлидан совчилар келиб қолди.

Ота-онанинг кутганлари шундай тегу тахтлик куёв бўлгани учун биринчи мартаба совчиларни яхши сўзлар ва қуюқ-суюқ ошилар билан жўнатиб, иккинчи келишига ўйлашиб жавоб берадиган бўлдилар. Эру хотин узоқ ўйлашиб турмай (чунки ўйлашадиган жой эмас эди!) совчининг иккинчи келишида жавоб берини-

га қарор қўйдилар. Кумушнинг қарши тушмаги тўғрисида, албатта, уларнинг шубҳалари йўқ эди. Шунинг билан бирга ота-онанинг сўзини ерда қолдиради, деб ҳам ўйламас эдилар.

* * *

Куз кунларининг оёги ва қиши кунларининг боши эди. Дараҳтлардаги сариқ барглар тўқилиб тугалған, ер юзи ўзининг қишики сариқ кийимини кийган эди. Тўрт томонининг ўралганлиги соясида япроқларини тўқилишдан сақлаб қолган бу голос ёғочлари ҳам бу кун тунги қора совуққа чидоммай елнинг озгинча ҳаракати билан-да баргларини ширт-ширт узиб ташламоқда эдилар. Ҳаво очиқ бўлиб, қуёш тузуккина кўтарған, аммо унинг ҳам бу кун унча таъсири йўқ, бу кунги қора совуқ қуёш кучини-да кесган эди.

Ўрта эшикдан Кумушбиби кўринди. Бурунги тўлалиги кетиб, озгинланган ва лекин бу озгинлик унинг ҳуснига камчилик бермай, билъакс юқорилатған. Камон қошлиари ортиқ мавж уриб ўзини кўрсатган, бир оз бота тушган шаҳло кўзлар тағин ҳам тим қоралик, тағин ҳам нурлилик касб этган эдилар. Бу кунги совуқка қарши кийиб олган совсар пўстинининг ёқалиги кишининг ҳасадини орттириб нафис бағбақаларини ўпидётар эдилар. Бироқ унда бир камчилик бордек кўринар эди: шаҳло кўзлар бурунгидек ўйнаб турмас ва сўнг чекидаги бир оғирлик билан ҳаракатланар эди. Бир томондан қараганда оғирлиқ-да унга бир олийлик, улуғворлик бояшилангандек. Кумуш келиб айвон муйишига ўтириди-да, кўзларини оғиргина ҳаракатлантириб кетма-кет чип-чип этиб тўқилмақда бўлган ҳазонларга қаради ва ҳар бир япроқни юқоридан кузатиб ерга қўя борди. У ерга тушган ҳар бир япроқда ўзининг таржимаи ҳолини ўқир, ўзини-да мавқидан айрилиб, ҳечга чиқиб турган шу ҳазонлардан айира билмас эди. Айира билмади-да, латиф кўкрагини тўрт энлик кўтариб тин олди ва кўзлари жиқ ёшга тўлди. Енг ичидан бир-бисисига ўтқизилган икки қўлинини баробар кўтариб кўз ёшини артар экан, ичкари ҳовлидан Офтоб ойим чиқиб келар эди. У ер остидан қизига кўз қирини ташлаб меҳмонхона эшигини очишга тутинди. Офтоб ойимнинг орқасидан Ойша буви ҳам кўринди, келиб Кумуш ёнида тўхтаб сўради:

- Нима қилиб ташқарида ўлтирибсан?
- Ўзим,— деди Кумуш қошларини чимириб, четга юзини ўгирди.
- Меҳмонхонага кирсанг, сен билан икки оғиз маслаҳатимиз бор эди.
- Нима маслаҳатингиз бор?
- Олдин кир, болам,— деди кампир ва Кумушнинг елкасига қоқиб турғизди. Улар ичкаридаги совчи хотинларни ёлғиз қолдириб, Кумушнинг сўзини олиш учун ташқарига чиққан эдилар. Аммо Кумуш бўлса совчиларнинг олдидан ризосизлигини англатгандек бир намойиш билан кетган эди. У меҳмонхонага киргандан сўнг ҳам терсайиб токчалардан недир ахтаргандек юрина бошлади.
- Токчада сен қидирган нарса йўқ, келиб ёнимизга ўтири! — деди Офтоб ойим.
- Ўтирганимдан сизга бир пуллик фойда йўқ, совчингизга ўзингиз билган жавобни бераверинг!
- Ойша буви қизига маънолик қилиб бир қараб олди:
- Болам, ахир икки оғиз гап эшишт-чи олдин! — деди.
- Кумуш ўтира бермагач, Офтоб ойим қизишиди:
- Қизим, сенинг бу қаршилигингдан муддаонг нима?!
- Сиз билан отамга муддаомни неча қайталаб айтдим-ку: бундан сўнг бу ишни хоҳламайман.
- Дунёдан тоқ ўтасанми?
- Тоқ ўтаманми, йўқми, буни тангри биладир.
- Мен сенинг ҳали ҳам ўша уятсиз эрингдан кўнгил узолмаганингни биламан. Сенинг бу хомтамалигинг кони болалигингдадир. Сен яхши билки, бундан сўнг отанг у уятсизга ўз уйидан жой бермаганидек, уятсизнинг ўзи ҳам узил-кесил сени ташлагандир. Агар сўзимга ишонмасанг, мана буни ўқиб қара,— деди-да, Кумушга бир қоғоз узатди ва давом этди.— Биз буни сен унга хат ёзгандан сўнг жавоб ўрнида олган эдик. Бироқ ўша вақтда бу уятсизнинг биринчи талоқ хатиси ҳам сенга етиб ортганликдан бунисини сендан яширган эдик. Ҳамон-да сенинг умидинг кесилмагани учун бу хатни ҳам кўрсатмакчи бўлдим! — деди. Кумуш қоғозни онасидан олди:
- «Мўталақа¹ Кумушбибига. Менинг биринчи хатим

¹ Мўталақа — талоқ, хати берилган.

билингизнинг менга қиладиган эркаликларингизга бир чек қўйилган каби эди. Лекин бунга тушумбасизми ва ё тушунишга тиламабсизми, ҳайтовур яна ҳам эски эркаликларингизни тарқ этмабсиз. Хатингизни ўқир эканман, ўзимни кулгидан тўхтатолмас эдим. Орзуга айб йўқ, дейдилар. Чекдан ошиб қилган ҳужумларингиз эски қадрдонлигинги отига кечириладир. Эндиликда сизга мендек вафосиз ва ҳийлагар бўлмаган янги эр топилгай эди, деб аддои Отабек Юсуфбек ҳожи ӯғли. 26 жавзо 1265 йил, Тошкент.»

Мактуб унинг юрак жароҳатини қайтадан тирнаб ташлаган эди. Кўз ёшини дув-дув тўкиб, хатни ўз тахига солди ва ўзидан жавоб кутиб турган очаси билан онасига деди:

— Мен бу уятысиз йиртқич билан ярашмоқ учун умид тутмайман, шунинг билан бирга эр ҳам қилмайман!

— Нега? — деб сўради онаси.

— Негами? — деди Кумуш ва йиғлаган куйи жавоб берса бошлади.— Негаки мен ўзимнинг севган ва муҳаббат қўйган эримдан бунча уятысизлик, бу янглир вафосизлик кўрдим. Энди эр деган шу бўлибдими? Бундан кўра дунёда тоқ ўтган яхшироқ, ёлғиз юрган тинчроқдир. Шунинг учун қизингизга эр отидан сўзламанг-да, япроқ каби титрайдиган юрагига даҳшат ҳам солманг!

Бу сўздан сўнг Офтоб ойимнинг оналиқ кўнгли эриб кетган, ичкарида жавоб кутиб ўтирувчи совчиларга қандай баҳона топиб киришини-да ўйлаб ўтирмаган эди:

— Йиғлама! — деди. Кумушни меҳмонхонада қолдириб онаси билан чиқди.

* * *

Салим шарбатдорники қутидорга ниҳоятда маъқул тушиб қолган эди. Шунинг учун хотини ва қизидан сўраб ўтирмай бир кун дўконидан эркак совчилар билан битишиб ҳам келди ва хотинига «мен бу кун фотиҳа қилиб келдим, нима бўлганда ҳам энди қизингни кўндирамасанг бўлмайдир», деди. Аммо Офтоб ойимнинг — эр отини эшитганда титрай бошлайдиган қизи билан учрашмоқча асло тоқати йўқ, эрининг бу сўзини эшитганда тамом ўзини йўқотган эди. У қизини кўндириш учун қутидорга ваъда берганда, ўз ҳолини икки ёқдан ўқтанилган ханжар орасида қолгувчига ўхша-

тар, қайси томонга қимиirlаса ҳам мұхлиқ¹ яра олишини аниқ билар эди. Шу кундан сүнг бечора онанинг оғир кунлари бошланди. Эрига берган ваъдасини асло бажара билмас, бу ҳақда қизига оғиз очиб сўзлай олмас эди. Ҳар кун бозордан қайтиб келиб биринчи сўзи «кўндиридингми?» бўлиб қолган эридан туни билан койиш эшитар ва кундузлари Кумушга оғиз очишга юраксина олмай азобланар эди.

Бир неча кун сўнг қутидор ҳам энди ўз хатосини англаган, чунки ҳар кун деярли Салим шарбатдорникидан келиб тўй кунини сўрагувчи кишига турли-турли баҳоналар айта бериб зериккан ва уятидан дўконига тушишнида тарқ қилиш фикрига келаёзган эди. Бир кун дўкондан ниҳоятда аччиғланиб қайтди ва Офтоб ойимни умрида эшитмаган сўкишлар билан сўқди: «Қизингни деб шаҳарда бош кўтариб юролмайдиган бўлдим. Кўндирисанг-кўндири, бўлмаса мендан умидингни уз, мен энди сенларнинг дастингдан шаҳардан қочиб кетмасам бўлмайдирган даражага етдим!» — деди. Эртаси кун бечора она қизига машъум мавзудан сўз очишга мажбур бўлди. Қизининг ёнига ўтириб, сўзлаш ўрнига юм-юм йиглай бошлади. Кумуш эса онасини бу ҳолга солган сирдан воқиф, шунинг учун йиги сабабини сўраб ўтирамай, у ҳам кўз ёшиси билан юзини ювмакка тутинди. Она-бала узоқ йиглашдилар, кўз ёшлари битгунча бўзлашдилар.

— Бу кунлардан кўра, дунёга келмаган бўлсам эди. Бу тириклигимдан кўра, ўлиб кетган бўлсам эди! — деди охирида Офтоб ойим.

— Янглиш сўзлайсиз, онажон,— деди Кумуш ва,— сиз дунёда туришга лойиқ эдингиз, лекин сизнинг дунёдан тўйишингизга ва қон-қон йиглашнингизга сабабчи мен бўлдим. Мен сиёҳ баҳт дунёга келмаган бўлсам эди, сизга мунчалик кулфатлар, мунчалик андуҳлар² йўқ эди. Шунинг учун сиз тангридан сўрангки, тезроқ мен машъумани маҳв³ этиб, сизга уч-тўрт кун тинчлик берсин, онажон! Сизни бу ҳолда кўришга ва ўз тилагим йўлида сизни қурбон этишга ортиқ тоқатим битди... Ташландиқ бу қизингиз, қўлма-қўл юрувчи бу

¹ Мұхлиқ — ҳалок қилювчи.

² Андуҳ — ғам, қайгу.

³ Маҳв — йўқ қилимоқ.

ўйинчоқ қизингиз киму, сиздек бир меҳрибон онани қон йиглатиши ким? Йигламангиз она, сизнинг тўкиб келган кўз ёшларингизнинг бир томчисига ҳам бу ташландиқ қизингиз арзимас, сиз отамга менинг ризолигимни ташвишланмай билдираверингиз! У ҳам кишилар олдида бу баҳтсиз қизининг таънасиға қолмасин. Сиз меним юзимга эзилиб қарамангиз, ўйламай-нетмай ризолигимни билдираверингиз! — деди ва юзига тўзғиб тушган сочини тўғрилаб олгач, давом этди.— Агар сиз менга ортиқ ачинсангиз ризолигимнинг бир шарти қилиб тўйни келаси кузга бўлишини айтиб ўтингиз; агарда отам баҳтсиз қизининг бу тилагини қабул этсан, бўлмаса меним бу тилагим ҳам сизнинг бир томчи кўз ёшингизга арзимас, онажон, сизнинг шодлигингиз йўлида ҳар бир оғирликларга бу баҳти қора қизингиз ризодир, онажон!

Офтоб ойим Кумушнинг бу сўзларига тўзиб туролмай, қизини бағрига босиб қучоқлади, она-бала тагин шиддатли равишда кўз ёшига кўмилдилар...

Офтоб ойимнинг қатъий исрорига биноан қутидор ҳам қизининг шартини қабул этган. Қудалар ҳам келаси қузгача кутишга ғози бўлган эдилар. Демак, келаси кузга Мирзакарим қутидор Салим шарбатдор каби бир кишига қудалашиб олгандек, Кумушбиби ҳам Отабек ўрнига Комилбекни алмаштирас эди.

11

НАВО КУЙИ

Халқимиз таъбирича, бу замонлар «мусулмонобод» бўлса-да, бироқ бу тантанали таъбирни бузиб қўядиган ишлар ҳам йўқ эмас эди. Хон мусулмон, бек мусулмон, халқ мусулмон, бунинг устига юриш-туриш ҳам мусулмонча эди. Ўғрилик қилган учун қўл кесиладир ва ё дорга осиладир. Зони билан зониялар ҳам пештоқдан ташланадирлар, ичкилик ичган учун қирқ дарра уриладир. Раис афанди мулозимларига дарра кўтартириб, номозсизларни текширар, фарзи айнни билмаганларни урдирап эди. Иш шунчалик нозик бўла туриб ҳам ўғрилар ўз тирикликлари орқасидан қолмайдилар. Эш ака билан Тош аканинг уйлари орқасидан тешилиб моллари ўгирлана берадир, пештоқдан

қопга бўғилиб ташланмоқ учун фоҳишалар ҳам етишиб турадирлар. Бутун умрида пешонаси сажда кўрмаганлар ҳам кўп, аммо фарзи айнинг бош томонидан тўрт-беш жумлани ҳар ким қийналмасдан сайрай олар эди. Кўп кишиларниң уйларида мусаллас билан бўзалар хумлаб қайнаб ётса, иккинчи томонда расмий суратда ичкилик сотиши билан тириклик қилувчилар ҳам йўқ эмас эдилар. Тошкентнинг Чуқур қишлоқ деган ерида очилган ва ҳамиша рустамнамо кишилар билан айқириб ётган бўзахоналар ҳам йўқ эмас эди.

Беш ойлаб Оқмасжид сафарида юриб келгач, Отабек тўғри шу Чуқур қишлоқ бўзахоналаридан бирига келиб тушгандек бўлди. Уни кундуз кунлари бўзахонада учратиб бўлмаса-да, аммо бўзахонага келмаган кечаси жуда оз эди. Бўзагар Отабекни кимнинг боласи эканлигини яхши билгани учун ҳамма ишни унинг тилагига қараб қилас, у келди дегунча, оддий бўзахўрлар ёнига ўтқизмай ўзининг маҳсус ҳужрасига олиб кирад, бошқаларга бериладиган лойқа бўзадан бермай, бўзанинг гули билан меҳмон қилас эди.

Хозир ҳам у шу бўзахонада эди. Энди учинчи кувачани тугатиб, тўртинчини чақирган эди. Бўзагар кирди:

— Бўза берайми, бек? — деб сўради.

— Беринг,— деди,— машшогингизни ҳам киргизинг!

Вақт ярим кечадан ҳам оққан, кундуз кунидан бери ичишиб чарчаган хўрандалар бақиришиб-чақиришиб тарқалишган эдилар. Бўзахона тинчиган эди. Қўлмақўл юриб чарчаган машшоқ ҳам бўшаб, Отабекдан катта-катта эҳсонлар кўргани учун, вақтнинг кечлигига ҳам эътибор қилмай кирган эди. Машшоқ Отабекнинг сархуш қўлидан бир пиёла бўзани ичкач, дутори ни чертиб сўради:

— Қандай куйни чалай, бек ака?

Отабек сархуш товуш билан жиддийгина қилиб жавоб берди:

— Билсангиз, ҳайдалиш куйни чалингиз, ажралиш куйни чалингиз!

Машшоқ ажабсинган эди:

— Дунёда бундай куйлар борлигини умримда биринчи мартаба эшитаман, бек ака!

— Дунёда бундай куй йўқ деб уйлайсизми, сиз эшитмаган бўлсангиз менинг эшитганим бор... Билсангиз билган куйнгизни чалингиз!

Машшоқ дуторини созлар экан, яна ёради:

- Бу куйлар янги чиққанми?
- Янги чиққан.
- Қаерда эшилдингиз?

Отабекнинг кайфи тарқагандек бўлиб, машшоққа қаради:

— Бу куйларни Фарғонанинг Марғилонида эшилдим ..— деди.

Дуторни созлаш учун реза куйлардангина олиб турган машшоқ, Отабек кутмаган жойда «Наво»дан бошлаб юборган эди. Куйнинг бошланиши билан нақ унинг вужуди зир этиб кетгандек бўлиб кейинги пиёласини бўшатди ва ихтиёrsиз равишда дуторнинг мунгли товушига берилиди. Дутор товуши қандайдир ўзининг бир ҳасратини сўзлагандек, ҳикоя қилгандек бўлиб эшитилар эди. Йўқ, бу ҳасратни у ўз тилидан сўзламас эди — Отабек тилидан сўзлар эди... Отабекнинг кўз ўнгидан ўтган кунлари бирма-бир ўта бошладилар-да, ниҳоят «анови» хотиралари, «анови» ҳангомалари ҳам кўриниш бериб ўтдилар... Йўқ, ўтмадилар... унинг кўз ўнгига келиб тўхтадилар-да, шу кўйи тура бердилар... Дутор бу кўринишни унинг кўз ўнгига келтириб тўхтатга, бу фожиага ўзи ҳам чида буролмагандек йиғлай бошлади... Дутор қуруққина йиғламас эди, балки бутун коинотни «зир» этдириб ва ҳаста юракларни «дир» силкитиб йиғлар эди... Отабек ортиқ чида буролмади-да, рўмоли билан кўзини яшириб, йиғламоққа киришди... У кўз ёшларини тўхтатмоқчи бўлар эди, бироқ ҳозирги ихтиёр ўзида эмас эди — ҳамма ихтиёр дуторнинг ҳазин «Наво»сида, тоқатсиз йигисида эди... Дуторнинг нозик торларидан, тилсимли юракларидан чиққан «Наво» куйи ўз ноласига тушунгувчи Отабекдек йигитларга жуда муҳтоҷ эди. Ўз дардига тушунгандан бу йигитга борган сайин дардини очиб сўзлар, йиғлаб ва инграб сўзлар эди... Эшишувчи эса дунёсини унугиб йиғлар, кучини йиғишириб йиғлар ва ҳасрату аламини кўз ёпсиси билан тўкиб йиғлар эди...

Ниҳоят, «Наво» куйи унинг бутун танидаги сувларини кўзи орқали тўқдирди-да, фалакнинг тескари ҳаракатидан шикоят этиб қўйди ва дунёда ёлғиз ҳасратгина бўлмаганлигини билдиргандек ўзининг «Савт» куйини ер юзига шодлик ва севинч ёғдириб арз эта

бошлади. «Наво»нинг сеҳрли «савти» Отабекнинг кўз ёшларини қуритди-да, бир енгиллик бағишлади. «Наво» билан ювилиб кетган унинг умид гулзорида янги че-чаклар униб чиқди...

Бу ўтиришдан сўнг у бир ойлаб бўзахонага келмай кетди. Марғилондан қайтиб келгач, яна эски одатида давом эта бошлади...

Отабекнинг ўша воқиадан сўнгги Марғилон қатнашлари фақат натижасиз қуруққина бир қатнаш эди. Бу қатнашнинг ҳар бирисида уста Олимнига тушар, аммо ҳануз ундан ўзининг сирини яшириб, Андижондан қайтиб келишини ва ё боришини ва йўл устидан кўриб кетиш учун кирганини айтиб, уста Олимни миннатдор қиласр эди. У Марғилонда кўп тўхтамас, бир кун, узоққа тортилса икки-уч кун туриб қайтар, баъзи вақтларда йўл устидан «Хўжа Маъзоз» мозорини ҳам тунаб кетар эди. Унинг ўн кунлаб йўл машаққатини ўз устига олиб, Марғилонда қиладиган иши шу машаққатлар эвазига арзигулик эдими, йўқми, ўқувчи буни қўйидан англар.

Марғилондан натижасиз, тамоман бўшга қайтиб Тошкент келгач, Кумушни унутгандек бўлиб, уч-тўрт кун у-бу билан овуниб юрар, сўнгра ҳафта, ўн кундан сўнг яна Марғилон тўғрисида ўйлай бошлаб, йилаб ўйнинг тегига ета олмагач, ўзини қаёққа уришини билмай қолар, шундан сўнг ҳамма аламини Чуқур қишлоққа ҳавола қилиб, ўн-ўн беш кун босим ичганидан сўнг ичкилиқдан ҳам лаззатланмай қолар ва шунинг ёнида унинг кўнгли бир нарсанинг бўйини олгандек сезинар, гўё Марғилон борса бир гап бўладигандек, бормай қолса кейинчаликда ўзи ўкина тургандек... Шундан сўнг тўсатдан Марғилон йўлига тушиб қолар, йўлда борар экан, ўзини тўрт кўз билан кутиб тургандек сезилган Марғилонга ҳар нимадир, бир соат илгарироқ етиш учун ошиқар эди. Лекин... лекин Марғилон дарбозасидан кириши ила унинг ҳоли ўзгара бошлар, юраги қинидан чиқар даражада ўйнамоққа олур, айниқса пойафзал растасига яқинлашгач, унинг бу изтироби шиддатланур, пойафзал растасининг яқини билан бунчалик ўзгаришда қолган Отабек растанинг ўзида қандай ҳолга тушмоғини тасаввурдан ожиз келур ва раста кўринди дегунча отининг бошини чапга буриб юборар ва орқасидан кимнингдир «...борингиз,

эшигим ёнида тўхтамангиз... уятсиз!» товуши эшитилгандек бўлар эди... У ўз-ўзига «ҳақиқатан мен уятсиз!» деб қўяр ва шунинг ила ҳамма кутилган-кузатилган гаплар, беш кунлик йўл мاشаққатлари ҳавога кетар, ҳатто, хаёlda эмас, ҳақиқатда ўйлаб қўйган қайин отаси билан хотинини шариатга чақириш фикри ҳам унтилар ва йўқолур, «ҳийлагарнинг юзини қозихонада кўрайми! Ўзи ҳам қурсин, юзи ҳам!» дер эди-да, отини тўғри уста Олимникига қараб солар эди.

Отабек уста Олимни жуда юқори даражага қўйгандек, унинг мажлиси билан ҳам анча енгиллашар, ўн йиллардан бери уста Олим юрагида сақланган ва қабрга бирга кетиши кутилган ишқ тарихини қайта-қайта эшигуси кела берар, уста Олим ҳам ўзининг ўлган Саодати тўғрисидаги ипидан-игнасигача бўлган хотирадарини такрор-такрор ҳикоя қилиб, ҳикояси охирида: «пешонамга сифмади-да, ўлди!» деб қўяр, бу сўз Отабекнинг ҳам юрагига совуқ сув сепган таъсирини бериб, у ҳам кўнглидан «меним ҳам пешонамга сифмади-да, тириклайн ўлди!» деган сўзни ўтказар эди. Шу ҳолда икки-уч кун уста Олимницида тургач, энг сўнгти марта Марғилон билан хайрлашган каби шаҳарнинг ҳар бир нарсасига алвидо назари билан боқар ва боши оқкан томонга кетгандек Марғилоннинг ўнгай келган дарбозасига қараб йўл олур эди. Қўқонда биринки кун, Кировчида уч-тўрт кун, Қурама, Телов ва шунингдек қишлоқларда ҳам бир неча кунлар қўна-қўна, ниҳоят Тошкентта келиб етар, яна... яна...

Отабекнинг Марғилонга бориб келиши шу йўсинда эди. Унинг сири ўзидан бошқа ҳеч кимга маълум бўлмаганлиқдан, орада унинг ҳолига кулувчи ва ундан ҳисоб оловчи бирор ҳам йўқ, фақат у ҳамма ҳисобни ўз юрагидан олиб, ўз юрагига берар эди. Шу йўсин оромсизлик ва бесаранжомлик ичida унинг ой-кунлари ўтиб турар эди.

12

ЖОНСИЗ БИР ХАБАР ВА ҚЎРҲИНЧ БИР КЕЧ

Агар олган ҳисобимиз тўғри чиқса, бу гал унинг Марғилонга қуруқ қатнаб юришининг еттинчи қайтаси эди. 1267 йилнинг кузи — бу воқиага ўн саккиз, ўн тўқиз ойлар ўтиб кетган эди.

Эрталабки чойдан сўнг, уста Олим ўзининг қайниси билан ошхонаси ёнига янги гина қурган тўқув дўконлари ёнида ипакка охор бериш ила овора эди. Аммо у бўлса, дўконхонанинг устунига суюлган куйи қандайдир бир ўй билан машғулдек кўринар, устанинг Тошкент тўғриларида берган саволларига «шундай, ҳа, йўқ, албатта» каби қисқа жавоблар билан қарши туради. У шу куйи, ярим соатлар чамаси сўзсизлик сўнгидә, сўзсизгина кўча эшик томонига чиқиб кета бошлади, уста Олим кўзини ишидан узиб сўради:

— Йўл бўлсин, Шокирбек?

Отабек йўлак ёнидан жавоб берди:

— Шаҳарни бир айланиб келмакчиман.

— Жуда яхши,— деди уста ва,— аммо пешиндан кечга қолманг, мен ошни дамлаб сизни кутиб ўтираман, тузукми?

— Тузук,— деди Отабек ва йўлакдан ўтиб эшик олдига — кўчага чиқди. Чиқиши билан нариги эшикдан Содик ҳам кўриниб қолди-да, Отабек билан тўқнаш келди. Содик илтифотсизгина унга қараб олгач, шоша-шоша ўнгдаги тор кўчага юриб кетди. Аммо Отабек тўғрига, катта кўчага қараб юрди. Ҳаво булат эди. Оқ булатлар бўлганлиқдан қуёшнинг нури унча кесилмаган, қуёш тўр рўмол ичида ўтирган келинлар каби ер юзига сузилиб қарар эди. Булатларнинг оҳистагина сайридан сезилар-сезилмас хафиф бир шамол юриб, енгилгина бир изғириқ ҳам юзга келиб тўқинар, бу изғириқ кишига унча роҳатсизлик бермаса-да, лекин қаердадир доф қилинмоқда бўлган зигир мойининг аччиқ исини димоқقا келтириб уришидан кишида бир беҳузурлик ҳосил бўлар эди.

Отабек йўлнинг айрилишига бориб тўхтаган эди. Юзидан иккиланиш ҳолати сезилар эди. Бу ҳолат икки йўл устида воқе бўлганлиқдан англанмоғи енгил, чунки бир томонда пойафзал раастасининг йўли, иккинчи ёқда тўғри кўча эди. Узоқ тўхтаб турмай собит ва кучли одимлар билан пойафзал раастасига юрди. Гарчи бу кўча унинг юзига қизариб-оқариш ва бўзариб-сарғайиш туслари берар эди, яна ҳар ҳолда у событ қадам эди, ўша воқиадан сўнг, оналар таъбирича, «илон чиққан» бу кўчага биринчи кириши, биринчи жасорати эди. Кўчанинг бурилишида яна бир оз унинг одимлари секинлашса ҳам, лекин олдинлашини қўймай боравер-

ди. Узокдан қутидорнинг тилсимли дарбозаси кўриниб туар эди... Дарбоза ёнидаги машъум тол дараҳти ҳам номуборак бир ишга гувоҳлик берган каби бўлар эди. Борлиқ кучини асабият марказига йигиб, тағин бир қайта дарбозага қараб олди. Бу қарашида бутун ўтган кунларини яна бир қайта хотирлагандек бўлди ва ихтизозот¹ орасида уфлаб юборди. Кўринган гилос ёғочларининг остида бир вақтлар кимдир бирор уни кутиб олар эди. Энди чи... Энди кимни кутар экан? — деган савол миясини шипириб кетди... У Кужушни тамоман ўз муҳаббатида боқе деб билар ва отасининг зулмига маҳкум деб тушунар эди. Шунинг учун кўринган гилос ёғочининг куз билан саргайган баргидек Кумушнинг заъфарон юзини кўрди, ўзи учун эмас, унинг учун қалби парчалангандек бўлди. Ҳозир у кутилмаган бир жасоратга молик бўлган каби эди. Кирайми, деб ўйлади, бевосита ўзи билан англашайми, деб жасоратланди... Лекин... лекин дарбозанинг қаршисидаги машъум тол ёғочи унга қараб кулгандек бўлар эди: «Уятсизга менинг уйимдан ўрин йўқ... Борингиз, эшигим ёнида тўхтамангиз...»

У дарбозага яқинлашаёзган эди, нимадандир чўчиб четга бурилди. Чунки дарбозадан чиқиб қолган икки кишини кўриб, буларнинг бирини қайин отаси бўлноб чиқмагидан ҳурккан эди. Ҳайтовур чиқувчилар бегона одамлар бўлиб, одинга томон юра бошладилар. Бояги «уятсиз...» жумласи билан унинг кириш фикри тамоман сўнган эди. Аммо «бирорлар» тўғрисида нима бўлганда ҳам бир гап эшиитмак ҳаваси туғилган эди. Бу чиқувчилар гарчи қутидорнинг или ҳақида бўлса-да, бир маълумот берарлар-ку, деб ўйлади ва уларга етиб олиш учун одимларини кенгайтириди. Улардан уч-тўрт одим берида борар эди. Бахтга қарши, улар чурқ этмай кетар эдилар. Ниҳоят юз одимга боргандан сўнг, улардан сўз эшитишга тўғри келди; бириси иккинчисига деди:

— Тўй билан никоҳни бу кунга қилганимиз яхши бўлди.

— Нима, жувонга ҳам тўй бошқа, никоҳ бошқа бўлармиди?! Борди-келди битта жувон қизи бор-ку, мунча тўйни бошқа, никоҳни бошқа қиласиз деганига ҳайронман.

¹ Ихтизоз — титраш, қалтираш.

— Ахир қутидор ҳам бообрў одам-да,— деди биринчи киши.

Жонсиз бу хабарни эшитган Отабекнинг ҳуши бошидан учган каби бўлди-да, одим узган жойида михлангандек қотиб қолди. Гўё устидан бир чеълак қайнаған сувни ағдарган эдилар-да, бутун териси оёғига сидирилиб тушган эди... Беш дақиқалаб йўл устида эсанкираган, ҳушсизланган кўйи қотиб тургач, мосинавори бирдан юриб кетди... «Кишининг хотинини талоқсиз чиқариб ол-да, бугун эрга бер!» — деди ва телбаларча нима учундир кулиб қўйди, ўз-ўзига сўзланиб Марғилон кўчаларида тентакларча югурга бошлади. Унинг бу кунги ҳолига қарааш юракларни ёрганидек, тасвирга ҳам қалам кучи ожиздир...

* * *

Ойнинг ўн бешлари бўлса-да ҳавонинг булутлиги билан ой кўринимас, чин маъноси билан қоронгу кузнинг қоронгу бир туни эди. Бир неча юз йиллардан бери яшаб, фавқулодда зўрайиб кетган «Хўжа Маъоз» мозорининг чакалаги бу қоронгуликка бир манба каби эди. Кучли бир ел турган: қандайдир бир ишга ҳозирланган каби тўрт томонга югуриб юрар эди. Мозор чакалагининг бир бурчагида тутаб ётган тўнка ёнида сочлари ўсиб соқолига қўшилиб кетган бир девона бу мудҳиш қоронгуликқа қарши курашган каби гулхани ёндиришга тиришар, гулхан теварагидан айланиб, қўлидаги косови билан тўрт томондан кавлар эди. Ел борган сайин кучлана борди, чакалак тартибсиз ҳолга кириб кетди, битта-яримта тўкилмай қолган япроқлар шитир-шитир тўкилишга олдилар, қарға ва зогчалар айни уйқу замонида тинчсизлангани учун елга қарши намойиш қилгандек ға-ғу билан чакалак устидан айлана бошладилар. Ел кучайгандан кучайиб борар ва шу нисбатда мозор ичи ҳам яна бир қат қўрқинч ҳолга киради, ел кетма-кет бўкирар, бунга чидай олмаган шоҳ-шаббалар қарс-қурс синар, кекса ёғочлар «гийқ-гийқ» этиб ёлбориш товуши чиқарар эдилар. Ел ортиқча бир газаб устида эди, ер юзидағи тиккайган нарсанни букиб-янчиб ташламоқчи бўлгандек пишқирав эди. Чинорлардан бирисини ерни титратиб ийқитди, девонанинг гулханини ҳам тўнка-пўнкаси билан кўтариб чакалакнинг ичига отди. Бутун мозор ичини ўт учқуни или тўлдириб, яна кўринишига бошқача бир тус берди.

Мозорни бу ҳолга солгандан сўнг, гўё шунинг учун ғайратлангандек бир оз пасая тушди, оч қолган шер каби пишқириб бўкиришлари босилгандек бўлди. Ярим соат чамаси жонсаракка учраб учиб юришга мажбур бўлган қарғалар елнинг ғазаби босилганини бир-бирларига хабар бергандек ға-ғу билан эски ўринларига қўна бошладилар. Кўкни ўраб олган қора булатлар ҳам тўс-тўсга бўлиниб, ой ҳам қора парда ичидан ярим юзини очиб ер юзига мўралаб қўйди. Гумбазнинг қаршисидаги икки туп кекса чинорнинг склет каби қуруқ шохларига ел билан аллақаёқларга учиб кетган бойқушлар тўпи ҳам келиб қўна бошладилар. Ой парчаланган қора булатлар билан бекинмачоқ ўйнаган каби ҳали кўриниб, ҳали яширинар эди. У ер юзига кулиб қараганда мозорнинг чакалак қисмига айтарлик ўзгариш бера олмаса-да, гўристон қисмидаги дўмбоқ қабрларни ва уларнинг устидаги мармар қабр тошларини чуқур бир сукут ичидан экан тақдим қиласр эди. Бойқушлар уяси бўлган икки туп чинорнинг қаршисида гумбазга рўбарў-рўбарў қилиб солинган айвон — зиёратхона бор, аммо ой тик кўтарилганликдан зиёратхона ичи қоп-қоронғу эди. Чинор шохлари тасбиҳ каби тизилган бойқушлар билан тўлган. Улар ой нуридан унча хурсанд эмаслар, чунки ой ер юзига кулиб қарай бошласа, улар бошларини кифтлари ичига оладилар-да, дум-думалоқ бўлиб сиқилиб кетадилар. Ой булатлар остига кирса, улар роҳатланган каби чиғ-чиғчиғ, ки-ки-ки қилиб сайраб ҳам юборадилар. Бу вақт шу бойқушлар сайроби ичидан инграницеш каби бир товуш ҳам эшитилгандек бўладир.

Масжид манорасидан руҳоният ёғдириб мунгли аzon товуши эшитилди-да, уйқу қучогида ётган табиат ўйгониб жавоб берган каби ёнгираб кетди. «Оллоқ акбар»нинг сўнгти тақорорида Отабек зиёратхона айвонидан тушди-да, шилдираб оқиб турган ариқ ёнида таҳорат олишга ўлтирди...

13

КУЛИБ ҚАРАМАГАН ҶАҲОН

Энди унинг умиди ортиғи билан узилган эсада, юрагининг ёниши босилурлик эмас эди. Илон чаққан кишидек довдир ва бесаранжом кўзлари билан теваракка

бежо-бежо назар ташлар эди. «Ниҳоят отаси ўз муддасига етди, қизини янги куёвга топшириб тинчланди, кеча кечаси у...» дер эди-да, бундан кейинги огулик ҳақиқатни бир турли ҳам ўзига сингдира олмас ва буни ўйламасликка тиришиб, ўзини алаҳситмоқقا ўла теварагига бежо-бежо назар ташлар эди.

Энди Марғилон қатнаб юришларга хотима берилгандек ва Марғилон ҳам ундан «тағин менда нима илинжинг бор?» деб сўрагандек бўлар эди. У «Хўжа Маъзоз» дан чиқиб тўғри уста Олимникига қараб борар эди ва у ердан отини миниб умрликка Марғилон билан видолашмоқчи эди эса-да, ошна бир кимса унинг кўз ўнгига кўрингандек ва бегона раҳмсиз бир йигитнинг қучоғидан қутулиш учун ундан имдод сўрагандек бўлар эди.

Уста Олим эшигига етаёзди. Том бир маъюсият ичida бошини қуий соглан эди, ўтиб турувчиларни пайқамас, лахча чўғ каби ёниб турган юрак ўти билан сархушдек эди. Қаршидаги Содикнинг эшигидан чиқувчини ҳам пайқамай қолди ва бир қараб олса ҳам танимаган эди. Отабек уста Олимникига келиб киргач, Содикницидан чиқувчи Ҳомид унинг орқасидан қараб йўл устида қотиб қолди...

Шокирбекнинг кеча эрталаб чиққанидан бери дараксиз кетишига ташвишланиб ўтирган уста Олим уни йўлақда кўриши биланоқ сўради:

— Эй-й-й, баракалла сизга, Шокирбек, қаёқларда қолиб кетдингиз! Жуда ҳам ташвишландим-да ўзим... Нега бир кунда бунчалик ўзингизни олдириб қўйдингиз?

Чиндан ҳам у ўзини танимаслик даражада олдирган, ўлат теккан кишилардек кўзлари ичига чўкиб кетган эди. Киртайган кўзига куч билан кулги туси берди.

— «Хўжа Маъзоз»га борган эдим...

— Нима учун?

— Тунашга.

Уста Олим таажжуб ичida яна бир қат уни кузатиб чиқди:

— Тунадингиз?..

Отабек айвон пешонасига ўтирас экан, устани шубҳада қолдирмас учун деди:

— Кўпдан бери бир тунасам, деган хаёлим бор эди:

— Бузруқдан сўрайдиган тилакларингиз бор эканда,— деди уста Олим ва кулди. Бу вақт иккиси ҳам йўлақда юриб келган оёқ товушига қарадилар. Қўпол қилиб бошига салла ўраган, устага ўхшаш рангсизгина бир йигит кириб келар эди. Уста Олим келувчининг истиқболи учун ўрнидан турди: «Эйй, уста Фарфи, келинг, келинг, бормисиз!» деди. Уста Фарфи салом бериб уста Олим билан кўришди. Отабек кўришишга ҳозирланмаган ҳам эди, аммо келувчининг ўзи қўл узаттида, «саломатмисиз, меҳмон» деб кўришиб олди. Айвонга ўтиргач, фотиҳа ўқиди. Уста Олим келувчининг хуш омади қиласар экан:

— Сиз ҳам келар экансиз-а, уста Фарфи,— деб пичинг отиб қўйди. Соғу саломатлик сўралиб бўлгандан сўнг, уста Фарфи қаршидаги янги қурилган тўкув дўконларига ишорат қилиб, деди:

— Ишлар катта-ку, уста! Дўконларни ҳам қуриб юборибсиз!

— Дўконни қурганимизга энди ўн беш кунча бўлиб қолди. Фотиҳа ўқишига келармисиз, деб кутдим, шу чоқ-қача дарагингиз бўлмади.

— Ўзингизнинг бошингиздан ўтган, уста,— деди,— бирорвнинг кафилини олгандан сўнг ишини ташлаб чиқиш қийин, жуманинг шарофатлари билан ошина-оғайниларникоға борилмаса, бошқа иложи йўқ; ахир, ўзингизнинг ҳам бошингиздан ўтган-ку!

— Йўқ, йўқ,— деб кулди уста Олим,— мен сизга ўхшаб дўконнинг устида сира тухум босган эмасман, симкорни кўзим қиймайдир, десангиз мен ишонар эдим.

— Бу гапингиз тўғри,— деди кулиб уста Фарфи,— жўжалари тушкур йилдан-йилга кўпайиб борадирлар. Қозонни сувга ташлаган кунимиз жанжал.

Уста Олим дастурхон ёзиш учун ҳужрасига киргандада, уста Фарфи Отабекка қаради.

— Сиз қаердан, меҳмон?

— Тошкентдан.

— Жуда яхши, қани юқорига чиқинг, меҳмон,— деди. Отабек раҳмат айтиб жойидан қўзғалмади. Уста Фарфи уни яна бир қат кўздан кечириб олгач, чўккаларини бузиб чордана қуриб олди. Дастурхон ёзилиб, эртанги нонушта учун дамлаб қўйилган чой олиниб келинди. Уста Олим Шокирбекни юқорига чиқишига қис-

таса ҳам, у кавушини ёчмай эскича ўтира берди. Ундан-бундан сўзлашиб чой ичишга бошладилар. Уста Олим билан уста Фарфининг сўzlаридан, илгарида бир устакорницида ишлаганиклари, бундан йигирма кунлар бурун уста Олимнинг устакор билан нима учундир уришганлиги ва шундан сўнг ўз уйига дўкон қуриб, ўзича ишлай бошлаганлиги англашилар эди. Уста Фарфи ундан аччиқлашиш сабабини сўраса ҳам, қаноатлантиарли жавоб бермас, фақат «ёмон одам экан тўнғиз» билан кифояланар эди. Шу вақт Отабек қўлидаги пиёласини бўшатди-да, уста Олимга деди:

— Энди менга рухсат берасиз уста, мен жўнайман.

Уста Олим ажабсиниб унга қаради ва:

— Нега тағин кетмакчи бўлиб қолдингиз? Уч-тўрт кун турмоқчи эмасми эдингиз? — деб сўради.

— Марғилондаги ишларим битиб қолди. Ўзим ҳам зерика бошладим...

— Бўлмаса чой тугалсин, шундан сўнг сизга рухсат! — деди уста Олим ва бир пиёла чой тўлдириб берди. Отабекнинг изин сўраши билан бўлинниб қолган саволини уста Фарфи давом эттириди:

— Тўғрисини айтингиз-чи, уста, нима учун устакор билан аччиғлашдингиз?

— У сизга аниқ айтмадими?

— Айтмади. Сўрасам, гапни бошқа тарафга чалғитади.

— Имонсиз айтишга уялган,—деди уста Олим ва кимгадир нафрлатланиб қарагандек бужмайиб қўйди.

— Ҳайтовур сиз билан аччиғлашган сабабини сўрасам, гапни четга буради.

Уста Олим қўлидаги пиёласини қулт этиб бўшатди-да, устакори билан аччиғлашиш сабабини сўзлаб берди:

— Мен Ҳомиднинг қайним Сайфига ёмон кўз билан қараб юрганини сал-пал сезиб юрар эдим... Уришадиган кунимизнинг эрталабида Сайфини илгарироқ ишга жўнатдим-да, ўзим нимагадир уриниб кечроқ қолиб бордим. Дарбозадан киришим ила ишхона ичидан кимнингдир йиглаб-ёлборган товушини эшишиб ажабсингидим ва ишхона эшигини очиб кўрсам, имонсиз Ҳомид қайнимга зўрлик қилиб турган экан. Эшик очилиши билан чўчиб Сайфини бўшатди-да, менга қаради. Мен аччиғимдан нима дейишни билмай қолган эдим. Тўнғиз

ишхонадан чиқа бошлаган эди: «Сен билан отансга йигирма йиллаб хизмат қилиб, ниҳоят сендан кўрган яхшилигим шу бўлдими?» дедим. Чурқ этмай чиқиб кетди. Нимагадир сиз, Карим ва Ортиқбойлар ҳам ишхонага келмаган экансизлар. Тўнғиз вақтдан фойдаланиб Сайфига ёпишган экан. Мана, орамиздан ўтганл шул. Унинг орқасидан мен ҳам Сайфини олиб чиқиб келдим-да, иккинчи учрашмай уйга дўкон қуриш ҳаракатига тушдим,— деди. Уста Фарфи ҳам устакорнинг бу қилиғидан нафратланган эди:

— Оббо падар лаънатей, ҳали шунаقا иш қилди денг-чи?! Ўзи одам эмас, ҳали бу унинг ҳунарларининг энг пачоги,— дёди ва товушини секинлатиб давом этди,— бадбаҳт ақллар ишонмаслик даражада бўлган ҳар бир ёмонликларни қилас эканки, биз билмас эканмиз!

Отабек уста Олимнинг ҳикоясини илтифот билан эшигтан эди. Шунинг учун ундан сўради:

— Бу қандай Ҳомид, қора чўтири киши эмасми? Мен ҳали уни қўшнингиз уйидан чиқсан ҳолда кўрган эдим.

Уста Олим ажабсиниб Отабекка қаради:

— Ўша-ўша, сиз уни қаёқдан танийисиз?

— Унинг билан аллақаерда сўзлашганим бор эди.

Уста Фарфи Отабекка кулги аралаш қараб олиб, деди:

— Бўлмаса, унинг қўланса сўзларига хўп завқлангандирсиз!

Отабек маъноли қилиб илжайди. Уларнинг сўзи шу ерга етганда рўмолда тугиғлик бир нарса кўтарган ҳолда Сайфи кириб келди. Саломдан сўнг, уста Фарфи билан кўришди ва Отабекка қараб деди:

— Кечакизни кута-кута ошларимиз совуб қолди, бек aka!

— Мен бу кунгами, деб ўйлабман,— деди кулиб Отабек.

Сайфи ҳовлиқиб бир нарса дейишга ҳозирләнар эди:

— Бугун кечаси ҳаммомнинг оғилида бировни ўлдириб кетибдилар! — деди.

— Кимни? — деб сўради уста Олим.

— Ким эканини билмадим.

Уста Фарфи жавоб берди:

— Келишимда қўрбошилар бошлиқ ўликни аравага ортар эканлар, ўлдирилган Салим шарбатдорнинг ўғли бечора Комилбек!

— Тавба! — деб қўйди уста Олим ва сўради.— Ўлдирувчи ушланганми?

— Ушланиш қаёғда, ўликнинг ўзини қидира-қидира зўрға ярим кечада топганлар,— деди уста Фарфи. Отабек бу хабарни совуққина эшишиб ўтирас ва фотиҳа ўқиб туришга ҳозирланар эди.

— Гумондор борми? — деди уста.

— Гумондор-ку, аммо бечоранинг ўлими жуда қизиқ кунга тўғри келиши ажиг,— деди уста Фарфи ва давом этди.— Кеча Комилбекнинг Мирзакарим аканинг қизи билан никоҳлари бўлмоқчи экан. Бечора никоҳдан икки соат чамаси илгарироқ ёнига бир ўргонги олиб, ҳаммомга борган ва бир онда ҳаммом ичидан йўқолган, ҳатто унинг ёнидаги киши ҳам қаёқса кетганини сезмай қолган. Қизникида ҳамма тажаммулни тайёрлаб, Комилбекнинг отасидан тортиб никоҳ қила-дирган қози-ю қуззотларгача куёвни кутиб ўлтирас эканлар. Бир вақтда ҳалиги бирга ҳаммомга тушган йигит ҳовлиқиб қизникига келган, куёв кутиб ўлтирганлар куёвдан дарак сўрасалар, у улардан куёвни сўраган ва воқиани айтиб ҳаммомда кийимларини ҳам қолдириб бир онда йўқолганини хабар берган. Шундан сўнг никоҳ-никоҳда, ош-ошда қолиб куёвни қидириб кетганлар. Ниҳоят, ярим кечада ҳаммомнинг таҳоратхонаси ёнидаги бир оғилнинг охуридан қонига белашиб ётгани ҳолда топганлар... Бечора таҳорат учун оғилга кирганда товуш чиқармаслик ерига ханжар уриб, охурга тиқиб кетган эканлар. Жуда қизиқ гап... Ким ўлдириган ва нима учун ўлдирилган, ҳеч ким билмайдир,— деди.

Отабек тамом англашилмаган бир ҳолатда қолган эди. Бу хабардан қувонишга-да билмас ва хафаланишга ҳам йўл топмас эди. Рақибнинг ўлдирилиши бўлса ҳам, нима учундир у бу ишдан ўзига тинчлик ортгира олмаган, аксинча, тинчсизлана бошлаган эди. Бу фожиадан ортиқча асарланган уста Олим «вой бечора-бечора» дер эди.

— Еирорта душмани борлиги маълумдир, ахир? — деб сўраб қўйди.

— Албатта, бордир!..— деди уста Фарфи ва Отабек-

ка қараб қўйди. Бу қаращдан Отабек борлиқ-йўқлиқ ҳолга кирган эди. Уста Фарфи давом этди.— Дунёда қандай одам йўқ, деб ўйлайсиз, кишининг ризқига тупурғанлар, охиратини ўйламаганлар ҳамма ёқда ҳам тўлиб ётибдир,— деди яна Отабекка қараб... Отабек ёрилиш даражасига бориб қайтди... Уста Фарфининг бу кейинги қарашини уста Олим пайқаган эди ва уста Фарфининг бу тўғрида бир нарса билиб-да, сўзлашга Отабекдан мулоҳаза қилиб тўхтадими, деб ўйлаган эди:

— Сўзлай берингиз, Фарфибой, бу киши ўзимизни-кидир,— деди.

— Нимани сўзлай берайин?

— Комилбекнинг душмани тўғрисида билганингизни!

— Мен сизга бир нарса биламан дедимми? — деди ва кулиб Отабекка қаради,— бу одамнинг ўсмоқчилашини қаранг-а?

Бу сўз билан Отабек бир оз енгиллашди.

— Менга бир-икки қайта қараб олганингиз учун, билсангиз ҳам сўзлашга мендан ётсиндингизми, деб ўйладилар, шекилли,— деди Отабек.

— Тўғрисини айтсан, сиз бу тўғрида бир нарса биласиз, лекин сўзлашга Шокирбекдан чўчиб турасиз! — деди уста.

— Қуруқ туҳматни қўйинг-чи! — деди уста Фарфи.

— Қуруқ туҳмат эмас, билиб туҳмат,— деди уста ва,— Шокирбек сиз ўйлаган кишилардан эмас, асло тап тортмай сўзлай беринг! — деди.

— Астагфурилло!— деб кулиб қўйди уста Фарфи ва бир оз ўйлаб олгач, деди:— Сиз билан менга шу нарсанинг нима зарурати бор, уста?

— Аввало сўзламайдиган бўлгандан сўнг, нук бериш керак эмас. Тилдан илингандан кейин бизга зарурати бўлмаса ҳам, билганини айтиш керак! — деди уста Олим.

Айниқса, устадан кўра ҳам Отабек сабрсизлана бошлилаган эди. Ҳозиргина ўйлаб турган жўнаш масаласи ҳам унинг эсидан чиққан, чунки рақибининг қотили ким эканлигини билиб олиш ҳаммадан ҳам унга қизиқ ва аҳамиятли эди.

Уста Фарфи энди айтмаса бўлмаслигини англади, шунинг учун Сайфига ишонмагансимон қаради:

— Жиян, сен ёшсан, ҳали сенинг оғзингга ишонч

йўқ,— деди ва,— бир оз дўконингга бориб тур, аччи-гинг чиқса ҳам!

Уста Олим ҳам қайнисини туришга ишорат қилди ва ўрадан сабзи олиб тўграшга буюрди. Бола кетгач, уста Фарфи оҳистагина деди:

— Агар гумоним тўғри бўлса, Комилбекнинг қотили Ҳомиддир!

Бу сўз Отабекни ажабсинтергандек, уста Олимга ҳам ғариб эши билган эди.

— Ҳомид дейсизми?! — деб сўради уста Олим.

— Ҳомид,— деди яна секингина уста Олимдан сўради,— сиз Умарбекни Ҳомидга яқин дўст эканлигини биларсиз, албатта?

— Биламан, ҳамма вақт юриш-туриши ўшанинг билан эди.

— Балли,— деди уста Фарфи,— ўша Умарбек билан ораларига яқинда бир совуқлик тушди-да, бундан ўн кунча илгари Ҳомиднинг бир мудҳиш ваҳшати тўғрисида Умарбекдан бир сир эшилдим. Ҳомид Комилбекни ўлдирганда устида бўлмаган бўлса ҳам, аммо ҳалиги эшилган сиримнинг далолатига қараб, албатта, Комилбекнинг қотили Ҳомид деган фикрга тушдим... Сиз бундан уч йилча илгари Марғилон келиб Мирзакарим аканинг қизига уйланган Отабек исмли тошкентлик бир йигитни ҳалиги қайин ота бўлмиш Мирзакарим ака билан қамалаб, осилишга ҳукм қилингандарида дор остидан қутқарилиш воқиаларини хотирлайсизми?.. Албатта, ёдингизда бўлса керак, ҳов, биз Сорибойнинг дўконида чой ичишиб ўтирган эдик-ку, ёдингизга тушдими?

— Эсимда бор, эсимда бор,— деди уста Олим ва Отабекдан сўради,— балки сиз танирсиз, Тошкентда машҳур бўлган Юсуфбек ҳожи деганинг ўғли.

— Танийман! — деди Отабек ва ҳикояни бунча узоқдан соглани ва ўз устида гап юргизгани учун у тонг ажаб ичида уста Фарфининг оғзига қараб қотган эди.

Уста Фарфи ярим товушда давом этди:

— Ана шу йигитнинг олган хотини жуда ҳам нозанин бир қиз бўлиб, бу қизга бизнинг Ҳомид ҳам харидор экан. Ҳалиги Отабек қизга уйланиб қўйгач, бизнинг Ҳомид тиканга ағанаб, орадан Отабек билан Мирзакарим акани кўтариш фикрига тушган ва бўлмаган чақимчиликлар билан уларни дор остигача тортишга

муваффақ бўлган!..— (Сўз бу ерга етганда, Отабек билинтирмаслик қилиб бир энтикиб қўйди.) Уста Фарфи давом этиб деди.— Аммо худонинг ҳақни ноҳақ қилмаслиги соясида, бир мактуб сабаби билан, кутмаган жойда дор остида нажотга чиққанлар. Булар оқлангач, Ҳомиднинг ўзи қамаладиган бўлиб, аммо қўрбошининг ёрдами орқасида Қўқонга қочиб қутилган ва у ерда ҳам тинч ётмай, Ўтаббой қушбегини порахўрлиқда айблаб, Мусулмон чўлоққа ариза берган.—деди ва сўзини бу ерда тўхтатиб устадан сўради.— Ўзингиз ҳам билсангиз керак, Ҳомид бир кеча йўқолиб уч ойлаб бедарак кетган ва уни қўрбоши йигитлари қидириб юрган эдилар!

Уста Олим тасдиқ ишорасини бериб:

— Сўзлай берингиз! — деди. Аммо Отабек бу даҳшатли ҳақиқатни эшитмақда бўлган қулоқларига ишонмас ва ўзини куч орқасида тутиб турар эди.

Уста Фарфи товушини секинлатиб давом этди:

— Ҳомиднинг Мусулмон чўлоққа берган аризасидан сўнг, Отабек билан Ўтаббой қушбеги Қўқонга чақириладилар-да, сўроқдан сўнг яна оқлиққа чиқадиrlар.

Аммо Ҳомид уч ойлаб Марғилон келолмай юргач, ниҳоят яна қўрбошининг ёрдами билан келишга ҳам муваффақ бўладир. Бироқ ҳануз тинч ётолмайдир. Фурсати келиши билан яна бир ёмонлик қилмоққа, қутидорнинг қизини ўзиники этишга ўйлаб юрадир. Тўнғизнинг баҳтига бу фурсат ҳам тўғри келиб, яна ёмонликка юз қўядир. Шундайки, Отабекнинг Тошкентдан ҳам уйланганини билиб, унинг тилидан бир талоқ хати ёздирадир-да, Мирзақарим аканикига киргизадир!

Отабек ўзини нечоғлик босиб, ушлаб келган бўлса ҳам, лекин энди ичидан қайнаб-тошиб кетган ҳиссиётини босолмади — «виждансиз тўнғиз!» деди-да, ихтиёрсиз ўрнидан туриб кетди. Уста Олим ҳам ўзини тинч тутолмади.— «Бадбаҳт кофир!» деб қўйди. Отабекнинг ўзгаришидан уста Фарфи шубҳага тушаёзган бўлсада, лекин уста Олимнинг ҳам унга қўшилиши уни ўйлатиб турмади, Отабек қайтиб ўрнига ўтиргач, у давом этди: — Бу сохта талоқ хати тўғрисида Отабекнинг нима қилганлиги Ҳомидга ҳам маълум бўлмайдир. Лекин иш Ҳомиднинг ўйлаганича натижаланиб, бир неча вақтдан сўнг Мирзакарим аканинг қизини талоқ

қилиниши хабари чиқиб қоладир. Орадан уч-тўрт ойни ўтказиб бизнинг Ҳомид Мирзакарим аканикига совчи киргизадир, аммо Мирзакарим aka унинг совчиларини қуруқ қайтарадир. Бир неча вақтдан сўнг Ҳомиддинг сохта талоқ хатиси билан эридан чиққан қиз Комилбекка бериладир ва нима учундир тўйлари бир неча вақтга кечикиб қоладир-да, орадан бирор йилни ўтказиб, ниҳоят кеча уларнинг тўй ва никоҳ кунлари эканки, Комилбекнинг ҳаммомда ўлдирилган хабарини эшлитиб турибмиз. Мана мен юқоридаги сабабларга биноан, Комилбекни ўлдирувчи аниқ Ҳомид, деб ўйлайман! — деди.

Уста Олим бошини чайқаб:

— Бунда шубҳа йўқ. Ҳа, Ҳомиддинг ўзи! — деди ва ўзича.— Шунчалик ҳам инсофсизлик бўладими, ўзининг бир эмас, иккита хотини бўла туриб, тагин бир йигитнинг ҳалолига кўз олайтириш... Яна ўзингнинг бўйинг етмаслигини била туриб ҳам, икки орада бир гуноҳсизнинг қонини тўкиш — эй шайтон боласи! — деб қўйди.

— Бу бир ит! — деди уста Фарфи.— Томдаги луқмани ўзи ҳам еёлмайдир, бошқага ҳам едирмайдир, нахитнинг ўзи!

Отабек ўз ҳаётидаги фожиаларнинг манбаи бўлган бир ҳабисни¹ ниҳоят биринчи мартаба таниб турар эди. Бу палид душманга қарши ўзида қўзғалган битмас-туғанмас нафрат ва ғазаб ҳиссиётини сирнинг фош бўлишидан қўрқиб ичига ютишга мажбур эди. Шундай бўлса ҳам, ичida қайнаган ҳиссиёт ўз шарпасини унинг юзига очиқ ташлаб турмоқда, кўзи ўт каби ёнар ва юзи хил тусга кирап эди.

Анчагина орадан сўз кесилиб қолгандан сўнг уста Фарфи деди:

— Сиз билан мен шу чоққача Ҳомиддинг бундай ишлари бор эканидан хабарсиз юрганимизга ҳайрон қоламан!

— Ҳайрон қолишта ўрин йўқ,— деди уста Олим,— сиз-ку, яқинда кириб ишлай бошладингиз. Аммо мен йигирма йиллаб шунинг уйида қолиб сира ҳам Ҳомиддинг ичидагига тушуна олмас эдим ва ҳамиша кўзимга димланган қоронғу ўрадек қўрқинч кўринар эди,—

¹ Ҳабис — ярамас, ифлос.

деди, бир оз тўхтаб олгач, бир нарса топгандек ҳаракат ясади,— бу гапларнинг бош омили, албатга, Ҳомид бўлса ҳам, лекин бунда унинг бошқа ёрдамчилари ҳам бор кўринадир, ёдингиизда борми, кўпинча чақчайган кўзли бир йигит ишхонамизга уни сўраб борар эди?

— Биламан, бу кунда ҳам Ҳомид билан сермуомала, оти Содиқ бўлиб, сизнинг қўшнингиз эмасми?

— Отангга раҳмат! Ана шу йигит билан унинг онаси бу ишда Ҳомиднинг энг ишончли ёрдамчилари бўлса керакки, у икки йилдан бери шу қўшнимнига ҳамиша қатнаб қолган эди. Содиқлар ўз овқатларини ҳам ўtkizolmagан ҳолда фақирликда яшаб, йил сайин менга оз-оз ерларидан сотиб тириклик қиласар эдилар. Бир йилча бўлди, бирдан сув олиб қолдилар ва Содиқ уйланиб ҳам қўйди. Мен, ҳайтовур, бечора йўлини топиб олдиёв, деб юрар эдим. Энди билсам, Содиқни уйлантирувчи ҳам шу Ҳомид экан,— деди ва Отабекдан сўради.— Сиз ҳали Ҳомиднинг қўшнимнидан чиқиб кетганлигини сўзлаб эдингизми? — Отабек тасдиқ ишорасини бергач, негадир бир энтикиб қўйди. Ҳакиқатан уста Олимнинг бу кейинги сўроғи уни энтикирарли эди. Ўтган кунларини заҳар билан булғаб келган бу мудҳиш душманига қайси йўсун билан жавоб қайтариш йўлларини излаб турган чоқда, бу савол берилиб, Ҳомид билан бояги учрашишини унга хотирлатган ва энди ҳам кулиб қарамаган баҳтига лаънат ўқиттан эди. У ўзининг ҳозирги ҳаётини-да улуғ таҳлика остида бўлганлигини ва бу таҳликанинг ўтгандагиларга қараганда тамоман бошқача бир даҳшатда бўлишини англар эди.

Уста Олим ошхонага бориб, ош қилиш ҳаракатига тушган эди, Отабекнинг тўсатдан кетиш ҳаракатига тушиб қолганини кўриб:

— Бек, шунча ўлтирганнинг қаторида яна ярим соатга таҳаммул¹ қилсангиз, ошни еб йўлга тушасиз. Мана мен сабзини ҳам босдим,— деди.

Отабек қайтиб ўтирмади ва ҳовлининг ўртасида туриб узр айтди:

— Раҳмат, уста, мен бугун ошиғич юриб, эрталаб жўнаб кетган юкларнинг кетидан етиб олмасам бўлмайдир.

¹ Таҳаммул — сабр.

— Ошни ташлаб кетсангиз, хафа бўламан, қирқа чидаган, қирқ бирга ҳам чидай оладир.

— Ўлтиринг, ўлтиринг, меҳмон! — деди уста Фарфи.— Ошга сабзи босилди — пишди!

— Мен устанинг ошини биринчи мартаба еб ётганим йўқ, агар савдогарчилик омон бўлса, ҳар ўн беш кунда бир келиб устанинг жонига ҳам тегаман,— деди Отабек ва боқчага қараб юра берди.

Уста Олим ошга сабзи босиш билан овора эди:

— Мен сизни зўрламайман, лекин йўл устида қорнингиз очиб қолса, ўзингиздан ўпкаланг,— деди.

Отабек майдонда отини супуриб эгарлар экан, майдоннинг гарбидағи хароба уйнинг деворидан бир бош кўтарилиб, унга қараб турар эди. Бундан унинг хабари бормиди, йўқми, лекин у бу томонга қарамасдан отини эгарлаш билан машғул эди. У эгарланиб бўлинган отини ҳовлига қараб етаклай бошлагандা, ҳалиги қараб турган бош ҳам девордан қуийга тушиб йўқолди. У отини ҳовлининг ўртасига қантариб қўйиб, айвондаги хуржун ва пўстинини олар экан, уста Фарфи билан хайрлашди. Отни Сайфи етаклагани ҳолда уста Олим Отабекни кўчагача узатиб чиқди ва унинг қўлтиғидан олиб, отга миндирап экан, ўпкалаш оҳангига деди:

— Ошни ташлаб кетганингизни унутманг, бек!

Отабек эгариға ўтириб олгач, сўради:

— Хафа бўлдингизми?

— Нега хафа бўлайин, аммо йўлда очиқиб қолишингиз учун сизга ачинаётиман.

— Тайёр ошни ташлаб кетиб, йўлда очликдан қийналишимни ўзим ҳам тушуниб турибман, уста,— деди Отабек ва,— бироқ туюкашлар билан Андижонда бу кунга учрашиш учун ваъдалашган эдим, уларга етиб олиб йўл харажатлари учун бир оз оқча бермасам, яъни ўзроҳатимни кўзлаб сизнинг ошингизни кутиб қолсам, беш кишини кўра-била туриб, оч қўйган бўлман.

Уста Олим отнинг жиловидан қўлини олиб сўради:

— Андижонга ўтган кезларингизда йўл устидан кириб туришга ваъда берасизми?

— Бўлмаса-чи,— деди Отабек,— шу ўн беш куннинг ичидаги саккиз тепки атласдан лоақал икки кўра йиғиб қўйингиз, ёдингиздан чиқармангиз!

— Ёдимда бор, хотиржам бўлингиз!

— Хайр-хўш!

— Яхши қол, Сайфи!

Саман йўрга йўлга тушди, човига одатдан ташқари бир-икки қайта келиб тушган аччиқ қамчи зарби билан бир онда кўздан ғойиб бўлиб кетди. Отабекни узоқлатиб уста Олим уйига кирган ҳам эди, Жаннат опанинг эшиги очилди-да, Содиқ от етаклаган ҳолда чиқиб келди. У отга минар экан, эшик ичидан кўринган Ҳомид — «тезроқ!» деган амрни берди. Содиқ ҳам Отабек изича отини ҳайдаб юборди...

Уста Олим Отабекни кузатиб келиб, айвон пешонасига ўтирас экан:

— Табиати жуда қизиқ йигит-да! — деб қўйди.

Уста Фарфи сўради:

— Бу йигит билан қандай ошналигингиз бор?

— Мен сизга ўзоти йили бир йигитнинг Ҳомиднинг дарбозасида юрганлигини ва мен билан бирга ҳовлига келиб бир кун ётиб кетганлигини сўзлаб эдим, шекилли?

— Ҳа, ҳа, ҳали ўша йигит шуми?

— Шу. Шундан бери ҳар бир Марғилон келганида ва Андижон ўтганида менинг уйимга кирмасдан кетмайдир. Ўзи жуда оғир ва ақлли йигит, бунинг устига қизиқ табиати ҳам бор! — деди.

— Қизиги қанақа? — деб сўради уста Фарфи.

— Жуда қизиқ! — деди уста ва кечаги воқиани сўзлаб чиқди.— Кеча эрталаб шаҳарни бир айланиб келайин деб чиқиб кетган ва тушлик ошга етиб келиш учун ваъда ҳам берган эди. Мен ваъда вақтида ошни дамлаб ўлтирибман-ўлтирибман сира келса-чи! Нихоят сиздан сал илгарироқ келиб турган эди. Сўрасам, «Хўжа Маъз»да тунаб қолдим, дейдир. Кўзи уйқусизликдан бир қарич ичига тушиб кетиблир. Жуда ҳам табиати қизиқ йигит!

— Яхши йигит экан! — деб қўйди уста Фарфи.

Ошни еб бўлганларида у ёқ-бу ёқдан жума товуши кела бошлаган эди. Шунинг учун чой ичиб ўтиришга тўғри келмай уста Фарфи уста Олимдан илгарироқ номоз жумага қўзғалди ва эшиқдан чиқиши билан ўз уйидан келаётгандек кўринган Ҳомидга учрашиди.

— Ҳа, уста Фарфи, бахай? — деди Ҳомид.

— Уста Олимникига келган эдим.

— Бўлмаса зиёфат қуюқ экан-да!

— Қуюқ! — деди кулиб уста Фарфи.— Уста Олим ўз уйига дўкон қурған экан, гиналаб юрмасин, деб фотиҳага келган эдим.

— Шундоғми! — деб қўйди Ҳомид. Биргалашиб кета бошладилар.

— Бўлмаса, уста Олим ўз уйига дўкон қурибdir, денг-чи!

— Дўкон қурибdir.

— Арвоҳ пири бермасдан-а?

— Қишда арвоҳ пири қилиб бермоқчи! — деди уста Фарфи. Яна бир неча дақиқага орадан сўз кесилиб қолди.

— Ош қилиб бергандир?

— Албатта.

— Бошқа меҳмони ҳам бор эканми? — деб сўраб қўйди Ҳомид. Уста Фарфи Отабекнинг Ҳомид билан учрашганини хотирлаган эди.

— Тошкентлик бир савдогар меҳмони ҳам бор экан,— деди. Масжидга яқинлашиб қолган эдилар. Ҳомид яна ниманидир сўрамоқчи бўлса ҳам, уста Фарфи шошиб масжидга бурилди.

14

РАҚИБ ИЗИДАН

Ўн олти-ўн етти кунлик ой оқ булат ичидан қутослануб кўринар эди. Ҳамма хуфтан номозига кириб кегган, кўчалар сув қўйгандек тинч эди. Кўчанинг бу тинч пайтидан фойдаланган каби уста Олимнинг эшиги ёнига келиб тўхтаган кимсанинг ким эканлигини билиш учун ой ёруғлигига қарши тушган бўғот халал берар эди. Бўғот панасида ва эшик ҳалқасида қадалиб бирмунча вақт ниманидир кутиб турган бу киши, ниҳоят авайлабгина эшикни очиб ўзини йўлакка олди. Тагин анчагина эшикнинг ичкариги қисмида тургач, очишидаги эҳтиёт билан эшикни ёпди.

Ой ёруғлиги уч бурчак равища йўлакка тушиб турар эди. Бу номаълум кимса оёқ учи билан юриб келди-да, мўралаб айвонга қаради. Айвоннинг токчасида шам ёниб, Сайфи ўрии ёзиш билан овора эди. Номаълум кимса йўлакнинг қоронғу қисмига ўзини олиб, кўзини Сайфидан узмай тура бошлади. Сайфи ўрнини тўшаб бўлгандан сўнг айвоннинг пешонасида ёзилиб

ётган дастурхон ва лаганин қўтариб ҳужрага кирди. Йўлақдаги мажҳул қимса гўё шуни кутиб тургандек оёқ учини онда-сонда ташлаб ўзини майдон ичига олди...

Барги тўкилиб қуруқ шохлари билан қолган майдон ичи туманли эди, мажҳул киши юзини ойдинга бериб, хароба уй остида қадалиб турганликдан унинг ким эканлигини таниш осон эди. Бу аламзада, зулмдийда юз, энг сўнгти курашга ҳозирланган бир йигит эди...

Отабек хароба уй девори ёнида сўнг чекдаги бир зътибор билан ичкарига қулоқ солмоқда эди. Ичкаридан ўтин ёриб ўчоққа ўт қалаш ҳаракатлари эшитилар, гоҳи хотин кишининг товуши ҳам келиб қўяр эди. У бир-икки қайта оҳиста одимлар билан хароба уйларнинг у боши билан бу бошига бориб келди, яъни ичкарига ошиб тушмак учун қулайроқ ўрин чоғлар эди. Хароба иморатларнинг ўрта бир еридаги раҳнадан ошиб тусиши қулайроқ бўлгани учун шунинг остига шумшайиб ўтири. Ўтириш ҳамона қаёқдандир оёқ товуши эшитгандек бўлди-да, секингина ўтирган жойига ерга сингтандек қилиб ётиб олди. Оёқ товуши тўхтаб нариги ёқдан уста Олимнинг товуши келди. Уста Олимнинг хуфтандан қайтиб келганлигини англади ва унинг майдонга кириш эҳтимоли бўлганлиқдан шу кўйи ёта берди.

Вақт жуда секин ҳаракат қиласи эди. У ўзининг ҳар бир юрак тепишини санагандек ўтказар эди. Кузнинг ёқимсиз шамоли ўпкани қичитиб ўйтални қистатар, у ҷалқанча ётган кўйи оғзини ўрамлаб кўмак кутган каби кўкка кўзини тиккан эди.

Орадан бир-бир ярим соатлар чамаси вақт ўтиб кетди. Теварақдан «жаннат қушлари»нинг биринчи товуши қичқирилиб ўтди, шу кезда хароба ҳовли томонидан бир неча оёқ товушлари эшитилди-да, у ўрнидан туриб қулоқ солишга мажбур бўлди. Бирмунча вақт англашилмаган сўзлашиб товушлари келиб тургач, даричанинг «ғийқ» этиб очилишидан сўнг, бу товушлар яна ҳам узоқлашдилар. Отабек деворга интилди ва секингина юқорига кўтарили. Бузиқ уйнинг даричасидан нариги қатордаги айвон ва ундаги ўчоқда ёниб турган ўт кўринди. Аммо очиқина бўлиб уй ичидан кишилар товуши келар эди. У ўмарилмаслик этиб девор устига минди ва осонгина хароба уй ичига ўзини олди. Чунки уй томи ўпирилиб остига босганликдан

унинг сахни жуда ҳам юза эди. Авайлаб учтўрт одим босди-да, уйнинг бузик даричаси ёнига келиб тўхтади ва мўралабгина ҳовли юзига қаради. Қаршидаги уйнинг ҳар икки даричаси ҳам ёпиқ, аммо тирқишиларидан шам ёриқлиги кўринар ва боягига қараганда секинроқ бир товушда гўнгир-гўнгир сўзлашиш эшитилар эди. Орадан ўн беш дақиқа чамаси фурсат ўтиб товушлар бир оз юқорилашиб келмакка бошлади. Бу орада уйдан қўлига лаган ушлаган бир хотин чиқди-да, қозондан лаганга бир нарсани кўтара берди. Отабек гўё шуни кутиб тургандек узоқ бир тин олди ва ўзини четга бурди. Хотин лаган билан уйга кириб кетгач, ичидан тақинган ханжарини қинидан суғуриб олди-да, дамини ойдинга солиб боқди ва ханжарнинг учини ёнбошидан орқасига ўтқизиб ушлади, яна уйни кутиб тўхтади. Хотин яна чиққан ва косаларга ўйрва суза бошлаган эди. Уйга бир-икки қатнаб сузилган шўрваларни ташиб битиргач, уйнинг эшигини беклади-да, кириб кетди.

Отабек ҳовлининг ўртасига, тут ёғочининг ёнига келиб тўхтаган ва жанубда киши йўқми, деб аланглар эди. У бу тўғрида бир қаноат ҳосил этгач, битта-битта босиб кишилик уйнинг йўлак томондаги даричаси ёнига етди ва ўзини сўнг чекда эҳтиётлаб дарича остига ўтириди. Ўтириш ҳамона димогига ичкилик билан шўрва иси келиб урди. Уйдагиларнинг сўзларинигина эмас, ҳатто, томоқ чайнашларини ҳам эшитса бўлар эди. Ичкарида кимдир бирор шап-шап эт чайнаб дер эди:

— Энди менга берма, Содиқ, Мутал полвонга беравер!

Отабек бу товушнинг кимники бўлганлигини билган эди.

— Ҳадеб менга бераверасанларми, оралатиб Жаннат оғамга ҳам бериб қўй, ха-ха-ха!

— Бизнинг кампирга берсанг, қайтармасдан ича берадир!

— Берса ича бераман, қих... ўзим хотин бўлсам ҳам Мутал полвонларнинг ўнини қочираман, қих...

Бу сўздан сўнг уй ичини кучли бир кулги товуши қоплади. Кулги босилгач, яна сўз бошланди:

— Энди шуни ичасиз, Ҳомид ака!

— Йўқ, Содиқбой иним, мен жуда ҳам бўлиб қолдим, ўзи ҳам жуда кучли чиққан экан.

— Ичмасангиз қўймайман, никин!..

— Мутал полвонга бер! Сиз олинг-чи шуни!

— Аниқ ичмайсизми, Кумуш опамнинг саломатлигига ҳам ичмайсизми??

Бу сўзни эшитган Отабек ихтиёrsиз ўрнидан туриб кетди. Жаннат опанинг хи-хи-хи қилиб кулган товуши эшитилди.

— Орага нозик бир исмни келтириб солмасанг худо ҳаққи ичмас эдим. Қани бўлмаса бер-чи, Кумуш опангнинг саломатлиги ҳаммадан ҳам менга керакдир!

— Ха-ха-ха, нозик жойдан ушладимми?

Отабек бу сўзларни эшитар экан, зўрга-зўрга ўзини даричага ҳужум қилишдан босиб қолган эди. Орада бирмунча майда сўзлар сўзлангач, кимнингдир уфф деб юборгани эшитилди.

— Тағин нима бўлди, Ҳомид ака?

— Бу кунги гап жуда ҳам мени чўчитиб қўйди-да, Содиқбой!

— Менинг гапимга нима учун ишонмайсиз, ахир! Юз мартаба сизга айтиб ётибман-ку, хумсони дарвозадан чиқардим, тағин қанчагача орқасидан бориб то карвонларга қўшилиб кеткунча кутдим, сўнgra қайтиб келдим, деб. Агар ўша кетиши бўлса, бугун худди Қўқонга бориб етган.

— Эй-й, сен билмайсан, ука!

— Некин менга қолса, бу ишда ҳеч бир қўрқадиган гап йўқ, уста билан танишлиги бўлса, унинг уйига меҳмон бўлгандир, савдогарчилиги бўлса, Марғилонга келгандир; ахир кетиб тургандаги сўзини ўз қулоғингиз билан эшитдингиз-ку!

— Бу мулоҳаза тузук-ку, бироқ мен билан аччиғлашган бир кишиникида меҳмон бўлиши бошни қотирадир, тағин сизларнинг ҳовлиларингиз ёнида...

— Агар сирингиздан уста Олимнинг хабари бўлса, у вақтда қўрқсангиз арзийdir. Аммо менга қолса, у хумпар Марғилонда хотини борлигини унутиб юборган деб ўйлайман.

— Менинг бу сиримни сиздан бошқа ҳеч ким билмайдир. Умарбек билан бир оз нари-бери бўлиб қолган эдим, ҳайтовур тағин орани очиб юбордик.

— Үндоқ бўлса, тағин нимадан қўрқасиз?

— Мен унинг Тошкент кетишини кўз бўяш учун бўлган ҳийлами, деб қўрқаман.

— Хайр, кетмаган ҳам бўлсин: ул ҳолда ўзингиз

айтгандек қилиб тўппа-тўғри эртага Салим шарбатдорнинг олдига бораман-да, ўғлингни Мирзакарим аканинг илгариги тошкентлик куёви ўлдириди, мен ўз кўзим билан кўрдим, дейман. Ана ундан сўнг хумсонинг ҳолига маймуналар йигласин! Агар у, сириңгизни билган бўлганда ҳам аллақачон келадиган ишга тушуниб олиб, Марғилондан думини хода қилди, десангиз-чи!

— Қих... Содикнинг гапи жўялик,— деб қўйди Жаннат опа. Отабек бу сўз даҳшатидан титраб кетган эди.

Содик давом этди:

— Энди ишнинг бўладирганини ўйлаш керак, сизнинг қўрқоқлигингизни кўриб, мана Мутал полвон ҳам ухлай бошлабдир.

— Ухлаганим й-й-йўқ, ҳез, дорингдан қуй-чи!

— Муталбой ўртоқ,— деди Ҳомид,— биз бироннинг яхшилигини унутадиган киши эмасмиз. Ўртоғингиз Содикбой мен билан биргалашиб камлик кўрмади, аввали худо, қола берса мен уни уйлантириб қўйдим... Мен бирор билан ошначилик қиласам, ҳатто, ундан жонимни ҳам аямай, кўнглини олмоқча тиришаман.

Содик:

— Муталбой сизни ўбдан яхши биладир, Ҳомид ака! Сизнинг қандай хизматингиз борлигига ҳам қонган... Аммо унинг сиздан бир илтимоси бор экан.

Ҳомид:

— Нима илтимосингиз бор, Муталбой?

Мутал:

— Битта-я-я-яримтадан уч-тўрт т-т-танга қ-қарзларим бор эди, Ҳомид ака.

Ҳомид:

— Ошналик деган уч-тўрт танга билан боғлана олмайдир, Муталбой! Мен сизга ҳали айтиб қўйдим: менинг ошналигим ошнадан жонни ҳам аямаслик билан бўладир. Уч-тўрт танга эмас, муҳтож бўлсангиз ўттиз-қирқ танга сўрай беринг!

Жаннат опа:

— Илоҳи Ҳомидбой мурод-мақсадига етсин, қих... Ошина-оғайнидан дунё аямайдир!

Бир оз вақт танга товуши эшитилиб тургач, Ҳомиднинг овози келди:

— Мана, Мутал полвон, ҳозирча оз бўлса ҳам шуни олиб турасиз, аммо хизмат ҳақининг ўз йўлига бўладир.

Сархуш:

— Р-раҳмат Ҳ-қомид ака, сиз жонни аямасангиз, м-мен ҳам йўлингизга бошимни тикдим, жамшиднинг арвойи!

Содиқ:

— Бизнинг Муталбой ҳам қуруқ йигит эмас!

Ҳомид:

— Дастурконни йигиштириб олингиз-чи, Жаннат опа!

Лаган-товоқнинг бир-бирисига теккан товуши эшилиб, Отабек ўзини оҳистагина йўлакка олди. Ўзоқ бошида бир-икки дақиқа чамаси товоқ-қошиқ ва оёқ товуши эшитилиб тургач, Жаннат опа ҳовлига тушиб келди ва қўлидаги дастурхонни тут остига қоқиб кетди. Отабек қайтиб келиб дарича остига ўтирган ҳам эди, Ҳомиднинг шу сўзини эшитиб қолди.

— Эшикнинг занжирига бир қараб келингиз-чи, имон топкур Жаннат опа!

Содиқ:

— Кўрқасиз-да, Ҳомид ака, эшикни ўзим занжирлаганман.

Ҳомид:

— Сен ҳали ёшсан, иним Содиқбой! Сиз чиқа берингиз, Жаннат опа!

Отабек учун вақт ортиқ танг ва қўрқинч эди. Хароба уйга борай деса, Жаннат опанинг кўриб қолиши аниқ эди. Эшикни очиб чиқиб кетай деса, ўтиришнинг мақсади ҳали очилмаган бўлиб, бутун машаққати шамолга кетар эди. Жони ҳалқумига тиқилиб теварагига аланглади ва йўлақдан нарироқда уста Олимнинг деворига суёғлиқ турган замбилга кўзи тушди. Замбилинг остига яшириниш жуда ҳам хавфли эди эса-да, аммо ўтиришнинг мақсадига қонмай кетиш ундан ҳам хатарли эди. Сир фош бўла қолса, уч душманга баравар ҳужум қилишни бўйнига олиб қўйди. Уй эшиги очила бошлаганде замбилинг остига кириб олган эди. Ўзини нечоғлиқ сиқиб гужанак қилган бўлса ҳам, аммо бир қараш билан замбил остида киши борлигини билиш унча қийин эмас эди. Замбил остида ҳанжарини қисимлаб, гўё сичқонни пойлаган мушукдек ҳужумга ҳозирланиб ётар эди.

Жаннат опа йўлакка томон юриб келди-да, замбил остидагини пайқамай йўлакка бурилди. Ойдиндан

эшикнинг занжирлиги аниқ кўриниб турар эди. Шунинг учун эшик ёнига бориб ўтирмай, йўлакнинг ярмидан қайтди. Қайтиши ҳамона юқоридан учиб ўтган биринки машак қушнинг «чев-чев» деган товушини эшитиб, кўкка қаради. Шимол шарқига тўғри отилиб ўқдек учиб борган машак қушларга қараганича йўлақдан уй томонига қайрилиб кетганини ўзи ҳам сезмай қолди. Жаннат опа айвонга чиққанида Отабек устидаги замбил тўрт энлик юқорига кўтарилиб, тагин секингина уни босиб тушган эди. Жаннат опа эшикни очиб уйга кирганда, у оҳистагина замбил остидан чиқди, унинг юрак тепиши ҳали ҳам шиддатли эди. Дарича ёнига юриб келди-да, ҳамон ҳужумга ҳозирлангандек ичкарига қулоқ солиб турди. Жаннат опанинг «эшик занжир!» деган товушини эшитгач, роҳат тин олди ва дарича ёнига чўнқайди.

Ҳомид:

- Бўлмаса, душанба куни кечасига бўлсин!
- Биз қайси кунга десангиз ҳам ҳозирмиз!

Мутал:

- Менга қолса, шу топда борсак дейман!

Ҳомид:

— Яхиси душанба кун, ундан нарига ўтгани ҳам ярамагандек, бериси ҳам фойдасиз бўладир, чунки биринки кун бунга ҳозирлик ҳам керак.

Содик:

Тагин қанақа ҳозирлиги бор?

Ҳомид:

— Олиб чиққандан сўнг уни Марғилон ичидаги олиб туриб бўлмайдир: то ром қилғунча бирорта қишлоққа юборишга тўғри келадир. Олиб чиққимиз душанба кечасининг қайси пайтига тўғри келишини ҳам ҳозирдан айтиб бўлмайдир. Олиб чиққан замон Марғилондан чиқарилиб юборилмаса, кундуз куни чиқариш тагин хавфли... Кечаси маълум Марғилон дарбозалари ёпиқ бўладир. Шунинг учун бирорта дарбозабонни қўлга олиб қўймогимиз, албатта, керак...

Содик:

— Яхши маслаҳат, қутидорникига қанақа қилиб тушамиз?

Ҳомид:

— Масаланинг бу ёғини ҳам ўйлашимиз керак экан, ҳали!

Содиқ:

— Энг яхшиси, дарбозасидан кириш!

Мутал:

— Дарбозасидан кириб бўлмаса, томидан ошиб тушамиз!

Содиқ:

— Ҳа-ҳа-ҳа, балли, Мутал тўрам!

Мутал:

— Кулишингни бежо қилма, ҳез Абдикарим! Сен ҳали дунёга келиб нимани кўрдинг-ку, сенга кулиш тушиб қолди! Бу бош дунёга келиб нималарни кўрмади-а? Бунақанг қочириқ ишларни энди қилиб тўрибди, деб ўйлайсанми? Эй-ха-х-ха... Мутал аканг нималарни қилмади?! Ҳа-ҳа-ҳа... Мусулмонсан, отангнинг арвойи, Ҳомид ака! Бир куни Жонкелдибой ҳасратиниң қилиб, Ҳатам тўранинг ўғлини яхши кўрганлигини, дийдорига тўёлмай бесар бўлганини арз қилиб қолдик, ёнимда Қаландар полвон бор эди, Жонкелдига — бўлмаса ўн оқта^{*} бер бизга, биз Қаландар билан бирга дўндиқчангни муҳайё қилиб берайлик, дедим. Жонкелди ўлиб турган экан, қулоқ қоқмай хўп, деди. Биз Қаландар билан тунни ярим қилдик-да, Ҳатам тўранинг ҳовлисига келдик. Ишнинг эбини жўплаб қарасак, жуда кашал, девор-тош ҳамен! Ошиб тушишнинг сира ўнқови йўқ, бу ишкални кўрган Қаландарнинг тарбузи қўлтиғидан тушиб, «беш оқтани қайтариш увал-ку?!» деди. Ўзимнинг сал шунақанг қайфим баландроқ эди, ханжарчамни қинидан сугуриб олдим-да, тўғри Ҳатам тўранинг дарбозасига бориб чақира бошладим. Бу ишимдан жон-пони чиқиб кетган Қаландар ёнимга келиб турта бошлади: «Ҳой Мутал, сенга нима бўлди?» Мен Ҳатам тўрани чақира бериб, «товорушингни чиқарма, хотинга ўшаган йигит» дедим. Қаландар ёнимда туролмади, мени ёлғиз қолдириб ура қочди. Бир вақтда ҳалиги Ҳатам тўра дарбоза орқасига келиб «ким» деди. Мен товушимга шошилишган тус бериб, «мен, мен, очинг тезроқ!» дедим, бечора гўл тўра дарбозани очиб юбориши борми, лип этиб ўзимни ичкарига олдим ва Ҳатам тўрани қўлидан ушлаб ҳовлига бошладим. Бечора энди мени таниган, авзойимнинг бузуқлигини ҳам пайқаган эди. Кекирдагига ханжаримни тираб: «Жо-

¹ Оқ танга.

нингдан умидинг борми, йўқми, ноинсоф!» дедим, жуда тили шишиб қолган эди хумсонинг — «бов, бов» деб ғулдираб жавоб берар эди... «Бир бечора ўғлингни деб кўкрагини захга бериб ётсин-да, сен тинчгина ўғлингни олиб ёт!.. Қани ўғлинг ётган жойини кўрсат!» дедим. Ҳатам тўра дир-дир қалтирас эди, шу кўй уни айвонга ўзим етаклаб бордим-да, ўғлини кўрсатди. Болани уйқу аралаш турғизиб кийинтира бошлаган эдим, бир томондан онаси додлаб қолди-ку, ханжарими ни олиб унга югардим, «товорушингни ўчир, мочахар... Ўғлингни ўлимга олиб бораётганим йўқ, ниҳояти бир пиёла чой ичади-ю-келади!» дедим. Қисқаси, илгари даҳшат бериб, кейиндан яхши гаплар билан уларни ишонтириб, болани олиб чиқдим ва Жонкелдига топшириб кетдим... Бахтимга, ўша куни битта ҳам миршаб йўлиқмади! Эй-й Содиқча, сен ҳали нимани кўрдингку, нимангта ишондинг, бузоқ бўғизлагандек қилиб бир-иккитани сўйган билан одам бўлдинг-кўйдингми? Гап билан бўлиб занғар кайф ҳам тарқаб кетди, қани, қуй-чи, бир-иккини!

Ҳомид:

— Сизга қойилман, Мутал полвон, сизнинг шунаңги ишларингизни билиб юрганим учун бу ерга чақиритириб келдим-да!

Мутал:

— Шуни билган бўлсангиз, бас, бу ишни менга топшириб қўя беринг!

Ҳомид:

— Содиқ айтгандек дарбозадан киришни хоҳламайман, чунки миршабларнинг оёғ усти.

Мутал:

— Бўлмаса ҳовлининг орқасидан тушамиз!

Ҳомид:

— Орқаси ҳовлидир?

Жаннат опа:

— Қих... ҳалиги оти қурсин... Маликбойнинг майдони-да!

Ҳомид:

— Жуда яхши экан бўлмаса, томига шоти етармикин?

Жаннат опа:

— Қих... жуда баланд.

Мутал:

— Баланд бўлса, зарари йўқ, осони уйнинг тегидан тешамиз, қўямиз!

Ҳомид:

— Қийин бўлмасмикин?

Мутал:

— Ҳаммадан ҳам осони тешиш, мўлжалини яхши олсак, бас.

Ҳомид:

— Бир-икки соатда уни тешиб бўлармиди?

Мутал:

— Ўзи майдонми, ахир?

Жаннат:

— Майдон... қих.

Мутал:

— Яқинида одам йўқми?

Жаннат:

— Йўқ, қих.

Мутал:

— Балли, мўлжалини олиб берсаларинг, эртадан бошлаб қазиганим бўлсин.

Ҳомид, Содиқ:

— Балли, раҳмат, полвон!

Мажлиснинг сўзи шу ерга етганда Отабек ўрнидан туриб йўлакка келди. Эшик занжирига қўлини олиб боргани ҳолда ўйланиб тўхтади ва эшикни очмай орқасига қайтди. Хароба уй орқали уста Олимникига чиқиб айвон ёнида тўхтади, уларнинг хуррак ва пишиллашларига қаноат ҳосил этгач, оёғ уни билан йўлакка ўтди ва эшикни очиб чиқди...

* * *

Ўз оғзидан эшитганимиздек Содиқ уни, Ҳомиднинг таълимотича, Қўқон дарбозасидан чиқариб то карвонларга қўшилиб олгунча таъқиб этиб борган эди. Отабек бу таъқибни жуда яхши сезганликдан Содиқ йўлда қолгандан сўнг ҳам яна бир бекат олдинга борган ва иккинчи бекатдан йўлни чаплаб, Тошлоқ дарбозаси орқали яна қайтиб Марғилонга кирган эди.

Уста Фарфининг Ҳомид ва ўзи тўғриларидағи мудҳиши ҳикоясини эшитгач, Марғилонда қолиш ва қайнотасининг уйига бориб англашиш ўрнига жуда ошиғичлик билан Марғилондан жўнаб кетган бўлиб кўриниши, албатта, ўринсиз эмас эди. Чунки, Комилбек

ўлдирилган бир кунда Ҳомиднинг кўз ўнгида қолиши, била туриб ўз-ўзига қабр қазиш, қабргина эмас, номусни барбод бериш ва қотиллик исмини олиб ҳалқ олдида шарманда бўлиш бўлур эди, нечукким биз, юқорида Содиқ оғзидан эшитганимиздек Ҳомид бу тухматдан ҳам қайтмас ва ўз тухматини маҳкама олдида мантиқий равишда исбот ҳам қила олур эди. Мана у шу мудхиши, бошга тушмоғи аниқ турган ҳалокатнинг дафъи учун Марғилондан ошиғич чиқиб жўнаган эди. Орқасидан қилинган таъқиби пайқаш эса, аввало бу унинг бир мулоҳазаси бўлган эди, иккинчи, отини эгарлар экан, девордан ўзига қараган бош билан бу мулоҳазасини чинга чиқишини билған эди. Учинчи, кўчада уста Олим билан хайрлашар экан, қўшнининг йўлагида кўринган киши кўлагаси яна таъқиб этилишини таъкидлаган эди.

Марғилондан иккинчи бекатга қўниб, чойхонада бир-икки чойдиш чой ичиб узоқ ўйлаган ва Марғилонга қайтиш қуруқ тухматга қолиш билан фарқсиз эканлигини яна бир қат тушунган эди эса-да, Ҳомидни майдонда музaffer ҳолда қолдириб кетишини ҳеч бир турли юрагига сифдира олмаган, гайри расмий яшириниб бўлса ҳам Марғилонда туришга ва туриб Ҳомиднинг бундан сўнгти режаларини ўрганишга ва шунига қараб кураш бошлишга қарор берган, шом билан аср ораларида Марғилонга кирган эди. Келиб биринчи келишида тушган саройга жойлашган ва жойлашиб тинчий олмаган, яъни таъқибини бу кунданоқ бошлишга қарор берган. Ҳомиднинг ёмонлик корхонаси уста Олимнинг қўшнисиникида бўлганлиги учун ҳеч бир тараддуғисиз йўлни тўғрилаб Содиқникуга солган эдики, биз бундан кейинги гапларни юқорида кўриб ўтдик.

Уста Олимнинг эшигини очиб чиққач, Содиқнинг йўлагига қулоқ солиб гўнғур-ғўнғур келган товушни эшилди ва секин-секин йўлга тушди.

Душман билан бетма-бет учрашмоқ куни белгилантанлиқдан ўзининг бу кунги кутилмаган муваффақияти тўғрисида ҳеч бир таажжубланмас, фақат душанба кун кечаси билан мияси машғул эди. Душанба кун кечаси бир эмас, уч душман билан кураш тўғрисидагина ўйлар эди. Бу бирга уч масаласи бир оз унинг миясини қотирган, кишилар ёллаш, ҳукуматга билдириб, қутилорни хабардор қилиб қўйиш мулоҳазаларигача келиб етган

бўлса ҳам, аммо иззати нафси бу қўрқоқликка тамоман зид турар эди. Бора-бора бу мулоҳазасини тамоман кўнглидан чиқариб ташлади, на кишилар ёллайдиган, на ҳукуматга билдирадиган ва на қутидорни хабардор қиладиган бўлди. Чунки рақиб билан дилдорнинг уйи орқасида танҳо олишмоқ, ёр оёғи остида қонли тупроқ-қа қоришмоқ — унинг учун жуда лаззатли ва шоирона туюла бошлаган эди. Саройга кирап экан, ўзича:

— Ширин ўлим! — деб қўйди.

Гарчи кечаги тун «Хўжа Маъз»да тунаб уйқудан қолган эди, аммо узоқ вақт бу кунги гапларни ўйлаб ётди. У ухлаб кетар экан, ўзини гоҳ қонга беланиб ётган ҳолда, гоҳ Кумушни эркалаб турган ҳолда кўрар эди.

15

ДУШАНБА КУН КЕЧАСИ

Бу кунги кеч Отабек билан Ҳомиднинг ҳаёт ва ма-мот масалаларини ўзининг қора қучогига олган қоронғу бир тун эди ва булардан қайси бирларининг сўнг соатлари етганлиги шу қоронғу тун каби қоронғу эди. Отабек бу икки ҳолдан табиий бирисини бу соат ўзининг кўз ўнгига кўрар ва шунга ҳозирланар эди эса-да, аммо Ҳомиднинг ҳаёли фақат гулгина искар, гул сайрига ошиқинар эди...

Олти қарич кенглиқда узундан-узоқ тор кўча, тор кўча бошида кичкинагина бир эшикча эди. Шом билан хуфттан ўртасида бу кўча бошига бир йигит келиб тўхтади-да, теварагига киши билмас қилиб разм солді. Кўчада ҳеч ким қолмаган, йўл оёғи босилган эди эса-да, у узоққина қаршисидаги дарбоза ичларини, том устларини, девор рахналарини кузатди ва қаноат ҳосил этиб тор кўчага оҳиста-оҳиста йўл олди. Тор кўчанинг ярмисига етгач, тўсатдан орқасига қайрилиб қарди... Унинг ҳаракати бир нарсадан шубҳаланиб эмас, аммо орқадан душман таъқиби бўлмадими учун эди. Кичкина эшикча ёнига етганда тагин ҳалигидек орқасига қараб қўйди. Бир оз ўйлаб тўхтагач, эшикнинг ўнг томонидаги деворнинг бузуқ еридан секингина кўтарилиб майдонга мўралади. Эшикнинг қулф ва занжири бўлмай юзига ёпиқ ҳолда турган бўлса ҳам, у эшикка

тақилмади, машаққатланиб деворга минди. Ой шом ейиб яхшигина қоронғу тушган бўлса ҳам, майдон ичининг дараҳтсизлиги учун тиккайган чўп ҳам ажратурлик эди. Майдонни кишидан холи билгач, секингина девордан ўзини майдонга олди.

Майдон икки таноб кенглиқда бўлиб, жануби қутидор ва қўшнисининг иморатлари орқасидан ва бошқа уч жиҳати ҳам шунга ўхшаш бинолардан иборат эди. Майдонга ёзда нимадир экилган, чуқур-чуқур жўяклар тортилган ва ер ёмғир билан ивиб-бўкиб оёқ кўтариб босишга имкон бермас, ҳар бир оёқ узганда уч чорак лой баробар кўтариулур эди. Қийнала-қийнала майдоннинг жанубига ўтди. Унинг чап қўли томонида бир уйнинг орқа девори бир бўйра эни кесиб туширилган бўлиб, қорайиб кўринар эди. У, бу кесилган ўринни ўтган кун кечаси келиб кўриб кетгани учун қайтадан қараб турмади эса-да, лекин унинг бу бинога илтифотсиз қараши мумкин эмас эди. Бу теги кесилган бино Кумушнинг ўз уйи бўлиб, бу уй ичida Отабекнинг саодатли кунларининг ширин хотиралари сақланар ва шу дақиқада ҳам унинг ҳаёт тираги бўлган Кумушшиби ўтирад эди. Отабек кўзини тўлдириб бинога қаради, гўё бу қараща у дунё малаги билан видолашар эди. Узоққина бинога қараб олгач, қўйнига қўл солиб бир қоғоз олди, хаёл ичida қоғознинг тахларини тузуклади-да, қайтариб яна қўйнига тиқди. Шундан сўнг бинога яна бир кўз ташлагач, майдоннинг кунботарига юриб, ўн беш одимлаб ҳалиги жойдан йироқлашди. Том шувоғига лой олинган зовур шакилли ўринни кечаси келишида биқиниш учун белгилаб кетган эди, келиб шунга тушди-да, қўлини чеккасига қўйиб ёни билан ётиб олди. Гарчи ости кесилган бино билан Отабек тушиб ётган лойхона бир-бирисига рўбарў эди, аммо иморатларнинг кўланкаси ва кечанинг ўтча қоронғуси орқасида лойхонада киши бўлганлигини пайқаш қийин эди.

Тун ярим бўлиб, олдинги ухлаганлар энди бир уй-куни олган эдилар. Майдон эшиги очилди. Бири орқасидан бири юриб, икки кўлага майдонга кирди. Буни пайқаган Отабек ханжарини қинидан чиқариб қўлига ушлагач, юз тубан ерга узанди... Икки кўлага сўзсизгина ости кесилган бино ёнига келиб тўхтадилар. Келувчиларнинг бири Содиқ ва иккинчиси Мутал эди.

Тумшуғини ерга тираб ётган мушукдек бўлиб Отабек уларни кузатар эди.

Тўхтагач, шивирлаб Содиқ сўради:

— Тешилаёзганимкин?

— Озгина қолгандир, деб ўйлайман, негаки, пахсанинг энидан бир газ чамаси жой очилган!

Мутал товушини баралла қўйиб сўзлар эди, шунинг учун Содиқ деди:

— Товушингни секинроқ чиқарсанг-чи!

Мутал белидан тешасини олар экан, унга жавоб берди:

— Ҳали шундан ҳам қўрқасанми, балки ҳали ашуламни ҳам айтиб юборарман!

— Жиннилигинги қўй, Мутал ақа! Мен ҳам ёнингда турайми?

— Турасанми, йўқми, ихтиёр ўзингда!

Мутал кавакка кириб кавлашга тутинди.

— Тешани қаттиқ солма,— деди Содиқ.

— Менга ўргатма, ўзим биламан.

Содиқ Муталнинг эҳтиётсизлигидан қўрқди шекили, бир оз Муталнинг ишига қараб тургач, деди:

— Бўлмаса, мен эшик ёнига бориб турай, тешилди дегунича ҳуштак бер.

— Тузук, ҳали Ҳомид куёвинг қаёқда қолди?

— Кўчанинг бошида пойлаб ўтиргандир. Ҳуштагингни эшитгач, уни ҳам чақирайми?

— Чақир! — деди Мутал ва шитир-шитир кесак тушира берди.

Содиқ эшиқдан чиққан ҳам эди, Отабек секингина бошини кўтарди-да, Мутал сари шувий бошлади. Мутал эса емирилиб тушган кесакларни ташқарига суриш билан овора эди... Шу вақт унинг қўлтиғи остидан узатилган қўл ҳиқилдоғидан омбир каби сиқиб олди... Мутал кучли эди, аммо Отабек ундан ҳам кучли эди. Сапчиб ҳиқилдоғини ажратиш учун бўлган Муталнинг биринчи ҳаракати бўшга кетди-да, чап биқинига ўткир ханжар ғачча ботирилди... Аммо у ҳамон бўшалишга кучанар эди ва кучли қўл баттарроқ сиқар эди. Уч дақиқали курашдан сўнг, Мутал бўшацди, илгариги кучанишлардан қолди ва бир-икки дафъа тўлғаниб жимгина жон берди. Отабек эшик томондан қўзини узмагани ҳолда, Мутални судраб ўзи биқинган лойхонага олиб борди ва қўрқибгина қўлини ҳиқилдоқдан

олди. Муталнинг боши шилқ этиб лойхонага тушди-да, мангулик уйқуга кетганлиги маълум бўлди... Отабек битта-битта тешилган бино ёнига келиб, эшик томонга ҳуштак берди, жавоб ҳуштаги эшитилгач, тешик ичига кириб ўтирди. Тешикнинг юқорисидан бир оз туйнук очилган бўлгани учун ичкаридан қулоққа енгилча пишиллаш эшитилар эди... Содик яқин етган эди, кесмадан узоқроқда туриб шивирлади:

— Тешдингми, Мутал?

— Тешдим, бери кел.

Содик кесмадан ёнига келиб энгашди. Энгариши ҳамоно қўл ҳиқилдоққа тўғри келган эди ва ханжар қорнига ботирилган эди... Содик қўлидаги ханжарини бир-икки қайта солиб кўрса ҳам, тегдириш учун кесманинг тубанлиги халал берди, лекин ўзи тетик эди. Отабек сапчиб кесмадан чиқди ва бор кучи билан Содикни босиб тушди... Босиб тушиши ҳамоно аллақайси ери ачишгандек сезилди... Сўл қўли Содикнинг ҳиқилдоғида, ханжарли қўли Содикнинг ханжарли қўлида эди... Бир оз кучини йиғиб олгач, ҳиқилдоқни бор кучи билан сиқа бошлади. Содик хириллар, шундай бўлса ҳам қўлидаги ханжарни бўшатмас эди. Эшик томондан Ҳомид ҳам кўриниб қолди... Вақт танг келган эди... Содикдан кўкрагини қочириб ханжарли қўлини бўшатди ва Содикнинг кўкрагига солди... Содикнинг ханжари бир-икки қайта унинг орқасига кучсиз-кучсиз келиб теккан эди. Ханжарини иккинчи уришда Содик бўшашди ва қўлидан ханжари тушди...

— Ҳомид акангга жуда ҳам меҳрибон экансан, Содик! — деди босиб ётган жойидан Отабек.— Жонингни ҳам унга қурбон қилдинг!

Содик инграпиб қўйди.

— Ким хириллайдир? — деди яқинлашиб келган Ҳомид.

— Тезроқ келинг. Ҳомид ака. Отабекни ўлдирдик! — деди шопиб Отабек.

— Ax! — деб югурниб келди Ҳомид.

Отабек Содикни қолдириб, Ҳомиднинг ханжарли қўлидан ушлаб олди:

— Мутал ўлди. Содик ҳам ўлим ёқасида. Энди сиз билан иккимизгина қолдик!

Ҳомид қўлини бўшатишга тиришар экан, Отабек солмоққина қилиб деди:

— Ортиқча ошиқмангиз, Ҳомидбой, мен сизнинг ханжарли қўлингизни бўшатаман ҳозир, аммо шунгача сиз билан икки оғиз сўзим бор!

Ҳомид ҳануз қўлини бўшатишга кучанар эди.

— Кучанмангиз, Ҳомидбой!

— Мард йигит бўлсанг, қўлимни қўй!

— Ошиқма, қўяман! — деди Отабек. Шу чоқда оёқ остида ётган Содик кўтарилиб-кўтарилиб ўзини отмоқда эди. Отабек Содикдан нарироққа Ҳомидни бошлади. Ҳомид тифизлик билан сурилди. Ханжарли қўли билан туйнукка ишорат қилиб, Отабек сўз бошлади.

Сиз мендан ҳам яхшироқ биласизки, шу уйда сизни аллақанча машаққатларга солган, чексиз жони-ворликлар ишлатган ва ҳисобсиз тиллалар тўқдирган, ниҳоят шу дақиқага келтириб тўхтатган бирор ухлайдир. Агарда сизнинг менинг тилимдан ёзиб берган талоқ хатингиз дуруст ҳисобланмаса, бу ухлагувчи менинг ҳалол рафиқам бўлиб, икки йилдан бери мен ҳам унинг кўйида саргардонман. Демак, сиз билан менинг орамизда шу бирор учун кураш борадир. Лекин сиз шу чоққача менинг устимдан муваффақият қозониб келдингиз: қорачопончи, деб дор осталаригача олиб бордингиз, Мусулмонқул қўлига топширдингиз, бу ишларингиз фойдасиз чиққач, исмимдан талоқнома ёзиб, икки йиллаб рафиқамдан айириб туришга муваффақ бўлдингиз, бу орада гуноҳсиз бир йигитни ҳам ўлдирдингиз. Ниҳоят, ўғирлик йўлига тушиб икки йигитнингизни ҳам менинг қўлимда ҳалок қилдингиз... Энди менга жавоб берингиз-чи: бу ёмонликларингизда сиз ҳақлими эдингиз?

— Ҳақли эдим! — деди Ҳомид ва силтаб ханжарли қўлини бўшатиб чалқанча йиқилди. У қўлини бўшатган чоқдаёқ Отабек ишини тўғрилаган, яъни Ҳомиднинг қорнини шир этдириб ёриб юборган эди. Ҳомид ҳолсизланиб ётар экан, уни беш қадам наридан кузатиб тек турувчи Отабек заҳарханда ичиде «ҳақлими эдинг?» деб сўради. Кучаниб «ҳақли эдим!» деди Ҳомид ва қўлидаги ханжарини Отабекка отди, ханжар Отабекнинг ёнига келиб тушди...

Отабек «кушхона» ўрнидан эшикка қараб қўзғалган эди, Ҳомиддан беш-олти қадам нарида ётган Содикнинг «ҳимм» деган товуши эшитилди. Отабекнинг кўнгли алланучуклангани ҳолда майдондан чиқди...

УЗНИ ТАНИТИШ

Эртаси кун бутун Марғилон деярли Маликбойнинг майдонида воқе бўлган ишга жуда ҳайрон эди:

— Мутал билан Содик бўлса шаҳарнинг том тешар йигитларидан, улар қутидорниги ўғирлик учун борган бўлсалар, боргандирлар... Лекин шаҳарнинг катта бойларидан ҳисобланган Ҳомиднинг иши қизиқ! Ҳайр, Ҳомиднинг ўғирлик ҳунари ҳам бор бўлсин, буларни ким ўлдирган? Қутидор бўлса эрталаб уйқудан тургач, бу ҳангомани билибдир, жуда ажойиб!..

Кун чошгоҳга етганда Отабек сарой дарбозасидан чиқди. У ўзининг сўл қўлини дока билан ўраб боғлаган ва кўкрагига кўтариб ушлаган эди. Кеча Ҳомид ханжарли қўлини силтаб тортганда, ханжар унинг бош бармоғи орасини суюкка етгунча шипириб кетган эди. Унинг оёқ олишида ҳам бир оз оқсоқланиш сезилар эди.

Саройдан анча узоқлашган эди, қаршидан ўзига қараб келувчи Раҳматни кўрди ва чор-ночор сўрашмоқча тўғри келди:

— Ҳа, мулла Раҳмат, саломатмисиз?

Раҳмат ошиқибина Отабек билан кўришиди:

— Қачон келдингиз, бек ака?

— Келганимга бир-икки кун бўлди... Нега хафа кўринасиз, мулла Раҳмат?..— Раҳмат уфлаб олди:

— Эй-й бек ака, бизнинг бошга тушганни душманингизга ҳам кўрсатмасин!

Отабек ажабсиниш туси кўрсатиб сўради:

— Нима бўлди, уй ичингиз билан саломатмисиз?

— Ўзингиз биласиз, бултур падар марҳум бўлган эдилар, бугун яна бошимизга ўлим тушадиган бўлиб қолди, тогам Ҳомидни аллакимлар чавоғлаб кетибдилар!

Отабек кўзини олалантирган бўлди:

— Қаерда, кимлар, яраси кўрқинч змасми?

Раҳмат воқиани қаерда бўлганлигини сўзлаб турмади:

— Яраси ёмон, ҳушсиз ҳолда ҳиқиллаб ётибдир. Қорнини тиқдирмакчи бўлган эдим, жарроҳ бўлмайдир деди.

— Чавоғлагувчини айтмадими?

— Тил бўлса айтади·да,— деди Раҳмат,— йиқилиб ётган жойида яна икки йигитнинг ўлиги бор экан... Шулардан зарб олганми деб ўйлайман.

— Худо шифо берсин! — деди Отабек. Ажралишдилар.

Отабек уста Олимнинг кўчасига бурилгач, Содик зшигида уч·тўртта бел боғлаган кишиларнинг тобут ясаш билан машғул кўриб, тинчсизланиб кетди. Уста Олимнинг йўлагига кирар экан, Жаннат опа билан яна бир хотиннинг йиги товушларини эшигти.

Жанозага таҳорат олиш учун обдаста ёнига ўтирган уста Олим Тошкент жўнаб кетган Шокирбекни орадан уч·тўрт кун ўтмай қайтиб келишига ажабсинган эди.

— Келинг, келинг, Шокирбек... Тошкент жўнамоқчи эдингиз?!

Отабек айвоннинг олдига ўтирас экан, кулди:

— Тошкентта бориб келдим...

Уста Олим унинг ҳазилини фаҳмлади·да, таҳорат ола·ола қизиқ вokiадан сўз очди:

— Марғилондан кетмаган бўлсангиз, ўзингиз ҳам эшигтгандирсиз, Шокирбек; сиз билан менга таржимаи ҳоллари маълум бўлган Ҳомид билан Содикни ва тағин Мутал деган яна бир йигитни Мирзакарим аканинг ҳовлиси орқасида ўлдириб кетибдилар. Ёмонлар ўз жазоларини топибдилар!

— Эшигдим,— деди Отабек ва тағин кулиб қўйди.

Уста Олим унинг бу кулгисига эътибор қилмаган эди, сўзида давом этиб сўради:

— Сиз булаҳни ким ўлдирган деб ўйлайсиз?

— Сиз·чи? — деди Отабек ва тағин илжайиб қўйди.

— Менга қолса,— деди уста Олим,— ўлдирувчи, албатта, Мирзакарим аканинг куёви Отабекдир... зап иш қилган·да, мен унга қойилман! Мен унинг Ўтаббой қушбегига қилган муомаласини эшитиб, юрагига балли деган эдим... зап йигит экан·да!

Отабек ўнгайсизланиб кетди. Уста Олим юз·қўлини артиб Отабекнинг қўлини олиб кўришмакчи бўлган эди, кўзи ўралган докага тушди:

— Қўлингизга нима қилди, Шокирбек?

— Пичноқ кесиб кетди...

— Ёмон кесдими?

— Сал.

Уста Олим Отабекнинг ёнига ўтирди ва:

— Нега Тошкент жўнамадингиз, бирорта моне чиқиб қолдими? — деб сўради.

— Моне чиқиб қолди...

— Қандай моне? — деди уста.

— Монеми,— деди Отабек ва кулимсираб: — Мен сизга бир катта гуноҳ қилиб кетган эдим... Йўлда бора туриб гуноҳимдан ўқиндим-да, сизга тавба қилгали Қўқондан қайтдим... Агар сиз гуноҳимни кечирсангиз, мен шу дақиқада Тошкент жўнайман!

Уста Олим ажабланиб Отабекка қаради:

— Ҳазиллашасиз...

— Ҳазиллашмайман, агар сиз кечирадиган бўлсангиз, гуноҳимни ҳам ҳозир иқрор қиласман!

Уста Олим кулимсираб сўради:

— Қани иқрор қилингиз, бўлмаса.

— Илгари кечиришга ваъда бериб қўйингиз.

— Менга қолса сизнинг ҳеч гуноҳингиз йўқ... Менга номаълум гуноҳингиз бўлса, кечирдим.

— Раҳмат,— деди Отабек ва сўради,— мен ким?

— Сизми, сиз Шокирбек!

Отабек уят аралаш кулиб қўйиб деди:

— Ана уста, менинг борлиқ гуноҳим сизнинг шу кунгача мени Шокирбек, деб билишингиздагина!

— Бўлмаса, сиз ким?

— Гуноҳимни кечиргансиз-а?

— Кечирганиман.

— Мен сиз билган Шокирбек эмас, тошкентлик Юсуфбек ҳожининг ўғли вა марғилонлик Мирзакарим аканинг куёви — Отабек!

Уста Олим бир оз ўзини кейинга ташлади ва қўзига жиқ ёш чиқарди.

— Сиз-а? — деди, келиб Отабекни қучоқлади.., Бу фавқулодда ҳолга тушуна олмай қолган Сайфи ишини тўхтатиб дўконхонадан қараб турар эди. Уста йиглаган ҳолда Отабекни қучоқлаб ўпди-да, айвонга кўрпача сола бошлади.

— Нима қилмоқчи бўласиз, уста? — деб сўради Отабек.

— Мен ўзимнинг янги меҳмонимни кўрпачага ўт-қазмоқчи бўламан! — деди кулиб уста Олим.

— Мен сизнинг кўрпачангизга кўп ўлтирганман, энди менга ортиқча такаллуфингизни ҳожати йўқ.

— Тўгри сўзламайсиз, Отабек, бу кунгача меним кўрпачамда ўлтириб юрган Шокирбек отли бир йигит эди. Энди мен ўзимнинг янги меҳмоним бўлган Отабекни сийламоқчи бўламан. Қани, Отабек, кўрпачага чиқингиз!

Отабек устанинг латифасига кулди-да, кўрпачага чиқиб ўтириди ва бу вақт Жаннат опанинг «шаҳид ўлган болам» деб йиғлаган товуши эшитилди-да, Отабек гуноҳкор бир юз билан уста Олимга қаради. У эса Отабекнинг бу қарашидаги маънони сезган эди:

— Зап қилгансиз, Отабек,— деди уста,— ёмонларнинг жазоси шундай бўладир... Ёнингизда кишиларингиз бор эдими?

— Йўқ.

— Уч душманга қарши ёлғиз ўзингиз?

Уста Олим Отабекка тушуна олмай қараб тургач, сўради.

— Ёлғиз ўзим! Худо ёмонга жазо берадиган бўлса, шундай бўлар экан.

Уста Олим тамом ажабда қолган эди:

— Субхонолло! Қандай юрагингиз бор экан, Отабек! Қўлингиздан бошқа ерингизда жароҳат йўқми?

— Йўқ. Бўқсанм устига бир оз ханжар учи тегиб ўтган бўлса ҳам, аҳамиятсиз.

— Худога шукур, Отабек! Сизнинг бу ишингиздан қайин отангизнинг хабари бор эдими?

— Йўқ эди. Бу ишни ҳозиргача бир ўзим ва бир тангри билди. Энди бу сирни билувчиларнинг учинчиси сиз бўлдингиз!

— Астагфурилло! — деб қўйди уста Олим.— Рақибингиз Ҳомидни биринчи марта бора Фарфи орқали таниганингизми?

— Биринчи марта бора танишим,— деди уфлаб олиб Отабек,— бунга ҳам сизнинг билан бўлган ошналигим кўмак берганликдан, сизга миннатдорлик қилишдан ожиздирман!

— Сизнинг ақллар ишонмаслик қаҳрамонлигингизга юрагим қинидан чиқиш даражасига етди, Отабек! Ҳомиднинг бу кейинги режасини қаердан билдингиз?

Отабек кулди:

— Худога шукурлар бўлсинки, менинг тортган оҳларимни қуруққа юбормай, кутмаган ердан сирни билдириди. Мен сизга ҳикоямни бошидан сўзлаб берайми ва ё Ҳомиднинг режасини билишимнигинами?

— Бошидан сўзлангиз, Отабек! — деди ҳовлиқиб уста Олим ва иш тўғиши ила машғул Сайфини сабзи тўғрашга буюрди.

Уста Олимни ҳикоя тингламоқ учун ҳозирланганини кўргач, Отабек деди:

— Таҳоратнинг сабаби ёдингиздан кўтарилди, шекилли!

— Кўтарилгани йўқ, Отабек, ёмоннинг жанозасидан, яхшининг ҳикояси фойдали кўринадир... Қани сўздан келинг!

Отабек ўзининг чин дўстига биринчи марта Маргилон келишидан тортиб ҳикоясини сўзлаб кетди. Унинг уч йил ичидан бошидан ўтганлари бир соатли вақтга чўзилиб, Сайфи ошни сузиб келганда, йўлда учрашган Раҳмат билан ҳикоясини тугатди. Уста Олим Отабекнинг елкасига қоқиб дер эди:

— Сизда чин юрак бор, дўстим! Бу юрагингиз билан ҳеч вақт дард қолмайсиз, Отабек! Аммо мендан чин исмингизни яшириб келганингиз учун сизни айблай олмайман. Бироқ жума кун кечаси Ҳомид изидан менинг ҳовлимга кириб-да, менга ўзингизни билдирмай кетганингизга хафа бўламан, худой кўрсатмасин, бир фалокат юз берганда, нима бўлар эди?

Ошдан сўнг уста Олим шундай фотиҳа ўқиди:

— Душманларингизнинг йўқ бўлганлари чин бўлсин, севганингиз билан энди масъуд яшанг!

Отабек ташаккур этди. Тағин бир оз чой ичиб сўзлашгандан сўнг, Отабек дафтаридан иккита хат чиқариб деди:

— Сизга оғир келмаса, бир хизмат топширмоқчи-ман, уста!

— Буюрингиз!

Отабек қўлидаги хатларни узатиб:

— Мен шу соатнинг ичилга Тошкент жўнашга мажбурман. Шунинг учун сиз бу хатларни қайин отамни-кига ўз қўлингиз билан элтиб берасиз.

Уста унинг бу гапига тушуна олмай қолди:

— Нега энди Тошкент жўнайсиз, ўзингиз...

— Ўзимга мумкин эмас, чунки... икки томсига ҳам

ўнғайсиз. Мен ҳозир кетишга мажбурман, балки ўзингиз ҳам англарсиз.

— Англадим,— деди уста ва,— гап-сўз босилаёзгач, келмакчимисиз.

— Балки...— деб тўхтади Отабек,— хатларнинг бириси қайин отамга, иккинчиси унга,— деди.

— Хўп.

— Қайин отамга ёзганим қисقا бўлгани учун, сиз унга мендан эшитганларингизни сўзлаб қондирасиз. Қутидор билан ишингизни тугатиб қайтишингизда унинг хатини берарсиз, тузукми?

— Маъқул.

— Учрашганингиз тўғрисида менга маълумот ёзсангиз, тағин миннатдор қиласардингиз...

— Бош устига.

Шундан сўнг иккиси қучоқлашиб кўришгач, видолашдилар.

Отабек эшиқдан чиққанда Содиқни кўмиб келган кишилар қуръон ўқиб тарқалмоқда эдилар.

17

ХАЙРИХОҲ ҚОТИЛ

Миршаблар томонидан қўрбоши махкамасига сўроқча олиб кетилган қутидор қайтиб йўлакка кириши билан, минг хил ташвишда ўтирувчи Офтоб ойим ила Кумушга қайтиб жон кирган каби бўлди. Кумуш, отасининг олдига қанот ёзган каби югуриб, унинг соқолини силар экан, сўради:

— Сизга зарар бермадиларми, отажон?

— Йўқ, қизим.

Офтоб ойим эрининг бу сўзини эшитиши билан Хўжа Баҳоваддин йўлига ўгириб қўйган етти танга пулинни Тўйбекага бериб, дарров эшонникига жўнатди ва шундан сўнг эридан сўради:

— Сизга айб қўя олмадиларми?

— Худога шукур, оқландим,— деди қутидор.— Чиндан ҳам менда қандай айб бўлсинки, ўзимиз ҳам бу ҳангомани уйқудан туриб пайқаган бўлсак. Уйимиз остини ёмонлар тешган бўлсалар ҳам, аммо киши сифмасли бўлганлиги мени оқликка чиқарди. Лекин киши сифадиган бўлиб тешилганда ҳам, мени айблай олмас

эдилар, зероки, уйимиз остини тешган муттаҳамлар албатта, яхши ният билан тешмаган бўлиб, молимиз ва жонимиз қасдида эканликлари маълум эди. Башарти, котил мен бўлиб кўринганимда ҳам, молим ва жоним қўриғида ўғриларни ўлдирганинг учун яна гуноҳкор бўлмас эдим. Ҳар ҳолда бу фожиа бизга заарсиз бўлиб ўтдики, бунинг учун ҳақтаолога қанча шукур қиласак арзийдир,— деди ва айвонга чиқиб танчага ўтиргач, Кумушдан сўради.— Ачанг келмадими?

Офтоб ойим жавоб берди:

— Қаттиғ оғриб қолибдир,— ва сўради,— кимлар ўлдириб кетганини била олмадингизми?

Қутидор ажабсинаб хотинига қаради:

— Қизиқ сўз айтасан-а! — деди. — Бу ишга бутун шаҳар ҳайрон. Қилни қирққа ёрадиган донолар ҳам бир нарса тўқий олмайдилар... Аммо менинг кўнглимга келадиргани шулки, бизнинг молимизга кўз олайтурган ўғрилар беш-олти киши бўлиб, уйни тешаёзган вақтларида ораларига низо тушиб, бир-бирлари билан пичоқлашган бўлсалар керак?

Кумуш отасининг бу кашфига қарши тушди.

— Бу гапингиз тўғри эмас, ота,— деди.

— Нега тўғри эмас?

— Негаки, бир-бировларини ўлдиришиб, бизга зарар бермасдан қуруққина кетмас эдилар.

— Тонг отиб қолгандир, ёки улар ҳам ҳолдан той-гандирлар,— деб жавоб берди қутидор.

— Бу орада Ҳомид нима қилиб юрибдир, ўзига тузуккина бой киши эмасми эди? — деди Офтоб ойим, бу вақт Кумуш секингина онасига қараб олган эди.

— Ҳомид нияти бузуқ бир йигит эди,— деб жавоб берди қутидор.— Эҳтимолки, унинг топган давлати ўғирлик орқасидадир, кишининг давлатига қараб ҳукм юритиш қийин.

— Худойимдан ўргилайки,— деди Кумуш энтикиб ва даҳшатланиб,— ёмонларнинг жазосини ўзи берган. Ўғрилар тешиб олдимга чиққанларида мен нима қилар эдим? Оҳ, отажон! Мен ажалимдан беш кун бурун ўлар эдим. Қизингиздан ажралур эдингиз!.. Мени гафлат уйқуси босмаган бўлса, нега бир газлик пахсани кесар эмишларда ва бошимдан туйнук очар эмишлар-да, мен ҳеч нарса сезмас эмишман!

Офтоб ойим бошини чайқаб:

— Шуни айт, қизим! — деди.

Қутидор:

— Худонинг қандай ҳикматлари бордирки, шу ке-ча-кундузларда бизнинг теварагимизда қонли воқиалар кўрила бошлади: бугун никоҳ деганимизда Комилбекни ҳаммомда ўлдириб кетдилар, кеча уйимиз орқасида бир эмас, уч киши ўлдирилдилар. Худо охирини баҳайр қилсин, энди!..

— Ишшоollo ишнинг охири хайрликдир, отажон,— деди Кумуш,— чунки бизнинг молимизга қўз олайтириб ёмон ният билан уйимиз орқасини тешгувчиларни ер билан яксон этдириши истиқболимизнинг хайрлик фолларидандир, отажон!

Қутидор:

— Тўғри айтасан, қизим,— деди.

Кумуш ўзининг қўнгироқдек товуши билан давом этди:

— Бу мақтуллар¹ кимлар бўлса бўлсин, бизнинг уйимиз орқасига яхши ният билан келувчи кишилар эмас ва буларни тупроққа қориширувчи ҳам бизга хайриҳоҳ бўлган қотил ва ё қотиллардир... Бизга мунча яхшилик қилган киши ким бўлса ҳам худо умрини берсин! — деди.

Қутидор қизининг сўзини кучлаб тушди:

— Бизга ёмон ният билан қараган бўлсалар, худо жазоларини берди. Бизга хайриҳоҳ бўлганларнинг ҳам хайри жазоларини берар! — деди.

Кумушбиби, бу қўрқинч уйда ёта олмаслигини билдиргани учун, Офтоб ойим Тўйбекадан Кумушнинг буюмларини иккинчи уйга ташита бошлади. Қутидор эса бутун кун меҳмонхонасига келиб-кетиб турган кўнгил сўровчи ошна, ёр-дўстлари билан овора бўлди.

* * *

Шомдан сўнг қутидор эндигина меҳмонлардан бўшаб ичкарига кирган эди, меҳмонхона йиғишириб қолган Тўйбека қутидор ёнига келиб деди:

— Сизни бир киши чақирадир.
— Қанақа киши, танидингми?
— Танимадим.

¹ Мақтуллар — ўлдирилган, қатл қилинган кишилар.

Қутидор эринибгина ташқарига чиқди-да, меҳмонхонада ўтирувчи таниш бўлмаган киши билан совуққина кўришиб, сўради:

— Хизмат?

Уста Олим қутидорга кулимсираб олгач:

— Рухсатсиз меҳмонхонангизга кирганим учун кечирасиз,— деди.

— Айби йўқ, мулла! — деди қутидор ва қаршима-карши ўтиришдилар.

— Ёмонлар сунқасидан саломат қутулишингиз муборак бўлсин!

— Тангрига қуллуқ бўлсин! — деди қутидор. Мехмонхона қоронғулашиб кетгани учун ҳовли супуриб юрувчи Тўйбекага даричадан туриб буюрди.— Шам ёқиб чиқ, Тўйбека!

Шам чиқинини кутгандек уста Олим бошини қуий солиб ўтирап эди. Қутидор «нима юмушинг бор менда» дегандек қилиб унга савол назари билан кўз ташлар ва қуръон тингловчи кишидек бўлиб ўтирувчи мажҳул кишидан таажжубланаар эди. Ниҳоят, шам келиб токчага қўндирилгач, уста Олим сукутдан бошини кўтариб қутидорга қаради:

— Мендан таажжубландингиз,— деди ва қўйнидан мактубларни чиқариб, биттасини кутидорга узатди,— мендан ҳам бу мактуб ажиброқдир! — деб кулди.

Қутидор хатнинг унвонига кўз югуртириб чиққач, уста Олим айтгандек таажжуб ичидаги очди... Ўқиб битиргач, у даҳшат ва таажжуб ичидаги тошлек қотиб қолган эди... Агарда уннинг ёнцида уста Олим бўлмаганди эди, эҳтимол у қай вақтларгача серрайиб қолар эди.

— Жон ва оиласигиз душмани бўлган бир балбахт ёнди ўз қилмишининг жазосини кўрди, бигодарим Стабек уларнинг тотиқларини хўп боплаб берди,— деди уста Олим ва давом этди,— шунинг билан сизнинг нажиб оиласигиз даҳшатли фожия даврларини кечириб, ёнди масъуд кунлар арафасига етди. Хатни ўқиб сизнинг даҳшатланишингиз эмас қувонишингиз, душманнингизнинг юз тубан қилгани учун ҳақ таолога шукур айтишингиз керакдир!

Қутидор ҳушини бошига йиғаёзди ва уфлаб тин олгач, ҳаяжон ичидаги сўради:

— Мен билан Отабекни қаматтирган ва дор осталрага юборган Ҳомиидми?

— Ҳомид!

— Талоқ хати ёзувчи Отабек эмасми?

— Ҳошо¹ ва калло² Отабек мундай гапдан хабарсиз. Унинг отидан талоқ хати ёзғувчи ҳам шу бадбаҳт Ҳомид.

Бундан сўнг қутидор туриб ичкарига югурди, ярим йўлданоқ танчада ўтирувчи Офтоб ойим билан Кумушга қичқирди:

— Сир очилди!

Иккиси ҳам сачраб қутидорга қарадилар-да, бирдан сўрадилар:

— Нима, қандай сир?

Қутидор танчага бориб ўтирумади-да, айвон пешонасидан туриб, қўлидаги хатни юқори товуш билан ўқиб чиқди:

«Муҳтарам қайин отамизга!»

Сиз билан мени қоронғу зивденларга тушириб, дор остларигача торган, бунинг ила ўзининг ваҳшиёна тилагига ета олмагандан кейин, менинг тилимдан сохта талоқ хати ёзиб дарбоза ёнидан ҳайдаттиришга муваффақ бўлган ва бир гуноҳсизни шаҳид этган Ҳомид исмли бир тўнгизни, ниҳоят икки йиллик саргардошлик сўнгтида, ёрдамчилари билан тупроққа қоришишишга муваффақ бўлдим... Сизнинг шонли ҳовлингиз ёнида всё бўлган бу кураш, албатта, сизни ва уй ичингиз ҳам ёр-дўстларингизни анчагина тинчсизликка қўйган бўлса керак. Начораки, ёмонларни сизнинг ҳовлингиз орқасида рафиқам қасдида бўлганлари пайтида учратишга тўғри келди ва мен бу ишга мажбур қолдим. Бунинг учун, албатта, мени кечирарсиз умидидаман. Фақат сизнинг тинчсизланишингиз ва мардумнинг юқори-қуви сўзи бўлмаса, сизга бошқа зарар бўлур, деб ўйлай олмайман. Сиздан бу улуғ гуноҳим учун афв сўраб, ҳайдалган ўғлингиз — Отабек Юсуфбек ҳожи ўғли».

Аммо қутидор «ҳайдалган» сўзини ташлаб ўқиди. Мактуб ўқилиб битганда Офтоб ойим, айниқса, Кумуш қутидорнинг бояги ҳолига тушган эдилар. Кумушнинг

¹ Ҳошо — шаксиз.

² Калло — шубҳасиз.

бу дақиқадаги ҳолини қалам билан чизиб кўрсатиш, албатта, мумкин эмас эди. У титрар эди, кўкарап эди, тўлғанар эди... Ҳозирги энг кучли ҳаяжон ва ҳиссиётни, ҳиссиётнинг аъло ифодаси бўлган ёш билан тўкар эди.

Қутидор ўз томонидан ҳам изоҳ бериб чиқди:

— Мен билан Отабекни қаматиб дор остига юборувчи, Отабек тилидан сохта талоқ хати ёзиб бир-биримиздан жудо этувчи, Комилбекни ўлдирувчи, уйимиз орқасини тешиб, Кумуш қасдида бўлувчи — ҳаммаси ҳам шу баттол Ҳомид экан... Аммо бадбаҳтни икки кишиси билан тупроққа қоришириб кетувчи Отабек экан!..

Офтоб ойим титраган товуш билан:

— Уятсиз Ҳомид! — деди.

Кумушбиби:

— Бечора бегим! — деб қўйди.

Учкови ҳам юракни тўхтатиб олиш учун анчагача жим қолдилар.

— Ўзи эсонмикин? — деб сўради охирида Кумуш.

— Хатига қараганда сөғ,— деди қутидор.

Офтоб ойим сўради:

— Ўзи қаерда эмиш, хатни сизга ким келтирди?

Бу саволдан қутидорнинг эсига меҳмонхонада ўтирган уста Олим тушган эди. Ўрнидан иргиб турди-да, хотинига жавоб бермасдан ташқарисига чиқди. Уста Олимнинг қаршиисига ўтирганда, меҳмонхонанинг юқори даричаси остига Офтоб ойим билан Кумуш хат келтирувчининг сўзини эшитиш учун келиб тўхтаган эдилар.

Қутидор узр айтди:

— Келтирган хабарингиз таъсирида сизни унутаёзиман...

— Мен буни пайқадим,— деди уста Олим кулиб,— шу йўсинда маккор Ҳомиднинг иблисона дасисаси¹ бир оилани тамом ишдан чиқараёзганким, бу тўғрида айниқса сизга сўзлаш ортиқчадир. Аммо арслон юракли Отабек ҳам бадбаҳтни шундоғ янчидан ташладики, бу жуда оз кишилар қўлидан келадиган ишдир!

— Ўғриларни ўлдирганда Отабекнинг ёнида неча кишиси бўлган? — деб сўради қутидор.

Уста кулди:

¹ Дасисса — макр, ҳийла, найранг.

- Отабекнинг танҳо ўзи! — деди.
- Уч кишига танҳо ўзи?! — қутидор ишонмаган эди.
- Азаматнинг ёлғиз ўзи! — деб уста Олим илгари-ги сўзини қайталади.
- Астағурилло. Нега бу тўғрида хабар бермаган?
- Сизга хабар бериб ўтиришни йигитлик отига эп билмай, ҳатто, менга ҳам бир нарса сездирмаган. Мен ҳали бу нуқсони учун айбласам: «Мен ўзимнинг ашаддий душманим билан танҳо курашиб ё жон бермоққа ва ё жон олмоққа қарор берган эдим. Шунинг учун ҳеч кимга ҳам билдирамадим» дейдир.

Қутидор бир томондан даҳшатга тушса, иккинчи жиҳатдан Отабекнинг дов юрагига ҳайрон қолар эди.

- Ўзига жароҳат олганми? — деб сўради қутидор.
- Бўксаси билан қўлидан яраланган бўлса ҳам, заарарсиздир.

Уста Олим қутидорнинг баъзи бир эътиrozларига қарши, Отабекнинг қутидор томонидан қувланганидан тортиб, шундан бери Марғилонга етти-саккиз мартаба келиб кетганини, ҳар бир келишида ўзининг уйига келиб тушганини ва қалин ўртоқ бўлиб олганларини, шундай бўлса ҳам Отабекнинг ўзидан чин исмини яшириб юрганини, жума куни уста Фарфидан биринчи мартаба ўз рақибини танишини, ниҳоят бу кунгина унга чин исмини очганини сўзлаб чиқди.

— Талоқ хати-ку сохта экан,— деди қутидор,— нега бизниги бир келгани билан қайтиб келмади экан?

— Чунки унинг сўзига қараганда, сиз уни оғирроқ тариқа билан дарбозангиз ёнидан жўнатган экансиз,— деб изоҳлади уста.— Тошкентдан уйланишида сизнинг билфеъл бош қўшишингизни фақат қизингизни ундан чиқариб олиш учун қурилган бир ҳийла экан деб ўлаб, қайтиб эшигингизга оёқ босмаган, ҳатто хотинини қо-зига чақириш тўғрисида фикри бўлса ҳам, сиз билан учрашишдан қочиб, бу фикридан ҳам қайтган, яъни сизнинг қизингиз бўлгани учун севган хотинидан ҳам кечмакка қарор берган!

Қутидор ҳали ҳам Отабекнинг руҳига тушуна олмаган эди:

— Мендан ўзи хафа бўлган бўлса, орага киши қўйса ҳам бўлар эди.

— Шундог қилса ҳам бўлар эди,— деди кулиб уста Олим.— Мен ҳали ундан шундай деб сўрасам, «ўзимга ишонмаган киши, киши сўзига киармиди, деб ўйладим» дейдир. Куёвингизнинг қизиқ табиатини шундан ҳам яхши билиб олсангиз бўладирки, шу чоққача отоналари ҳам бу фожиадан хабарсиз эканлар!

— Қизиқ йигит,— деди қутидор,— мендан ҳам катта нодонлик ўтган!

— Ҳаммаси ҳам тақдирнинг иши, амак, бу орада сиз билан менинг ҳеч бир ихтиёrimiz йўқ.

— Албатта йўқ,— деди қутидор ва сўради,— ўзи сизницидами?

— Бугун пешинда Тошкентга жўнаб кетди.

Қутидор тушуна олмаган эди:

— Нега, нега? — деб сўради.

— Нега, сабабини мен ҳам яхши тушуна олмадим.

— Қайтиб келадиган вақтини айтгандир?

— Бу тўғрида сўраган эдим, муҳмалроқ жавоб берди,— деди уста ва ёнини кавлаб хатни олди.— Бу хат каримангизга бўлса керак, энди менга рухсат! — деди ва фотиҳа ўқиб ўрнидан қўзғалди.

— Мен сизга дастурхон ёздиришни ҳам унутганиман, қўзғалмангиз!

— Раҳмат, амак, ҳозирча мени кечириб турасиз, аммо бафиржа каттароқ зиёфатни унутмайсиз,— деб кулади уста Олим. Қутидор уни кўчагача кузатиб чиқди.

Кумушбиби дарича орқасидан ҳамма гапни эшлиб олган ва ҳисснётини юм-юм йиғлаб ўтказган эди.

* * *

Офтоб ойим Кумуш билан бошлашиб ичкарига кирап экан, сўради:

— Ҳомиднинг ёмонлигини бизга улаштириб юрган пучук хотиннинг шумлиги ўз бошига етиб, ўлганларнинг биттаси ўшанинг ўғли экан, билдингми?

— Ўлганидан менга нима фойда,— деди Кумуш.

Офтоб ойим қизига ажабланган эди.

— Фойдасини кўриб турибсан-ку, ахир!

— Фойдаси Тошкентга кетиб қолганими?

— Кетиб қолган бўлса, тағин бир кун келар.

— Келмайди,— деди ўксисб Кумуш,— унинг ҳамма ҳаракати душманидан ўчини олиш учун экан!

— Ким айтди сенга?
— Хат олиб келганинг сўзидан пайқадим.
Офтоб ойим кулди:
— Эринг сени ташлаб кетмас, қўрқма, қизим,—
деди,— сенинг бошингта тикилган бу балоларни ўзининг ширин жонидан кечиб даф қилган Отабек, сени сира ҳам унутмас, сенга ёзган хатини отангдан олиб ўқиб кўрчи олдин.

Кумушбиби йифидан қизарган кўзини катта очиб сўради:

— Менга хат ёзганми?
— Ҳалиги киши сенга атаб дадангта бир хат бердику, билмадингми?
— Билмадим,— деди, чунки у, уста Олимнинг «муҳмал жавоб берди» сўзини эшигга, тамоман ўзини унутиб, берилган хатни пайқамай қолган эди.

Икки йилдан бери суратини кўз ўнгидан кеткизолмаган Отабекнинг юзини кўролмай, сўзини эшита олмаса ҳам, ёзган хатини ўқиб эшитиш Кумуш учун катта қийматга молик эди. Отасининг йўлақдан кириши билан латиф кўкраги кучли тин олиш ила кўтарилиб ташланди-да, гўё Отабек билан учрашадигандек юраги ўйнамоққа бошлади. Қутидор келиб, танчага ўтиргач, ўзига «омонатни топшиғинг» деган каби қараб турган Кумушга хатни узатди:

— Сенга хат.

Кумушбиби уялиб-нетиб турмади ва кимдан деб ҳам сўраб ўтирамди, дарров токчада ёниб турган шам ёкига бориб хатни оча бошлади. Шам қарписида қизарган шаҳло кўзлари, ёш билан сингтан жингила киприклири, чимирилган тўсдек қора қошлини уни аллақандай бир ҳолга қўйган эдилар. Қош устига тўзгиб тушган соchlарини тузатиб хатни ўқиди:

«Ой юзли рафиқам, қундуз қошли маъшуқам Кумуш хонимга!

Шайтон устаси бўлган Ҳомиднинг менинг номимдан сизга ёзган талоқ хати ила менга қарши ёниб кетган юрагингизнинг нафрат ўти эҳтимол энди ўча тутган-дир. Сохта талоқ хатини олгаи сўнгигизда менга хитоб қилиб ёзган фикрларингиздан эҳтимол энди кайтаёзгаидарсиз... Бу хатни ёзар экан, муҳаббатингиз билан тўлиқ бўлган юрагим мудҳишибир ҳақиқат эҳти-

молидан япроқ каби титрар ва ўзининг тўлиб-тошган ҳасратларининг, фарёдларининг ифодасидан адашар эди... Сизга очиб сўзлай, гўзал рафиқам: гўё менинг бу мактубим сизнинг Комилбек учун ҳасратли ёшлар тўккан, ўтли оҳлар тортган чоғингизда эришар-да, унтилган, эскирган бир юракнинг арзини тинглай олмасиз ва ёниб турган юрак ўтингиз билан куйдирарсиз...

Аммо хатимни ўқимасангиз-да ва марҳумингиз учун тортган оҳингиз ўтида куйдирангиз-да, менинг учун фарқсиздир. Нега дейсизми? Чунки сиз менинг шаръий рафиқамсиз — яхшилик билан-да ва ёмонлик билан-да мен буни исбот қилишга ҳозирман!

Уйингиз орқасида қилган адабсизликларим, хунхўрликларим учун мени кечирингиз... чунки мен бу ваҳшийликни ишлашда ихтиёrsиз эдим: ҳаётингизнинг, номусингизнинг сақланиши буни тақоза этар эди... Албатта, мен ишонаманки, сиз менинг бу яхшилигим учун миннатдорлик қиласиз. Лекин мен бу миннатдорчиликка ўзимни сазовор ҳисоблай олмайман.

Мен ўшал кун кечаси душманлардан бирини ўлдирдим-да, сўнг даражада заифландим, иккивчи душмандан енгилишимни ва кўйингизда жон беришимни аниқ билиб роҳатланаб кетдим... Менинг учун кўйингизда ва оёғингиз учida жон бериш жуда ширин эди ва кўпдан бери ғоям эди. Шу сабабли яқинроғингизда ўлмоқ учун, ўлар эканман, сўнг дақиқамда яна бир мартаба бўйингизни олиб ўлиш учун душман томонида уйингизга очилган тўйнукчага кирдим. Кирдим-да, сизнинг бўйингизни оддим, хафиғ тин олгандаги латиф ухлаган товушингизни эшилдим... Шу вақт, субҳонолло... ўзимда қутимаган бир куч сезган эдим, икки эмас, икки юз душманга муқобила¹ этишга ўзимда қудрат кўрган эдим... Мен ўзимга бағишлиланган куч манбаини жуда яхши англардим, мендаги бу ўзгариш манбаи уйичида ухлагувчи бир малак эди... Сиз эдингиз!»

Кумушбиби хатнинг бу ўрнига етганда қизариниб, бир оз ўқищдан тўхтаб олди ва давом этди:

«Шундан сўнг иккинчи душманни туйнукдан чиқмаёқ ишини битирдим. Бизнинг фожиамизининг асл

¹ Муқобил — қарши туриш.

омили бўлган Ҳомид эса гўё менинг қўлимда мушук каби ўйин бўлган, уни кулиб туриб, ўйнаб туриб ти-лимлаган эдим...

Эсингизда борми, мени дор остидан қутқазиб, менга янги ҳаёт багишлаганингиз? Бу кеча ҳам бу иккинчи ўлимдан қутқазувчи ва иккинчи марталаб менга ҳаёт багишловчи яна сиз бўлдингиз! Шунинг учун миннатдорлик этгувчи сиз эмас, мен бўлишга тегишиман!

Сиздан эмас, отангиздан бир ўпқалашим бор: сохта талоқ хатини менинг ўз қўлим бўлиб, бўлмаганини ажрата олмаган. Гумонимча, бу сохта хат сизга ҳам кўрсатилмаган ўхшайдир, чунки, айниқса, сизнинг кўз ўнгиздан бу ҳақиқат қутула олмас эди... Ҳар ҳолда тақдирнинг бунчалик ўйинлари турган бир замонда биз нима ҳам қила олур эдик. Бу тўғрида мендан ҳам ўтган жойлари бордирки, сизнинг биринчи маргаба менга ёзган хатингиз маъносида даҳшатли суръатда ўзимни тағофилга соглан ва хат келтирувчини суриштирмасдан жавоб хати бериб юборган эдим. Шунинг ила сизни-да, ўзимни-да Ҳомид қўлида ўйин бўлмогимизга катта йўл очган эдим.

Баъзи эҳтимолларга қарши, сиз билан кўришмак менга муюссар бўлмади. Умримда биринчи мартаба кўнгил орзусига қарши бордим. Чунки, менимча, орадаги қора тикан супурилган эди. Бундан сўнг ҳамиша менини эдингиз. Мен Тошкентда юрарман, аммо кўз ўнгимда сизнинг ҳайкалингиз! Ажабо, бусиз менга мумкинми?!

Завжингиз Отабек».

Кумушбиби хатни ўқиб тугатди-да, юрганича ўйига кириб кетди. Унинг бу ҳаракатидан Мирзакарим қутидор билан Офтоб ойим ажабсиниб бир-бирларига қарацгандар. Кумушбиби қўлида иккинчи бир мактуб кўтарганича уйдан чиқди-да, шам ёнида икки хатни бир-бисига солиштириб кўрди. Бу хат Ҳомиднинг Отабек тилидан ёзган талоқномаси эди. Бу икки хат биринчи қаращаёқ, икки киши томонидан ёзилганликларини ўз оғизларидан сўзлаб турар эдилар.

Кумушбиби икки хатни қатор ушлаб отасига кўрсатди:

— Буларга қарангиз, ота! Бизни нечоғлик ғафлат босган экан! — деди.

Қутидор қизининг мақсадига тушуниб, икки турли қўлни дарров пайқаб олди:

— Виждансиз, ибليس,— деб қўйди.

Кумушбиби Отабекнинг хатини буклаб чўнтағига солди-да, сохта хатни шамга тутиб ёндирад экан, отасидан сўради:

— Шу воқиадан сўнг қуёвингиз аниқ келганми эди?

— Келган эди, қизим.

— Бечорани нега ҳайдадингиз-да нега мени, лоақал ойимни бу келишдан хабардор қилмадингиз?

— Мен унинг келишини бошқа гапга йўйиб, сизларга билдирмаган эдим...

— Қизингизни талоқ қилган бир кишини Тошкент деган жойдан эшигингизга келиши сизга ғариб туюлмагани эди?! — деб яна сўради Кумуш.

Қутидор уялиш ва ўқиниш орасида:

— Жаҳолат келса, ақл қочадир, қизим! — деб қўйди.

Офтоб ойим билан Мирзакарим қутидор Ҳомиднинг иблисона ишларига «тавба, тавба» деб муқобила қилсалар ҳам, аммо Отабекнинг фавқулодда юрагини сўз орасида «барака топкур», «умринг узоқ бўлгур!» билан қарши олар эдилар. Кумушбиби эса бутунлай бошқа қайғуда эди. Эру хотиннинг сўзлари Отабекнинг Тошкентга кетиб қолиши тўғрисига келиб тақалди-да, Офтоб ойим Кумушдан сўради:

— Сенга келишидан айтганми?

Кумушбиби силталаш назари билан уларга қаради ва кескин оҳангда жавоб берди:

— Айтмаган!

Эру хотин маънолик қилиб бир-бирларига қарашиб олгач, орада узоққина сукут бошланди. Кумуш отасига савол назари билан бир-икки қайта қарааб ҳам қўйди.

— Келиб қолса, яхши! — деди ниҳоят қутидор,— келмаса, Тошкентга ўзимиз тушамиз-да! — деб хотинига қаради.

Бу гап Офтоб ойимга ёқмаганликдан юзини четта бурди. Аммо Кумуш отасидан рози қолиб, онасиға қаради.

— Қизинг ҳар қайси ерда бўлса ҳам соғ бўлсин! — деди хотинига қутидор.— Эрига топшириб, сен билан менинг тинчгина дуо қилиб ўлтирганимиз маъқул ўхшайдир!

— Энди қизингизнинг бир ками кундош балоси эдими? — деди сапчиб Офтоб ойим. Қутидор хотинига кулиб қаради:

— Эри яхши бўлса, кундош балоси нима деган гап!?

— Эри минг яхши бўлсин, барибир кундош кундошлигини қила берадир. Машойихлар билмасдан «кундош» демаганлар.

Қутидор қизига қараб кулди ва хотинини юпатди:

— Ҳамма вақтта эмас, қўрқма!

— Менга қолса бир кунни ҳам кўп кўраман, кундош билан кечирилган кун кунми!

— Куёвингнинг шунча қилган жонбозлигини унутдингми?

— Нега унутай,— деди Офтоб ойим.— Келсин! Мана бош усти, болам бир эмас икки. Улдирки, қизимни кундош устига юборишга тиш-тироғим билан қаршиман.

— Беш-олти кунга ҳам-а?

— Неча кунга?

— Менга қолса битта-иккита болалик бўлгунча турсин, деяр эдим. Сен бунга кўймасанг, бир-иккى ой туриб келсин, лоақал! Бир йигит қизингни деб икки ийлаб сарсон бўлганда, қизингни икки ойлик кундош азобидан хайф кўриш жуда уят, ахир!

Қутидор «битта-иккита болалик» сўзини айтганда Кумуш қизариб ерга қараган эди. Офтоб ойим эрининг кейинги сўзи билан анчагина бўшаши:

— Бир ойдан ортиқقا мен рози эмасман, шунда ҳам кўёвимнинг яхшилиги учун! — деди.

— Ана энди ўзингга келдинг, хотин!

— Ўзимга келсам-келмасам шартим ҳалиги, шунда ҳам ўзим бирга бориб келаман.

— Албатта, ўзинг бирга борасан, қудаларинг билан танишмоғинг ҳам зарур.

— Қачон юбормоқчи бўласиз энди? — деб сўради Офтоб ойим.

Қутидор бир оз ўйлаб олгач, Кумушга қараб жавоб берди:

— Отабек билан кетма-кет чолищмоғимиз ҳам унча маъқул кўринмайдир. Ундан сўнг қиши куни арава сафари ҳам қулай иш эмас. Шунинг учун орадаги уч ой қишини ўтказиб жўнармиз,— деди. Кумушнинг уч ой муддатни эшитгач, жуда ҳам ҳурпайиб кетгани учун бўлса керак.— Балки ўзи ҳам бирор ойларда келиб қолар,— деган сўзни-да қўшиб қўйди.

УЧИНЧИ БЎЛИМ

МУСУЛМОНҚУЛ ИСТИБДОДИГА ХОТИМА

Мусулмонқулнинг аҳолига бўлган жабру зулми ҳаддан ташқари кетди. Унинг истибоди ўзга шаҳарларга унча сезилмаса ҳам, аммо марказ — Қўйон одамларини жуда тўйдирди. Унинг ўз кайфича ойда эмас, ҳафтада солиб турган солиқлари фуқаронинг терисини шилса, арзимаган сабаблар билан қорачопсонларни остириб, кестириб туриши хосни ҳам эсанкиратди. Отигагина хон бўлиб ўтирувчи Худоёр ҳам, остириш, кестириш ва ёрлақаш ўз ихтиёрида бўлган Мусулмонқул майдондан олинмагунча ўзининг қўғирчоқ сифат юра беришини тушунди. Кўпдан бери унга юрагида кек сақлаб келиб, аммо не тариқада нажотга чиқишини билмади, чунки у суюнадиган Қўйон бекларининг «мана» деганлари Мусулмонқул ва кишилари томонидан осилиб, кесилганлар, қолганлари товуш чиқаришга мажолсиз эдилар. Атроф шаҳар ва қишлоқ беклари ҳам аксар Мусулмонқулнинг ўз одамларидан, улардан бир иш кутиш яна мумкин эмас.

Шаҳар халқининг ҳар бир табақаси деярли Мусулмонқул даккисини еб келган, магар уламо халқи ундан жуда рози, зероки, Мусулмонқулнинг биринчи суюнчиғи ўзининг одамлари бўлса, иккинчиси уламолар эди. У, уламо орқали ўз зулмини машруъ бир тусга қўйган, ўзи учун зарарли унсурларни йўқотишда уламолар-

дан «улул амрга бөгийлиқ» деган фатвони олишни унутмаган эди. Уламонинг бу янглиғ истибодони «бөгийлиқ» ранги билан бўяб бериши мукофоти учун Кўқон ва Андижон каби шаҳарларга маълум мадрасаларни бино қилган ва бу мадрасаларга хизмати билан танилган уламодан мударрислар тайинлаган эди. Аммо Мусулмонқулга яқинлаша олмаган, яъни унинг хизмат ва марҳаматидан четда қолган «нимча» уламолар ҳам йўқ эмас эдилар.

Астойдил Мусулмонқулнинг оталигидан қутулишни ва мустақил равишда ҳукмрон бўлишни орзу этган Худоёр, ниҳоят қайнин отаси билан курашда ўзига биринчи суюнчиғ қилиб шу кейинги синф уламони оди. Мусулмонқул балосидан қутулгандан сўнг Худоёрнинг уларга қиладиган инъом ва эҳсонлари, берадиган мансабларининг нақддек ваъдаси баракасида бу кейинги табақа Кўқон муллалари ҳаракатга келдилар.

Мусулмонқул тарафдори уламолар унинг сиёсатини шариатга қанча мутобиқ¹ кўрсатиб келган бўлсалар, бу кейингилар ҳам ўшанча хилофи шаръий эканлигини исботга киришдилар.

Бошда бу ҳаракат, албатта, «енг ичид» бўлди ва бу ҳаракатнинг бошида Худоёрнинг ўзи турди. Биринчи галда яширин равишда Тошкент, Андижон, Марғилон ва ўзга шаҳарларнинг ишончли уламо ва бекларига Мусулмонқул истибодидан қутулишда кўмак бериш учун мурожаатномалар йўлланди. Бу мурожаатномаларда Мусулмонқулнинг номашруъ ишлари, Кўқон одамларига қилган жабру зулмлари саналган, кейинги вақтларда хоннинг ўзи ҳам бу зулмлар қаршисида чираб туролмаслик ҳолга келганлиги сўзланган, агарда бошқа шаҳар уламо ва ашрофидан кўмак бўлган тақдирда билфеъл Мусулмонқулга қарши кўтарилишга ҳозир турганлиги айтилган эди. Иккинчи галда Кўқон сипоҳларининг қипчоқдан бошқа қисмига яширин равишда, умуман ановиларга қарши ташвиқот юргизила бошланган эди.

Андижон, Марғилон, Наманган каби шаҳарлардан «хон бу ишни маслаҳат кўрсалар, биз ёрдамга ҳозирмиз» деган қуруқ ваъдалар келиб, аммо Тошкентдаги

¹ Мутобик — мувофиқ, уйгун, тўғри келадиган.

Юсуфбек ҳожи тўдасидан амалий чораларини ҳам кўрсатилиб ёзилган жавоб мактуби олингган эди.

Мактубда айтилар эди:

«Сиз Хўқанд уламои киромларининг Мусулмонқул хунхўрлигидан фарёдга келиб ва шариати мустафо-ни орага восита қилиб ёзган маҳфий хатларини олдик. Биз Тошкент уламо ва ашрофидан Домла Солиҳбек охунд, мулла Юсуфбек ҳожи, саркардалардин Қосим ва Ниёз қушбегилар, Каримқул ва Муҳаммадражаб қўрбоши ҳам Қамбар шарбатдорлар бир орага ўтиришиб воқиав Мусулмонқулнинг зулм ва тааддиси Хўқанд фуқароси ва айни замонда бўлак шаҳар ва қишлоқ кент аҳолиси устига ҳам беогоят ошиб борганлигини музокара ва муколама¹ қилишдик. Биз фақирлари ҳам Мусулмонқул ҳаракати беҳудасини шариатга хилоф, юрт ва эл учун музир², халойиқнинг осойиш ва умр гузаронлиги³ важҳига халалдор деб билдик. Бу маънига у тождор амиралмуъминин мувофақат кўрсатсалар у бепарҳиз осиби⁴ тахту салтанатнинг ҳайдалмоғи беҳроқдир⁵ ва яна биз Тошкент мардумлари бу тўғрида ҳақиқат томонида событ қадам бўлмоққа тил беришурмиз. Башарти сиз киромлар ул бепарҳиз золимнинг мингбошилик вазифасидан тардид⁶ этишга аздулужон бел боғлаган бўлсаларингиз, биз фақирларнинг ақли қасиримизга бир андиша келадир. Андоғки, Тошкент Хўқанд ҳукуматидин юз ўғирган бўлиб худнафсига мустақиллик эълон қилсин. Бу тақдирда итоатдин бош тўлғаган Тошкент устига, албатта, Мусулмонқул золим қўшин тортар. Ушбу қўшин орасига сиз киромлар ўз одамларингизни кўпроқ киргизишга қўшиш қилиб ва яна жаноби тождор ҳам бирга келсинлар. Қўшин Тошкентга етган баъдида бизлар ташқаридан ва сизлар ичкаридан бўлиб Мусулмонқулни орадан кўтаргаймиз. Бу маслаҳат фақирларнинг ақли қосирларимизга кўп тафаккурлар баъдида келиб, яна раъии савоб ўzlаридан бўлгай. Аммо бу тақдирда қон тўкилмасдан муд-

¹ Муколама — сўз юритиш, сухбат.

² Музир — зарарли.

³ Гузаронлиги — яшashi, ҳаёт кечириши.

⁴ Осиб — оғат, кулфат, тинчсизлик.

⁵ Беҳ — яхши, маъқул.

⁶ Тардид — рад қилмоқ, олиб ташламоқ.

дао ҳусулга¹ келурму деб ўйлаймиз. Боз махфий қолмагайки, Тошкент беги бўлган зот борасида андиша лозим эрмас, зеро ул одам фуқаронинг осойиши йўлида жонбозлик қилувчи кишидир. Бизлар бамаслаҳат нима десак, у бўйин тўлғамас. Ишоолло, бул андишамиз киромларга маъқул тушган тақдирда жаноби тождорнинг ҳам раъйиларини олмоқ ва имкони бўлса ул жанобнинг исм шарифларидан бизларга писанднома ёзмоқ маъқулдир. Токи бизлар ишонч бирлан муддаога шуруъ² қилайлик».

Бу хат Худоёрнинг қўлига теккандан кейин, хатда кўрсатилган тадбирни жуда маъқул топди ва тезлика ўз исмидан ташаккур ва писанднома йўллади. Ижобатни олгандан сўнг юқорида мазкур Тошкент ашрофлари бир мажлис қуриб, ўтиришга Нормуҳаммад қушбеги (Тошкент ҳокими)ни ҳам чақирдилар. Мажлисда хондан ва уламодан олинган мурожаатномани ўқиб Нормуҳаммад қушбегига эшииттирдилар. Мажлисга йиғилганлардан Юсуфбек ҳожи ва домла Солиҳбек охунлар қушбегининг пир деб инобат қилган одамлари бўлганлари учун, элнинг осойиши ва мамлакатнинг ободлиги номига бу таклифни, яъни Қўқснга қарши исён этган бўлиб туришини у ўз бўйнига олди. Бундан англашиларки, Нормуҳаммад қушбеги ҳам ўзининг валинеъмати бўлган Мусулмонқулнинг тутган сиёсатини юртманфаатига хилоф деб билибдир.

Узоқламай Нормуҳаммад қушбеги Кўқондан бош тоблаб, ўз олдига мустақил ҳукумат эълон қўйман бўлди ва Юсуфбек ҳожиларнинг ўйлаган тадбирлари айни кутган натижаларни бера бошлади. Итоатдан бош тортган Тошкентта қарши Мусулмонқулнинг тела сочи тик туриб, адаб бериш ниятида сафар жабдугини тузди. Тошкентта қарши, айниқса газабланган бўлиб кўринувчи Худоёр ҳам бу сафарнинг тадорикини баробар кўришди ва Мусулмонқул билан бирлиқда Тошкент устига чиқдилар, йўл устида ҳам Тошкент билан яширинча сўз олишиб, хатти-ҳаракат чизишиб туришдилар.

Мусулмонқул Чирчик бўйига келиб етганда, қушбеги бошлиқ Тошкент йигитлари ҳам сувнинг бериги юзи-

¹ Ҳусул — ҳосил бўлиш, қўлга кириш.

² Шуруъ — киришаш, бўшлаш.

да ёв кутиб турган эдилар. Туш чоғида икки ёв бир-бирларига қарши келишдилар. Қўқонликларга дам бермайни Тошкент қўшини милтиқларга ўт берди. Мусулмонқул кутмаган жойда қўшинидаги бир дуркуми ўз устига ҳужум бошлаб ва бир фирмаси Тошкент йигитлари томонига қочиб ўтди. Мусулмонқулнинг ўз йигитлари саросималикда қолиб, Мусулмонқулнинг мудофаасини-да ва қочишини-да билмай қолдилар. Ўз устига чуғурчиқдай ёпирилиб келмоқда бўлган қўқонлик ва тошкентликларга қарши ўзида куч йўқлигини билган Мусулмонқул бир от ва бир қамчи аранг қўшиндан чиқиб қочди ва бир қанча йўлгача қувланди. Бошлиқ орқасидан қочмоқчи бўлган қипчоқ йигитларига мунодий¹ нидо қилди:

— Қипчоқ оғайнилар! Бизнинг ҳамма адоватимиз Мусулмонқулга эди! Сиз оғайнилар илгари хон ёнида қандоғ хизматда бўлган бўлсаларингиз, энди ҳам ўша вазифада қола берасизлар ва лекин Мусулмонқулга тарафдорларингиз бўлса, тинчликча қўшиндан чиқиб кетсин!

Қипчоқ йигитлари ҳам бир ерга уюшиб, ўз тарафларидан мунодий қўйдилар:

— Биз Мусулмонқулни танимаймиз! Бизнинг бошлигимиз Худоёрхондир!

Шундан сўнг қипчоқ ва ўзбек бирга аралашиб кетди, гўё ҳамма адоват Мусулмонқул билан бирга кетгандек бўлиб, икки ҳалқ бир-бири билан кўришди. Ўн минглаб ҳалқ янгидан Худоёрга итоат изҳор этиб, чин хонлик билан уни муборакбод қилишдилар. Тошкент ҳалқи иззат-икром остида хонни ва Қўқон сипохини шаҳарга тушириб, ўрдада уч кун зиёфат бердилар. Зиёфат асносида иттифоқнинг фойдалари, тарқоқликнинг зарарлари сўзланди. Қушибеги ва Юсуфбек ҳожиларнинг таклифи билан Мусулмонқул ўрнига Ўтаббой қушибеги (Марғилон ҳокими) мингбоши белгиланиб, тўртинчи кун Худоёрхон қўшини билан Қўқонга қайтди.

* * *

Қиши чиқар олди. Мусулмонқул воқиасидан йигирма кунлар чамаси кейин эди. Муҳаммад Ражаб қўрбошининг уйидан икки-уч қайталаб киши кела бергандан

¹ Мунодий — жарчи.

кейин, Юсуфбек ҳожи иложсиз қолиб боришга мажбур бўлди.

Йиғинда Муҳаммад Ниёз қушбеги, Қосим мингбоши, Қамбар шарбатдор, Каримқул понсадлардан тортиб Тошкентнинг айтиувлик ашроф ва аъёнидан ўн бешлаб одам бор эди. Меҳмонлар учун мева-чева, қуюқ-суюқ тортилди. Зиёфат тўкин эди. Емак асносида Ниёз қушбеги сўзлаб йиғиннинг мақсади билан аҳли мажлисни таниширига борди.

— Оғалар, инилар! Билиндики, оғайнилар бир тан, бир жон бўлсалар қипчоқ касофатидан қутулиш унча қийин тушмас экан. Бундан бир ой илгари биз қандай ҳолда эдик? Мусулмонқулнинг омонсиз қиличи оғайнининг бўғзида эди. Худо ҳожи акамизнинг умрини узун қилиб, бола-чақасининг эгилигини кўрсатсанки, аввало унинг ақлли тадбири, ундан кейин оғайниларнинг бир ёқадан бош чиқариши соясида Мусулмонқул балосидан енгилгина қутуладик. Аммо бу қутулиши чин қутулиш деб бўлмайдир. Нега десаларингиз, оқ ит бўлмаса, қора ит тавоқ-қошиқقا тегмақда. Ҳали биз қипчоқ элидан узил-кесил қутулганимиз йўқ. Анови Мусулмонқул бўлмаса, бошқа Алимқулнинг бош кўтариши аниқ! — деди қушбеги ва дастурхондан чўқиниб давом этди.— Нормуҳаммаднинг раъйини деб, ҳамма ихтиёр ўз қўлимизда бўлгани ҳолда, Ўтаббойни мингбоши белгилаб юбордик... Бу ҳам ўзимизнинг энг катта хатоларимиздан, мен ўша кундан бери ўз-ўзимиздан бўғилиб юрибман: Мусулмонқулнинг ити бўлмаса, ўзимиздан мингбоши бўларлик одам қуриб қолувдими, дейман. Йўқ, оғалар, темирни қизигида сўқиб қолиш керак! Қачонгача биз шу қипчоқлар билан сан-манга боришиб юрамиз? Яхшиси шулки, бу бош оғриғиларни бирварақай орадан кўтариб тинчишайлик. Биз шу ердаги оғайнилар билан кенгашиб бир гапга тўхтаб қўйдик. Аммо бу маслаҳатнинг ҳожи акамизга ҳам маъқул тушмоғига шубҳа қилмаймиз. Бу ўйимизга хон ҳам бир нарса демаса керак. Қўқон, Марғилон, Андижон, Ўш ва бошқа ерларнинг оғайнилари ҳам бу гапдан бош тўлғамаслар! Нега десангиз, қипчоқлар барчани ҳам жонидан тўйдирди,— деди ва нос қовоғини қоқа-қоқа бир отимини тилининг тегига ташлади.

Юсуфбек ҳожи ҳалиги гап сўзланганда қўлидаги пиёласини чайқатиб оғир бир ҳолат кечирган ва чуқур

бир сукутга кетган эди. Бошқалар бўлса Ниёз қушбенинг сўзидан кейин бир кўздан деярли ҳожининг юзига тикилган эдилар. Ҳожи миқ этмай ўтира бергач, Қамбар шарбатдор ўзининг хипча товуши билан қушбенинг гапини кучлаб тушди.

— Сўзингиз жуда тўғри, қушбеги,— деди,— сиз айтгандек, бизга икки йўл бор: қипчоқни қириб йўйиш ва ёки бутунлай қипчоқ қўлида қолиб кетиш!

Юсуфбек ҳожи кўтарилиб Қамбар шарбатдорга қаради ва мажлисни ер остидан кузатиб чиқиб, яна жим қолди.

Каримқул понсад ҳожини туртмак мақсадида:

— Кенгашиблик иш тарқашмас, деганлар. Ҳожи акамиз ўлашиб жавоб берсинглар-чи, ахир! — деб қўйди.

— Билмадим...— деди ниҳоят ҳожи,— сизларнинг муддаонгларга тушунмадимми, ёки тушунсан ҳам ўзимга ётишиб келмадими, ҳайронман!

Ниёз қушбеги бошини қашиб олди:

— Нимасига ҳайронсиз, ҳожи?

— Мақсадларингиз Қамбарбекнинг айтганидек қипчоқни кесишими?

Қушбеги иккilanмай жавоб берди:

— Кесиши!

— Сизларни,— деб истеҳзоланиб кулди ҳожи,— бу ишга нима ва ким мажбур қиласидир?

Қушбеги ёронларига қараб олди:

— Саволингиз қизиқ,— деди,— сабаби бизлардан ҳам кўра, сизга маълум бўлса керак-ку!

— Дуруст айтасиз,— деди ҳожи бошидаги салласини олиб,— Мусулмонқулни ҳайдамоққа мажбур бўлгањ эдик — ҳайдадик. Барча ёмонлик ўшанинг боши билан бирга кетгандек қипчоқ оғайнилар ила тотувлашдик, қипчоқнинг эски адсоватлари битди... Бас, бизга тағин нима керак?

Ҳожининг бу гапи мажлисни бир-бисрисига аланглатиб қўйди, аммо қушбеги сирни бой бермас учун тиришгандек қилиб кулди:

— Мусулмонқул энди тинч ётар деб ўйлайсизми?

— Албатта ўйламайман, лекин Мусулмонқул тинчмайдир деб хўлу қуруқ қипчоқка тиф тортиш ҳам ҳеч бир ақлга сифадиган гап эмас. Ўзингиз, қушбеги, айтинг-чи, биз бу кунгача ёмонликни кимдан кўрдик? Қип-

чоқ отлиғ халқданми, ёки унинг саноғлик бўлган бир неча кишилариданми?

— Нафсиамрни айтганда, биз қипчоқ деганинг ҳар бирисидан ҳам дақки ёб келамиз!

— Сўзингизда янгишлик бор, қушбеги! Агар сиз нафсиамрга қарасангиз икки халқни бир-бирисига совуқ кўрсатиб, адоват тухумини сочиб келувчи бир нечагина одам бор... Менга қолса мамлакатни тинчи-тиш учун шулар тўғрисида ўйлаш керак. Наинки, тўртта муттаҳамни деб бутун бир халқа ҳужум қилиш!

— Сиз айтгандек, ёмон тўрттагина эмас, ҳожи! Ҳар бир қипчоқ бизнинг елкамизга минмакчи. Бизнинг тавогимизга тумшуғини тиқмоқчи — бунга қолганда ишни бир оз енгил ўйлаб турибсиз, ҳожи ака!

Қосим мингбоши:

— Ҳожи акамнинг ҳамма гаплари фақат раҳмдиллиқдан айтиладир,— деди,— аммо ўйлаш керакки, қипчоқ бу кунгача озгина оғайнининг қонини тўқдими? Анови кун Маражаббек билан ҳисоблашиб кўрсак, Қўқоннинг ўзидан икки йилнинг ичидаги етмиш саккиз бек ўлдирилибди! Ҳали бу ҳисобга фуқародан ўлдирилган бечоралар кирмайди!

— Мен бу ҳақиқатлардан тониб турганим йўқ, мингбоши! Аммо биз сенга сен, деб жавоб бермасак, бизники ақл ва инсоф доирасидан чиқмаса дейман...

Орадан бирор ҳожининг сўзини бўлди.

— Ақл, инсоф билан иш қила-қила энди жуда тўйдик.

Ҳожи сукут қилди, ўзининг шунчалик гапларини ҳавога кетиб турганини, мажлиснинг Ниёз қушбеги руҳида борсанлигини яхши сезди. Бундан ташқари Ниёз қушбегининг бундай бир фикрга келиши учун уни нима мажбур қилган, буни ҳам очиқ англади. Ниёз қушбегининг барча кинаси Ўтаббойнинг мингбоши белгиланган кунидан бошланганини, «мен турган ерда, қипчоқ мингбоши бўлсинми!» деган кек орасида бу фикр фақат унинг томонидан майдонга чиқарилганлиги Юсуфбек ҳожининг мулоҳазасидан ўтди. Мажлиснинг бошқа аъзоларига бўлса, иш йўғидан юмиш чиқаришга талабгор бекорчилар, деб қаради.

Албатта, эл фойдасидан кўра ўз манфаатини олдинга сурувчи бу чўталчи бекларга қарши ҳожининг со-

вүқёнлик сақлай олиши ва асабийлашмаслиги мумкин эмас эди.

— Беклар,— деди у,— менинг ҳамма мулоҳазам юрт, эл манфаати нуқтасидан туриб айтиладир! Мен ҳеч бир вақт инкор қилолмайманким, ёлғиз ўз ғарази йўлида иш қилувчи палид кишилар қипчоқлар орасида бор бўлганидек, бизда ҳам йўқ эмас. Балки ановиларда ўнлаб бўлса, бизда юзлаб бор. Бизнинг кўзимизга совуқ кўринган қипчоқвачча Нормуҳаммаднинг эл учун қилиб турган тўғри хизматини мен ўз умримдаги Тошкент беклари орасида биринчи мартаба кўраман. Буни сиз яхшилар ҳам инкор қила олмассиз! Бас, айб қипчоқда эмас, балки ўзининг манфаати шахсияси йўлида иш кўрувчи бошлиқларида ва қипчоқлар ўйландек гуноҳ қорачопонликларда бўлмай, балки унинг уч-тўртта маънисиз бекларида!.. — Биродарлар! Ўрис аскарлари ўз ичимидан чиқадиган фитна-фасодни кутиб дарбозамиз тагида¹ қўр тўкиб ётиди. Шундай маҳшар каби бир кунда биз чин ёвга берадиган кучимизни ўз қўлимиз билан ўлдирсан, сен фалон деб қирилишсан, ҳолимиз нима бўлади. Бу тўғрида ҳам фикр қилувчимиз борми? Кунимизнинг кофир қўлига қолиши тўғрисида ҳам ўйлаймизми, ёки бунга қарши ҳозирлик кўриб қўйганмизми?

Ҳожи ўзини тутолмай кўз ёшишини оқ соқслига қуиб давом этди:

— Мана, биродарлар! Сиз ўз қипчогингиз учун қабр қазиган фурсатда ўрис аскарлари бизга тўп ўқлайди. Сиз дунёда ўзинизнинг ягона душманингиз қилиб қипчоқни кўрсангиз, мен бошқа ёвни ҳар замон ўз яқинимга етган кўраман! — деди ва рўмоли билан кўз ёшини артиб ўрнидан турди.— Агарда дунёдан ўгаётган бир кексангизнинг маслаҳатига қулоқ берсаларингиз, бу фикрингиздан қайтинг, биродарлар. Илло Юсуфbekни ўлдига чиқариб, бу шум ишингиздан мени ташкарида ҳисоблангиз! — деди ва мажлиснинг «ўлтиринг тўхтанг» сўзига қулоқ солмай, ўтиришни ташлаб чиқди.

Ҳожи дарбозадан чиқмаган эди, Ниёз қушбеги хатолаб кулиб юборди:

— Вой ваҳимант қурғур, ҳожи! Бугун кўкнори ичган экан, шекилли, — деди.

¹ Оқмасжитда демоқчи.

Бошлиқдан кулгига рухсат берилгач, бошқалар ҳам кулишиб, орада ола-говур бошланди.

— Йўқ,— деди Қамбар шарбатдор,— ҳожи аканинг ёши қайтиб, кўнгли жуда ҳам бўшашиб кетибдир!

— Вой, хўвари ҳожи,— деди Ниёз қушбеги,— олди-даги овни кўрмай, узоқдаги ёвни кўрадир!

— Худди, худди!

Муҳаммад Ражаб қўрбоши бошини чайқаб Ниёз қушбегига қаради.

— Мен сизга айтиб эдим-а, қушбеги,— деди,— ҳожини ҳар нарсага кўндирангиз ҳам, бу гапга кўнди-ролмассиз,— деб.

— Мен унинг кела бермай овора қилганидан ҳам пайқаган эдим.

— Кеча бир оз хомсиган эди,— деди Каримқул понсад.

— Иш бузилди-да,— деб қўйди Муҳаммад Ражаб қўрбоши.

— Нега бузиладир? — деб сўради қушбеги.

— Сиримиз очилди, албатта, ҳожи тинч ётмайдир.

— Сиримиз ҳали очилган эмас,— деди ишонч билан қушбеги,— агар биз, шу ўтирган оғайнилар бояги гапда собит қолсак, сиримизни яна яшириб кетиш мумкин!

— Масалан,— деб сўради Қамбар шарбатдор.

— Ўша сўзимиз — сўз, иттифоқимиз — иттифоқми? Мажлис тасдиқ ишорасини бериб:

— Албатта, албатта! — деди.

— Сўз битта бўладирган бўлса,— деди қушбеги,— ҳожининг иши жуда осон. Биз ҳозир сўзни бир жойга етказамиз-да, биримиз ҳожининг олдига бориб, маслаҳатингизни мувофиқ кўрдик, биз янглишган эканмиз,— деймиз,— албатта ҳожи ишонадир-да, ҳеч кимга сўзламай қўядир. Биз бўлсак, енг ичиди ҳозирлик кўра берамиз, ана холос!

— Маъқул гап, тўғри маслаҳат!

— Маъқулликка маъқул,— деди қушбеги,— аммо гап бу ердаки, биз аниқ шу ишга бел боғлаймизми?

— Боғлаймиз, боғлаймиз!

— Баракалла,— деди қушбеги,— маълум бўладирки, ҳаммамиз ҳам яқдил эканмиз, энди бошқа гапга ўтсак ҳам бўладир.

— Хонни кўндириб бўлармикин? — деб сўради Қосим мингбоши.

Күшбеги кулди:

— Хон кўнган ҳисоб,— деди.

Бу гап мажлисга унча англашилмади, шекилли, ажабланиб бир-бирларига қарашибдилар.

— Изоҳ, қүшбеги, изоҳ!

Күшбеги изоҳ берди:

— Мен хонни Тошкентдан жўнатиш олдида унинг холи вақтини топиб, бу фикримни бир даража арз қилиб ўтган эдим,— деди.— Бу фикрим хонга жуда маъқул тушган бўлса керак, сўзимни эътибор билан тинглаб турди ва жавобида: «Яхши. Ўйлашиб, тадбирлари билан менга фикрингизни ёзинг, мен ҳам ўйлаб кўрарман» деди. Менга қолса, бу тўғрида биздан хабар кутиб хоннинг уйқуси ҳам келмай ётгандир: бизга фақат ишнинг ўнақайини топиб хондан тасдиқ эттиришгина қолган!

— Хон тайёр экан бўлмаса! — деди кулимсираб Қамбар шарбатдор.

— Тайёр экан, тайёр экан!

Шундан кейин ишнинг ўнақайи тўғрисида музокара ва мувоаза¹ бошланди. Ҳар ким бир турли фикр баён қилиб узоқ бош оғритдилар ва натижада хонга қўйидаги нома ёзилди:
«Тождори мусулмонон, ҳоқон ибни ҳоқон шаҳаншоҳи навжувон тожи сари хушбахтон ҳузури ҳумоюн олийларига арзи убудият² адосидан сўнгра биз фақиулҳақир садоқат пешаи беназир қулларидан арзи бандалик шулдирки, навкарлари доималавқот ул жагобга қипчоқ ҳалойиқи бепарҳизидин бирор осиби етарму деб ҳаросидадирмиз³. Ва яна ул ҳаромзодаларнинг рўйи заминдин⁴ тарошламай туриб, у жаноби олийнинг таъмини амниятлари ҳам биз қулларича кўп хавфу хатар остида бўлганидек тахмин қилинадир. Шу мулоҳаза ва андишалар бъядида биз Тошкент қулларидин бир нечаларимиз бир ерга жам бўлишиб, дурудауз⁵ тафаккур ва таҳайюрлар⁶ сўнгида, азбаройи у

¹ Мувоаза — ватъхонлик.

² Убудият — қулллик, бандалик.

³ Ҳарос — қўркув.

⁴ Рўйи замин — ер юзи.

⁵ Дурудауз — узоқ ва батадисил.

⁶ Таҳайюр — ҳайратланиш, ҳайронлик.

шаҳоншоҳнинг кўп замонлар бошимизга соябон бўлмоқлари умидида бар тақдир¹ ул тождорнинг хотири отери дарё муқтадоларига² писанд тушиб, ижобат оғоз³ қилсалар, бир маънини хўб ва садоқат мақосидига⁴ маҳбуб деб билдик. Андоғки, у халойики осибийларни ўн беш синни солидин болиг⁵ ва етмиш ёшидан қуий ҳар бир эркак зотини билотараҳҳум⁶ қатли ом⁷ қулларича сазовордир ва илло ул муртаддин⁸ бадтар жобр ва бехирадлардан жаноби тождорга ҳар рўз, балки ҳар соат хавф бордир. Аммо бул тақрирни ўшал муайян қатли ом соати етмагуича ҳар бир бехирад ва босгий бўлмаги яқин мажхул одамлардан пўшида⁹ тутилмоғи маъқулдир. Ва лекин ул тождор бир соати саиди музafferни муайян айлаб қаламравларидағи барча шаҳар ва кўйлар, қишлоқ ва кентларнинг садоқати зоҳир ва қалби тоҳир қулларига маҳфий номалар кўндириб, сак баччаларнинг қатли омига амри олийларни дариг тутмагайлар¹⁰. Аммо Хўқанд фирдавс монанднинг¹¹ ўзида ул шақоват пешалар беҳад ва беҳисоб нуфусга молик бўлганлари важҳидан биз Тошкент навкарларининг иъонати бешакку шубҳа возибдир. Сиз шаҳаншоҳ, ўша соати музafferни тайин айлаб, биз қулларига хабар юборсалар, бунда лозим бўлган одамимизни қолдириб ва яна ҳар қайсимизга тегишлиқ бир юз, икки юз ва беш юз йигитимизни олиб, халойик кўзида гўё жаноби тождорнинг Мусулмонқули фалокатидин озодлиққа чиқиб мустақил соҳиби тож бўлганларини муборакбод қилмоқ учун юрган бўлиб, иъонатларига етармиз ва дарбозадан киришимиз ов фажъатан у галаи сакларга ҳужум бошлаб, қатли омга қилич тортәрмиз, ва яна маҳфий қолмагайким, Тошкентнинг алҳол беклик мансабида ўлтирувчи қипчоқ Нормуҳаммад борасида қандоғ фармон бергайлар, бул маънида

¹ Бар тақдир — фойдаланиш мумкин бўлган эҳтимол.

² Муқтадо — бўйсунилган (кимса).

³ Оғоз — бешланиш, киришиш, ибтидо.

⁴ Мақосид — мақсадлар, муддатлар.

⁵ Ўн беш синни солидин болиг — ўн беш ёшдан юқори.

⁶ Билотараҳҳум — бераҳм, шафқатсиз.

⁷ Қатли ом — қирғин.

⁸ Муртад — диндан қайтган.

⁹ Пўшида — яширин.

¹⁰ Дариг тутмоқ — аямоқ.

¹¹ Фирдавс монанд — жаннат сифаг.

ҳам ишоратни дариг тутмасалар қулларини андишадан озод қилған бўлгайлар. Ушбу болода¹ мазкур маҳзи² самарайи садоқат ақли қосирларимиз ҳусули натижасини биз қулларига ушбу номанинг қосиди³ қўлидан савоб ва хато, рад ва ижобат, писанд ва нописанд жавобини арсол қилсалар ва яна ўз фикри босавобларини изофа қилиб, қусур ва хатоларимизни танбеҳ этсалар, биз навкари бежавҳар ва босадоқати бефаросатларни дунё-дунё шоду хуррам қилиб, ул соябони марҳамат ва меҳрбони бошафқатнинг хизматларига камари хизматни берк боғлатган бўлур эдилар, ҳуволло алмустаъин.

Садоқатингиз мажлисига жам бўлгувчи навкарларигиз — (имзолар)».

Бу нома эртаси кун хонга юбориладиган бўлиб, бунга маҳсус киши белгилаади. Мажлиснинг қўрқинчи Юсуфбек ҳожидан бўлган учун унга сохта қарорни эшиттиրмак тўғрисига Муҳаммад Ниёз қушбегининг ўзи бевосита мажлисдан чиқиб кетди. Шунинг ила бу мажлис тарқалди.

2

ҚОРОНГУ КУНЛАР

Отабек Марғилондан қайтиб келгандай кейин ўн беш кунлар ўтказиб уста Олимдан бир хат олган эди. Уста Олим хатида қутидорга учрашганлигини ҳамма майда-чуйдаларигача ёзиб келиб айтар эди: «Сиз хиёнатни пайқагуича қайин отангизга қандоғ кина сақлаб келган бўлсангиз, ул ҳам сизга ўшандоғ киналиқ экан. Мени ва оиласми таҳқир этди, деб бу ҳақоратни умр бўйи унута олмаслигини тушуниб, ўт ичидা юрар экан. Мендан ҳақиқат ҳолни англаб жуда шошиб қолди, ҳатто, ҳуши бошидан учди. Ичкаридан аниқ маълумот бера олмасам ҳам, аммо уларнинг ҳам қайин отангиз ҳолига тушганларини мулоҳаза қилдим. Қайин отангиз сизнинг ўтган ҳолингизнинг оғирлигини тасаввур қиласммагандек, душманларигизга берган жавобингизни тақдир этиш учун ҳам сўз тополмас эди. Ҳар ҳолда

¹ Болода — юқорида.

² Маҳз — холис, тоза.

³ Қосид — хаберни.

орангиздаги кинанинг душманингиз билан бирга супурлганнига шубҳа йўқ.

Мактубнинг яна бир ўрнида: «Сизнинг қаерда бўлганлигинги сўраган эди, мен билганимни айтдим. Келармикин деган эди, бунга ҳам ўзингизнинг ўшал муҳмал жавобингизни бердим. Фикримча, қишида бўлмаганда ҳам, кўкламга чиқиб ўzlари Тошкент тушарлар, деб ўйлайман».

Хатнинг охирида: «Сиздан бир кун сўнг Ҳомид ўлди. Ҳайтовур бир оғиз сўзсиз тўнғиз қўпибдир... Мен ўлар чоғида ҳам сизга бир туҳмат тўқирми, деб қўрқсан эдим. Қутидорга ҳеч бир жарима ортмабдилар. Мақтулларнинг эгалари ҳеч кимни тутиб кўрсата олмагани учун маҳкамалар ҳам ишни текширмай қўйдилар. Ўйлашимча, ҳеч ким билмаганда ҳам, сирни ўлган Содиқнинг онаси билса керак эди. Аммо унинг ҳам дами ичида, сўраганларга худодан кўрдим, деб жавоб берар эмиш. Бу хотиннинг қўлидан ҳар бир иш келадур деб ўйлаб, ўтган кун қайин отангизга айтдим: бегона хотинни уйингизга йўлатмасинлар ва четдан келган таомни емасинлар деб, ҳар ҳолда ёмондан хазар лозимдир», деб ёзар эди.

Бу хатдан кейин Марғилондан тиқ этган хабар бўлмади ва орадан икки ойлаб фурсат ўтиб кетди. Шунинг учун Отабекнинг кунлари қуёш ботиб чиқсан сайин бир англашилмовчиликка, қоронгуликка кира бориб, ҳар соат аччиқ ва ё сучуклиги номаълум бир ҳол кечира бошлади. Баъзи кезларда у умид қучоғида шошиб қолар эди ва иккинчи вақтда ярамас, қора хаёллар билан энтикар эди.

Умидланган кезларда:

— Ой туйнуқдан тубанроқда, бугун бўлмаса эрта — чиммати қўлида, паранжиси устида, саригми, қорами атлас кўйлаги этнида дарбозадан кириб келгандек ва ўпкалагандек...

Иккинчи бир вақтда кимнингдир қуийдаги гапини эшитар эди:

— У ўзининг душманларини ўлдириш учунгина Марғилонга қатнаб юрган экан, ҳисобини тугатди-да, бедарак кетди-қолди. Тузукроқ жой чиқса, бериб қолайлик Кумушни... умри ҳам ўтиб борадир!

Ана шу қора хаёл уни чиндан ёниб турган бир ўт ичига ташлар ва шу чоқ ўзини мувохазага¹ бошлар эди: «Мен нега икки йил сарсон бўлиб юрдим-да, бу сарсонликнинг натижасига бориб чиққанда, шундай аҳмоқликка тушдим?!» дер ва Марғилон йўлини кўзлар эди. Аммо энди унга Марғилон бориш ўнақайи сира келмас: «Мен нега келдим-да, энди нега бораман ва нима деб бораман? Қизингизни Тошкент олиб тушарсиз деб кутган эдим... Сиз олиб туша бермаганингиздан кейин ўзим қайтиб келдим, дейманми?» — Отабек мана шундай чучмал азоблар ичида кейинги кунларини ке-чира бошлади.

Ой тўлмасдан Марғилон қатнаб турувчи ўғлини энди уч ойлаб қўзғалмай қолиши учун Ўзбек ойим эскича яна қувониб кетди. «Кейинги қилдирган иссиғ-совуғим кор қилди, шекилли, бира тўласига Марғилонни тилига олмаёқ қўйди. Энди хотинига исиб, меҳмонхонада ётишни ҳам барҳам берса... ҳар нечук, дуодан қолмайлик!» деб Зайнабни домланикига қистар эди.

Отабек кейинги вақтларда савдога юришини тарқ қилиб қўйгани учун, Ҳасанали ишсиз қолган, узун кун уйида бекор зерикканлиқдан, ҳожига айтиб бирмунча дастмоя билан гузардан баққоллик дўкони очган эди. Отабек кўпинча меҳмонхонасидағи кутубхонадан уни-буни ўқиб ўтирас, ўқишдан зериккан кезларида Ҳасаналининг дўконига чиқар ва гузардан ҳам зериккандан кейин боши оқсан ёқларга, Солор бўйларигача кетар ва гоҳи Чуқур қишлоқ томонларига ҳам тушар эди. Аммо тушгани билан бурунгича ичмас, икки-уч, ортиб кетганда тўрт оёқ ила кифояланар, кўз ўнглари оз-оз жимирилашган, турли хаёллари бирмунча тарқалган ҳолда қайтар ва лекин Ҳасанали ҳам унинг бу кайфини жуда сийрак сеза олур эди.

Ўтган кун Чуқур қишлоқقا тушган эди. Аср вақтларида қайтиб гузарга келди-да, хаёлат билан Ҳасанали дўконига ўтириди. Отли, яёв ўткинчилар тўрут томонга қатнаб турадирлар, унинг бу кунги кайфи ўтачароқ кетган бўлса керак, уларни гира-шира кўзга илгандек қарайдир.

Ҳасанали бир-икки уни кузатгандан кейин сўради:
— Марғилонга нега кетмай юрибсиз?

¹ Муҳоказа — койши.

Бу саволдан унинг кайфи тарқалгандек бўлиб, кўзлари мошдек очилди:

— Ҳафсала йўқ...

— Қайнотангиз кўнса, қўчингизни олиб келсангиз ҳам маъқул эди, қатиаб юргандан...

— Қайдам...

Илгари шундай савол чоқларида ўзининг ёлғон жавобларидан жуда хафаланаар, Ҳасаналига ўтган гапларни бирин-бирин айтиб бергувси ва «Менинг уйланишинга сен сабаб бўлган эдинг, энди уни мендан ажратдилар!» деб ундан ўз дардига даво истагувси келар эди. Ҳозир ўзида хафалик, ўнгайсизлик сезмаган бўлса ҳам бошига «ўзим боромасам-да, Ҳасаналини юборишим ва кезини топиб ўтган гапларни отага ҳикоя қидишим керак эди», деган фикр келди. Бора-бора бу фикр унинг бошига жиддий ўринлашиб олди, шу тўғрида чинлаб ўйлаб кетиб кайфи ҳам тарқалбёзди. Дўконни ёпшиб, Ҳасанали билан бирга кетди — йўлда, меҳмонхонада бирга ўтириб ош еди, дастурхон устида унинг ўйлагани фақат шу бўлиб қолди. Бироқ бу фикр қарор туслига кириб кета олмади, дақиқа сайн тарқалиб боргай кайфидек турли монеларга учрай бошлади:

— Ҳали Марғилонда ишлар қалайкин? Улар яна айнаб қолмаганмикинлар? Марғилондан бир нарса пайқамай туриб, кишини овора қилишга арзирмикин?..

* * *

Бу кун қуёш очиқ ҳавода кезиши учун жим-жим товланиб, ер юзига қулиб қаради. Икки кундан бери қуёш бетини қоплаб, турли ерларга жон суви сепинш или чарчаган баҳор булутлари бурчак-бурчакка тарқалиб борар эдилар. Үяларидан чиқиши биланоқ чумчуклар чирқиллашиб, мусичалар ку-кулашдилар. Ано-ви ар-ар теракка уя қўйишга ўйлаган бир жуфт карруклар ҳам вижир-вижир қилишиб кенгаш очдилар. Подачининг товушини эшитиб, далага ошиққан онасига эргашиб қашқа бузоқ ҳам маъраб юборди. Модасига тегишгани учун томдаги кантар ҳам буқоғини чиқариб рақибининг теварагида яғрин бера бошлади... Қисқаси, буқун уйғонишданоқ бутун коинотнинг яхши туш кўриб турганлиги сезилар эди.

Баҳорнинг бу кунги сеҳрли куни Отабекни ҳам қитқлади. Чойини наридан-бери тугатиб, Ҳасанали кетидан гузарга чиқди. У гузарга чиққанда Ҳасаналининг қўшниси бўлган Али, эринибгина дўкон тахтасини туширмоқда эди. Отабекни кўриш билан дўкон очишни тўхтатди:

— Бугун бўшмисиз, бек ака?

— Бўшман.

— Бўш бўлсангиз, Минг ўрикка — қимизга борар эдик,— деди Али,— Тўла ака бияларини яйлоқقا солибдир!

— Дўконингиз-чи?

Али туширган тахтасини қайтадан жойига қўя берди:

— Дунёнинг иши битар эмишми, бек ака! Хўп десангиз, дўконни ёпаман!

Отабек ярқираб чиқиб келган қуёшга қаради:

— Ёпинг бўлмаса! — деди.

Отабек Ҳасаналининг дўкони воситасида Али билан яқинда танишган эди. У ичи кирсиз, серкулки, очиққина бир йигит бўлиб, бек билан гўё кўп йиллардан бери бўлган танишларча муомала қиласа эди.

Еекка бу тасодиф жуда қулай келди, чунки уйдан чиқишиданоқ унинг қасди бу кунни далада ўтказмак эди. Улар эт олдилар-да, яёвлашиб Минг ўрикка кетдилар.

Минг ўрик мавзуи отидан ҳам маълум — бунда минг чөғлиқ ўрик дараҳти ўсгани учун бўлиб, Шивлининг сувидан бошлаб то Солор ариғигача қатор-қатор ўриклар эди. Солорнинг нариги ёғи бийдек қир, эндиғина кўм-кўк ўт гилами униб чиқкан эди. Минг ўрикнинг этаги бўлган Солор бўйида уч-тўртта қозоқ ўтовлари тикилган эдилар. Иккиси Солор бўйига етиб Тўла аканинг келинчагига этни шўрва қилиш учун бердилар.

Али ўтовдан кийиз олиб, Солор бўйига ёзди. Келинчак ёстиқ, кўрпача ташлаб берди. Отабек ҳордиқ чиқариб ясланди.

Қуёш озорсизгини қиздирар эди. Енгилчагина эсган шамол димоқقا турли ўлан исларини келтириб урар эди. Бир неча қалдирғоч Солорнинг оқиши бўйлаб учар ва учган кўйи «валфажри» ўқир эдилар. Поёнсиз қирнинг юқори-қуий ўринлари якранг кўкат ва кўз илға-

майдиган узоқликлари туманлангансимон кўриниш берар эдилар. Қушлар, қуртлар сайраши табиий бир соз хизматини ўтаб, кишига ифодаси қийин бўлган бир сезги солар эдилар.

Отабек табиатнинг шу кўркам ва латиф кўриннишига мафтун бўлиб бир оз ётгандан кейин, «Ул ҳам бўлса эди», деб ўйлади ва узоқ тин олиб қўйди.

Бу куннинг кўркамлигидан олган таассуротини Али ичига сифдиrolмади:

— Зал яхши кунми! — деди.

Отабек ҳам шу гўзалликни ўзига totимай турган дардидан шикоятланди:

— Шундай кунларда каму кўстинг бўлмаса...

— Сизнинг ҳам каму кўстингиз борми? — деб Али кулимсиради.

— Йўқ, деб ўйлайсизми?

— Ҳаммада бўлганда ҳам, сизда йўқ, деб биламан!

— Масалан?

— Масаланми,— деди кулиб Али,— сизнинг билан стангизнинг обрўси қушбегида ҳам йўқ, давлат тўғрисидан бўлса, очиқарли ерда эмассиз... Иккита тўтидек хотинингиз бек ақам учун сочини тараб ўлтирадир... тағин қанақа каму кўст?

Кишининг бахтини юзакигина кўриб ҳукм қилгувчи Али унга қизиқ кўринди ва кулиб:

— Тўғри айтдингиз! — деди.

— Шукур қилиш керак, бек ака! — деди Али ва ўзининг бахтсизлигидан, топганини рўзгордан ортиромай, шу кунгача уйланолмай келишидан ҳасрат қилиб кетди. Отабек унинг ҳасратини диққат билан эшитди, ҳаётнинг зарбаси ҳар кимнинг ўз даражасига қараб ва лекин истисносиз¹ бўлганлигини тушунди:

— Дунёнинг иши шунақа экан, мулла Али! — деб уни юпатиб қўйди. Иккиси ҳам бир неча вақт жим қолдилар.

— Марғилонлик хотинингиздан болангиз бордир?

— Йўқ...

— Бўлса ҳам турмадими, уйланганингизга анча йил бўлган, шекилли?

— Турмади.

¹ Истисно — мустасно.

Али Отабекнинг каму кўстини шу боласизликдан деб ўйлаган эди:

— Боласизлик учун хафа бўлиш керак эмас, ҳали ёшсиз, бек ака!

Отабек жавоб бермади. Корсонда қимиз келди. Бек бир-икки зарангни ичгандан кейин, ясланиб кўкка қараб ётиб олди. Али бор товушини қўйиб ашула қилди:

Кўзларим йўл устида, келмайди ёр,—

Ушбу кенг дунё кўзимга бўлди тор!

Қай қароқчи тўсди ёримнинг йўлин?

Бундаги бахтсиз йигит йўл узра зор!

— Қўшилишмайсизми, бек ака?

— Ўзингиз яхши айтасиз, тўхтаманг!

Али бор овози ила ҳамма ҳунарини ишлатиб, ғазал тугагунча ашулани айтиб борди.

— Тузукми, бек ака?

— Яхши ашулачи экансиз!

— Ундоғ бўлса, устидан буни ичиб юборинг! — деди кулиб, бир заранг қимиз узатди. Бек қимизни бир симиришда бўшатди-да, энтикиб узоқ қирга қараб турди-да, юқоридаги байтни ўқиб оғиз ичидан минғиллади:

Кўзларим йўл устида, келмайди ёр!

Қай қароқчи тўсди ёримнинг йўлин...

— Қўқонга кетган сипоҳлардан дарак эшитдингизми, бек ака?

Отабекнинг хаёли бўлиниб, Алига қаради:

— Эшитмадим.

— Менинг акам ҳам кетган эди... Ой бориб, омон келишсинлар-да!

— Акангиз йигитмиди?

— Йўқ, мерган эди. Қўқон кетаётган ўртоқларига қизиқиб, борма деганга, кўнмади. Уруш эҳтимоли йўқми, шунчаки фотиҳа учун кетишгандирлар-а?

— Ким билсин,— деди бек ва бир оз ўйлаб қолгандан кейин,— бўлмас! — деб қўйди.

Корсондаги қимиз тугаб, шўрва ҳам ичилди. Дастурхонни йифувчи келинчакка ўғил тилаб дуо қилингандан кейин, қўлига ўттиз чаقا сурма пули бердилар ва қирни айланиб, бинафша териш учун кетдилар.

ҚИПЧОҚҚА ҚИРГИН

Кечки соат түртларда Қоймос дарбозасидан қайтиб шаҳарга кирдилар-да, дарбозадан ўн одим нарида бошли танидан олинган уч кишининг гавдасига йўлиқдилар. Отабек бу ҳолга тушумади, чунки аҳёнда бир осиладиган гуноҳкор Эски номозгоҳ дорига элтилар эди. Шунга кўра дарбозабонни ҳужрасидан чақириб сўради:

— Булар қандай гуноҳкорлар экан?

Дарбозабон бекни таниб қўл қовуштириди:

— Тақсир, қипчоқлар!

— Гуноҳлари нима экан?

Дарбозабон ётган гавдаларга қараб олди ва бекнинг яқинига келди.

— Ўзлари биларлар-ку, тақсиримнинг... бегимга сийтулиги йўқ...

— Гуноҳлари нима, ахир?

— Ахир қипчоқлар-да, тўрам!

Отабек диққатланди:

— Қипчоқлар эканини билдим, аммо гуноҳлари шима деб сиздан сўрайман!

Дарбозабон қўл қовуштирганича Отабекка ажабланниб қаради.

— Аниқ хабарлари йўқми, тақсиримнинг? — деб яна сўради.

— Йўқ!

— Вой-бўй тақсир, бугун эрталабдан бери кўринган қипчоқни сўйиб юрдилар-ку! Гуноҳлари суриштирилмади, тақсир! — деди ва ўликларининг ёнига юриб келиб изоҳ берди.— Ановисини уйидан олиб чиқиб сўйдилар, мановиси менинг ёнимда турган дарбозабон эди — раҳматлик. Мановисини танимайман ва лекин ўзи қипчоқ бўлса керак...

Отабек даҳшатланиб ёнидаги Алига қаради, Али эса ётган жонсиз гавдаларга қараб, лабини тишлаб турар эди.

— Кимлар ўлдириди? — деб Отабек даҳшат ичидан дарбозабондан сўради.

— Бу ерга келгувчилар йигирма чоглиқ эдилар, ўзимизнинг Тошкент йигитларидан ҳам бор, қўйонликлар

ҳам кўриндилар. Ўзлари ҳам қипчоқни қидира бериб ҳамма ёқни тозаям ғалвир қилиб юбордилар-да, тақсир... Кўқонга кетган бекларданми, хонданми, ишқилиб, шунаقا буйруқ кепти-да, тақсир... Бизлар хизматкор одам — нимани билайлик, тўрам!

Отабек масалага тушунгандек бўлди ва даҳшат ичидан Али билан йўлга тушди, ўттиз қадам босмай тагин икки ўликка учрадилар. Ўн одимда яна бир жонсиз гавда...

Энди Али сўрамай чидамади:

— Ноузанбilla, бу нима деган гап, бек ака?

— Сўраманг!

— Йўғ-а,— деди Али,— ахир ҳаммаси ҳам гуноҳкормиккин?

— Гуноҳкор!..— деб заҳарханда қилди бек.— Мусулмонқулни биларсиз, албатта?

— Нега билмай, икки ой илгари қочигини ҳам кўрдим...

— Билсангиз,— деди бек,— буларнинг ҳаммаси ўшанинг гуноҳига ўлдирилган ўхшайдир!

— Шу ҳам гапми, худоё тавба!

Одим сайин бир ўликка учраг эдилар. Али санаб келар эди, гузарга етганда саноқ етмишдан ортди. Ҳали бу биргина тўғри кўчанинг ҳисоби бўлиб, кенг Тошкентнинг ўзга кўчаларини ҳам ҳисобга олганда фаже бир адад ташкил этиши маълум. Гузарнинг ичига кирганда қатор чизилган қирқ чоғлик ўлпикларни кўрдилар...

Кун асрдан оғиб шомга яқин, шунинг учун гузардаги дўконлардан очиги уч-тўртта, жумладан, Ҳасанали ҳам ярим очик дўкони олдида ўтирас эди.

— Соғ келдингизми, бек! Еиз бу ерда юз хил васвасага тушиб ташвиш тордик,— деди Ҳасанали.

Стабек бошқа хаёlda эди. Ҳасаналининг сўзини гўё эшитмагандек сўради:

— Бугун дадам қаерда эди?

— Сиздан кейин ўрдага кетган эдилар. Бир соатдан кейин, шошганнамо қайтиб келдилар-да, сизни сўрадилар, шундан сўнг қаёққа кетганларини билолмадим.

— Қачондан бошлаб қипчоқни сўйдилар?

— Отангиз келиши биланоқ,— деди Ҳасанали ва энтикиб фожиани ҳикоя қилди.— Ой.. бек, раҳмсизлик бунаقا бўлар экан... Худди қиёмат бўлди! Бечоралар

німа гуноҳ қилдиларикин? Уйида ҳалол касбini қилиб ўтирганларигача тутиб сўйдилар... Эй бечоралар, қандай гуноҳлари бор экан? Йигитлар тутиб келтириб турадир, жаллод бош кесиб борадир... Бу ногаҳоний қазодан эслари чиқиб кетган бечоралар йиглашадилар... Айниқса, бир бўёқчи... худди хум ёнидан тутиб келганлар — қўли бўёқ... Эй худо, мен нима гуноҳ қилдим, деб йиглайдир... Чидаб бўлмади, дўконни ёпиб қочдим, кўплар ҳам қочдилар... тагин бир...

— Бас! — деди Отабек, Ҳасанали ҳикоядан тўхтади, чунки бекнинг юраги эзилиб оқиш даражасига етиб, Али Отабек билан хайрлашмасданоқ қочган эди...

Уйга бориб кечки ошни ҳам емади ва отасига ҳам учрашмади, гўё шу йиргичлар дунёсидан яширингандек оқ қундаёқ тўшагига ётиб, кўрнасига бурканиб олди. Унинг бу ҳолига уй ичи тушунгандари учун, нима қилди, деб сўрамадилар ва ёнига ҳам келмадилар...

Юсуфбек ҳожи эрталаб чойни Отабек билан бирга ичиш учун меҳмонхонага чиқди. Отабек терсайганча келиб чойга ўтирди, отасига салом ҳам бермади. Чунки у ўз отасини қипчоқ қирғинининг бош омилларидан деб қарор қўйган эди. Чой яримлаёзи. Ораден чурқ этган сўз чиқмади.

Нихоят, ўғлига енгиллик бериш ниятида ҳожи тилга келди:

— Хафа бўлма, ўғлим!

— Сизларга ўхшаб,— деди истеҳзоланиб,— қувонайми?

Ҳожи ўғлининг қандай фикрда ва нима учун терсайганини билди.

— Янгишасан, ўғлим!

— Ражаббекникидаги мажлисда,— деди заҳарханда билан,— бу йиртқичликнинг режачиси ким эди?..

Ҳожи энтиқди ва:

— Ражаббекникида бўлган мажлисни сен биласанми?...— деб сўради.

— Биламан.

— Билсанг,— деди ҳожи,— менинг устимга мунид оғтуҳмат ортишдан уял, бола!

— Ражаббекникида бу кенгаш бўлганмили?

— Бўлган эди.

— Бўлган бўлса, тагин қега ўзингизни қуруққа оласиз?

Юсуфбек ҳожи ёш боладан кулгандек қилиб ил жайди.

— Баъзи енгил муҳокамаларинг онангницидан қолишмайдир, Отабек! — деди.— Мажлисдан хабаринг бўлган бўлса, ким қайси фикрда қолганини ҳам биларсан?

— Йўқ.

— Мажлисда нимадан баҳс қилинганини-чи?

— Мажлисда нима музокараси бўлганини ҳам билмайман ва лекин ўша мажлис фақат қипчоқларга қатли ом учун йигилган экан, деб кеча ишондим. Мажлисингиз аъзоларининг сиздан бошқаси нега йигит тўплаб, Қўқонга кетдилар ва улар Қўқонга етмасларида-ноқ нега бу ваҳшат бошланди?

— Бу муҳокаманиг тўғри. Аммо отангни ҳам шу жониборлар орасига қўшиб ўлтиришинг қисқалигингдир! — деди, кўзига ёш олди: — ўзинг ўйлаб кўр, ўғлим! Ўз қўлимиз билан ўзимизникини кесишимиздан мамлакат учун қандай фойда бор? Башарти, мен бу ваҳшатта иштирок қилган бўлсан, қайси ақл ва қандай мағфаатни кузатиб қўшилишган бўламан? Агарда менинг юрт сўрамоққа ва шу восита билан бойлик ортироққа орзум бўлса, бошқалардан ҳам кўра ўз ўғлимга — сенга маълум бўлмасми? Нега ҳар бир нарсага етган ақлинг шунга қолганда оқсайдир. Нега ёнган юрагимга яна сен ҳам заҳар сочасан?!

Титраб ва тўлқинланиб айтилган бу сўзлар Отабекни ўқинтирди, ўлганнинг устига чиқиб тепиши қабилидан бўлган ўз ҳужумининг ҳақсиз эканига тушиуниди.

Юсуфбек ҳожи битта-битта ётиги билан мажлис ҳақида баён қилиб, ўзининг қарши тушганини ва уларга уқдира олмагандан кейин, мажлисни ташлаб чиқиб кетганини сўзлаб келиб деди:

— Бирор соатлардан сўнг орқамдан Ниёз қушбеги келиб мендан афв сўради ва мажлиснинг у фикрдан қайтганини, ўзларининг хатога кетгандарини айтди. Мен хурсанд бўлиб, бу ишнинг зарарини яна исбот қилиб чиқдим. Ниёз мен билан хайрлашар чорида: «Жон ҳожи ака! Энди гап шу ерда қолсин, битта-яrimта эшигтудек бўлса, биз ерга қараплик бўлмайлик, ўлтиришнинг катта илтимоси сиздан — шу!» деди. Мен бу иблисона алдовга учиб, бу тўғрида на сенга ва на Нор-

муҳаммад қушбегига оғиз очмадим ва уларнинг Қўёнга фотиҳа учун қўзғалишларидан ҳам ҳеч бир шубҳаланмадим... Эҳ, шайтонлар!

Хожи бир оз тўхтаб давом этди:

— Кеча эрталаб ўрдага борган эдим. Саҳн юзида уч-тўрт юз мусаллаҳ йигитларни бировни кутган ҳолда кўрдим ва илтифотсиз қушбеги маҳкамасига кирдим. Кирсан, Қўёнга кетган Қаюм понсад уч-тўрт йигити билан қушбенинг қаршисида турибди. Қушбеги қўлида бир қоғоз ушлаб, гўё эс-ҳушидан айрилган каби қотиб ўтирибdir. Мени эшикдан кўриб, сўзсиз-несиз қўлидаги қоғозни менга чўзди ва бошини тебратиб қўйди. Мен бир нарсага ҳам тушунмаган ҳолда бориб қоғозни олдим... Ўқидим-ўқидим-да, менинг ҳам ҳушим бошнимдан учиб, қушбеги ҳолига тушдим. Бу қоғоз хоннинг ёрлиги эди ва бунда тахминан шундай гаплар бор эди:

«Биз Туркистон мамлакатининг хони ўз қаламравимиз ва салтанатимиз учун қипчоқ тойифасини музир деб билдик. Бу янглиғ ҳукмимизни ўз қаламравимизда бўлган барча бекларимизга, ҳоким, қўрбоши ва даҳбосиларимизга билдириб буюрамизки, ушбу фармонимизни олган он дарҳол ўн беш ёшдан то етмиш ёшгача бўлган қипчоқ эр зотини қиличдан кечиргайлар ва ҳеч бир силаий раҳмни восита қилмагайлар. Ушбу ҳукмимизни ерига еткузишда сустлик қилган мансабдор бизга итоатдан бош тортган ҳисобланиб, энг қаттиқ жазомизга маҳкум қилинур. Бу ҳукмимизни ижро эткувчи Тошкент ҳокими Нормуҳаммад қушбегига марҳамати шохонамиз шулдирким, гарчи сизянинг қипчоқ қавмига мансубиятингиз бўлса ҳам, Мусулменқулини ҳайдашда бизга унумаслик хайриҳоҳликлар ва хизматлар кўрсатдингиз, бинсан алайҳи сиз бу жазодан маъғурдирсиз ва садоқатингизда бокий қолиб, амримизни ижро этишингизда шубҳа қилмаймиз!»

Қушбегига қарадим, ул ҳам менинг оғзимга қараб турар эди. «Буйруқни қачон олдингиз?» деб сўрадим. Ул жавоб ўрнига Қаюм понсадга имлади.

«— Мен олиб келдим!» — деди Қаюм понсад.

— Сиз Қўёндан олиб келдингизми? — деб сўрадим.— Чунки сен айтгандек беш олти кунда Қўёнга бориб келиш сира ақлга сиғмас эди.

«— Биз беклар билан Қўқон йўлида эдик,— деди Қаюм,— йўл устида хондан ушбу ёрлиқ келиб қолди. Ниёз қушбеги менга йигит қўшиб бу ҳукмномани ижро қилишда бекка ёрдам бормак учун жўнатди!»

— Бу сўз менга ҳамма шайтонотни очиб берди ва ўзимнинг иблислар томонидан алданганимни билдим,— эртадан бошлаб ҳукмни ижро қилсак қалай бўларкин? — деб қушбегига қарадим.

«— Мен ҳам шуни ўйлаб туриб эдим...» — деди қушбеги ва Қаюмга қаради.

Қаюмнинг устодлари ишни кейинга силташимисни илгаридан кўриб қўйган эканлар:

«— Эртага қўйиб бўлмас!» — деди Қаюм.

— Нега? — дедим.

«— Негаки, эртагача қипчоқлар қочиб битадирлар!»

Мен Қаюмнинг сўзига қулоқ солмадим-да, қушбегидан эртанинг кенгашини сўраган бўлдим. Бу ҳолдан аччиғланган Қаюм ёнимга келиб ўтириди.

«— Овора бўлмангиз, ҳожи ака!» — деди.

Унинг бу ҳаракатидан аччиғим қистади.

— Сизнинг билан менинг бу ишга аралашмоққа ҳаққимиз йўқ! — дедим.

«— Сизники бўлмаса тўғри, аммо менини бор!» — деди Қаюм.

— Буйруқ кимнинг отига? — дедим.

«— Қушбетининг!»

— Бас, сиз билан мен фақат у ёрдам сўрагандагина кетмон кўтарамиз, бошқа даҳлимиз йўқ! — дедим.

Қаюм заҳарханда билан ёнини кавлаб, иккинчи бир буйруқ чиқарди ва менга бериб:

«— Ўқингиз!» — деди. Ўқидим.

— Бас, биринчи буйруқни сиз олган экансиз, нега яна қушбегидан фотиха кутиб ўтирибсиз?! — дедим ўт ичида.

«— Ҳар нарса бўлганда ҳам улуғимиз деб сийлаб турган эдим...» — деди Қаюм.

— Эгасини сийлаган итига суяқ ташлар қилмоқчиз-да, баракалла! — дедим.— Борингиз, устодларингизнинг васиятини бажарингиз!

«— Хафа бўлмангиз, ҳожи ака!» — деди Қаюм ва қўлимдан қофозни олиб қушбегидан сўради: «— Нима дейсиз энди, бек?»

«— Менинг кенгашимга кирсангиз, эртадан бошлайлик!» — деди қушбеги.

«— Сира иложи йўқ, қушбеги! Чунки барча шаҳар ва кўйларга ҳам фақат шу бу кунга, деб буюрган ёкан!» — деди Қаюм.

Қушбеги билан мен гўё тоғ остида босириқ бўлган эдик. Бошимизга ҳеч бир гап келмас эди. Қаюм ўрнидан турган ҳолда қушбегидан жавоб кутар эди. Қушбеги кўп фурсат ўтиргандан кейин, Қаюмга қўли билан чиқишига ишорат қилиб, «билганингизни қиласверингиз!» деди. Қаюм ёнидаги йигитлари билан маҳкамадан чиқди. Унинг чиқиши билан қушбегига дедим:

— Энди нима қиласми?

«— Нима қилас өдик?»

— Ахир, қараб қола берамиزمи, вақт танг, қаршига биз ҳам йигит чиқарайлик!

«— Қўя берингиз, ҳожи!»

— Бечора гуноҳсизлар кесила берсинларми?

«— Кесила берсинлар!» — деди қушбеги, мен изтироб ичida унга тушунолмай қолган эдим. У йифи ичida тилга келди: «— Мамлакатнинг тинчлиги қипчоқларни кесиш билан ҳосил бўлса — майли, кессинлар! Юртнинг ободлиги гуноҳсиз қипчоқнинг қизил қонига қараб қолган бўлса — майли, ўлдирсинлар! Агарда нажотимиз қипчоқ тухумини қуритишда бўлса — мени ҳам оссинлар! Бу палидларнинг марҳаматига мен ҳам муҳтоҷ эмасман!»

— Ҳозир инод¹ нинг ўрни эмаслигини ҳарчанд уқдирмоқчи бўлдим, кўнмади. Ноилож, ёлғиз ўзим чиқиб қўлимдан келганча қипчоқларни қочиришга ҳаракат қилдим, теваракка кишилар йўлладим. Аммо тўрт юз жаллоднинг қаршисига чиқсан бир кишининг уҳдаси, албатта, бир-бир кишича эди. Муттаҳамлар кўп бечоранинг ёстигини қуритишга муваффақ бўлдилар! — деди ҳожи.— Мана, Отабек, ҳақиқат шул, киши тушунмасдан туриб бирорвга туҳмат тўқимайдир!

Отабек ўзининг ўринсиз гапидан уялганнамо ерга қаради ва бирмунча вақт фикрга кетиб ўтиргандан сўнг сўради:

— Йиртқичларнинг бу қирғиндан қандай муддаолари ҳосил бўларикин?

¹ И nod — ўжарлик.

— Мақсадлари жуда очиқ! — деди ҳожи.— Биттаси мингбоши бўлмоқчи, иккинчиси Нормуҳаммаднинг ўрнига минмакчи, учинчиси яна бир шаҳарни ўзига қарам қилмоқчи. Ҳон эрса Мусулмонқулга бўлган адватини қипчоқни қириб аламдан чиқмоқчи! Менга қолса ўртада шундан бошқа ҳеч гап йўқ, ўғлим! — деди ва бир оз тўхтаб олиб давом этди.— Мен кўп умримни шу юртнинг тинчлиги ва фуқаронинг осойиши учун сарф қилиб, ўзимга азобдан бошқа ҳеч бир қаноат ҳосил қилолмадим. Иттифоқни нима эканини билмаган, ёлғиз ўз манфаати шахсияси йўлида, бир-бирини еб, ичган мансабпаст, лунёпаст ва шухратпаст муттаҳамлар Туркистон тупроғидан йўқолмай туриб, бизнинг одам бўлишимизга ақлим етмай қолди... Биз шу ҳолда кетадиган, бир-биримизнинг тегимизга сув қўядиган бўлсак, яқиндирики, чор истибоди Туркистонимизни эгаллар ва биз бўлсак ўз қўлимиз билан келгусимизни ўрис қўлига қолдирган бўлармиз. Ўз наслини кофир қўлига тутқун қилиб топширувчи — биз кўр ва ақлсиз оталарга худонинг лаънати албатта тушар, ўғлим! Боболарнинг муқаддас гавдаси мадфун Туркистонимизни кофирхона қилишга ҳозирланган биз итлар яратувчининг қаҳрига албатта йўлиқармиз! Темир кўракон каби доҳиларнинг, мирза Бобир каби фотиҳларнинг, Фаробий, Улуғбек ва Али-Сино каби олимларнинг ўсиб-унган ва нашъу намо қилганлари бир ўлкани ҳалокат чуқурига қараб судрагувчи, албатта тангрининг қаҳрига сазовордир, ўғлим! Гуноҳсиз бечораларни бўғизлаб, болаларини етим, хоналарини еайрон қилувчи золимлар-куртлар ва қушлар, ердан ўсиб чиққан гиёҳлар қарғишига нишонадир, ўғлим!..

4

ОЙ ЭТАК БИЛАН ЁПИЛМАС

Чой тугалган эди. Отабек фотиҳа ўқиб, ўрнидан қўзғалмоқчи бўлди.

— Турма!

Юсуфбек ҳожи тарафидан берилган омиrona бу буйруқ Отабекни қайтадан ўтириб қолишга мажбур этди ва отасига «нима хизматингиз бор?» дегандек қи-

либ қаради. Юсуфбек ҳожи бир сўз демасдан салласини олиб тиззасига қўйди. Бош қашиниб яна саллани кийди. Дадасининг салла олиб, бош қашиниши кейинидан кўпинча ўзини бир тергов остида кўрар эди. Шунинг учун яна бир мартаба дадасига қараб қўйди.

Чини билан ҳам ҳожининг тузидағи бояги ҳасрат ва қайғу аломатлари йўқолиб, уларнинг жойини шарқ оталиги вазияти олди.

— Марғилонда нима ишлар қилдинг?

Кутилмаган бу саволга Отабек нима деб айтишини билмай қолди. Жавоб ўрнига ҳовли томонга қаранди.

— Сендан сўраяпман, Отабек!

— Сизга хабар бергувчи нима ишлар қилганини ҳам айтгандир...

— Жўн одамлар қаторида одам ўлдириб юрдим, дегин?!

Отабекнинг юзида кулимсираш билинди.

— Жўн одамлар қаторида эмас,— деди,— мажбурлар қаторида, зўрланганлар қаторида!..

Ҳожи ўғлининг киноясига тушунмади:

— Одам ўлдириш учун сени ким зўрлаб мажбур қилди?

— Ҳали билмайсизми?

— Билмайман,— деди ҳожи,— айтишларига қаранди, сени ҳеч ким мажбур қилмаган!

— Мени зўраган ва мажбур қилган эдилар, дада! — деди заҳарханда билан.— Йўқса, сизнинг ўғлингиз бўлган бир йигитнинг шаънига, албатта, одам ўлдириш уят ва номусдир.

— Ким сени мажбур қилди, ахир?

— Сиз, онам!

— Эсинг ўзингдами, йигит?

— Ўзимда,— деди ўғил,— сиз ўзингизнинг орзуҳавасингиз ўёлида мени мажбур қилдингиз ва душманларимга йўлни катта қилиб очиб бердингиз, мен бу жониворликни хоҳ, ноҳоҳ ишлашга мажбур қолдим!

— Шундоғми,— деди ҳожи ўз гуноҳи ўқилига тушган ҳолда,— ундоғ бўлса, бизни кечир, ўғлим!

— Сизни гуноҳкор қилишга ва гуноҳингизни кешишга менинг ҳаққим йўқ, дада! Лекин гуноҳсиз бўла туриб, ҳам яна мувоҳаза остига тушганим учун ўзимни мудофаа қилишга мажбурман...

Ҳожи лабини тишлаб, бошини чайқади:

— Хом сут эмган бандамиз! — деди.— Хайр, бу айбни-ку бизнинг бўйнимизга қўясан, дарҳақиқат қўйишга ҳаққинг ҳам бордир... Аммо ораларингта ёмонлар оралаган экан, шунча муддатдан бери нега мени хабардор қилмадинг? Ёки бунда ҳам бирор сени индамасликка мажбур қилдими?

— Ҳеч ким мажбур қилмади,— деди,— аммо мени шу вартага ташлаган дўстларимдан... кўмак сўраш ҳам маъқул кўринмади...

Ҳожи бошини қуий солди. Ўғлининг кейинги сўзи жуда унга таъсир қилган эди... Нима қиссинки, Отабек тўғри гапни айтар эди...

— Биз сени Тошкентдан уйлантирсак-да,— деди ки-хоят ҳожи,— катта хотинингдан ажратиш фикрида эмас эдик. Агар сен шу хаёл билан биздан сирингни яшириб келган бўлсанг, катта аҳмоқлик қилибсан, болам!

Отабек дадасининг бу кейинги сўзига қарши ҳеч нарса демади, гўё ҳамма аламини юқоридаги икки жумла билан чиқариб юборгандек жимгина сомелик¹ дараражасига тушди. Аммо натижани тезроқ эшитиб олиш учун унинг юраги қайнаган ошдек шопирилар эди.

Ҳожи давом этди:

— Кишининг бошига бир иш тушганда, дарров бирордан кенгаш ва ёрдам сўрайдир. Ҳатто, ота-онасидан ҳам сир сақлаган бир йипитни ўз ўғлим бўлиб чиққани менга қизиқ кўринадир. Қайин отанг менга бир хат ёзибdir, ўқиб-ўқиб мазмунинга тушунолмай ҳайрон бўламан. Ой сайин Маргилон бориб турар эди-ку, деб ўйлайман. Ҳатни икки-уч қайта ўқиб чиққандан кейин, билсам ҳақиқат шу эмиш... Мирзакаримнинг ёзганига қараганда бирмунча янгишлик ундан ҳам ўтган кўринадир ва лекин сенинг болалигинг олдида уники ҳолвадир... Яхшики бу ақлсизлигинг бошқаларнинг бошига кўринган... Ўзинг айт, агар менга шу касалингни бир оғиз билдирансанг, мен қайин отангга хат ёзмасми эдим, Ҳасаналини юбориб ҳақиқатни очмасмидим ва бу тақдирда одам ўлдириб юришларга қандай ҳожат қолар эди?

¹ Соме — эшитувчи, тингловчи.

Отабекнинг бошига бу гапларнинг бир ҳарфи бўлсин ўрнашмас ва ўзи куттган натижага бориб етиш учунгина қийналар эди.

— Шунчалик ишларни қилиб, нега охирда қайин отангга йўлиқмай келдинг?

— Шунга мажбур эдим.

— Марғилонга энди қачон борасан?

Отабек ўйлаб қолди. Чунки бу «қачон бориш» масаласини яхшилаб ешмак керак эди ва уни ешмак ҳам қийин эди, узоқ ўйлагандан кейин:

— Маълум эмас,— деди.

Гарчи бекнинг юраги ҳозир бўлса ҳам Марғилонга қараб учишга тайёр эди, бироқ унинг юрагидан кучли бўлган яна бир нарса «бориш» масаласини чуволтириб, «маълум эмас» бир ҳолга қўйган эди.

— Қайин отанг келин болани олиб шу ҳафта ичи йўлга чиқмоқчи экан! — деди ҳожи.— Тарихига қарангда хатнинг ёзилганилигига ўн кунлаб бор, эҳтимолки эрта-индин келиб қолсалар, тўрдаги уйни бўшаттириб, полос ёзиш керак эди...

У бу гапни эшитар экан борлиқ, йўқлиқ — ишқилиб аллақандай қизиқ бир ҳолат кечирди. Иссиқ бир нарса баданига тегиб кетгандек ҳуркиниб кўйди ва «ниҳоят, эндими?» дегандек қилиб энтиқди. Кўз ўнгидан бирорвонинг сурати ўтиб сархушланди ва тил билан англатиб бўлмаслик бир соғиниш чидамсизлиги ичида у ивирчивир ҳолатдан гангид кўз очди. Кўз очди, бироқ ўзига «нима дейсан?» деб қараб турувчи отасига мувофиқ бир жавоб беришни билмади. Юсуфбек ҳожи эса ўғлининг бу сустликка ўхшаб кўринган ҳолини ёмонга йўйди. Марғилон деган шаҳардан катта ўзини кичик олиб қизи ила келаётган Мирзакарим акага ўғлининг хўрлик келтиришидан чўчиди. Шунга биноан Отабекни эпақага олиш учун унга кулки туюлган бир қанча насиҳатларни чизди.

— Ўғлим,— деди,— сийлаганни сийлаш керак, энди сенга қадрсизланган бўлсалар, аммо бизнинг қошимизда уларнинг қадру қийматлари юқори. Қутидор бўлса кўз очиб кўрган қудамиз, хотининг бўлса бош келинимиз! Агар сен мени отам дейдирган бўлсанг, шуларнинг кўнглини олмоққа тириш! Қайин отангдан мени қувлади, деб кўнглинг олинмасин, чунки у бечора ҳам бир шайтоннинг васвасаси билан бу хатога тушган —

ҳар ҳолда ҳурматларини бажо келтир, Марғилон деган шаҳардан сенинг юзингни, деб келадилар.

Отасининг бу сўзлари унинг истиқболи учун яхши таъминотлар берар, гўё мажбурият остида ота насиҳатини қулоққа оладигандек бўйин эгиб ўтирас эди.

— Агар уларнинг келиш кунларини аниқ билсак,— деди ҳожи,— сен йўлдан қаршилаб кирав эдинг!

Отабек жавоб бермади.

— Ҳар ҳолда ўттаси кун мўлжал, сен чиқмасанг ҳам, Ҳасанали чиқсин, йўлга!

— Майли, чиқсин! — деди Отабек.

5

МАКТУБ

Ҳожи шу жавобдан кейин ўғлидан бир даража қаноатланди ва чойга фотиҳа ўқиб, ўрнидан турар чоғида ёнидан бир хат чиқариб узатди:

— Хатнинг ичидан чиқди. Келиндан — сенга бўлса керак,— деди.

Отабек мактубни олиб отасининг кетишини кутиб қолди. Хат саккиз букланиб, қизил ипак билан бир-икки еридан чатилган ва Отабекка аталган эди. Отасининг узоқлашини кутар экан, юраги ёмонлаган отек типирчилар эди. Тикилган ипакларни сўқди ва мактубни очиб оч кўзини ишга қўйди:

«Юсуф савдосида беқарор Зулайҳо исмидаи, Мажнун ишқида йиглаган Лайли отидан — сизга бошимдаги соchlаримнинг тукларича беҳад салом. Мендан — ҳадду-ҳисобсиз гуноҳ, сиздан кечириш. Ўтган ишга саловат. Чунки шу икки йил ичида кечирган қора кунларни эсга олиш менинг учун ўша кунларни қайтадан бошдан кечиришлик сингари, ул кунларни сиз унутинг, унутманг, аммо мен унутдим. Шунинг учун сўзимни ўзимнинг охирги ҳам чин баҳт ислари ҳидлаган тарихимдан бошлайман.

Сиз — қочқоқсиз, нари-бери тил учиди менга бир нарса ёзгандек бўлиб қочгансиз, икки йил бўйи Марғилон келиб юришларингизни мен — ўзимча ечдим, лекин топиб ечдим: сизнинг барча машақкатларингиз — душманларингиздан ўч олиш учун бўлганини англадим. Йўқса, мени кўрар эдингиз, кўргингиз кел-

маганда ҳам бошқалар сизни кўрар эдилар, тўйр эдилар... Мен каби баҳтсиз, мен каби ғовғаси кўп сизни зир кетириб, жондан тўйдиргая бўлса, ажаб эмаски, қоча бошлагансиз... Қочсангиз қочиб кўрингиз, аммо мен бу кундан бешлаб, бирорларни қувишга бел боғладим. Отам билан ошам рафоқатларида хизматингизга — чўрилигингида эрта-индин юраман, севганинги кундошим олдида қадру қийматимнинг нима бўлешини ҳам биламан... Сиз олижанобсиз: эски қадрдовлик ҳурматига, кўнгил учун кулиб боқарсиз... Лоқал шутина билан ҳам баҳтсизни масъуд қиласиз! Аммо... севганинги — кенжангизининг жеркишларида, қарғишларидан беҳад қўрқаман, ўзимда йўқ қўрқаман. Шу яқин срадаги унинг билан бўладиган масъуд дақиқаларингизда худо йўлнга ваъда олингиз — мени оғримасин, рақибам келди деб ўйламасин. Нихояти мақсадим икки дўстга бир чўрнилк ва шу муносабат билан бирорсларни кўриб юрини...

Хатим охирида шуни ҳам айтиб қўяй: ўч қайтиб, мен ҳам кўчадан ҳайдалмасам эди, деган хавф ҳамиша кўнглимда. Агар худо ёрлақаб эшигингизда ўринлашиб олсем, у ёғини ўзим билар эдим...

Эрта-индин кўзимга йўл кўринур
Йўл босишлиқ кўнгилга бир умр кўринур...

З ҳамал, Марғон, Кумуткингиз ёздиш».

Отабекнинг севинчи ичига сифласлик, ўзини йўқотиб қўйган ҳолда илжаяр эди. Хатни иккинчи қайта ўқиб чиқиб, яна севина бошлаган эди, кечаги манзаралар унга кўриниш бергандек бўлдилар. У сесканди, кўз ўнгидан кечаги мазлум гавдалар бирма-бир ўтиб, у ошиғич равища хатни буклади ва улардан яширгандек чўнтағига тиқди, иргиб ўриндан туриб кетди...

Кўчани бир айланиб келгандан сўнг, бояги манзаралардан бир оз қутулгандек бўлиб, яна мактуб эсига тушди. Меҳмонхонанинг даричасига қия турган ҳолда хатни яна ўқиб чиқди. Лекин бу хат ҳам боягидек севинч эмас, кечаги мазлумларга таъзия туттандек оғир маъно берди: «Аммо... севганинги — кенжангизининг жеркишларида, қарғишларида беҳад қўрқаман...» боя нима учун севинганига ўз-ўзидан ҳайрон бўла бошлади. Чиндан ҳам мактубнинг мунда кўчирилган

жумласи, ўйлаб қараганда, ҳеч қандай қувончга йўл қўймаслик даражада қора маъноли эди. Бу жумла келасидаги англашилиб битмаган, лекин бўлиши аниқча ўхшаган ярамас ва тинчсиз бир ҳаётнинг гўё муқаддимаси эди...

Отабек Кумуш айтгандек кундош, яъни Зайнабдан унча қўрқмаса ҳам, аммо дарднинг энг давосизи бўлган онаси тўғрисида юраги титради. Умрининг энг қимматли кунларини оғулаган, икки йил бўйи давосиз дардга мубтало қилган, ярамас ва ишончсиз йўлларда санқишига сабаб бўлган ўз онаси эмасми? Рақибларга, душманларга йўл очиб берган шу онанинг орзузи эмасми?

Бутун шаҳарни алгоқ-далгоқ қилиб кўҳли қиз қидирган, ниҳоят чиройлилиқда танҳо, ақллилиқда якто топиб, тўйлар, томошалар, орзу ва ҳаваслар билан ўғлига «хотин бу бўлибdir!» деган, ифтихор ва мағрурият илиа тақдим қилган севикли келини устига гўё ўчакишгандек бўлиб келадирган Марғилон парисига нима ва қандай муомала қиласи эди?

Кумуш кундошининг жеркишидангина чўчиған бўлса, Отабек бу чўчишни ўзининг кўланкасида қолдирадиган онаси тўғрисида тамом ақлини йўқотиб қўйди.

6

ЎЗБЕК ОЙИМ — ОҒМА, ЗАЙНАБНИНГ ДАРДИ

Юсуфбек ҳожи чала-думбул табиатли хотинининг феълини яхши билгани учун ўтган воқиаларни, яъни Отабек сирларини унга очмасликка қарор берган бўлса ҳам, аммо марғилонлик келин ва қудаларнинг келишларидан хабар беришни лозим топди. Чунки хотинининг марғилонлик кelingга бўлган адоватини Отабекдан ҳам яхшироқ билар ва унинг: «Ўғлингиз Марғилондан уйланмади, бир балодан уйланди!» деб қиладирган шикоятларини ҳамма вақт эшитар, доимо иссиқ-совуқчи домла, хўжаларницида бош оғритиб юришини ҳам билар эди. Шунинг учун ўз тарафидан Ўзбек ойим тушкирни яхшилаб эбга олмоқ, юз қизартирадиган ишларга қарши чораларни кўрмак фикрига тушди.

Чолу кампирнинг ҳар бир ўтиришларида сўз Ўзбек ойим томонидан бошландими, албатта, ноқобил ўғил билан марғилонлик «анди» келин устида бўлар ва унинг учун энг аҳамиятли масала фақат шугина бўлиб кўринар эди.

Бошқа кезларда кампирнинг бу тўғридати дод-ҳасратини кулгулик билан ва кам хафсалалик билан эшилса ҳам, аммо бу гал Ўзбек ойимнинг ўша эски ашуласини ортиқча бир тўзимсизлик орасида кутар эди. Кампирнинг дарди ғўзада, сичқоннинг кўзи донлик кўзада, деганларидек, бизнинг Ўзбек ойимизнинг ҳам дарди юзада эди. Сўз уринди, сўздан — сўз чиқди, ниҳоят ҳожининг кутганидек ўғил ҳасрати ҳам бошланди:

— Аҳмоқингиз бир оз эсини йиқсан кўринадир,— деди Ўзбек ойим,— ҳайтовур уч ойдан бери Марғилонни эсидан чиқариб қўйди.

Ҳожи кулади:

— Иссиф-совуғинг кор қилгандир...

— Билмадим... Ҳар нучук сув қуйгандек бўлди-қолди! Илоҳи эм тушган бўлсин...

Ҳожи кулиб:

— Илоҳи эм тушсин! — деди.

Ўзбек ойим эрининг истеҳзосига тушуниб қолди ва лаби-лабига тегмай бобиллай кетди:

— Нега куласиз,— деб депсинди,— бу кунгача кулиб-ку, ўғлингиздан ажралаёздингиз! Эндиғина сиз ҳам... худоё тавба қилдим!

— Зўри беҳуда миён шиканад!

— Илоҳи сўзингиз қурсин! — деди Ўзбек ойим,— мен тўғрисини айтсам бу гапларнинг ҳаммасига сиз сабаб бўлмоқдасиз, эр! Яккаш кулиш, яккаш кулги! Ундан кўра ўғил-қиз ўтиришга уқувим йўқ, деб айтинг!

Ҳожи тағин кулади:

— Ҳа, уқувим йўқ, ойимча!

— Кулинг-а, кулинг! Худо ўлим берсин кулгуга! — деди Ўзбек ойим ва аччиғи билан юзини четга ўгирди.

— Менга қара, хотин! — деди ҳожи жиддий тусда. Ўзбек ойим қаради.— Ўринсиз чирансанг, белинг сина-дир, дейди тоҷиклар. Шунга ўхшаш ўзинг жойсиз чиранганингдек, мени ҳам ўз ёнинига тортмоқчи бўласан!

— Бўлмаса менинг барча ҳаракатларим ўринсиз экан-да?!

— Ўринсиз!

— Нега ўринсиз бўлар экан?

— Сенинг муддаонг,— деди ҳожи,— марғилонлик келинни ўғлингдан ажратиб юбориш ва бу келининг билан қолдириш — шундоғми?

— Албатта шундоғ!

— Мана шу ҳаракатингни ўринсиз чираниш, дейдилар. Нега десанг, билфарз ўғлингни олдингга олсанг-да ундан сўрасанг, «қайси хотининг билан бўлишни хоҳлайсан? Хоҳламаганингни қўй!» — деб. Ана шу вақтда ўғлинг нима дер эди? Нима дейишини ўзинг ҳам яхши билсанг керак, хотин!

— Биламан,— деди Ўзбек ойим.— Марғилонликнинг домласи кучли. Ўғлим бечоранинг бошини айлантириб, кўнглини хиппа ўзига боғлаган!

Юсуфбек ҳожи ўзини кулгидан яна тўхтата олмади.

— Яхши,— деди,— сен ҳам-ку уч йилдан бери Тошкентдаги ҳамма домла-хўжаларнинг эшигига бирмабир кириб чиқдинг. Бас, сен ҳам нега ўғлингнинг кўнглини Зайнабга хиппа қилиб боғлай олмадинг?

Ўзбек ойим эрининг бу саволидан ҳайрон бўлиб турмади:

— Марғилонликнинг домласи сеҳрчи ҳинди эди, мен бўлсам бу ердан ҳинди домла топа олмадим.

Ҳожи энди кулмади, чунки хотинининг ҳолига ачина бошлаган эди.

— Бундоғ ақлсиз ишларни қўяйлик, хотин! — деб мулоийона сўзлаб кетди.— Бир оз ақлга ён бериб иш қилган киши ҳеч бир вақт дард қолмайдир. Модомики, иккимизнинг ёлғиз ишончимиз шу ўғлимиз экан ва унинг соғлиги, шодлиги бизнинг тириклигимизнинг тираги экан, бас, бизга лозими унинг хурсандлиги нима билан бўлса, шуни ахтаришдир. Мен яхши биламанки, сен бу ишларни фақат ўғлингни аяганингдан қиласан ва сенда шундан бошқа ҳеч бир мақсад йўқ, бу тарафдан қараганда сени ҳам айблаб ўтириш осон эмас... Шуни ҳам яхши билгилки, ўғлингнинг ой сайин Марғилонга қатнаб туриши сени қанча хафа қилса, мени ҳам сендан бадтар аччиғимни қистатар, ҳатто, баъзи кезларда сўкиб юбориш даражаларигача бориб қайтар эдим. Аммо сенинг жаҳлингни чиқариб кулишим бўлса, фа-

қат «ўлганимдан куламан, юзимни ерга суралман» қабилидан бўлиб, бунга сен тушунмас эдинг. Ниҳоят, сен айтгандек, жоним хиқилдоғимга етди-да, ўғлиңгни бу гал Маргилонга борма, деб йўлдан қайтариб қолгувчи ҳам мен — ўзим бўлдим...

Ўзбек ойим бошини тебратиб сўзни эшитиб келар эди. Бу кейинги сўзни эшитгандан кейин, бошини кўксигача етказиб, «баракалла», «раҳмат» дегандек қилиб қўйди...

Ҳожи давом этди:

— Менинг бу тўхтатиб юбормай қўйганимдан ха-барсизлигинг учун бўлса керак, кўнглинг домла-хўжанинг дуосига кетиб қолди ва мен сенинг сўзингдан кулдим. Чунки ҳақиқатан бунинг сабабчиси ўзим эдим...

Ўзбек ойим эридан ўпкалади:

— Нега ахир мени хабардор қилмайсиз?

— Бу тўғрида менда ҳам айб бор! — деди ҳожи,— сен билан ўзимнинг муддаоларимиз бир деб ўйлаганим учун, Отабекни койиб тўхтатганимдан сўнг сенга кенгаш солмасданоқ қудаларингга бир хат ёзган ва келин болани Тошкентта олиб келишларини сўрасан эдим. Ҳайтовур сўзимни ерда қолдирмаган ўхшайлар, букун қудадан битта жавоб хати олдим... Ақлли кишиларнинг садағаси кетсанг ҳам арзийдир: «Шу чоққача сизларга айттирмасданоқ зиёратларингизга боришимиз керак эди. Хатингизни ўқиб ниҳоятда хижолат чекдик, айниқса келин болангиз бек ойимга қайси юз билан қарайман, деб юзини юлди. Бу одобсизлигини боргандан сўнг, албатта, юзига солмаслар, деб ишонамиз» дейдир...

Ўзбек ойим эрига анқайғанча қараб турар эди. Ҳақиқатан ҳам ҳожининг усталиги Ўзбек ойимдек думбул табиатли хотинларни гангитарлик эди.

У хотинининг жавобини кутиб ўтирмасданоқ, том устига том ёпа борди:

— Қайси уйни бўшаттирсак экан? — деб сўради ва жавоб кутмасдан.— Қудаларингни нима билан кутишни бўлса ўзинг биласан: тую сўйиб чарлаганингда ҳам келмайдирган кишилар! — деди.

Ўзбек ойимнинг мияси айнадими, ёки ўзи айтган сеҳрчи ҳиндininг дуоси асар қилдими, ҳар нучук уч ийллик адоватлар ва кина-кудуратлар барчаси ҳам алла-

қаёққа қараб учиб кетдилар ва уларнинг ўрнини «икки келинлик бўлиш» масаласи келиб олди... Узок, яқин хотинларнинг: «Хой, Ўзбек ойимнинг марғилонлик келини ҳам келибdir, худди тўтигининг боласи эмиш... Юринглар бир кўриб келайлик!» — деган сўзлари эши-тилгандек бўлди. Шу чоққача Зайнабга ялиниб, ёлпоғланниб кун кўриб келган бўлса, бундан сўнг бир қўша келинни ўзининг оёғлари остида ялиниб юрган ҳолда кўрди...

— Ҳар нима бўлганда ҳам теги нозик,— деди ойим.— Иззати учун шу уйимизни бўшатиб берамизми?
— Ўзинг биласан...
— Биз тўрдаги уйга кўчиб ўтсак ҳам бўладир...
Ахир, теги нозик...

Уч йиллик гина ва адоват ўрнига ниҳоятда олий марҳамат ва меҳрибончилик келиб ўтирган эди. Уч йиллик эмас, уч дақиқалик ўзгаришдан Ўзбек ойимнинг юзи қизармас ва қизаришни ҳам билмас, ҳатто ўғилқиз ўстиришни билмагувчи Юсуфбек ҳожидан аллақанча юқориларда юрар эди. Юсуфбек ҳожи эса хотинидаги бу кулгилик ўзгариш учун ажабланмади ва кулмади, чунки бу кулги табиатга молик бўлган хотин билан энди ўттиз беш йиллаб бирга яшар эди.

Ўзбек ойимни шу ҳолга келтиргандан кейин, ундан сўраб қўйди:

— Зайнабга ҳам бу хабарни ётифи билан айтиб қўянимизми?
— Сиз билан мен бир ишни мувофиқ кўрганимиздан кейин, Зайнабга чикора! — деди Ўзбек ойим. Бундан уч дақиқа илгари саодати учун тиришилган орзулик Зайнабнинг оқибати ҳам шу бўлиб қолган эди.
— Гап унда эмас,— деди ҳожи,— умр, муросса деган гаплар бор, айниқса кундошлик иши қийин, коса-косага текканда ғиди-ғиди гаплар кўпайса, бизга эмас, ўғлингта ҳам тотимай қоладир.

— Чакир, дейсизми?

— Чакир.

Ўзбек ойим Зайнаб билан Отабекнинг кутилмаган равишда очилиб сўзлашиб ўтирганлари устидан чиқиб қолди.

— Ўғил-қизнинг кенгашими?

Отабек кулимсираб Зайнабга қаради, Зайнаб эса тузатиниб ўрнидан турди ва қайин онасига жой кўрсатиб:

— Шунақага ўхшайдир, ойи! Ўғил-қизнинг кенгаши худди шу кунга йигилиб қолган экан,— деди ва кулим-сираб эрига қаради.

Ўзбек ойим ўтирмади ва уни-буни суриштириб, ўйлаб турмади:

— Иккаласига бир пардан кўйлаклик ол! Бирини паст, бирини баланд қилма, бу хотининг бўлганда, ул ҳам кўз очиб кўрганинг... Зайнаб, сен мен билан юр-чи, ҳожи станг чақирияптилар! — деди.

Томдан тараша тушгандек қилиб сўзланган юқоридаги гапларга бошда уларнинг иккови ҳам тушунмади. Аммо бир оздан сўнг Отабек айтилган телва-тескари сўзларнинг маъносини англаб олди, онасининг нима бўлса ҳам Марғилон тарафга оғишганини ва ўзининг кучли бир душмандан қутулаёзганини билиб, Зайнабни нима учун чақирилганлигини ҳам пайқади. Зайнаб эса бир нарса тушунмаган ҳолда қайин онаси билан чиқди.

Қайин она ва келин қархисига келиб ўтиришгандан кейин, ҳожи Зайнабга қараб олди.

— Болам, Зайнаб,— деди,— биз Марғилондаги спанг кўчини олиб келмакчи бўлдик... Сен шунга нима дейсан?

Зайнаб ялат этиб қайин онасига қаради, чунки Ўзбек ойимнинг бояги гапи энди унга англашгилган эди. Дўстни душман ёнида кўриб билинار-билинимас қилиб энтиқди.

— Мен нима дер эдим...

— Гап нима дейиш ва нима демасингда эмас, ойим! — деди ҳожи.— Гап шундаки, ул келган чоқда этачи-сингилдек бўлиб кета оласаними, деб сўрамоқчиман.

— Бўлиб кетармиз...

— Этажи-сингил бўлиб кетарсиз-а? — деб такрор сўради қайин ота.

— Билмадим...

— Нега тағин билмай қолдинг?

Зайнаб бирмунча вақт ўйланиб қолди.

— Қарс икки қўлдан чиқадир,— деди Зайнаб,— мен яхши бўлганим билан опам ёмон бўлса, ҳозирги берган ваъдамдан нима фойда бўлсин...

— Жуда тўғри гапирдинг, болам, сендан олган вальдани ундан ҳам оламиз.

Зайнаб сукут қилди.

— Зайнаб сиз ўйлаган келинлардан эмас,— деди Ўзбек ойим,— худога шукур, ақл-ҳуши бошида.

— Башқа гапларни кўнглингга келтирма, қизим! Марғилонлик келин билан сенинг бизга ҳеч бир фарқларинг йўқ, икковларинг ҳам боламизнинг қўшоғи — боламизсиз!

Зайнаб бошини иргатиб қўйди. Юсуфбек ҳожининг дуосидан сўнг, Зайнаб Отабекнинг олдига кирди.

Отабек Зайнабнинг юзидағи маъюсликни биринчи кўришидаёқ сезди. Бир оз жимгина қарshima-қарши ўтиришдилар, иккисига ҳам сўз айтиш ўнгайсиз ва алланарса монедек эди.

— Нега чакирган эканлар? — деб ниҳоят Отабек сўраб юборди.

— Билиб туриб сўрайсизми? — деди Зайнаб кучланаб кулган ҳолда.

— Нимани билиб туриб?

— Марғилондан келадиган кишингизни...

Отабек қийин ҳолатда қолди ва оғзига шу гап келди:

— Бунда менинг ихтиёrim йўқ... Ҳамма ишни отам қилаётиди...

— Отангиз қилсалар ҳам сизнинг кўнглингиздагича!

— Нима кўнглимдагича?..

— Севганингиз билан биратўласига қўшилиб олиш, албатта, сизнинг кўнглингиздагича...

— Мен уни севаманми?..

— Албатта севасиз...

Отабек ўзини тинч ушлаган ҳолда:

— Янглишасиз! — деди.

— Ҳеч янглишмайман! — деди Зайнаб.— Сиз уйлашидаёқ уни севиб олгансиз, мени бўлса, мен отонангизнинг орзуларича!—деди ва кўзига жиқ ёш олди.

Отабек оғир ҳолга тушди, бу тўгри сўз уни тамом эсанкиратди ва бу ҳақиқатга қарши бориш, яъни ёлгонлаш яна оғир эди. Шундай бўлса ҳам ёлгонламай чораси бўлмади:

— Бошда... севиб уйланганим сиз айтганча тўгри, аммо ҳозир ундоғ эмас! — деди.

— Ишонмайман.

— Нега ишонмайсиз, ишснинг...

Зайнаб бир оз унга қараб тургандан кейин:

— Ишонмаганимнинг сабаби бор,— деди.

Стабек тинчсизланди:

- Сабабини... сўзланг...
 - Менга уйланганингизга қанча бўлди?
 - Икки...
 - Шу икки йилдан бери менга бўлган алоқангиз бир зарра ҳам ўзгарган эмас,— деди Зайнаб,— мени хотин ўрнида кўрмайсиз!
 - Бекор гап...
 - Бекор гап эмас, жоним! — деди Зайнаб қизишган ҳолда.— Марғилондан қайтгандан кейинги кунларингизни меҳмонхонада кечириб келишингиздан, албатта, тона олмайсиз... Шу ҳам умид билан бир ёстиқقا бош қўйган эди, деб менинг тўғримда ўйлаб қарамаслигингизнинг сабаби ҳам ўзингизга...
 - Зайнаб сўзини битира олмади, четга қараб кўз ёши ни тўқди. Отабек гўё тоғ остида қолган эди.
 - Сиз тамом бошқача тушунибсиз.
 - Бўлмаса, бу гапларнинг сабаби нима?
 - Сабаби жуда очиқ,— деди Отабек. Лекин нимани сабаб қилиб кўрсатишини ўзи ҳам билмас эди.
 - Айтингиз ахир?
 - Ўзингиз ҳам биларсиз, деб ўйлайман.
 - Мен ҳеч нарса билмайман.
 - Биласиз!
 - Худо ҳаққи, билмайман.
 - Билмасангиз...— деди бек,— билмаганингиз яхши... Сизга ўз оғзим билан иқрор қилишга уяламан...
 - Мендан-а, хотинингиздан уяласизми?
 - Уялмайними?
 - Уялманг.
 - Уялмасам... мезожим заиф...
- Зайнаб ишонар-ишонмас унга қаради.
- Тўғри сўзламадингиз...
 - Ишонмасангиз ўзингиз билинг, лекин ҳақиқат гап шу, сиздан узоқда юришимнинг сабаби ҳам шунда.
 - Ишонганимда ҳам бу ҳол ташқарида ётиб юришингиз учун катта сабаб бўлолмайдир. Чунки мен фақат шунинг учун сиздан ўпкаламайман,— деди ва кўзини тўлдириб Отабекка қаради.— Менга сизнинг мезожингиз керак эмас... Ўзингиз!..— деди ва йиглаб ёлборган ҳолда Отабекнинг қучоғига ўзини ташлади... Отабек Зайнабнинг шу қадар юрак дарди борлигини биринчи марта билар эди. Бечора Зайнаб — жонсиз ҳайкални ўпиб қучоқлар ва ёлборар эди.

ҚУДАЛАРНИ КУТИБ ОЛИШ

Кечаги кирган савдогарлардан қудаларнинг бугун аниқ кириш хабарларини билган эдилар. Нарироқдан кузатиб кириш учун Ҳасанали йўл устига кетган. Юсуфбек ҳожининг ўзи иш бошида туриб, Ойбодоқقا ташқари ҳовлини тозалатар эди. Ичкарида бўлса, Ўзбек ойим қўшни хотинлардан бир нечасини ҳашарга сўтиб, ҳаммани жой-жойига қўйдирган, ҳовли юзини ҳам ёғ тушса ялагундек ҳолга келтирган эди. Аммо ўз уйини бўшаттириб, гилам солиб қўйганига энди уч кунлар бор, қудаларнинг зиёфати учун керак бўлган ҳамма нарсаларни ҳам ҳозирлатган, улар келиб тушди дегунча бўғизлатиш учун деб бир гўонон қўйни оғилнинг устунига қантариб қўйган эди. Кумуш билан Зайнабга аталиб слинган хон атласларга кўнгли тўлмай, «ҳар нучукда теги нозик, бу бўлса энди кўп кийди, атласининг ёнига яна бир хитойи латта олингиз!» — деб марғилонликнинг кўйлагини бир қўша қилдирган. Битта хитойи чужум мурсакни кам кўриб, ёнига ўзининг қиммат баҳо заррин мурсагини ва иккита рўмолига ҳам қониқмай, ўзининг келинлигидан ўролмай қолген қалмоқи салла-часини қўшган эди.

Зайнаб ҳам унча хафа кўринмас, қайин онасининг буйруқларини эски ҳолича бажариб юрар ва ҳосирда уйга кириб олиб меҳмонлар келиб тушди дегунча олдларига ёзиш учун дастурхон ясатар эди.

Ўзбек ойим ҳашарчи хотиндан бирига тандирга ўт қўйишини буюрди-да, ўзи Зайнабнинг олдига келди:

— Дастурхонинг битдими, болам? — деб сўради.

— Битди. Ташқарининг асали камга ўхшайдир.

— Кам бўлса, дарров омбордан керагича олиб чиқ, ундан кейин хамирингта ўзинг қара, Ойбодоқнинг қўли тегмас, хамир гуп бериб кетибди! — деди ва дәричадан кўтарилиб дастурхонларни кузатди,— дастурхон тузук, варақини эсингдан чиқарма! — деди ва ўрта йўлакда кўринган Юсуфбек ҳожини ўзига имлади.— Бери келинг!

Юсуфбек ҳожи бошида оқ дўпписи ва эгнида оқ олача тўни билан устидан белини боғлаган эди. Ўзбек ойим ёнига секин-секин юриб келди:

- Нима гап?
- Даастурхонларимизга бир қараб қўйинг-чи?
Хожи парвосизгина қилиб қараган бўлди:
- Ўзингта ёқса бўпти,— деди.
- Қассоб айтганмисиз, тағин улар келгандан сўнг шошиб қолмайлик.
- Қассоб тайёр, ҳозир бўғизлатсак бўлмайдими?
- Йўқ,— деди Ўзбек ойим,— ош эгаси билан ширин! Ҳа, айтгандек, қудангизникига юборган кишингиз келдими?
- Асал учун шошиб борган Зайнаб тўхтаб қайин отасининг оғзига қаради.
- Бориб келди,— деди ҳожи,— Олимбек даласига кетган экан, хотин қудалар келишмоқчи бўлишибдир.
- Зайнаб асалга кетди. Ҳожи Ўзбек ойимнинг ёнига юриб келди ва секин сўради:
- Зайнаб хафа эмасми?
- Нимага хафа бўлар эди!
- Ахир, сўрайман-да.
- Туппа-тузук,— деди Ўзбек ойим,— ташқарингиздан Ойбодоқ қутулаёздими?
- Қутулиб қолди. Маҳалладан ҳам уч-тўртта киши айтдим, ошни кўпроқ қилиш керак.
- Хўп.

Ҳожи у ён-бу ёнга аланглаб олгандан кейин сўради.

— Ўғлинг қаёқда, кўринмайдими?

— Ташқарида эди-ку.

— Боя шу ёқقا киргандек бўлган эди.

— Гузар-пузарга чиққандир,— деди Ўзбек ойим.

Ойбодоқ ташқарини йигиштириб кирди. Ҳожи меҳмонхонага чиқиб кетди. Ўзбек ойимнинг амрича Ойбодоқ, Зайнаб ва ҳашарчи хотинлар кулча ясашта ўтиридилар.

Кун тушдан оққанда ҳамма саранжом олинган эди. Ўзбек ойим тўйга борадиган хотинлардек ясангаҳ, эгнида одими хон атлас кўйлак, бошида оқ шоҳи дақана, кўзида сурма эди. Ўзбек ойимнинг «келинни хор тутар экан демасинлар, сен ҳам ўзингни тузат!» деб айтгани учун Зайнаб ҳам тамом ипакларга кўмилиб ясанган, кеча эрга теккан янги келинлар сурагига кирган эди.

Зайнабнинг онаси — Моҳира ойим, опаси — Хушрўйбиби ва янгаси Ҳанифанисолар ҳам келишдилар. Ўзбек ойимнинг кўнгил тортар қўшниларидан Карима

отин, Шарофат чевар ва Маҳинабонулар ҳам ясаниб-тусаниб чиқдилар. Ўн ҷоғли хотин бўлишиб совутмачоқ дастурхонга ўтирищдилар. Ўзбек ойим мажлиста — марғилонлик қуданинг одамгарчиликни билишидан, Отабекни Тошкентдан уйлантиришга қарши лом-мим демай, қайтага ўзи куёви билан бирга келиб, тўйни ўтказишиб кетганидан, марғилондаги обрўсидан ва давлатидан баҳс қилиб айтар эди:

— Бечоранинг бори-йўғи пешонасидағи боласи шу бизнинг келинимиз. Отабекни ўз боласидан ҳам яхши кўриб, «ўғлим бўлса шундоғ бўлар эди-да, мендан кейин ҳамма давлатим шуники, илоҳи омон бўлсин!» дер экан.

Моҳира ойим алланучуклангани ҳолда жавоб берар эди:

— Ҳа, айланай қуда... қарс икки қўлдан чиқадир, деганлар... Бузоқ яхши бўлса икки онани эмар экан...

Қўёшнинг қиздиришидан чанги чиқиб кетган ҳовлига сув сепиб турган Ойбодоқ ташқаридағи гулдур-гулдурунни эшилди ва чопиб меҳмонлар ўтирган уйнинг даричаси ёнига келди: «Келишганга ўҳшайдилар» деди. Ўзбек ойим гапириб турган сўзини ярим йўлда қолдириб, иргиб ўрнидан турди ва меҳмонлар ҳам унга эргашдилар. Зайнаб бўзарган ҳолатда уйига югуриб кетди. Ўзбек ойим бошлиқ хотинлар ҳовли юзасидан тушдилар. Моҳира ойим қизи Хушрӯйнинг қулогига нимадир шивирлаб кулиб қўйди. Ўзбек ойим ўрта эшикка бориб етмаган ҳам эди, нариги ёқдан қўшнининг боласи югуриб кириб қолди.

— Севинчи беринг, бек буви, кеннойим келдила!

Ўзбек ойим чўнчагига қўлини солиб, беш-ўн пул олиб берди. Бола орқасидан Ҳасанали кўринди:

— Қани, ойи, кўрманани беринг-чи, мен сизнинг қочқоқ келинингизни тутиб келдим! — деди у йўлакка қараб.— Тўхтанг, тўхтанг, илгари мен севинчимниundiриб олай.

Йўлакдан Офтоб ойим кўринди. Паранжиси бошида, чашмбанди қўлида эди. Ҳасанали Ўзбек ойим билан таништириди:

— Бу киши қудачангиз — Офтоб ойим бўладилар.

Ўзбек ойим Офтоб ойим билан саломлашиб қучоқлаша кетдилар. Ўзбек ойимдан кейин бопша хотинлар унинг билан кўришиб чиқдилар. Ҳамманинг кўзи аланг-

жаланг келди. Кумушни ахтаришар эдилар. Кумуш ҳали ичкарига кирган эмас. Ўзбек ойимнинг икки кўзи йўлакда, Ҳасанали бир йўлакка ва бир Ўзбек ойимга қараб нима учундир кўзини қисиб қўяр эди. Хотинлар билан кўришиб четда турган Офтоб ойим қудаси ёнига келди: «Уялиб тургандир» деб кулди. Ўзбек ойим кулимсираб йўлак томонга:

— Ҳой пошша келин! — деди.— Бизлар кугиб қолдик-а, уялманг, болам! Ҳасаналининг кўрманаси бўлса тайё!

Ҳасанали йўлакка қараб имлади... Қип-қизарган ҳолда Кумуш кўринди: паранжиси қўлида, кора атлас кўйлак эгнида, зангор латта мурсак устида, оқ шоҳи рўмол бошида эди. Шаҳло кўзлари кулимсирашга яқин ҳолда уятли эдилар.

Ҳасанали танитди:

— Мана бу киши қайин онангиз — бек ойим бўладирлар.

Кумуш салом берди ва қўлидаги паранжисини ерга ташлади, югуриб келиб ўзини Ўзбек ойимнинг қучогига олди. Ўзбек ойим ҳам уни маҳкам сиқиб қучоқлаб олгаи, юзидан шап-шап ўпиб, айланиб-ўргилар ва тикилиб-тиклиб нима учундир йиғлар эди... Кугиб турган хотинлар, Моҳира ойим, Хушрӯй ва Ханифалар Кумушни кўрган он бир-бирларига қаравиб лабларини тишлашдилар...

Қайин она-келин бир дақиқа чамаси кўришиб қолдилар. Сўнгра Кумуш бошқалар билан бир-бир кўришиб чиқди. Ўзбек ойим ҳар бир хотинни ким бўлганини унга танитиб борди. Энг кейин орқадан Зайнаб кўринди. Чунки у уйдан энди чиқиб келган эди. Ўзбек ойим кулиб Кумушга қаради:

— Қани, ўзинг тани-чи, ким экан бу!

Кумуш ҳайрон бўлиб қолмади... ипаклар ичига ғарқ бўлган Зайнабга қараб олиб, унга томон одим ташлади:

— Зайнаб опам! — деди. Зайнаб ҳам кулимсираган ҳолда Кумушга яқинлашиб келди... Икки кундош «эсон-мисиз, омонмисиз, эсон-омон юрибсизми...» сўзлари билан озорсиз қилиб бир-бирининг елкасига ва қўлтиқ остига қўл юборищдилар. Улар кўришиб турганда йўлакдан Юсуфбек ҳожи кўриниб, қочадиган хотинлар ўзларини четга олдилар. Ҳожи уларнинг олдига —

юзага чиққач, Офтоб ойим салом бериб, рўмоли билан томоқ остларини ўраб олди. Ҳожи қудаси билан сўрашиб:

— Баракалла, синглим! Ҳайтовур чарчамай келдиларингми, мен сизларни овора қилдимов! — деб узр айтиб кулган ва уялиб борган қудачасига енгиллик беріан бўлди.

— Қани, бек отаси, кўрманани беринг-чи! — деди Ўзбек ойим Кумушни имлаб:

Кумуш уялиб зўргагина салом берди ва Юсуфбек ҳожининг яқинига келиб бўйин эгди. Ҳожи қўли билан Кумушнинг елкасига қоқиб сўйди ва Кумушнинг манглайига тегизиб олган ўз қўлини ўпди:

— Бизнинг Марғилонда ҳам шундай келинимиз бор экан-ку, биз билмай юрган эканмиз-да! — деб теварагига қараб кулинди ва қўлини дуога очди.— Бизни шунчалик сийлаб келибсизлар, бу яхшиликларингиз биздан қайтмаса, худодан қайтсан. Олло таоло ёшларга тинч ва баракатли умр берсин... Илоҳим тақаббул¹ дую...

Ҳамма дуога юз сийпащдилар. Сўнгра Юсуфбек ҳожи Кумуш билан Зайнабга қаради:

— Мен сизларнинг кўришиб турганларингизни кўриб жуда қувондим,— деди.— Бундан сўнг ҳам шу йўсинда бир-бирларингизга эгачи-сингилдек бўлмоқла-рингизни тилайман.— деди ва Ўзбек ойимга.— Қани, меҳмонларни ичкарига олинглар! — деб ўзи ташқарига бурилди.

8

ЗИМДАН АДОВАТ

Шундан кейин Ўзбек ойим олдинга тушиб, қудаси билан Кумушни уйга бошлади. Уларнинг кетидан бошқа меҳмонлар юрдилар. Ўзбек ойим йўл устидан Ойбодоққа:

— Тезроқ чойингта қара, бечораларнинг аравада ичаги узилгандир,— деди ва Офтоб ойим билан Кумушга,— мен сизлардан жуда хафаман,— деб қўйди.

¹ Тақаббул — қабул бўлсиш.

Офтоб ойим Кумушга қараниб жавоб берди:

— Айтсангиз, айтмасангиз биз жуда уятли бўлганмиз.

Уйнинг даҳлизига кирдилар. Ўзбек ойим уларни тўрга таклиф қилди:

— Қани, юқорига! — деди.

Офтоб ойим тўрга ҳаракат қиласа ҳам, Кумуш бошқа меҳмонлардан уялиб тўхтади, Ўзбек ойим уни қис-таб тушди:

— Ийманма, Кумуш отин, бугун-эрта бизга янги келинсан, учинчи кундан бошлаб сен муғомбирнинг босшингда тегирмон юргизишни ўзим яхши биламан! — деди. Офтоб ойим ва кейиндагилар кулишдилар. Яна, — ҳали сен менинг совунимга кир ювиб кўрганинг йўқ! — деб қўйди. Бу гал Кумуш ҳам кулимсираб олди.

Тўрга Офтоб ойим ва Моҳира қудачалар ўлтиридилар. Офтоб ойимнинг сўлига Кумуш, Кумушнинг ёнига Хушрўй, Моҳира ойимнинг ўнгига Ҳанифа, ундан кейин Карима отин, Шарофат чевар ва Маҳина бонулар қатор чизилишдилар. Энг оёғда Ўзбек ойимнинг ўзи ўтириди. Карима отин қўл очиб дуо қилгандан кейин, Ўзбек ойим «Хуш келибсиз» қилди. Бундан сўнг ҳамманинг кўзи иттифоқ қилгандек Кумушга тушди. Кумуш уялиб ерга қаради, бир неча вақт жим қолишиб Моҳира ойим Офтоб ойимдан сўради:

— Марғилондан ётиб келгунча ҳам жуда бир ерга еткандирсизлар?

— Унча чарчаганимиз йўқ,— деди Офтоб ойим,— ўзи Марғилондан Тошкентгача арава йўли ўн кунлик экан, биз чарчамайлик деб, секин-секин ўн икки кунда келдик.

— Йўл лойдир? — деб сўради Маҳина бону.

— Лой эмас,— деди Офтоб ойим,— йўл жуда яхши экан — икки ёқда кўм-кўк майса, қирларда лолалар; йўлнинг жуда ҳам томоша вақти экан.

Сўз навбати Ўзбек ойимга келди:

— Келмаганларингизда Отабекни энди сира ҳам юбормасликка қарор қилиб қўйган эдим,— деди,— бооо худо, ўғлим, уч йилдан бери ой сайин Марғилонга қатнаб зерикмадингми, энди улар ҳам келсин ахир, деб йўлдан тўхтатган эдим.

Кумуш Отабек исмини эшитгач, секингина кўтарилиб қўйди. Офтоб ойим Ҳасаналидан ҳамма сирни ўр-

ганиб олган, шунинг учун Ўзбек ойимнинг довдирашига тушунди:

— Юзимизга солмасангиз ҳам жуда уятли бўлганимиз,— деди.

Зайнаб дастурхон кўтариб кирди ва меҳмонларга «Хуш келибсиз» айтгандан сўнг дастурхонни ёзди. Даҳлиздан — Ойбодоқ қўлидан ясалган баркашларни олар экан, бир-икки қайта ер остидан Кумушга кўз юборди ва Кумушнинг кўзи ҳам унинг кейинги қарашнида тўқнашиб олди. Баркашлар қўйилиб бўлди. Ойбодоқ тўрт чойдиш чойни мис теглиги билан киргизиб берди. Зайнаб чойдишлар ёнига меҳмонларга чой қувиш учун ўтирди. Ўзбек ойим чиқиб борган Ойбодоқни тўхтатиб сўради:

— Қассоб келганмикин?

— Боя келган эди. Ойимлардан фотиҳа олиб берсангиз, қўйни чиқариб берар эдим.

Ўзбек ойим қудачасига қаради:

— Фотиҳа берасизми, қуда!

Офтоб ойим Моҳира ойимга қаради:

— Фотиҳа берингиз, ой!

— Қўй сизга аталган,— деди Моҳира ойим,— фотиҳа бериш сизнинг ҳаққингиз, биз бўлсак фотиҳани кўп берганимиз...

Ўзбек ойим ҳам «сиз беринг» дегандек қилиб Офтоб ойимга имлади. Офтоб ойим уялинқираб фотиҳа берди. Ойбодоқ чиққандан кейин дастурхонга қарадилар ва «олинг-олинг» билан бир-бирларини қисташга бошлидилар. Боягидек кўлчиликнинг кўзи Кумушда эди. Айниқса Ўзбек ойим сукланиб унга қарар ва томоққа қистар эди:

— Ол, болам, ол! Мен томоқдан уладиган кишини ёмон кўраман! Ёки эшикдан киришингданоқ сансирай бошлаганим учун хафа бўлдингми?

— Хафа бўлиш смас, севиндим! — деди Кумуш ва дастурхондан чўқинди.

Офтоб ойим:

— Сансирашингиз уч йилдан бери Кумушни болам деб юрганингизни бизга очиқ англатади. Айниқса, мейбунинг учун сиздан миннатдорман!

Карима отин:

— Киши ўз боласини сансирайди, бегонани ҳам сансирасин-чи.

Зайнаб:

— Мени ҳам чимилдиқдан чиқишим биланок сансираган эдилар...

Ўзбек ойим:

— Мен яқин кўрган кишимни сизсирай олмайман,— деб мақтандансимон бўлиб олди.— Ҳой Кумуш, ол, жиллақуриса анови варақидан бир-иккита ё, юрагинг узилгандир!

Кумуш узр айтди:

— Чарчадим шекилли,— деди,— иштаҳам бўғилганга ўхшайдир...

Ўзбек ойим кулди:

— Иштаҳанг бўғилган бўлса чарчаганингники эмас, эрингни соғинганингники,— деди. Бирдан ҳамма кулиб юборди. Зайнаб ҳам кулгига иштирок қилди... Аммо Кумуш юзини четта ўғирган эди. Эҳтимолки, қайин онасининг заковатига ичидан таҳсин ўқир эди.

Ўзбек ойим Офтоб ва Моҳира қудаларни дастурхонга қистади:

— Олинг, қуда, сиз, ёшларни қўя беринг, буларни йигит асраса, сиз билан мени томоқ асрайдир!

Яна кулги бошланди. Офтоб ойим ўзини тутолмай кулар эди. Кумуш ҳам очиқ кулиб, кулги орасида Зайнабга қараб олди, Зайнаб ҳам кулар эди...

Кулги босилиб тушгандан кейин, Зайнабнинг янгаси Кумушдан сўради:

— Бегингиз билан кўришмаганингизга қанча бўлди?

Кумуш даҳшатланиб онасига қаради. Офтоб ойим жавоб берди:

— Уч ой шекилли.

Хушрўй ўзининг золим кўзини ўйнатди:

— Ҳа, бўлмаса холам айтганлариdek иштаҳангиз бўғилгани ўшаники.

— Тўғри, тўғри! — дейиши хотинлар.

— Мен ўзим биламан,— деди Ўзбек ойим,— жўрттага Отабекни уч ой тўхтатиб қўйдим-ку, ахир!

Кумушнинг кўнглидан кечди: «Аниқ биласиз, жўрттага тўхтатдингиз!» Офтоб ойим кулиб жавоб берди:

— Жилла уники бўлмаса керак. Менинг ҳам иштаҳам бўғилгандек...

Ўзбек ойим эсига Отабек тушган эди:

— Ҳой, айтгандек, Отабекни кўрдингизми? — деб Офтоб ойимдан сўради:

— Йўқ!

Ўзбек ойим Зайнабга қаради:

— Ташқаридамикин?

— Йўқ, эмишлар...— деди Зайнаб.

Ўзбек ойим ажабланди:

— Боя отанг ҳам сўраган эдилар...— деди,— қаёққа кетган экан ақлсиз... Эрталаб сенга ҳеч нарса демабимиди?

Кумуш Зайнабнинг оғзига тикилди, Зайнаб ҳам унга қараб олди:

— Эрталаб мендан уст тўйларини сўраган эдилар,— деди,— мен тўйни бериб қаёққа боришларини сўраганимда, бир жойда ишим бор, деган эдилар!..

Зайнаб зимдан Кумушни чақиб олди. Кумуш лойкаби бўшашиб, Офтоб ойим ҳам оғир тортди. Зайнабнинг қариндошлари кулгансимон бир-бирларига қарашиб олдилар. Ўзбек ойим орадан ўтган сирни пайқади: «Бирорта зарур иши чиққандир»,— деди. Шу вақт даричадан Ҳасанали кўринди, қўлида бир меш қимиз кўтарган эди, даричадан туриб меҳмонларни «Хуш келибсиз» қилди ва қимизни узатиб Офтоб ойимга қараб кулади:

— Қимизни куёвингиз сизга киргизди!

Офтоб ойимнинг ҳуши ўзига келиб, Кумушнинг юзига қон югурди. Ановлар бўлса, энди булаарнинг ҳолига тушиб бўзрайишдилар.

Қимиз билан енгиллашган Ўзбек ойим Ҳасаналидан сўради:

— Қачон келди?

— Ҳозир.

— Қаёққа йўқолган экан, аҳмоқ?

Ҳасанали изоҳ берди:

— Кеча ҳожи унга иш буюрган эканлар. Билмадим, кеча нима билан овора бўлиб хизматини унугган ва бугун эрталаб эсига тушиб меҳмонлар келгунча бориб келарман, деб шунга кетган экан. Борадирган жойи узоқроқда бўлиб, кечиккан ва йўлдан кела туриб бу гуноҳига икки меш қимиз олган... Ҳали қимизни менга бериб: «Кириб айтинг, жуда уятли бўлдим, кечирсинлар», дейдир! — деди ва кулади.

Карима отин:

— Кечирилмайдир, қимиз ўзи нима деган гап,— деди.

Офтоб ойим меҳмонларга қараб чиқандан кейин Ҳасаналига кулиб жавоб берди:

— Ўзимиз жуда чўллаб келған эдик, шунинг учун кечирдик!

Балли, балли! — деди Ҳасанали.— Мен кечирганингизни чиқиб айтаман.

— Чиқиб айтинг,— деди Офтоб ойим.

— Сиз-чи? — деб сўради Ҳасанали Кумушдан.

Кумуш бақадек қотиб ўтирган Зайнабга қаради ва уялинқираб жавоб берди:

— Мен ҳам кечирдим...

— Сизнинг икки бошдан кечиришингизни ўзим ҳам билар эдим,— деди Ҳасанали. Бўғоз-қисир уй ичини кулги босди.

Кулгидан сўнг Ўзбек ойим:

— Нега ўзи кирмади? — деб сўради.

— Қайин отаси билан сўзлашиб ўлтирибдир...

Ҳасанали кетгандан кейин Ўзбек ойим Ойбодоқقا — қимизни мис тоғорага бўшатишга буюрди. Қўй сўйи-либ тайёр бўлган эди. Ўзбек ойим қудачасининг раъйи-ни сўради:

— Нима буюрасиз?

— Мендан сўраб ўлтирманг, меҳмонлар нимани хоҳласалар биз ҳам ўшангга ёрмиз.

Ўзбек ойим томоқ буюриш учун ҳовлига тушди. Зайнаб мис тоғорага ағдарилган қимизни чўмичлаб ко-саларга қуийиб меҳмонларга тутди.

ҲОЖИ ЭТАК СИЛККАН

Тўрда Мирзакарим қутидор, унинг ёнида маҳалла-нинг имоми Юнус Муҳаммад охунд, юрт оғаси Пирна-зар жаллод¹ ва Сотиболди отлиғ яна бир кекса ўтирар эдилар. Пирназар жаллоднинг ёнида Отабек ва Соти- болди аканинг қаторида Юсуфбек ҳожи эдилар. Оёғда Ҳасанали мешдан қимиз қуяр эди.

Сўз тўртинчи куни бўлиб ўтган қипчоқ қиргини ус-тида кетиб, Юсуфбек ҳожи бу тўғрида сўзлар эди.

¹ Илгари жаллодлик қилиб, ҳозирда бу касбини ташлаган, аммо жаллод лақаби қолган.

— Мен биз халқнинг одам бўлишимиздан тамом умидимни кесиб қўйдим... Эсимни таниганимдан бери амал демай, мансаб демай, фақат мусулмонлар манфаатини кўзлаб келиб, оёғида ўзини қушбеги, мингбоши олган уч-тўрт манфаатпарастлардан гўё ёш бола каби алдандим... Улулъамир бўлган киши ҳам шу манфаатпарастларнинг хароб фикрларига қулоқ бериб, биздек одамлардан бу тўғрида бир оғиз кенгаш сўрашини унудти. Ҳолбуки, Мусулмонқул балосидан уни најотга чиқаргувчиларнинг биттаси биз эдик. Натижада эрса сўзи — сўз, кенгashi — кенгаш бўлганлар шу учтўртта калла бузарлар бўлиб, бизга ўхшаганларнинг даражамиз ёш болзек алданиш экан...

Юнус Муҳаммад охунд унинг сўзини бўлди:

— Эй ҳожи,— деди,— ҳамма фасод улулъамирда, агар улулъамир дуруст одам бўлса, уч-тўртта муттаҳамнинг ёмонлиги ҳеч қаерга бормас ва бунча гуноҳсиз бечоранинг қони ўринсиз тўкилмас эди. Жаноби пайғамбари худо ҳалиси шарифларида айтадирларким, бисмиллоҳирраҳмонирраҳим, қоланнаби алайҳуссалом: «Изо виссадал амру ило ғайра аҳли фонатизирассоата», яъни ул сарвари коинот марҳамат қилурлар ким, агар бир қавмнинг иши ноаҳил одамга топширилган бўлса, бас ўшал қавмнинг қиёматини яқин бил, яъни ҳалокатига мунтазир бўл деб, бас бизнинг корларимиз ҳам кўп фурсатлардан бери ноаҳил одамларнинг қўлига қолиб ва ҳар замон ул нобакорлар бизларнинг бошимизга анвои¹ кулфатларни соладилар. Илоҳи кори бадлари ўз бошлари бирлан даф бўлгай!

— Садоқта, ё расууллло! — деди ҳожи ва ҳадисни такрорлади.— «Изо виссадал амру ило ғайра аҳли фонатизирассоата» —вой бўлсин биз бадбахтларнинг ҳолига! — деди. Бир оз маъюсланиб тўхтади ва домла тарафидан бўлинган сўзини шу гаплар билан тамомлади:

— Шу кунгача бўлмаганларга бўлишмоқчи бўлиб умримнинг ниҳоятига етиб қолдим,— деб соқолини турамлади,— бу соқол шу эл қайғусида оқарди. Бу кўнгил шу манфаатпарастлар таъсирида қорайди. Ёшим олтмиш бешга етиб бир вақт бўлсин ибодатимни жаноби ҳаққа бевосита йўналтирганимни ва кўнгил кў.

¹ А н в о и — ҳар хил, турли-туман.

им очилиб қилган саждамни хотирлай олмайман. Бу алданишими эрса, ҳақ тарафидан бир танбех, бўлмаганларга бўлишмоқчи бўлганим учун бир киноядир. Энди мундан кейинги беш кунлик умрим дунё можароларидан этак силкиб, тўшаъи охират тадорукини қилмоғим учун ғанимат кўринадир!

Бу сўз мажлиста бир маъюсият берди. Кўп вақт ҳаммалари сукутда қолдилар. Ҳожининг гапи айниқса Пирназар ақага таъсир қилган эди. У ўз ҳунари руҳида мулоҳазасини сўзлади:

— Ёмонларни битта-битта, териб-териб бош кесмасдан элни тинчтиш қийин! — деди.

Бу сўздан кейин мажлис ҳожининг оғзига қаради. Ҳожи кулиб қўйди, бир оздан кейин:

— Тўғри айтдингиз, жаллод! — деди.— Бу тақдирда ёнингизда ўтирган бизнинг ўғилни ҳам кўмагингизга чақира оласиз...

Ҳамма кулиб юборди. Қутидор ер остидан Отабекка кулимсираб қаради. Отабек дадасининг киноясига тушуниб қип-қизил лавлагидек бўлди. Яхшики, қутидор ва Ҳасаналидан бошқа ҳеч ким бу кинояга тушумас эди.

Пирназар ака жиддийча Отабекка қаради:

— Отабек менга ўхшаган жаллодгина эмас, амири лашкар бўла оладир. Сиз фотиҳа берсангиз ва Отабек амр берса, мен, худо ҳақи, ёмоннинг бошини олишдан қайтсам! — деди.

— Бизнинг каттадан-кичигимизнинг,— деди ҳожи,— топган-тутганимиз фақат бош олиш... Биз ўйлаймизки, гўё бош олиш билан олам тинчийдир ва биз ўз ҳоҳланнимизни кила оламиз. Тузук, жаллод айтганидек, ёмоннинг бошини олмоққа мен ҳам қарши эмасман ва лекин бунинг нозик шартлари бор: аввало манфаати шахсиясидан кечиб, фақат эл баҳти учун бош тикканлар жамоаси керак ва бу жамоанинг ўз маслаги йўлида кузатган маълум бир нишонаси бўлмоғи зарур. Ана шундан кейин ҳалиги нишонага қараб интилишда оёғ остига олишган чўп-хасларни супура бориш лозим. Мана шундагина тўқилган қонлар ўринли ва машруъ, берилган бошлар чин қурбон ҳисобланадирлар. Йўқса, сизнинг бош олишингиз ҳам ановларнинг қирғинидан фарқли бўлолмас! — деди ва бир оз тўхтаб олгандан кейин афсусланди.— Шу ёшга етиб бу халқ орасида

ҳалиги жамоазни уч-тўрт нафардан ортиқ учратолмадим, афсус!

Яна бирмунча гаплар ўтгандан кейин, ҳаммалари масжидга чиқиб шешинни ўқиб кириш учун қўзғалдилар. Отабек ҳам кўпчилик билан бирга қўзғалган эди. Ҳасанали уни тўхтатди:

— Сиз тўхтангиз, Отабек! — деди. Кишилар ҳовли юзига тушгандан кейин,— ичкарига бир кириб чиқмасангиз айб бўладир... Бояги ишингизни бўлса зўрга ёлғон-яшиқ билан уларнинг кўнглидан чиқардим.

Отабек ниҳоятда бўшашган ҳолда қайтиб ўрнига ўтириди:

— Майли, бўлмаса...— деди.

10

ҲАСАНАЛИНИНГ ҲИЙЛАСИ

Киши ортиқча қўрққанда ганигуб аъзоси ҳаракатсиз ва оғриқ ҳолга тушадирким, албатта буни биз қаттиқ қўрққандан деб биламиш. Дарҳақиқат бизнинг қарши мизга йўлбарс чиқса, биз қаттиқ қўрқамиш, чунки бизни ўлим кутадир, инсон учун дунёда ўлимдан қўрқинч нарса йўқ. Биноан алайҳи биз бундаги қўрқувни табиий ҳисоблаймиз. Аммо қизиги шундаким, бизни дунё баҳти кутганда, бизга саодат башорати берилганда нега биз ўлим кутгандаги ҳолга тушамиз ва узвий ташкилотимиз биринчидағи ҳолатни кечирадир.

Отабек ҳам ҳозир шу кейинги ҳолатга тушган эди. Эрта биландан бошланган бу ҳолат Ҳасаналининг кейинги сўзи билан тамом бир даҳшат касб этди ва ҳушсизларча ўтириб қолди...

Ҳасанали киргандан сўнг қилинадиган муомалани таълим берди:

— Онангиз билан Зайнаб анови можароларингиздан хабарсиздирлар, буни қайин онангиз билан келинга ҳам уқдириб қўйганман. Улар билан сўрашиб-сўзлашганингизда, гўё уч ойдан беригина кўришмаганлардек бўлингиз!

Отабек бўзариб энтиқди:

— Ул-ку осон...— деди.

— Қийини қайси?

— Шу ҷоқҷача тушунмадингизми?

Ҳасанали Отабекнинг юзига узоқ тикилиб қолди...

— Йигит эмасмисиз, эй баракалла!

— Йигитлик билан юракни тўхтатиши...

Ҳасанали ҳам ўйлаб қолди. Дарҳақиқат, Отабекнинг ҳозирги ҳоли нозик эди. Ҳасанали бир неча қайта бош қашиниб ва соқол тутамлаб ўйланди. Нихоят, ўзича куниди:

— Тўхтанг бўлмаса,— деди,— мен бир иш қилайки...

— Нима иш қилмоқчисиз?

— Сиз ҳозир сўраманг, аммо шу дақиқадан бошлаб ихтиёрингизни менга топиштиринг!

Отабек кучланиб кулди:

— Нима, ахир? — деб яна сўради.

— Сўраманг! — деди Ҳасанали.— Сиз тинчгина таҳоратингизни олиб, номозингизни ўқий беринг!

Ҳасанали шу сўзни айтиб меҳмонхонадан чиқди. Отабек Ҳасанали тарафидан тасҳир этилганидек, туриб таҳорат олди ва меҳмонхонага кириб «таробиҳ» бошлиди... Орадан ярим соат чамаси вақт ўтган эди. Ҳасанали ичкаридан чиқиб келди. Отабек эса ҳануз рукуъда, сужудда эди...

— Ўқиб бўлмадингизми? — деб сўради даричадан.

Отабек ёнига салом бермасдан унга қаради. Бу ҳолга Ҳасаналининг кулгиси қистаб келса ҳам, ўзини зўрга тўхтатди:

— Қани, мен билан юринг!

— Қаёққа юраман?

— Ичкарига.

— Тағинми?

Ҳасанали кулди:

— Энди кирсангиз бир мартаба бўладир! — деди.— Сиз... ҳозир ўрта йўлакда секингина менинг уйимга кирасиз... Хотинлар номоз ўқиб ётибдилар, сизни ҳеч ким кўрмайдир. Сиз киргандан кейин мен эшикни устингиздан ёпиб оламан-да, бир оздан сўнг олдингизга келиннинг ёлгиз ўзини киргизаман... тузукми?

— Тузук...

— Қани, туринг тезроқ!

Отабек турди. Учрашишга ҳали анчагина вақт бор. Шунинг учун унинг юраги тинчсимон эди. Ўрта йўлакка кирдилар. Олдинда борган Ҳасанали тўхтади ва уйнинг эшигини кўрсатиб «ўтинг!» деди. Отабек унинг

айтганича қилиб ўзини уйга олди. Ҳасанали Отабекни уйга киргизгандан сўнг, келиб эшикни қияроқ равишда ёпди ва даричани нариги уйдан қараганда киши кўринмаслик қилиб қийғоч очди. Шундан кейин у ўзича нимагадир кулимсираб хотинлар олдига кетди.

Отабек киргизилган Ҳасаналининг уйи Ойбодоқ она тарафидан тозагина йигиштирилиб, ўртаҳоллик кишиларнинг уйидек асбоб-жихозлар билан зийнатланган эди Деворлар ганчланган, шиплар сирланган, оёқ ости алвон гуллик кийиз билан тўшалган ва тахмонга кирпуш кўрпалар осилган эди. Отабек кавушини даҳлизга ечди-да, уй бўйича бир-икки қайта юринди ва энтикиб нафас олди. Шу вақт тахмонга осилган кирпуш ўз-ўзидан қимиirlагандек бўлди. Бу қимиirlашни Отабек пайкамади. Ҳалиги қимиirlаган кирпуш бирдан очилиб кетиб Отабек чўчиди... Бирор тахмондан унга қараб кулимсирап эди. Отабек титрар эди... Бир оздан сўнг иккиси ҳам ўзларини бирмунча тўхтатдилар-да, бир-бирларига томон юришиб келдилар ва сўзсизгина қулоқлашдилар... Отабек сунбул исли соchlардан рух олар, Кумуш гўё унинг бағрига сингиб кетган эди. Бу ҳол бир дақиқа чамаси давом этгандан кейин, бир оз ажralишган кўйи уйнинг оёғига юриб бордилар ва тизза-батизза ўтиридилар... Бириси ҳам сўзлай олмас, фақат термулишар эдилар. Неча дақиқагача шу ҳолда бўлдилар. Ниҳоят, Кумуш кулги аралаш кўзига ёш олди.

— Сиз... қочқоқсиз! — деди.

— Сиз...

— Мен?

— Сиз қувлоқсиз!

— Ажаб қиламан,— деди Кумуш ва шапалоги билан әрининг юзига секингина уриб қўйди.

— Бу ёқقا ҳам...

— У ёқقا Зайнаб урсин!

— Зайнабнинг... уришга ҳаққи йўқ!

Кумушнинг кўзида ҳалигача кўрилмаган бир шодлик ўйнади:

— Тўғри айтасизми?

— Тўғри айтаман!

— Мана бўлмаса! — деди Кумуш. Отабекнинг иккинчи юзини ҳам силагандек қилиб қўйди. Яна кулимсирашиб, термулишиб қолдилар...

— Бироннинг гамида куйиб қаридим,— деди Кумуш.

— Бекор айтасиз... Мени айтсангиз гўғри.

— Сизнimi? -- деди Кумуш.— Сиз энди қирчиллаб-сиз!

— Тўғри гапирмадингиз.

— Тўғри гапирдим.

— Аммо сиз...

— Мен?

— Кейин айтаман...

Кумуш ўпкалади:

— Айтинг ҳозир! — деди ва жоду кўзини аллақандай ҳолатга қўйди. Отабек жавоб ўрнида Кумушнинг юзидан ўпди... Кумуш ўзини қутқазиб ўрнидан турди:

— Яхши қолинг энди!

Отабек тушунолмай унга қаради:

— Нима бўлди сизга, қаёққа борасиз?

— Марғилонга...

— Бугун кеч бўлиб қолди, эртага кетарсиз!

Кумуш кулиб Отабекнинг юзига урди:

— Бизнинг овлоқда кўришганимизни,— деди,— ойим ва Ҳасанали отамдан бошқа ҳеч ким билмайдир, айниқса Зайнабингиз билса яхши эмас.

— Билса нима қиладир?

— Ҳеч нарса қилмайдир... Яхши эмас-да,— деди,— бир оздан кейин чиқиб ойим билан сўрашинг, кирмаганингиз учун қайин оналарингиз севинишниб ўлаётидилар.

Кумуш яна бир кулиб қарагандан кейин уйдан чиқди. Отабек энди тамом ўзини босиб олган, эндиги юрак уриши фақат ҳалиги фаришта томонга ошиқибтина эди. Ўзи ёлғиз қолгандан сўнг нимага бўлса илжайди ва Ҳасаналига илгаригидан ҳам қуюқроқ ўзида муҳаббат сезди. Шу дақиқадан бошлаб кечирадирган масъуд кунларини тасаввурдан ожиз ва Зайнаб тўғрисида ўйлаб ҳам қарамас, бошқа гап эсига-да келмас эди. Орадан Кумушнинг уйга кириб олиши фурсат ўтгандан кейин, уйдан чиқди ва парвосизча меҳмонлар ўтирган уйга борди. Унинг келишини ўз уйидан кўрган Зайнаб юргурганча Отабек орқасидан меҳмонлар олдига кирди. Уйдагилар Отабекни кўриш ила ўринларидан турганлар, фақат Ўзбек ойим «ҳап» этганча ўтирас эди. Отабек Офтоб ойим билан кўришди... Офтоб ойим

уни қучоқлаб юзидаң ўпди ва кўзига ёш олди... Сўнгра кичкина қайин онаси билан, Зайнабнинг опаси ва бошқалар билан сўрашиб чиқди ва кулимсираган ҳолда Кумушга «эсонмисиз...» деб қўйди. Кумуш ҳам «шукур» деб кулинди. Сўрашиш тамом бўлгандан кейин ўтиришдилар. Отабек онасининг ёнига, Зайнаб унинг ёнига ўтиришдилар. Кумуш Зайнабнинг бу қилиғига ғижиниб бир-икки қайта ер остидан унга кўз юборди.

Фотиҳа, ўқилиб куёв қайин онага узр айтди:

— Аввало сизлар келгунча қайтарман деб, эрталаб бир гуноҳ қилдим. Ўндан кейин меҳмонхонадан қўзгалимай иккинчи уятга қолдим...

Офтоб ойим:

— Боламизникини айби йўқ!

Ўзбек ойим:

— Қимиз киргузиб қайин онангнинг оғзини ҳўлламаганингда, наҳ балога қолиб эдинг, болам!

Кулишдилар. Карима отин:

— Кумушой бўлса, сен эримни яширгансан, деб Зайнабнинг энка-тенкасини чиқарди.

Яна кулги бир-бирига илашди. Зайнабнинг бояги ишига Кумушнинг ғаши келганини айтилмаса, ҳозир у ҳам жуда очилган, кулар ва ер остидан Отабекка кўз қирини ташлар, Зайнаб бўлса Кумушни таъқиб этар эди. Мажлисга бир оз жимлик киргандан сўнг, Отабек ҳам ўз томонидан бир кулги тўқимоқчи бўлиб, Зайнаб билан Кумушга қараб олди:

— Мен бир ишга ҳайронман,— деди.

— Нимага? — деб сўради Моҳира ойим.

— Нега Зайнаб семиз-у Кумуш озғин?!

Ўзбек ойим жавобланди:

— Бунинг ҳикматини мендан сўра, болам! — деди.— Кумушинг ўзингта ўхшаш серфикр кўринадир. Зайнаб бўлса менга ўхшаш қувноқ!

Отабекни ўзига ўхшатгани учун Кумуш қайин онасидан рози бўлди. Аммо Зайнаб ўзини Отабекдан четга қоққани учун Ўзбек ойимга ғижинди.

Ўзбек ойимнинг бу фикрига Карима отин қарши тушибди:

— Янглишдингиз, ойи! — деди.— Бундаги фарқни Юсуф-Зулайхо қиссаларини ўқиган киши биладир... Уч ой деган фурсат озгина вақт эмас. Кумушхонимнинг озгани соғинишнини.

Карима отин қош қўяман деб, кўз чиқараёзи, яъни Отабек билан Кумушни Юсуф-Зулайхога ўхшатиб, Зайнаб ва қариндошларини ўт ичига ташлаган эди.

— Ўзбек ойимники тўғри,— деди Моҳира ойим,— Зайнаб қувноқ, Кумуш эса менинг кўзимга ҳам серфикрга ўхшаб кўринадилар...

— Тўғри, тўғри! — деди Хушрой.

Кумуш билан Офтоб ойим орадан кечган сирга тушуниб жим ўтирап эдилар. Кумуш ер остидан Отабекка ризосизча кўз ташлади.

— Тўхтанглар-чи,— деди Отабек, ҳамма унга қарадилар,— ҳеч қайсиларингиз ҳам тополмадингиз!

— Тополмаган бўлсак ўзингиз айтинг! — деди Шарофат чевар.

— Ўзларингиз тополмагандан кейин мен айтиб нима қиласай?

— Мен топдим, хах шайтон! — деди Карима отин.— Қизил гулнинг ҳам ўз олдига, оқ гулнинг ҳам ўз олдига иси бор, демоқчи!

Ҳамма бирдан кулишиб:

— Худди, худди! — дейишдилар.

Отабек кулиб ўрнидан турди ва «тополмадингиз, тополмадингиз» деганча уйдан чиқди. Кумуш билан Офтоб ойимнинг кўнгиллари бирдек бўлса ҳам, бу кашфдан кейин Зайнаб билан Моҳира ойим анча енгиллашдилар. Бу қий-чув орқасидан меҳмонларга қуюқ-суюқ берилди.

11

КУМУШНИНГ СЎЗ ҮЙИНИ

Шомга яқин меҳмонлар тарқалишидилар. Меҳмонхонада ҳожи, Мирзакарим қутидор, Ҳасанали ва Отабек қолган эдилар.

Ичкарида Ўзбек ойим меҳмонларни кузатиб бўлиб, Кумуш билан онасидан ҳўппак олар эди.

— Мен сизлардан жуда хафа бўлган эдим. Сизларни чурик латтага туғиб, токчага ташлаш даражасига етган эдим. Наҳотки уч йил бўлса-ю, бир йўли ўз билгалингизча келмасаларингиз. Ўғлим бечора ой ўтмасдан бўзчининг мокисидек қатнаб турса... Ахир менинг ҳам

ўзимга яраша обрўйим бор, Тошкентда кимсан, Юсуф-бек ҳожи деганинг кучиман, Худоёрхон ҳам бир кун кечаси келиб бизга межмон бўлдилар... Қушбегининг уй ичлари бўлса бир ишни менинг кенгашимсиз қилмайдилар... Шундай обрў кўрган бир киши, келиб-келиб наҳотки ўз қудасидан ва келинидан мунчалик обрўсизлик кўрса. Шаҳардаги каттадан-кичик эртаю кеч қулоқ-миямни ейдирки, ҳой, марғилонлик келинингиз келдиларми, нега шундоқ келинингиз бўла туриб Марғилонга ташлаб қўйибсиз? — Мен бўлсам ҳеч сўз тополмаганимдан айтамак: — Келинимнинг онаси касал эмиш... Иккинчи вақтда: — Келиним бечора мунглуг... дейман. Энди кўрсан милтиқнинг ўқидек, пушти гулнинг тўқидек келиним бор экан... Мен бу одобсизга тагин ўзим ўлтирган уйимни бўшатиб берибман-а! — дер эди.

Ўзбек ойимнинг дали-гулилигидан Офтоб ойим ва Кумуш унга жуда ўзлашиб олганлар, унинг сўзига гоҳ кулиб, гоҳ узр айтар эдилар. Ҳозир уйда Отабек бўлмагани учунми, нимадан бўлса ҳам ҳар нучук Зайнаб ўз уйида уймаланишиб ётар ва меҳмонарни Ўзбек ойимнинг танҳо ўзига ташлаган эди.

Токчаларга шамлар ёқилиб, вақт хуфтанга яқинлашиб қолгандан сўнг уйга Отабек кирди. У киргандан кейин Офтоб ойим билан Ўзбек ойим улар олдида ўтиришни эб билмадилар-да, сирлашиш учун бошқа уйга чиқиб кетдилар. Уларнинг чиқиб кетишини кутиб тургандек, қўлига бир чойдиш чой кўтаргани ҳолда Зайнаб кирди ва Отабекдан чой ичиб-ичмасини сўради. Отабек ичмайман, деб жавоб берган эди, Кумуш орага тушди.

— Мен ичаман, ўзингиз ҳам ўлтиринг!

Зайнаб унча қистатмади, ўлтириб Кумушга чой қўйиб бера бошлади.

Кумуш уни сўзга солиб сўради:

— Менинг бало-қазодек етиб келишим учун хафа бўлгандирсиз?

Зайнаб Отабекка қараб олди:

— Нега хафа бўлай! — деди.— Сиз келмаганингизда ҳам ўzlари борар эдилар...

— Бормас эдилар! — деди Кумуш.— Мен билан уришиб келган эдилар...

Отабек Кумушга ер остидан кулиб қаради, Кумуш ҳам кулиб жавоб берди.

— Шу киши бирор билан уришадиларми? — деди Зайнаб.— Икки йилдан бери менга бир оғиз қаттиқ сўз айтганларини билмайман...

— Тўғри айтасиз,— деди Кумуш,— бу киши эмас, мен уришган эдим... Бу кишида сира гуноҳ йўқ ва аразимизга бир тўнғиз сабабчи бўлган эди!

— Ким бало экан ул? — деди Зайнаб.

— Бизнинг шаҳарнинг энг ярамаси! — деди Кумуш ва Отабекдан сўради.— Сиз эшитдингизми, яқинда ўшани бир бек ўлдирибdir?

Отабек кулимсиради:

— Эшитдим...

— Ўша бекнинг ҳақига эшитганимдан бери дуо қилиб келаман...

Зайнаб сўради:

— Сизларда қандай душманлиги бор экан?

Отабек «энди нима дейсан» дегандек қилиб Кумушга қаради. Кумуш бўлса парвосиз жавоб берди:

— Ўша тўнғиз уйланмоқчи бўлиб менинг бир ўртогимга совчи қўйиб юрар эди... Мен эрса ўртогимни унига тегищдан айнитган эдим. Айнитишим ҳалиги тўнғизнинг қулогига етиб мени бу кишига чақибdir. Бу киши бўлса нега бирорнинг ўртасига тушасан. деб мендан хафа бўлдилар...

«Бу киши» Кумушнинг ёлғон уйдиришидан кулди, Зайнаб эрса эрини оқлаб тушди:

— Айб сизда экан! — деди.— Сиз ҳам нега бирорнинг ўртасига тушасиз?

— Айб мендаликда — менда! — деди Кумуш ва Отабекка қаради.— Нафсиамрга қараганда, айб бизнинг орамизга чўп бўлиб тушган холамнинг қизи Зайнабда, шундог эмасми? — деб сўради.

Отабек сачраб Кумушга юз ўгиради:

— Бу ўртага Зайнабни келтириб нимага тиқасиз, энди?

Кумуш кулади ва эски ҳолини бузмади:

— Сиз ҳовлиқманг, бек,— деди,— тунови куни холамнига борган эдим, холам қизи Зайнабдан шикоят қилиб, ҳамма гапни Ҳомид чўчқанинг қулогига еткизувчи ўз қизи Зайнаб гумбаз бўлганини бирма-бир айтиб берди, билдингизми?

Отабек зўрға-зўрға хохолашдан ўзини тутиб қолди:

— Нима бўлганда ҳам айб сизда, нега бошда ўзингиз бу ишга аралашдингиз, ахир? — деди.

Зайнаб:

— Ўзингизнинг аралашишингиз чакки-да! — деб қўйди.

Кумуш жиддий тус олди:

— Сиз айтгандек Зайнаб гумбазда ҳам айб йўқ, менга қолса ҳамма гуноҳ бек отам билан хон ойимда! — деди.— Орзу-ҳаваслик жойни қидирмасдан қизларини бир кишига бериб қўя қолсалар — албатта, бу савдолар йўқ эди... Наҳотки икки йилдан бери неча бечорани зир қатнатиб овора қилсалар, Тошкент қишлоғи билан Марғилоннинг ораси озгина йўлми, ахир?

Отабек хоҳолаб юборди:

— Ҳамон айбни ўз бўйнингизга олмайсиз, астағфурилло...

Зайнаб Кумушдан:

— Бек отангиз билан хон ойингиз ким?

— Ҳалиги мен айтган ўртогимнинг ота-оналәри... Орзу-ҳавас қидириб бечора қизларини қаритиб қўйдилар!

— Нега сиз тайёр куёвдан ўртогингизни айнитдини?!

— Давлати бўлса ҳам ўзи тирик намойиш эди... Киши давлат учун эрга теккандан ерга тексин...

— Албатта! — деди Зайнаб.

Отабек Кумушнинг сўз ўйинига ажабланар ва ҳой шайтон дегандек унга қарап эди.

Кумуш яна тинчий олмади:

— Бизнинг уришиб қолишимиз учун Карим сандиқчининг ҳам дахли бор! — деди.

Отабек жўрттага сўради:

— Қандай дахли бўлсин. Сизга қолса, бутун шаҳар даҳлдор экан-да?

— Шошманг, жоним! — деди Кумуш.— Нега ўйламай-нетмай эшигига бош уриб келган бир йигитни қувлаб соладир?

— Астағфурилло, унинг қувланишига ҳам Ҳомид сабаб бўлган. Ҳомиднинг ёмонлигига эрса сиз сабаб бўлгансиз...

Зайнаб нимадир сўрамоқчи бўлган эди, Кумуш унга йўл бермади:

— У ҳам эмас, бу ҳам эмас,— деди,— ҳаммаси худонинг тақдирли!

Отабек:

— Ана энди тўғри айтдингиз!

Кумуш:

— Икки ўртада дум қидириб қулоқдан ҳам ажраган пучуқ ойимнинг ҳоли ҳам худонинг тақдирин!

Отабек кулди. Зайнаб кейинги сўзларга тушуна олмаган, шунга кўра Кумушдан изоҳлар олмоқчи эди. Кумуш унга изоҳлар уюстиришни хоҳламагәнликдан сўзни четга чалғитиб юборди:

— Неча ёшга кирдингиз, Зайнаб опа?

— Ўн тўққизга шекилли.

— Ҳали сиз бола экансиз,— деди Кумуш.

— Сиз нечага кирдингиз?

— Мени сўраманг, мен энди қариб қолдим...

Зайнаб унга ҳасадланиб қаради ва кучланиб айтди:

— Ҳали ёшга ўхшайсиз-ку.

— Неча ёшга кирган деб ўйлайсиз?

Зайнаб Кумушнинг тўлиб етмаган гавдасига ва ўн олти ёшлар чамали губор тегмаган ҳуснига ҳайрон бўлиб, мулоҳазасини айтишдан қўрқди. Зайнабга қолса эҳтимолки Кумуш ўзидан ҳам ёш чиқар эди.

— Мен қаёқдан билай...

— Йигирмага кирдим.

— Мендан бир ёш катта экансиз.

— Сиздан, албатта каттаман! — деди Кумуш.

Кумушнинг «албатта каттаман» деган сўзини Отабек ичидан тасдиқлади, унинг ҳуснагина эмас, ақлда ва бошқада Зайнабдан неча баравар юқорида эканини ўйлади. Орага бир неча дақиқали сўзсизлик кирди. Отабек ер остидан Кумушга нигоҳ ташлар, Зайнаб гиламнинг попугини чирмаб ниманингдир хаёлини сурар, Кумуш бўлса ҳеч кимга ҳам қарамай мудрагансимон ўтирас эди. Кумушни бу ҳолда кўриб Отабекнинг юраги ачиди...

— Йўлда чарчаган кўринасиз, Кумуш!

Зайнаб гиламдан кўзини олди, Кумуш мудрашдан чўчиди.

— Қайдам...

— Биз кетайлик, сиз тинчиб ухланг! — деди Отабек.

— Майли... Хуфтани ҳам ўқий олмайдиган ўхшайман.

— Зарари йўқ! — деди.— Ёлғиз қўрқмайсизми..
Ёнингизда Зайнаб ётсинми?

— Зайнабниса сиз билан ётсин... Мен ёлғизликка ўрганганман...

— Онангизни чақириб берайлик бўлмаса.

— Раҳмат.

— Ёлғиз ётиб қолганингизни айниқса ойим эшитса...

— Сиз билан Зайнабниса ёлғиз ётиб қолганимни айтмасангиз ҳеч ким билмайдир... Ўрин ўшами?

Зайнаб нимагадир жуда ҳам қувониб кетди. Шунинг учун бўлса керак, Кумушни ўрин ёзишга қўймай ўзи пар тўшакни олиб ерга солди. Кумуш мудраган кўйи Зайнабга ташаккур айтиб тўрдаги бурчакка ўтириб олди. Отабек бериги бурчакдан туриб уни қўли билан янар ва кулимсираб хўмраяр эди. Кумуш мудраган кўйи, сузилган кўйи илжайиб жавоб берар эди...

Ўринни солиб битиргандан кейин, Зайнаб қаноатланиб уйдан чиқмоқчи бўлган эди, уни Кумуш тўхтатди:

— Зайнабниса,— деди, Зайнаб қаради,— бу кишини ташқарига чиқиб ётишга қўйманг, тузукми?

— Нимага?

— Нимагаки, дадамнинг кўнглига гап келадир.

— Хўп! — деди Зайнаб ва эшитдингми дегандек қилиб эрига қараб олгандан кейин уйдан чиқди. Унинг кетича Кумуш Отабекка қаттиқ қилиб айтди:

— Қани, сиз ҳам уйингизга!..

Зайнаб жуда ишонган ҳолда ўз уйига бориб етди.

— Чиндан айтиб ётибман, эшитасизми?

Отабек ўзини ғафлатга солиб Кумушнинг ёнига борди:

— Сиз...

— Мен?

— Сиз қувсиз...

— Мен қув эмасман! — деди кулиб Кумуш.— Мен ҳали уришиғлик ҳолдаман, ярашганим йўқ!

— Боя нималарни сўзладингиз, сир очиладими, деб жоним бўғзимга келди.

— Нега сир очилсин? — деди.— Мен сиз билан ўтган ишлар ҳақида сўзлашмоқчи бўлиб турар эдим — ўзи жўрттага кириб келди. Мен ҳам сўзимни тўхтатмай жўрттага бошқа йўлда айтиб чиқдим. Нима, бир нарса пайқадими?

— Пайқамади-ку... шундоғ бўлса ҳам мен жуда қўрқдим.

— Ҳали шу юрагингиз билан уч кишини ўлдирединг-

изми, мен ишонмайман! — деди Кумуш ва Отабекнинг ханжар теккан қўлининг чизигига кўзи тушди.— Пи-чоқ ёмон кесибди... Чумчук сўйдингизми? Қани чиқинг, мен ётаман!

— Ёта берингиз.
— Сизнинг олдингизда ечинайми?
— Уялсангиз мен юзимни ўгириб турай! — деди ва юзини четга бурди.

— Қараманг бўлмаса! — деди Кумуш ечинар экан, «Бўлгани йўқ, бўлгани йўқ!» деган сўзни беш-олти қайта такрорлади ва ўринга кириб олгандан кейин ҳам «бўлгани йўқ, бўлгани йўқ!» деб кулар эди.

Отабек ниҳоятсиз «бўлгани йўқ»дан зерикиб қаради:

— Алдамчи!
— Бу алдашлар — алдаш эмас, сиз ҳали қараб туринг, қочқоқ!
— Аниқ қўрқмайсизми ёлғиз?
— Нега қўрқай, икки йил ёлғиз ётиб, энди жуда ўргандим... Эҳтимол сиз ёлғизлиқдан қўрқарсиз!
— Киноянгиз...
— Бу киноя эмас, тўғри сўзим,— деди Кумуш,— мен бу ҳолда ёлғиз ҳам эмасман...
— Бу нима деган сўзингиз тагин?
— Яъни ҳамроҳим бор, деганим, мендан қўрқманг, деганим...

Отабек яна тушунмади:

— Ҳамроҳингиз...
— Ҳамроҳимми? — деди Кумуш.— Ҳамроҳим бироннинг хаёли, бироннинг фикри. Бас, бундан ҳам яхши рафиқ борми? Баъзи вақтларда бу йўлдош уйқудан ҳам ширин.

Отабек «ҳамроҳ»га тушунди ва ётиб Кумушнинг юзидан ўпди:

— Лекин мен бу сўзингизга ишонмайман.
— Нега ишонмайсиз?
— Негаки, сиз анови... кечаси ҳамроҳсиз эдингиз... пиш-пиш ухлар эдингиз...

Кумуш Отабекнинг елкасига қўлини ташлади:
— Ўшал вақтларда ҳамроҳсиз ухлаганим тўғри,— деди,— чунки биронлардан бутунлай умидим кесилган, ҳамроҳим менга ҳамиша умидсизликкина берар, даҳшатимнигина ортдирар эди. Аммо ўша кунларда уйқу

менга жуда ширин бир нарса бўлиб қолган, мен уйқу-
дагина бирорларни кўрар ва қундузлари ҳам уйқу қи-
дирад эдим. Энди бўлса яна йўлдошим хаёл... Тағин
німа дейсиз?

— Ҳеч нарса демайман... Лекин сиз икки йил бурун-
ги Кумуш эмассиз.

Кумуш кўрпага бурканиб олди:

— Чиқинг... уйқум келди.

Отабек зўргагина ўрнидан турди. У узоқлашгандан
кейин Кумуш секингина юзидан кўрпани олди ва муд-
роқ кўзлари билан Отабекка кулимсираб қаради. Отабек
ҳовлидаги оёқ товушини эшитиб токчадаги шам-
лардан утасини ўчирган эди, даричадан Зайнаб кўринди:
«Ҳали ҳам шу ерда экансиз, мен сизни ташқарига
чиқсансиз, деб ўйлабман...» деди. Отабек жавоб бермай
қолган шамларни ўчириди. Зайнабнинг «ҳали ҳам шу
ерда...» сўзи билан Кумушнинг кўзи уйқудан очилиб
кетган эди... Отабек эшикни ёпиб чиқди.

12

КУНДОШ — КУНДОШДИР

Кумуш қайин отаси билан қайин онасига уч-тўрт
куннинг ичидаёқ ўзини кўрсатиб қўйди, ширин ва ақл-
ли муомалалари билан уларни ўзига мафтун қилди.
Юсуфбек ҳожи — «бу одам фарзанди эмас — фариш-
та!» дер, орада Зайнаб бўлмаса «фаришта» деб атамоқ-
қа ҳам ҳозир эди. Ўзбек ойим бўлса эски кина ва ад-
ватларни қайтиб келмас дунёсига жўнатди. Теваракдан
маргилонлик келинни кўриш учун келувчи хотинларга
муомалани яна ҳам юқорироқдан туриб қила бошлади.
Ҳар бир — «келинингиз ажабми?» деб Кумушга суқла-
нувчи хотинларга, «менинг чин келиним Маргилонда
эди-да!» — дер эди. Гоҳо Ўзбек ойимнинг ўзи ҳам Кумушнинг ҳуснига ва муомаласига ажаблана бошлар,
ҳожини овлоғроқда учратиб қолса, «алҳазар, ўғлингиз-
дан — уйланган хотинини қаранг!» деб қўяр, ҳожи бўл-
са, «ўзинг билган сеҳрчи ҳинди сенинг ҳам бошингни
айлантирибдир...» деб илжайгандা, Ўзбек ойим: «Рост,
бу келиннинг ҳуснидан ҳам бошқа яна тағин бир ало-
ҳида хосияти борга ўхшайдир!» деб кулар эди. Кумуш
ўзини кўргали келувчи хотинлардан кўпроқ олқиш

олса (албатта ошкора эмас), хотинларнинг жўнаши би-ланоқ дарров Ўзбек ойим Ойбодоқдан исириқ тутатти-риб аввало Кумушга, ундан кейин кўнгли қолмасин, деб Зайнабга солдирав, агар Отабек кўриниб қолса, уни ҳам қуруқ қолдирмас эди.

Эгасини сийлаган итига суюк ташлар, қабилидан қизлари туфайли қутидор ва Офтоб ойимлар ҳам жуда яхши иззат кўрар эдилар. Қутидор келгандан бери бир соат ҳам уйда бекор қолмай, ҳар кун Юсуфбек ҳожи-нинг муҳлисларидан бирининг уйида меҳмон ва ҳожи-нинг сұхбатидан мамнун эди. Офтоб ойимни бўлса Ўзбек ойим ўтқазгани жой топмас, қуда сўзи ўрнига — синглим деб хитоб қилас, ошни ҳам унинг раъйини сў-рамасдан буюрмас эди.

Келгандарининг ўн бешинчи кунигача шаҳарнинг казо ва казо хотинларини қабул қилиб ўткарадилар, яъни Офтоб ойим Тошкентнинг юзбоғи ойимидан тортиб, понсадбоши, қўрбоши то ўрда ойимларигача танишиб олди ва уларнинг ҳар бирларидан кутилмаган даражада иззат, ҳурмат кўрди. Бу ойимларнинг ҳар бирларидан — «албатта бизникига меҳмон бўлмасдан кетмайсиз, эгачи» деган таклифлар ҳам ҳисобсиз эди. Ўзбек ойимнинг лозим топишича, бу таклифлардан фақат ўн чоғлиги ижобат этиладиган бўлиб ва биринчи мартаба Нормуҳаммад қушбегининг хотини Сорабек ойим-никига, яъни ўрдага борилмоқчи эди.

Ўн олтинчи кун меҳмон оёғи товусланиб, Ўзбек ойим Сорабек ойимта ўзларининг боришларидан хабар юборди ва Ҳасаналига аравани қўшмоқقا буюрди. Ўрда ойимларининг турмушларини кўрмагани учун Кумушнинг ҳам улар билан бирга боргувси келди ва эрталаб чой устида Зайнабни тилга келтириб, «Зайнабнинг ҳам борадими» деб сўраганида, Ўзбек ойим: «Зайнаб бир мартаба бориш бўлса борган» деб жавоб берди.

— Мен-чи?

— Сен ҳам бормайсан.

Кумушнинг маъюсланиб қилган сукутидан кейин, Ўзбек ойим мундоғ изоҳ бериб чиқди:

— Сен Тошкентдаги Юсуфбек ҳожининг келини бўласан, болам! Чорламаган жойга бориш учун сенинг кавушинг кўчада қолган эмас! — деди.

Отабек қаёққадир от миниб кетган эди. Юсуфбек ҳожи билан қутидор Солихбек охундинг Кўкалдош

ҳужрасиға меҳмон бўлиб кетганлар. Фақат бугун уйда қоладиганлар — Кумуш, Зайнаб ва Ойбодоқ эдилар.

Ўзбек ойим йўлаккача кузатиб чиққан Кумуш билан Зайнабга қараб арава ёнидан кулди:

— Икки кундош уйни холи топиб тағин юлишманглар! Ойбодоқ, сен кундошлардан хабарсиз қолма!

Офтоб ойим аравага минар экан:

— Худой сақласин, ойи! Шукур, иккаласининг ҳам ақл-ҳуши бошида,— деди.

— Булар кундош эмас, эчаги-сингил-ку,— деди отнинг жиловидан Ҳасанали.

— Мени ташлаб кетганингиз аламини Зайнабдан олмасам — кимдан олай,— деди кулиб Кумуш ва дарбозанинг ҳалқаси билан ўйнар экан,— а, юлишамизми? — деб Зайнабдан сўради. Зайнаб жавоб бермади.

Ўзбек ойим Ойбодоқга баъзи таълимотларни бергандан кейин келинларига:

— Тушда иссигиз қолманлар! — деди. Арава қўзғалди.

Зайнаб илгарироқ, Кумуш кейинроқ ичкарига қайтиб кирдилар. Кумуш кундошининг сўзсиз-несиз ўз уйига кириб кетгани учун ўйланиб бир оз ҳовли юзида тўхтади, сўнгра бу ҳам ўз уйига бурилди.

Кундан-кунга Зайнабнинг сусайиб, ўзига бегоналашиб борганини яхши англар эди. Бугун бўлса ўйнаб айтган сўзи жавобсиз ҳам қолдирилиб, бу ҳол яна унинг миясини қотирди. Кўнглида бир хиралик билан бориб дарича ёнига ўтирди. Зайнабнинг ҳасадини қўзғатмас учун Отабек билан муомалада қилган эҳтиётлари заррача фойда бермаганига ҳайрон, энди қайси йўсинда муросани созлаш йўлларини ўйлар эди. Ўн беш кун ичидаёқ бунча кескинлашган Зайнабнинг ички адсоватининг бир ойда қайси даражаларга бориб етишини ўйлар ва муроса бу ҳолда кетган тақдирда бу уйда узоқ қола олмасини фаҳмлар эди. Лекин бу уйдан чиқиб кетишни, бир-икки сийлаб Отабекни Зайнаб қўлига топшириб қўйиши яна мувофиқ кўрмас, яъни Кумушда ҳам бир қизғончиқлик ҳисси уйғонган. Фикри шу ерга етганда қайси кунидир Отабекнинг Зайнабга бошқачароқ қилиб кулиб қарагани ва Зайнабнинг шу вақтдаги ойдек жозибали тўла юзи кўрингандек бўлди... Бу кўринишдан сўнг у сакраб ўридан турди-да, токчадаги ойнани олди ва ўзига қаради...

Маълумки, киппин ойнага боққанда нечоғлик айбсиз бўлса ҳам, ўзини бир камчилиги орқали кўрадир. Шунга ўхшаш бу қараашда Кумуш ҳам ўз-ўзидан рози қолмади. Шаҳло кўзлар, ўсиқ жингила киприклар, қундуз қош ва қора холлар ва бошқа латофатлар ўзига писанд бўлмадилар... Ўзини Зайнабга қараганда сиқиқ, ёш бола сифат кўрди... Ойнани токчага қўйиб Зайнабга чинлаб ҳасадланган ҳолда келиб бояги ўрнига ўтириди. Анчагина ўйлаб ўтиргандан кейин, кўнглига «у мени севса бўлди-да» деган гап келди... Ўзининг бу ҳукмига рози бўлмади. Гўё ўзининг севилиши бир неча ойликкига ўхшар, Зайнабнинг тўлган ойдек юзи бу севилишга шу беш-ўн куннинг ичидәёқ хотима берадигандек кўринар эди. Шу кўриниш орасида Зайнабни яна ўз кўзидан яхшилаб ўтказмакка ва унинг ҳусн кучини синамоққа қарор бериб ўрнидан турди...

Кумуш кирганда Зайнаб дарича ёнида тўппи тикиб ўтирап эди.

— Ойим айтгандек,— деди кулиб Кумуш,— сиз билан юлишгали келдим!

Зайнаб тўпписини қўйиб ўрнидан турди:

— Мен ҳам олдингизга чиқайми, деб турган эдим...

Кумуш истеҳзо билан кулди:

— Тўппи тикиб ўтирибсиз-ку, менинг олдимга чиқармидингиз, баракалла сизга! — деди. Зайнаб бир сабаб кўрсатолмай ўнгайсиз ҳолда қолди. Дарҳақиқат, унинг бу иши очиқдан-очиқ болаларча кетган эди. Кумуш уни ўнгайсиз ҳолдан чиқариш учун тикилган тўппини ердан олиб кўрган бўлди.

— Чокни яхши тикар экансиз, кимга?

— Бирорвга атаганим йўқ, ахир биттаси кияр... Ўлтилинг!

Икки кундош қаршима-қарши ўтиришдилар. Кумуш унга тикилиб-тикилиб қарап эди... Зайнаб бояги ўнгайсизликдан ҳали чиқиб етмаган, қизаринқираб ерга боққан эди. Бир-икки дақиқани сўзсиз кечирдилар.

— Чиқмаганимни ҳам кўнглингизга олибсиз-да! — деди ниҳоят Зайнаб.

— Нега кўнглимга олмай, мен ёш боламанми! — деди.— Келганимга ўн беш кун бўлмасдан ўзингизни четга торта бошладингиз... Мен сиз билан эгачи-сингил бўлармиз, деб ўйлаган эдим...

— Ҳали нима бўлибмиз... Арзимаган гапни ҳам кўнглингизга ола берсангиз...

— Бу арзимаган гапми? — деди Кумуш.— Уйда ҳеч ким йўқлигини била туриб ўзингизни четга тортасиз... Бу эса юзингни кўришга тоқатим йўқ деганингиз бўладир.

— Қўйинг-чи... Ўзингиз ҳар бир нарсани ҳам кўнглингизга ола берар экансиз... Мен унақа эмасман...

Бошланишда анчайин ҳазилга ўхшаб кўринган бу гинахонлик кутилмаган жойда жиддий бир тус олиб кетди. Кумуш ўн беш кунлардан бери йигилиб келган аччигини бирваракай тўкиб солди:

— Мен кўнглимга олсам арзийдирганини билиб оламан,— деди.

— Олдингизга чиқмаганим юзингизни кўрмаслик учун бўлганини сиз қаёқдан билдингиз, менинг ичимга кириб чиқмагандирсиз-ку, ахир?

Зайнаб ҳам анча қизишиб олди. Кумуш ундан ҳашишиб тушди:

— Билиш учун ичингизга кириб чиқишим шарт эмас... Баъзи ишларингиз ичингиздагини менга очик сўзлайдир.

— Қайси ишларим?

— Сўраманг...

— Билмаган бўлсам билдириб қўйинг, ахир!

— Айтсам яна аччигингиз қистайдир...

— Тўғри гап бўлса аччиғим сира қистамайдир.

Яқинроқда юмиш қилиб юрган Ойбодоқ эшилтмасин учун секинроқ товушда:

— Қистамаса айтай,— деди Кумуш,— эрингиз менинг олдимга кирса, нега ишингиз бўлса-бўлмаса кириб ўтириб оласиз-да, ёлғиз қолганимда кирмайсиз?

— Шундоқ деярсиз, деб турган эдим ўзим ҳам,— деди Зайнаб.— Киришимни ҳам кўнглингизга олган бўлсангиз, зиди бундан сўнг кирмаганим бўлсин...

— Қани, тўғри гапга аччиғингизнинг қистамагани?

— Ахир, эрингиз билан ёлғиз ўлтирганингизда мундан сўнг кирмайин деяпман-ку!

— Эгриликка олманг, Зайнаб! — деди Кумуш.— Мен бу гапни ёнимда эрим бўлганда кирма, деб айтмадим, балки бояги сўзимнинг исботи учун айтдим...

Бу ўринда иккиси ҳам жим бўлдилар. Ойбодоқ даричага келган эди:

— Тушлик ош вақти бўлдими, нима томоқ қилсамикин?

Кумуш Зайнабга қаради:

— Нима томоқ буюрамиз?

— Сиздан сўрайпти...

— Зайнабниса яхши кўрган томоқни қилинг! — деди Кумуш.

— Лагмон қилайми? — деб Ойбодоқ Зайнабга қаради.

— Томоққа иштаҳам йўқ, ўзингиз билганингизча қила беринг!

Ойбодоқ кетди. Унинг кети билан Зайнаб «тавба» деб қўйди.

— Тавба деманг, Зайнаб... Бу гаплар айниқса сиз билан менга келишмаса ҳам, азбаройи мени ёлгиз ташлаб қўйганингиздан айтдим... Мен сизнинг уйингизга бутун умрга келган эмасман... Атиги уч-тўрт кун қайин ота, қайин оналаримни кўриб кетиш учунгина келгандман. Шунчаликка бир-биrimиздан четлашиб, мунғайишиб юришимиз кишига оғир келар экан.

Кумушнинг «уч-тўрт куни...» билан Зайнаб ёришиб кетгандек бўлди:

— Вой ўлай, Кумуш опа! — деди Зайнаб бўшашган оҳангда.— Чиндан ҳам қўнглингизга олибсиз дейман. Кўнглимда тариқдек ёмонлик бўлса, эртагача етмайин! — «Кетиш» сўзини эщитиб онт ича бошлаган Зайнабга Кумуш ичдан кулиб қўйди ва «энди ўлсам ҳам кетмай, сен қараб тур!» деб янди.

Шундан кейин орадаги гап-сўз тўхтагандек бўлди. Кумуш тиззасини қучоқлаб ниманидир хаёлида, Зайнаб бўлса қатимини узун тортиб тўпписини тикар эди. Анчагина шу ҳолатда қатим тортгандан сўнг Зайнаб секингина қаршисидаги ғайри расмий ёвга ёвларча қаради. Узоққина қараб тургандан кейин ўзига ҳам сездирмаслик қилиб энтиқди, яна уч-тўрт қатим тортди...

— Сиз мунчалик қўрқмасангиз ҳам бўлар эди...

Кумуш бир оз жавобсиз қолди ва сурилиб деворга суялди:

— Нимадан ҳам қўрқмасам бўлар эди?

— Ахир... жек қўрмасангиз ҳам... дейман-да...

— Мен кимни жек кўрибман?

— Биларсиз ахир, кимни...

— Уят, Зайнаб!

— Сизники ҳам уят!

Яна икки кундош ҳужумга ҳозирлашган хўрозлар-дек бир-бирларининг устларига ҳурпайишдилар.

— Нимам уят? — деб сўради Кумуш.

— Мен эрим билан ўлтирганда устимга кирма дейи-шингиз, албагта уят!

— Аввало мен бу сўзни сизнинг ҳалиги қилигини изга қарши айтдим. Агар сиз бўни чинга ҳисоблаган бўлсангиз, мен ҳам сиздан чин-ча сўрайин: сиз эрингиз билан ўлтирганда мен устингизга кирдимми?

Зайнаб бу саволнинг жавобига қолганда бир оз тутилиқди. Чунки, Отабек Зайнаб ёнида бўлганда Кумушнинг кирганини хотирлай олмади.

— Сиз кирсангиз, албатта кўкрагингиздан итармас эдим,— деди Зайнаб.— Ўзингиз жек кўрганингиз учун мени ҳам ўзингиздек фаҳмлаб кирмайсиз.

— Кишини бўгасиз, Зайнаб! Гапга темирчилик яхши эмас!

— Гапга темирчиликдан худой сақласин, ота-онам темирчи ўтган эмас.

— Ким сизга, отанг темирчи деяпти?

— Ахир, сўзини изнинг сираси шунга келди-да?

— Тавба,— деб кулди Кумуш,— жек кўрасан деб бир айтасиз, ўзингдек фаҳмлайсан деб яна узиб улайсиз, сен қўрқмасанг ҳам бўлади деб тағин нина тақа-сиз... Мана шуни гапга темирчи, деб айтадилар!

— Рост-да, ахир, сиз қўрқмасангиз ҳам...

— Сўзлай беринг!

— Ахир...

Зайнаб ўзининг хатосини англади ва гапиролмай тулдиради. Кумуш эса буни сезиб, Зайнабнинг ўз оғзи-дан иқорот эттириш кўйига тушди.

— Мен тушундим! — деди.— Сен қўрқмасанг ҳам бўлади, эринг сени яхши қўради, демоқчисиз!

Зайнаб ишини тўхтатиб бўзрайганча Кумушга қараб қолди... Бу хатосини ўнглаш учун эсига ҳеч гап келмас эди:

— Ахир... менга ўхшаш сизни ҳам ишонтириб қўй-гандирлар...

— Сизни нимага ишонтирганлар?

— Ахир... Мен сенсиз туролмайман, деб сизга ҳам айтгандирлар...

— Ҳеч!

— Сизга айтмаган бўлсалар... менга юз қайталаб айтганлар... У кишини сизга ҳам шунақалар, деб ўйлабман...

Ўзи асло ишонмаган шунча ёлгон гапларни бояги довдираш ҳолатида илҳом равища тўқиб юборди. Унинг бу довдир гаплари ғалаба қозонмоқчи бўлган Кумушни довдиратди. Бояги ойна ёнида тугилган шубҳаси чинга чиққандек бўлди ва муҳокама хусусиятини йўқотди. Зайнаб тўгри айтади, деб ўйлади, агар уни яхши кўрмаганда Тошкентга келишимни кутиб ўлти-рармиди?..

Зайнаб бу ёлғонлаш натижасидан қўрқиб, ўнгу терс ишига ёпишди. Кумуш моддий ҳаётидан айрилган жонивордек бўшащди. Ойбодоқ она тарафидан икки кундош ўртасига қўйилган тушлик бир неча вақт совуб ётди. Зайнабнинг қўрқа-писа «олинг, опа!» сидан сўнг, икки тараф ҳам лагандан чимчиган бўлишдилар-да, бирин-бирин қўлни дастурхон четига артишдилар...

Шундан бирор соат кейин Отабек қайтиб Зайнаб томснidan қарши олинди. Уст тўнини ечиб Зайнабга бергандан сўнг, қайси уйга кириш тўғрисида ҳовли юзасида бир оз тараддусланиб қолди. Теварагида ғилдирлаб юрган Зайнабнинг уйига кира бериш учун Кумушнинг мулоҳазасини қилар, Кумушнинг олдига кирмак учун Зайнабни ўйлар эди. Кумуш уйда кўринмади, шунга кўра «ухлагандир» деб ўйлаб Зайнаб билан кирди. Зайнаб оёғи олти, қўли етти бўлган ҳолда эрини тўрт қават кўрпача устига ўтқазиб, ёнига учта пар ёстиқни уйди. Эрининг маҳсисини артишга кўмаклашиб, еллиб қўймоқ учун изин сўради. Отабек узр айтиб бунчалик меҳрибончилик маъносидан чўчиб қўйди. Отда келган бўлса ҳам куннинг иссиқлигидан бир пиёла чойга муҳтож эди. Чой, сўзи оғзидан чиқмасданоқ Зайнаб ўчоқ бошига югуриб кетди. Унинг кети билан Кумушнинг уйига қаради. Эшик ва даричалар очиқ бўлсалар ҳам, уйда бирор кўринмади.

Кумуш келгандан бери Отабек кун сайин ўзини сиқиқроқ бир доирага кириб борганилигини сезар эди. Одимини санаб босиш, бир чўқиб саккиз ёққа қарашиб каби эҳтиётларга таълимотсизоқ ўрганиб қолган, бунинг устига бир хил ўнғайсизлиги ҳам йўқ эмас эди...

Унинг ўтган кунлари, яъни Кумушга Марғилонда муомала ва алоқаси Зайнабга қоронгу, шу қоронғулиқдан фойдаланиб Зайнаб билан муомаласи ўзи тилаганча, аммо энди ўша ҳолатни давом эттириш мумкин эмас эди. Кумушга кулиб қараса, Зайнабга ҳам шундай қилмоқча, унга қандоғ муомала қилса, бунга ҳам шундоғ қилишга мажбур эди. Бироқ бунинг биринчиси юракдан, иккинчиси... Биринчисини тавсиф қилиб кўрсатиш нуҷукким биз шу ўрингача кўп қофозларни қоралаб келамиз, ўқувчини ҳам зериктирмай орқамиздан эргаштиргандек бўламиз, чунки Отабек ва Кумуш ишқларида самимият, яна тўғри — шеърият бор эди. Иккинчи масала устига ўтиб таҳлил қилмоқчи бўлсак, Отабекда мажбуриятдан бошқа ҳеч гап тополмаймиз, топган билан ўқувчига қизиқарли бир нарса чиқмайди. Қахрамонимизнинг ҳозирги «мажбурияти» сабабларини мұхтарам ўқувчилар яхши ҳис этсалар ҳам яна биз бир даража ўз томонимиздан уларни санаб кўрсатамиз:

Ота-онанинг ҳурматлари кўндаланг, мажбуриятнинг энг кучлиги ҳам нозиги — мундан бир неча ҳафта илгари Зайнаб аввал мартаба юрак дардини — кўз ёшлиари ичида — очиб берди. Ҳаммадан ҳам мана шу кейингиси Отабекни сиқиб ташлаган эди. Бу дард айниқса, Отабекка уч йилдан бери синашта, у бу дардининг аччиқ-чучугини уч йил бўйи тотиб келар ва шунинг учун ҳам бояги оғирликни ўз устига олмоқча мажбур эди...

Зайнаб унга икки пиёла чойни ичиргандан сўнг сўради:

— Сизни кеч қайтарсиз деб ош қолдирмаган эдик. Совуқроқ бўлса ҳам озроқ олиб қўйган эдим... есангиз?

Отабек очиқиб келган эди, «майли, беринг» деди. Бояги гап билан ейилмаган лағмон Отабекнинг олдига келди. Устидаги қиймаси билан лаганинг бузилмаганини кўриб Отабек сўради:

— Ўзларинг емадиларингми?

— Едик, Кумуш опам ҳам шу ерда эдилар... Лағмонни унча хушламас эканлар, шекилли, яхши емадилар... У киши емаганларидан кейин мен ҳам еб ўтиргали иймандим...

— Емаган бўлсангиз, сиз ҳам олишинг! — деди бек.

Зайнаб эридан — ийманмай биргалаши. Хўрак ораси Отабек Зайнабдан сўраб, Кумушнинг ухлаб ётганини билди. Томоқдан кейин Отабек ҳам бир оз ухлаб олиш учун ётди. Кўзи уйқуга боргач, фақат шуни кутиб ўтирган Зайнаб қўлида елпигичи билан ёстиқ ёнига келди. Эри жуда ухлаб кетгандан сўнг елпий бошлади... Елпир экан, Зайнабнинг кўзи Кумушнинг уйида эди...

Зайнаб ўзининг бу тасодифий муваффақиятини кундош назаридан ўтказиб олмоқчи ва бояги даъвосини бир даража амалда кўрсатмоқчи эди.

Зайнаб шу ҳолда узоқ фурсат эрини елпиди ва натижада маълум кўрикни одатдан ташқари бир муваффақият ичида кундош назаридан ўтказди: нима юмиш биландир уйдан чиққан Кумуш Отабекнинг ёстиғи ёнида қўлига елпигич ушлаган Зайнабга кўз қирини ташлаб ўтди.

Бирор соатдан кейин Отабек уйғонди. Зайнаб ҳам кундош юрагини ун қилувчи тегирмонни тўхтатмоққа мажбур бўлди.

Отабек уйга кирганда ёстиқ бетини тартибсиз соч ўримлари билан чулғатиб Кумуш ухлар эди. Отабек бир неча дақиқа унинг уйқулик ҳолатига термулиб қолди ва унга роҳатсизлик бермас учун секингина орқасига қайтди. Ўз эшигидан чиқар чогида яна бир қараб олди... Энди уйқулик кўз очилган эди.

— Тинч ухлай беринг, мен кетаман!

Кумуш кўз юмиш ўрнига ёстиқдан бошини узди ва ерга тушган рўмолини ўраб, ўтириди. Унинг кўзи уйқудан қолган кишиларнинг кўзидек қизарган эди. Отабек қайтиб кирди.

— Нега қўзғалдингиз, ухланг! — деди. Кумуш жавоб бермади, қовоғи солиғ эди.— Кўзингиз қизарип кетибди, ухлай олмадингизми?

— Тобим йўқ...

— Худой сақласин,— деди бек ва Кумуш ёнига ўтириди,— қаерингиз оғрийдир?

— Билмайман,— деди. Кўзи токчадаги алланарсаларда эди.

Отабек бу терс жавобни ҳазил фаҳмлаб кулди ва Кумушнинг манглайига қўлини тегизди:

— Нега билмайсиз?

— Қўлингизни олинг!

— Нега олай?

— Мендан хазар лозим...

— Сиздан хазар қилмайман...

Кумушнинг кўзида бир турли ғилтилаш бор эди:

— Зайнабдан-чи? — деб сўради.

Отабек дафъатан жавоб беролмай ҳовли томонга қараб қўйди:

— Буни... мендан ҳам сиз яхши биласиз!

Отабекнинг аланглаб жавоб бериши Зайнабнинг бояги даъвосини чинга чиқаргандек бўлиб, Кумуш жуда ҳам тўнини тескари кийди ва юзини четга бурди:

— Ялҳакликни қўйинг!

Отабек бу ҳолга тушунолмай, Кумушнинг кўзига жиқ тўлган ёш яна уни шошириб қўйди. Шундоғ ҳам бўлса кулимсираб:

— Уйқудан сўл ёнингиз билан турибсиз! — деди.

— Чунки менинг ўнг ёним билан турғизадирган кишим йўқ...

— Адоват шунинг учунми, ҳали? — деди бек ва кулиб юборди.

Кумуш кўз ёшисини артди:

— Ҳа, шунинг учун.

— Шунинг учун бўлса арзимайди...

Кумуш кўтарилиб кетди:

— Икки юзламалигингиз ва тил тагида тил сақлаганингиз ҳам арзитмайдими?

— Тушунмай ётибман...

— Албатта тушунмайсиз ва тушунишни ҳам тила-майсиз.

У Кумушдан бундай терс гапларни умрида биринчи мартаба эшитар эди. Бир онда неча хил эҳтимолларни ўйлаб чиқди:

— Зайнаб сизга бир нарса дедими?

— Деди, «Сенсиз туролмайман» деб айтган сўзларингизни ҳам деди!

Унга нима бўлса ҳам икки кундош ўртасидан анча гаплар ўтгани бир даража маълум бўлиб, Зайнабнинг ёлғон-яшиқ гаплар билан Кумуш юрагига ўт ёққанини пайқади. Аммо бояги ярим жиддий вазиятини бузмай сўради:

— Зайнабнинг сўзига сиз ишондингиз?

— Ишонмайдирган гапми?

— Яхши, мен унга шундай деб айтган ҳам бўлайин, лёкин шунда ҳам сизнинг хафаланишингиз менга қириқ туоладир. Айниқса сиздан бу гап...

Кумуш индамади. Отабек унинг орқа сочидан тутиб секингина ерга босди:

— Қани гапирингчи менга, орангиздан бир гап ўтдими? — деб сўради.

— Ҳа, ўтди! — деди Кумуш ва четта қараб кулимсиради.

— Ўн беш кун бўлмасдан?!

— Мендан бошқа хотин бўлса Зайнабингиз билан биринчи кунданоқ аразлашар эди...

— Худо хайрингизни берсин...

— Кесатманг!

— Кесатмасам, гапиринг!

Кумушнинг рақобат ўти бир оз ўча тушган эди, уч-тўрт кунлик можародан яхшигина ҳасрат очилди. Отабек ҳасратни ярим жиддий тинглаб борди. Зайнабинг кейинги сўзи ва сўнгги елпитиш фожиалари ҳам ҳасрат қолипига бирма-бир кириб чиқди. Ҳасрат тугалгандан сўнг Отабекнинг юзидағи бояги ярим жиддийлик кетиб, унинг ўрнини ўйчанлик олди. У шу ҳолатда анчагина сўзсиз қолди ва охирда ўзидан натижа кутиб ўтирувчи Кумушга қараб кулиб қўйди.

— Нега куласиз?

— Чунки йигламоққа арзимайдир.

Кумушнинг қошлиари чимирилди:

— Зайнабингизнинг бу қилиғига мен чидолмайман!

— Чидаш ва чидамасни ҳозирча бир тарафга қўйиб турайлик,— деди Отабек,— аммо ҳаммадан илгари сиздан сўрайман: менга ишончингиз борми?

— Бор, ҳам йўқ! — деди Кумуш ва кулимсираб бир оз ўйланиб олди.— Зайнабинг ҳалигидек гаплари кишини шубҳага солар экан ..

-- Аммо сизни шубҳадан чиқарадиган ҳужжатларингиз албатта йўқ эмас эди.

Кумуш ўйлаганиамо юзини четта бурди. Отабек товушини секинлатиб давом этди:

— Ўтган кун сиздан «Тошкентда қоласизми, йўқми?» деб сўраганим ҳам фақат шунга ўхшаш гаплар билан сиз хафаланманг, деб айтилган эди. Агафда сиз сиқилар экансиз, ҳали ҳам Тошкентда қолмаслигингиз

менга маъқул кўринадир. Чунки мен сизни шунинг сингари ўринсиз озор чекишингизни хоҳламайман!

— Сиз қувламасангиз мен Марғилонга бормайман! Отабек кулди:

— Агар сиз шунга ўхшаш арзимаган гаплар учун менинг устимга ҳужум қила берсангиз албатта қувлайман!

Кумуш бир хил ўпкалаган боқища:

— Сизга ишонсам бўладими? — деб сўради.

— Юрагингиздан сўранг!

— Юрагим... Юрагим ишонма, дейди.

— Бўлмаса бу юрак сўзи эмас.

— Албатта, юрак сўзи!

— Юрагингизнинг ишонма, дейишга бирор важи бордир?

— Бор.

— Бўлса айтинг.

— Юрагим: қувланишга ким сазовор, деб сиздан сўрайди... Сиз ҳам ўз юрагингиздан олиб жавоб беринг!

Отабек мақсадга тушунди, дафъатан жавоб беришга ҳайрон бўлиб қолди. Дарҳақиқат, Кумуш энг нозик жойдан ушлаган эди.

Кумуш Отабекдан жавоб кутиб ўтирмаи, яна деди:

— Бошқалар юрагини синаб кўришга қудратим етмаса ҳам, менинг юрагим икки нарсани ўз ичига сиғдира олмайдир...

— Сенинг юрагинг икки нарсани ўз ичига сиғдира дир, демоқчисиз!

— Демоқчи эмасман,— деди Кумуш,— чунки бу ҳеч бир вақт бўладиган гап эмас.

Кумуш ҳамон юқорида айтилган бир маънонигина ифода қилмоқчи бўлар эди. Аммо Отабек Кумушнинг тўсиндан ўзгариб кетган характер қатъиятига ва бир кундаёқ бунчалик масофани ўтган кескинликка жуда таажжубда! Қархисидагининг суратида эмас, сифатида қизиқ бир ўзгариш кўрар эди.

— Мақсадингизга яхши тушунаман,— деди охирида,— ҳар жиҳатдан қаралганда ҳам сиз бу тўғрида ҳақлисиз. Аммо ўшангача... балки буни ўзингиз ҳис этарсиз, деб ўйлайман...

Кумуш индамай қўйди. Эҳтимолки, у кейинги масала тўғрисида эрининг фикрини билиб қўймоқчи эди...

Тошкентга келишнинг йигирманчи кунидан қутидор Марғилонга қайтиш фикрига тушди. Ҳожи ва Отабеклар яна бир неча ҳафта қолишга қистасалар ҳам, бўлмай узр айтди: «Уй ёлғиз, фақат Тўйбека билан Ойша она; ҳоллари нима кечди, нима қўйди, маълум эмас. Бошқа тарафдан ўзимнинг савдо ишларим ҳам ўлдажўлда, шунчалик меҳмон бўлдик... бас. Қилган иззат ва икромларингиз учун раҳмат!» деди. Ҳожининг: «энди келин болани юбормаймиз-да», деб қулишига: «Менинг болам эмас — сизники, у ер ҳам, бу ер ҳам ўзининг уйи. Жанобингиз нимани мувофиқ кўрсалар, менга ҳам маъқули ўша!» деди. Ҳожи бирмунча гап айлантириб: «Ўртадан анови гаплар ўтмаган бўлса эди, албатта бу ерда олиб қолмас, зероки, сизнинг бағриңизни бўш қўйиш инсофдан бўлмас эди. Агар сизга оғир тушмаса юртдаги гап-сўз босилгунча бирор йил Тошкентда турсин, сўнгра Марғилон борсин, дердим!» — деди. Қутидорга ҳам бу мулоҳаза жуда маъқул тушиб: «бу мулоҳазалар беандоза тўғри, албатта мунда бирор йил туриши лозим ва лобид!» — деб жавоб берди.

Кумушнинг Тошкентда қолишига отаси шундай ёввош қаради, бу тўғрида Офтоб ойимнинг фикр ва ризолиги билан ҳисоблашиш эмас, ҳатто уни кўнглига ҳам келтириб кўрмади. Ҳолбуки Марғилондан чиқишида Офтоб ойимнинг «Кумушни Тошкентда қолдирмай-сиз!» деб қўйган биринчи шартига қайта-қайта қўл қўйгувчи шу қутидор эди. Сўзни чўзмоқча ҳожат йўқ: эрларимизнинг Офтоб ойимларга қараши ҳамиша шундан бошқа эмас!

Қайтиш хабари Офтоб ойим қулогига етишгандан кейин, унинг аввалги учрашиши қизи билан эди. Чунки эрига қараганда ҳам кўпроқ ихтиёрни қизида бўлганини яхши билар эди.

Шу хабарни Ҳасаналидан эшитиши ила тўғри Кумушнинг ёнига кирди:

— Кумуш,— деди кулимсираб,— қайтар эмишмиз, даданг айтибдилар!

Кумуш қўлида нимадир тикиб ўтирган эди. Кўзини ишдан олмади:

— Қайтсаларингиз, хайр-хўш!

Бечора она қизининг лоуболи¹ бу гапидан бўшашиб кетди ва не зайдада ўтириб олганини билмади:

— Нима дейсан?

Кумуш илжайиб онасига қараб қўйди, яна ишини тика берди:

— Кетсаларингиз, хайр-хўш!

— Сен-чи?

— Мен қоламан.

Офтоб тушунолмай қизига бир неча вақт тикилиб туради, Кумуш унга қарамай, нина санчар эди.

— Ҳазилингни қўй!

— Ҳазилим эмас — чиним.

— Уят эмасми?

Кумуш кулди:

— Нега уят бўлсин?

— Қўй-чи!

— Колсам ўз эримники,— деди Кумуш,— бегона эмаски уят бўлса...

Офтоб ойим ўт ичида қолгандек тобланди:

— Бирор қол, демаса ҳам қола берасанми?

Кумуш ишини ёнига қўйиб энди онасига қаради:

— Аввало бу ерда қолишимга сиздан бошқа ҳеч бир қарши киши йўқ, Зайнаб сизнинг ёнингизга ўтса ҳам, бироқ унинг хоҳишининг менга аҳамияти йўқ!

— Эсинг ўзингдами, бола?

— Ўзимда,— деди кулиб,— мен сизнинг қизингиз Кумуш... Ҳозир Тошкентда ўз эримнида ўлтирибман...

— Эрим, деб туқдан онангдан кечасанми, юзиз?

— Йўқ, кечмайман, фақат бир неча вақт соғинибгина юраман.

Офтоб ойим қизининг бу гапини эшитиб йиғлаб юборди:

— Онангнинг ўша соғинишга тоқати йўқ,— деди,— мен сени кундошлик уйга ишонмайман...

— Кундошим битта бўлса, дўстларим саккизта!

Офтоб ойим кўз ёшини артди:

— Кундош билан ҳазил ўйнама, қизим!

Кумуш гўё Зайнаб устига ҳужум ясадигандек ҳурпайди:

¹ Лоуболи — бепарво.

- Ул кундош бўлганда, мен кундош эмасми?
- Минг қилганда ҳам,— деди онаси,— сен чин кундош бўлолмайсан!
- Нимага?
- Нимагаки, эринг сен тарафда, чин кундошлик ва чин душманлик Зайнаб тарафда!
- Кумуш кулимсираб онасининг қулогига шивирлади:
- Бу тўғридан хотиржам бўлинг.
- Нима учун хотиржам бўлай?
- Агар Зайнаб менга кундошлик қила берса, куёвингиз унинг жавобини бермакчи... Шунинг учун ҳам менинг бу ерда қўшишим маъқул.
- Жавобини берса, қайтиб келишлик қочмас...
- Мен кетсам,— деди Кумуш,— ҳеч қачон Зайнабга жавоб бермайдир.
- Нега бермайдир?
- Шунинг учунки қудачангиз келинсиз қоламан деб орага тушадир, аммо мен шу ерда бўлсам, албатта тилига калтак келадир.
- Офтоб ойим ҳамон оёқ узатмади, қизига ялиниб кўрди:
- Ёш жонинг бор, қизим,— деди,— бирорга ёмонлик соғинма, мен билан бирга кет, нима қилишса ўзлук-ўзи қилишсин... Зайнаб ҳам умид билан бир ёстиққа бош қўйган.
- Сиз тушунмай ётибсиз! — деди Кумуш ва эшикдан оёқ товушини сезиб гапни шу ерда тўхтатди. Ўзбек ойим сўзланиб кирди:
- Нега мунча шошмоқ, ёв қувладими, ақалли бир ой бўлсин... Марғилон деган юртдан от отлаб, тую қумлаб кел эмиш-да, бир ойгина турмай кет эмиш! — Офтоб ойим билан Кумуш унинг ҳурматига ўринларидан турдилар. Ўзбек ойим ўгирап-ўтирмас сўзлади.— Ҳали эшитдингларми?
- Эшитдик,— деди Офтоб ойим,— биз ҳам шунинг можаросида эдик.
- Ахир, шу ҳам гапми, худди аллакимларга ўхшаб!
- Офтоб ойим узр айтди:
- Уйимиз ёлғиз, шунчалик сизларни озор чекдирдик... Бегона кишиникида ҳам йигирма кун турайликчи... Худди ўз уйимиздек яйраб-яшнадик, шарофатларингиз соясида кўп кишилар билан танишдик, иззатикромларингиз таърифидан ожизмиз... Энди навбат

сизларнинг ҳам бизнинг шаҳарларга боришли рингизга келди!

— Бекор гап,— деди Ўзбек ойим,— ҳали қудаларимизни муддаодагидек сийлай олганимиз йўқ, шу ҳолда жўнатсанак, бизнинг шаънимизга яхши эмас... Мен қудамнинг олдига чиқаман, бизга номус келтиримоқчи бўлса, эртага жўнай берсин!

Офтоб ойим такрор узр айтди:

— Бизни уялтиromoқчи бўлсангиз майли, чиқинг, агар хурсандлигимизга қарасангиз, қўйинг! Кумушингиз ҳам, шунча турганимиз бас, энди Зайнабни олиб ойимнинг ўзлари бизниги борсинлар, дейди...

Кетиши орасига Кумуш ҳам келтирилиб сиқилгач, Ўзбек ойимнинг ҳалиги одамгарчилклари кейинги навбатга қолди.

— Ҳали Кумуш ҳам кетмоқчими?

Кумуш қулимсираб онасига қаради. Офтоб ойим узр айтди:

— Шукур, сизнинг олдингизда Зайнабниса бор. Менинг бўлса қанот-қуйругим шу Кумуш. Айниқса, Кумушингизга жавоб бермасангиз бўлмас, ойи!

Ўзбек ойим Кумушга хўмрайиб олди:

— Йўқ, йўқ, Офтоббону,— деди,— сизларга жавоб берсан-да Кумушга йўқ!

— Шу галча жавоб берасиз, мен сиздан сўрайман.

— Сўзингиз ерда қоладир, був Офтоб, бир оз андиша ҳам лозим! — деди ва Кумушга юзини ўғирди.— Уят эмасми, келин? Кечакелдинг сурилиб, бугун кетгин бурилиб!

— Менда ихтиёр йўқ, ойижон! — деди Кумуш.— Сизлар нимани маъқул кўрсаларингиз менга барибир.

Ўзбек ойим боши билан келинига ризолик билдириб, «баракалла» деб қўйди. Офтоб ойим қизига ўқрайинқираб ер тегидан қаради:

— Албатта Кумуш нима ҳам десин? — деди,— Кумушнинг ҳам ҳалигидек қололмаслиги фақат мени кўзи қиймагани учун... бўлмаса, албатта кетмас эди!

Ўзбек ойим бир гапдан тоймай, «кетиши уят, Отабек уч йил қатнаганда қизингиз бир йилгина Тошкентда турса нима қипти...» каби сўzlари ўзгаришсиз бир мақомда айтилиб тургандан кейин, Офтоб ойим бошقا йўл тутмоқчи бўлиб, Кумушни уйдан чиқиб туришга буюрди. Кумуш чиққандан сўнг:

— Қизини менга қолдиришга аяди деманг, ойи! — деб қўйди.— Мунда бошқа мулоҳазалар ҳам йўқ эмас...
— Айтинг.

— Айтсам шуки,— деди бечора она,— Кумушингизнинг феъли-автори ўзимга маълум: эрка ўсган, лафзи тез, кундошликка чидайдирган сиёки йўқ, ҳар кун Зайнабингиз билан гиди-биди қила бериб сизни қийнаб қўярмикин дейман... Бир куни келганда онаси қургур бир оғиз айтмаган эди, деб мендан ранжирмикинсиз дейман... Тана бузоқнинг турқи туққанига тамға деганлариdek, албатта менга равшан... Аразчи десангиз ҳам шу, ичи қоралик десангиз ҳам шунда...

Шунча тўқимадан Ўзбек ойимнинг юзида ҳеч бир ўзгариш сезилмади:

— Албатта унаقا гап ҳар кимда ҳам бўлади,— деди,— шукур мен билан ҳожи отангизтирик бўлсак, ундоғ гапларга йўл қўймаймиз. Зайнаб бўлса худонинг яратган махлуқи: уриш ва араз деган гапни билмайдир!

— Зайнабингизнинг феъли албатта сизга маълум экан, аммо мен Кумушни сизга яхши, деб айтолмайдан.

— Ўз боласини ёмонлагувчини,— деди кулиб Ўзбек ойим,— мен ўз умримда биринчи марта кўрдим... Ундан кўра боламни сенга ишонмайман, деб айтинг!

— Нега ишонмайин, фақат қозонимдагини сизга субз қўйдим...

— Нима бўлганда ҳам Кумушга жавоб йўқ!

— Хўп, қолсин! — деди Офтоб ойим, жони куйиб асабийлашган эди.— Кумушдан ҳарна ёмонлик кўрсангиз, мендан ўпка қилманг.

— Қизингизга ёмонликни ўзингиз ўргатиб кетмасангиз, сиздан ўпкам йўқ.

Икки қуда ҳовли юзасига тушганда Кумуш саҳн бўйлаб юриб турар эди. Улар Зайнабнинг уйига тўғри кирдилар. Зайнаб уларни қаршилаб ўтқазди ва ачиниш оҳангиди Офтоб ойимга деди:

— Қайтар эмишсизлар, деб эшитдим. Бирор ой ҳам турмас экансизлар-да.

— Анча турдик айланай, був Зайнаб,— деди Офтоб ойим,— энди навбат сизларнинг боришиларингизга қолди.

Учинчи сўзни Ўзбек ойим олди:

— Шунча айтдиму бўлмади, ёв қувлаяптими, билмадим. Опоқ ойингга қолса, Кумуш опангни ҳам бирга олиб кетмакчи.

Зайнаб бир турли ҳолга тушди. Кучлангандек қилиб:

— Улар нега кетсинлар! — деди.

Офтоб ойим қудасига қараб қўйди:

— Кетмаса бўлмайдир, був Зайнаб! Бир чеккаси сизнинг эс-ҳушингиз жойида, менинг Кумуш опангиздан бошқа ҳеч кимим йўқ; қолса-ку майли, бироқ мени Кумушсиз ўлди, денг! Шунга қолганда қайин онангиз бир оз тушунмай туриптилар.

Зайнаб ер остидан қайин онасига кўз юборди. Ўзбек ойим ҳануз тиришиб ётган қудасига қарши қишишди:

— Қўйинг-чи,— деди,— беш-олти кун қизсиз турган киши бир нарса бўлтими?

— Сиз тушунмаяпсиз, ойи... ҳали тагин дадаси биладилар.

— Мен сенга айтай, Зайнаб,— деди Ўзбек ойим ва энди қудасининг гапига қулоқ солмай қўйди,— опоқ ойингнинг ҳамма мулоҳазаси сенданга ўхшайди. Зайнаб сиқилмасмикин, икки ўртага совуқчилик ораламасмикин, деб қўрқади. Мен: Зайнаб сиз ўйлаган келиклардан эмас, тегу таҳтлик, аслзода, Кумушни сийламаганда ҳам бизни сийлади, десам ҳам уна-майди...

— Мени худо уринтими,— деди Зайнаб. Офтоб ойим қудасининг кейинги гапидан анча сиқилди. Гўё ўзи Кумушни қолдиришга тарафдор бўлса ҳам, фақат Зайнабининг кундошлик қилишидан қўрқиб тургандек кўрсатилган эди.

— Янглишяпсиз, ойи!

— Янглишисам, янглишмасам Кумуш бу уйдан силжимайдир!

Офтоб ойим бўғилиб, фойдасиз тортишиб ўтиришни тарқ қилди. Энди бу тўғрида эрига мурожаат қилмоқчи эди...

Марғилонгача аравани Ҳасанали минадирган бўлди. Чунки Марғилондан арава миниб келгувчи ёлланган киши бўлиб, Тошкентта келишнинг эртаси куни ҳисобини олган эди. Қудаларнинг қайтиши чинга айлангандан кейин, йўл тараддуди бошланди. Ўзбек ойим бў-

ғирсоқ қовуртириш, толқон туйдириш, тўқоч ёпдириш билан машғул бўлди.

Офтоб ойим эридан ҳам қўлини ювиб қўлтиғига урган эди. «Ҳожи афанди бирор йил турсун, деб айтди. Энди бир йилни ўзимизга кўрмасак бўлмас, икки оёгимизни бир этикка тиқишимиз уятга ўхшайдир!» дейиши ва сўзга қулоқ ҳам солмай: «Меҳмонхонада ҳожи бор, сен билан йўлакда эзилишиб ўлтирмайман, номус!» деб бурилиб кетиши, бечорани жуда ҳам эсанкиратиб ташлади. Охирда Отабекка ҳам мурожаат қилиб кўрди. Ундан ҳам асли мақсадни ҳосил қилолмай, фақат уларникидан жўяликроқ узр эшилди. Отабек қайнин онаси ning фикрига қисман қўшилиб, «нима бўлса ҳам бешён кун оғирликни менинг учун ўз устингизга оласиз. Агар мен сизнинг талабингизни маъқул қиласидиган бўлсам, айниқса қизингизнинг кўнглига шубҳа келадир... Сизга айткулиги йўқ, бу тўғрида менинг аралашмогим яхши бўлмас! Кундош адовати борасидаги фикрларингиз тўғри ва лекин иш у даражаларга етмас, деб ўйлайман... Жуда бўлмагандан Кумушнинг ўзини олдингизга жўнатарман, хотиржам бўлинг!» — деди.

Офтоб ойим шу йўсин ҳар тарафдан ҳам умидсизланиб, менгровсиб қолди. Кумушни кўрган сайин алланучук юраги ачир, жудолик кунларини асло тасаввур қилолмас эди. Кумуш бўлса, онасиning ҳозирги ҳолига ачингандек — унга яқинлашмай, четлаб юрар ва иккичи тарафдан Зайнабнинг бир ярим қарич осилиб кетган қавоқ-дудоғига истехзоданиб томоша қилар эди.

Йўл ҳозирликлари битиб, Ўзбек ойимнинг қутидор, Офтоб ойим ва Ойша кампирга атаб тиқдирган саруполари ҳам битди...

Бу кун меҳмонларнинг энг сўнгти кечалари эди. Ўзбек ойим ярим кечаларгача қудачаси билан сўзлашиб ўтирди.

Сўнгра Офтоб ойим билан Кумушни ёлғиз қолдирib ўз уйига ёткали чиқди. Она-бола бу кечани бирга кечирмакчи эдилар. Офтоб ойим қудасининг кетидан қизига ҳайфсиниб қўйди.

— Онангни фироқ ўтида ёндиришдан уялмадинг, қизим!

— Нега ёнар экансиз...

— Нега ёнмайин, ахир, дунёга келиб сендан бошқа овунчогим бўлмаса... Агар қўлимдан келса, ачиб ва

ёниб турган юрагимни сенга очиб кўрсатар эдим...
Кошки эди бир шаҳаргинада бўлсанг!

Кумуш онасининг юрагидаги ўтни ҳозир синамасдан ҳам ҳис этган, чунки йигирма йил ўз қучоғида ўстирган онадан ажралиш унинг ўзига ҳам оғир туюла бошлаган эди.

— Беш-олти ой... ҳеч нарса бўлмас, ойи! Эсон бўлсак, тағин кўришармиз.

Офтоб ойим кўз ёшини дув тўкиб юборди. Нечоғлиқ ўзини қаттиқ ушлаган Кумуш ҳам сирини яшира олмади... Она-бола бир неча вақт йифи ичида бўғилдилар.

— Қолишга — қолдинг,— деди охирда она,— аммо қайин ота ва қайин оналарингга хизмат қил, яхшиликни қўлингдан берма, айниқса кундошингга ёмонлик соғинма. Яхшилиқдир, ёмонлиқдир, ҳар нимаики ўзлари қиласинлар, зинҳор сен аралашма!

— Менинг нима ишим бор...

— Албатта ишинг бўлмасин... Шундоғ бўлса ҳам мен кечаги сўзингдан чўчиб қолдим... Кундошингнинг кўриниши боёвга ўҳшаса ҳам, аммо ўзи писмиқ экан... Бундай одамдан албатта хазар керак! Агар ораларингга совуқчилик тушибирган бўлса, сен ўчакишиб юрма, яхшиси қайин отангга узрингни айтиб, бу уйдан кетиш ҳаракатини қил! Мен бу тўғрида эринг билан ҳам сўзлашиб қўйдим, тузукми?

— Тузук.

— Худойга шукур, қўлингда хатинг бор, ўлганнинг ўстига чиқиб тепгандек хат-хабарсиз қўйма! Ҳар бир ўн беш кунда хат ёзиб, эрингга бер!

— Албатта, сиз ҳам унумтманг!

Бир оз жим қолдилар... Офтоб ойим энтиқиб оғир нафас олди ва маъюсона Кумушга қаради. Кумуш ўринсизча онасига қараб илжайди. Бу ўринсиз ишдан Офтоб ойим аччиғланди:

— Маним ҳолим сенга кулгими, қизим?

— Йўқ,— деб яна кулимсиради Кумуш,— бир-икки кундан бери сиз айтадиган...

— Нима, мен айтадиган?

— Ахир...— деб қизаринди Кумуш,— кўнглим айнар эди, деб айтар эдингиз-ку...

Офтоб ойимнинг ҳам юзида бир кулимсираш кўрилди:

— Тўғрими?

— Билмадим...— деди, ерга қараб қизарди,— ўтган кундан бери кўнглим айнагандек бўлади... Айниқса палов исидан кўнглим кетади... Аччиғ нарсалар егим келади...

— Муборак бўлсин! — деди Офтоб ойим, кулди. Кумуш ижирганиб ўзича алланарса сўзланди. Офтоб ойим энгапиб Кумушнинг қулогига шивирлади,— бу сирни эрингдан бошқа ҳеч кимга билдирма, қайин онанг ҳам енгил хотин, айниқса кундошинг сеза кўрмасин!

Кумуш маъқул ишорасини берди. Она-бала бир ўрин ёзиб ётдилар. Кўп вақтгача Офтоб ойимнинг ивир-шивири набира тўғрисида бўлиб қолди. Кўзига уйқу келмай — «шуни ҳам кўтар кун бўлармикини?» дер эди.

Саҳар пайтида туриб чой ичдилар. Субҳ номозини ўқиб, арава қўшилди. Аравага чиқадиган майдо-чуйда ташилиб битди. От жиловида Ҳасанали, арава ёнида қутидор ва ҳожи сўзлашиб турар эдилар. Отабек арава орқасига нарвонча чиқариб қўйди. Хотин-халаж ҳамма йўлакка йигилиб Офтоб ойим бирин-бирин кузатувчи хотинлар билан кўришиб чиқди. Энг сўнг Кумушни бағрига босиб йиглаб юборди. Кумуш ҳам ўзини тутиб туролмади. Бошқалар ҳам йифидан насибасиз қолмадилар.

— Худойга топширдим, Кумуш, қазом етиб кўролмай ўлсам, мендан рози бўл!

— Сиз ҳам, ойи!..

Қутидор ҳам кўчадан йўлакка кириб қизининг манглайидан ўпди:

— Кўришгунча, қизим...

— Хайр, отажон!

Йўлакка Юсуфбек ҳожи юзланиб умумий дуога қўл кўтарилиди. Дуодан сўнг Отабек тўриқ йўргани чиқариб қутидорга тутди. Офтоб ойим яна бир қайта қизи билан қучоқлашгач, Отабекнинг кўмаги билан йигланган кўйи нарвончадан аравага минди ва соябон орқали олдинга ўтди. Қутидор Юсуфбек ҳожи билан саломлашиб қучоқлашгандан кейин, Отабекнинг қўлтиглаши билан отга минди. Отабек ҳам аравага — Офтоб ойим ёнига чиқиб ўтиргач, умумий «олло акбар!»дан сўнг Ҳасанали отни йўлга солди.

- Кумуш дарбоза ёнига чиққан эди!
— Хайр, онажон! Менинг учун бувимни қучоғлаб
қўйинг, ўртоқларимга салом айтинг!
— Худойга топширдим, Кумуш, яхши қолинг, қуда!
— Яхши боринг, був Офтоб!
— Яхши қолинг, був Зайнаб!
— Яхши бўринг, опоқ ойи!

Арава кўчадан бурилгунча — «яхши қолинг, яхши
боринг, салом айтинг» сўзлари тақорланиб турди.
Арава катта кўчадан бурилиб кўздан йўқолгач, энг
кейинда қолиб йифлаган кўйи Кумуш ичкарига кирди.
Отабек бир неча бекатгача меҳмонларни кузатиб бо-
риб, сўнгра қайтмоқчи эди.

14

ХУШРЎЙБИБИ ВА ЗАЙНАБ

Хушрўйбиби Зайнабнинг эгачисидир. Моҳирабону-
дан икки ўғил ва икки қиз дунёга келиб, тўнгичи Азим-
бек, ундан кейингиси Хушрўй, учинчиси Каримбек ва
тўртингиси бизнинг Зайнаб эди. Зайнаб эгачиси Хуш-
рўйдан етти ёш чамаси кичик эди. Гарчи бу икки эгачи-
синги билан қориндан талашиб тушган бўлсалар ҳам,
сажия — характерда таниб бўлмаслик даражада бир-
бирларидан фарқли эдилар. Сажиядагина эмас, сурат
ва сиймо важида ҳам катта ўзгаликлари бор эди.

Хушрўй узун бўйли, қотмароқ ва зарча танли эди.
Зайнаб қисқа бўй, гўштдор ва оқ танли эди. Хушрўй-
нинг ҳаракати енгил ва лафзи тез эди. Зайнаб лоппос
ва ўнта сўзга аранг битта жавоб қайтарадиган эди.
Хушрўйнинг кўзи ўйнаб, ҳар секундда ўн ёқса аланг-
лар эди. Синглиси бўлса бирор билан бетма-бет келиб
сўзлашганида ҳам кўзини ҳамиша бир нуқтадан узмас
эди. Хушрўйга болалик чоғидаёқ уй ичи ва қўни-қўшни
«шаддод» деб исм берганлар, чунки у кимдан бўлса-
бўлсин айтганини қилдирмай қўймас, агар бирорта
иш унинг тилагига тескари кетса шовқин-суронни
худди бошига кийиб олар эди. Шунинг учун Хушрўй-
нинг раъйини билмасдан қозон осилмас, унга ёқмаган
гапга оғиз очилмас, у бор жойда қадам ҳам саналиб
босилур эди.

Зайнаб эгачисининг аксича ўз яқинларида «писмиқ» деб исм олган, онаси бўлса аччиғи чиққандада «мингаймас ўлгир» деб уни қарғар эди. Айниқса, қуида зикир қиласидирган ҳолимиз бу икки опа-сингилнинг характердаги фарқларини очиб кўрсатиш учун етадир:

Моҳира ойим ҳар бир ҳайитдан бирор ойлар илгари эрига айтиб болаларига кийимлик олдирар эди. Олдирган кийимлик Хушрўига ёқмаса, дарров ярамаганини айтиб алмаштириб беришга дадасини мажбур этар ва кўнглидагини ҳосил қилиб тинчир эди. Аммо Зайнаб бўлса ўзига келган кийимликка қарши бошда бир нарса демас, кийимлик бичилиб ва тикилиб ҳам арафа кунлари келиб етгандан кейин, ҳурпайиб ҳеч ким билан сўзлашмай қўяр эди. Моҳира ойим қизининг бирорта ишдан норозилигини пайқаб, «мингаймас, писмиқ ўлгир, тагин нима жин урди сени?» деб сўраганида, Зайнаб қовоқ-дудогини солиб бир оғиз ҳам жавоб бермас эди. Ниҳоят, эртага ҳайит деган куни Зайнабнинг ҳурпайиши йиги билан алмашар ва йиги аралаш мақсад очилса ҳам, кўпинча натижасиз қолар эди. Бирор жойга меҳмондорчиллик учун борадиган бўлсалар, Хушрўй ҳаммадан илгари эълон этар эди: «Мен ҳам бораман!» албатта уни қолдириб кетиш учун энди ҳеч кимда ҳад йўқ. Иккинчи вақт: «Мен бормайман!» бу тақдирда уни бир қадам силжитилсан-чи! Аммо Зайнаб онаси билан янгаси Ҳанифа бир жойга отланадиган бўлсалар, «бораман, бормайман» демас, улар ҳам йиғламаган болага сут берилмас қабилидан индашмасдан меҳмондорчилликка кетар эдилар. Кечқурун қайтиб келсалар, бир бурчақда Зайнаб йиғлаб ўтирибди:

— Нега йиғлайсан?

— Нега мени бирга олиб кетмадингиз...

Зайнабнинг шу феъли балоғатга етиб, эрга текканидан кейин ҳам ўзгармади.

Отабекнинг Зайнабга бўлган муносабатини ўқувчи га албатта сўзлагулиги йўқ. Эри унга ойлаб, йиллаб қарамай қўйганида ҳам у их деб товуш чиқармади. Отабекнинг бу ҳолига қарши чиқувчи ва Зайнабни йўл-йўриққа солувчи яна фақат Ўзбек ойим эдик, бунинг сабаби ҳам иззатли ўқувчимизга бир даража маълум бўлса керак. Сут билан кирган, жон билан чиқар деғанлариdek, Ўзбек ойимнинг ўша вақтлардаги ташви-

котлари ҳам унинг тарафидан фақат «келинлик» маж-бурияти остида қабул қилинар, масалан, қайин она — «фалончи домлага бориб мундоғ қил, Зайнаб!» деб буюрмагунча ўрнидан қўзғалмас ва шунинг билан бирга эрининг ташлаб қўйиши тўғрисида онаси, эгачиси ва бошқа яқинларига чурқ этуб оғиз очмас эди. Зайнабнинг бу ҳолига ҳукман — «эрининг қарааш ва қарамаслиги унинг учун фарқсиз эди» деб айтиш, албатта тўғри бўлмайдир. Чунки кундошнинг Тошкентта келиш хабарини эшитган Зайнабни биз юқорида Отабек қучоғига ташланган ҳолда кўриб эдик. Хулоса, Зайнабнинг болалик вақти билан ҳозирги ҳолини чағишириб қарасак, кўрамиз: ёш Зайнаб бир ой илгари тикилиб кўйилган кийимнинг ўзига ёқмаганини фақат арафа куни айтиб йиғладидир, бу кунги Зайнаб ўзининг муҳаббатини эрига фақат кундоши келиб етар олдида эълон қиласадир.

Биз юқорида ёш Хушрўй билан ўқувчини бир дара жа таништирган эдик. Энди унинг оила ҳаёти билан ҳам таништиришга мажбурмиз:

Хушрўйнинг эрга тегиши ҳам ўзига ўхшашибавқулодда бўлган эди. Масалан, аксарият қизларимиз ота-она кимни мувофиқ кўрса, шунга тегишга мажбурдирлар. Лекин Хушрўйники мундоғ бўлмади. Хушрўй ўн саккиз ёшга етгандан кейин, унга совчилар кела бошлийдирлар. Табиий, Хушрўйнинг феълини яхши билган ота-она унинг раъйини олмасдан туриб бир иш қилмоқдан қўрқадирлар. Олим понсадбошига маъқул бўлган неча йигитлар, Моҳира ойимга ёқсан қанча тегу тахтли хонадонлар Хушрўй томонидан рад қилина борадир. «Фалончининг ўғлими?» деб сўрайдир Хушрўй ва онасидан жавоб кутмай: «Худой кўтарсин эрни! Ўшанга текканимдан кўра, қора ерга текканим яхши!» дейдир. Бир неча вақт шу йўсин Хушрўйнинг раъйига қараб эру хотин зерикадирлар-да, ўзларича бир жойга қудалашмоқчи бўладирлар. Уларнинг андишасини билган Хушрўй бошда бунга қарши бир нарса демайдир. Аммо узил-кесил фотиҳа ўқиб, қудалашиш учун уйларига келган совчи ва қуда хотинларнинг олдиларига келиб бетларига айтадир: «Ҳали мен эрсираб қолганим ўқ, фотиҳа ўқиб ташвиш чекмай уйларингта жўнай беринглар!» Моҳира ойим бу юзсизликдан ер ёрилса ерга киргундек бўладир. Совчилар эрса бундай

уятысиз қиздан алхазар ўқишиб жўнайдирлар. Албатта ота-онанинг бунга қарши чоралари қарғиш ва ранжишдан нарига ўтолмайдир. Оғаси Азимбекнинг Хушрўй устига кўтарган мушти ҳам, «нега мени урасиз, мен фалонлик қилдимми?» деган ҳақли сўз билан дармонсизланадир.

Шу воқиадан сўнг совчилар оёғи узиладир, Хушрўй учун ҳеч ким оғиз солмай қўядир. Чунки бояги совчилар бу фавқулодда муомалани кўринган бирорвга достон қилиб ўқийдилар. Моҳира ойим таънага тил очадир: «Энди дунёдан эрсиз ўтасан, қизим!» Лекин Хушрўй ҳануз пинагини бузмайдир: «Эр қуриб кетган эмасдир, хоҳласам эртагаёқ эрга тега оламан» — дейдир.

Ўртадан бир неча вақт ўтиб Азимбекнинг ўртоқлаидан бўлган Нусратбек отли бир бекникидан хотин устига совчилар келадир. Моҳира ойим эридан фикр сўраш ўрнига қизига арз қиласидир ва Хушрўй бунга қолганда қулоқ қоқмайдир. Бу ризоликни эшитиб отаси ва оғаси жуда севинишадилар. Зоро Нусратбек, беклар ичида обрўлироқ кишининг ўғли ва ҳозирги тутиб турган иши ҳам анча донғли бўладир. Шунинг учун унинг хотинли бўлиш камчилиги ҳам эътиборга олинмайдир. Фотиҳанинг иккинчи ҳафтаси тўй, никоҳлари бўлиб, Хушрўйнинг Нусратбек билан чодирда қилган биринчи муомаласидан тил бириктириб эрга теккани хотинларга маълум бўладир.

Хушрўй чодирдан чиқмасданоқ чой ташиб, хизмат қилиб юрган кундошига кесатиқ билан ҳужум бошлайдир. Иккинчи ва учинчи кунларда тўппа-тўғри кундош устига сапчийдир. Ҳафта, ўн кун ўтмасдан эрини ўз томонига оғишириб кундоши ёнига киргизмаёқ қўядир. Иккинчи ва учинчи ҳафталарда ўчоқбошини ўз қўлига олиб кундошини иккита ёш боласи билан томоқ важидан ҳам сиқа бошлайдир. Нусратбек бўлса кўчага чиққанда беклик даъвосини қилиб, уйига кирганда Хушрўй бекка муте! Бечора катта хотин Хушрўйнинг доимий ҳужумига маҳкум қолиб, эридан лоақал иккита гўдаклари юзи учун бўлсин марҳамат кўрмай азобланадир. Иккинчи ойлардан бошлаб Хушрўй кундошини бўғиб уриш одатини чиқарадир ва ўрим-ўрим кундош сочини алафдек юлиб олишдан ҳам тортинмайдир.

Тамом жонидан тўйган бечора кундош учинчи ойга чида боролмай эридан талоқ сўрайдир. Ноилож Нусратбек ҳам унга жавоб беришга мажбур бўладир. Аламзада бечора икки гўдакни эрига ташлаб кетмакчи бўлганида, Хушрўйдан очиқчасига шу гапни эшиладир: «Итдан бўлган қурбонликка ярамас! Болаларингдан умидингни узган бўлсанг, итваччаларингни бу уйда қолдир!» Хушрўйнинг оғзидан чиққан бу таҳдид бечора онанинг юрагини уюштирадир. Дарҳақиқат, Хушрўйнинг бу ишдан ҳам тоймаслигини аниқ билиб, йиғлай-йиғлай болаларини ўзи билан бирга олиб кетадир.

Хушрўй уч ой ичида томир ёйиб қолган бир оилани илдизи билан юлқиб ташлаб тинчийдир. Бундан бошқа Нусратбек каби бир одамни ҳам ўз ишоратига қаратадир.

Энди етти-саккиз йил бор, у ўз кайфича яшаб келадир. Ҳар нарсадан ҳам мамнун, бироқ... Шунча муддатдан бери она бўломмаганидан хафа, ҳамма қайғу, ҳасрати ана шу туғмасликда. Бундан икки йилча бурун эри Нусратбек: «Олти йилдан бери туғмайсан, кўрсатмаган табибинг қолмади. Энди нима қиласмиш?» деб кулган эди, Хушрўй эрининг мақсади нима эканини пайқаб: «Боласиз кини дунёда туролмайдиган бўлса, ғир оз заҳарни бошлаб сизга бераман, ундан кейин ўзим ейман!» — деди. Шундан кейин Нусратбек бундай гапни иккинчи гапирмай қўйди. Дарҳақиқат, Хушрўйнинг бу сўзини ҳазил деб бўлмас эди.

15

ЭСИНИ КИРГИЗДИ

«Кундошлик уйда кунда жанжал!» деганлар. Албатта буни айтувчи киши ўйламасдан ва билмасдан айтмагандир. Жилла, ҳар куни жанжал бўлмаганда ҳам, ҳафтада, ўн кунда бир тўполон чиқмаса, албатта, кундошни кундош, деб бўлмас. Нега десангиз, бизнинг баъзи бир кундошсиз, чиқитсиз оилаларда ҳам икки, уч кунда товоқ-қошиқ синиб, тогора янгиланганини ҳар қайсимиз биламиш, бас, энди кундошлик оилаларимизга келганда-чи, албатта юқоридаги «Кундошлик

365

ўйда кунда жанжал!» мақолини тұғрига, чинга чиқар-
масдан чора йўқ.

Мен — ёзувчи, «Үтган кунлар» ҳикояларини отам
мархумдан неча қайталаб эшитсам ҳам зерикмас әдим,
фақат бир жойигина мени зериктиради. Бу кун мен
шу «Үтган кунлар»ни қаламга олганимда ҳам ўша
ўзимни зериктирган фаслини ташлаб ўтишга мажбур
бўлдим. Дарҳақиқат ўз орамизда кундош жанжалини
ким билмасин? Арзимаган гап устида дунё бузган кун-
дош тўполонлари кимнинг қулогига ёқсин? Ўқувчининг
қимматли вақтини аяганимдек, қаламни ҳам бу гиди-
бидидан озод қилишни мувофиқ кўрдим. Мени кечир-
синлар.

Зайнаб хафалиги ошган кезларда қариндош-уруг-
лариникига юриб чигилини ечар эди. Уч-тўрт ойнинг
ичида икки мартаба эгачиси Хушрўйницида ҳам меҳ-
мон бўлиб кетди. Аммо ҳозиргиси учинчи мартаба ке-
лиши эди.

— Нучук худо ёрлақади! — деб Хушрўй синглисини
қаршилади.

Сунбула ойининг мұттадил¹ ҳавосига қарамасдан
Зайнаб маржон-маржон терлаган эди.

— Нега мунча ўзингни олдириб қўйдинг, Зайнаб!
Уйингдан тинчмисан, эринг эсон-омон юрибдими?

— Қуриб кетсан! — деди Зайнаб ва кўзига ёш олди.
Хушрўй ачиниш ўрнига кулди.

— Кел, айвонга чиқ,— деди,— ойимницида эдингми?

— Йўқ.

— Уйингдан келдингми?

— Ҳа.

Хушрўй синглисини ўтқазиб, чўрисига чой буюрди.
Фотихадан кейин, «поччам эсон-омонмилар?» деб сўра-
гувчи синглисига:

— Поччанг ўлсин! — деди аччиғланиб Хушрўй.—
Нажмиддинбек деганинг даласига кетган эди. Тўрт
кундан бери дом-дараксиз, ўлдими-қолдими, билмай-
ман!

Зайнаб уч-тўрт ойнинг ичида киши танимаслик ҳол-
га тушган эди. Йилариги тўлалигининг ярмисини йўқот-
гандек, тусига қаримсиқлик кирган. Кўз ҳаракатида
ҳам бир бесаранжомлик зоҳир ва буларнинг устига ҳар

¹ Мұттадил — ўртача ёқимли.

қачон унда кўрилган «оғирлик» ўрнига асабийликка яқин бир вазият ўтиргандек эди. Зайнаб эгачисининг ҳалиги гапига ризосизлик билдириди.

— Ношукур экансиз, опа,— деди,— поччамдан но-лишингиз яхши эмас, сизнинг ҳам бошингизга менинг кунимни солса нима қиласр эдингиз?

— Мен ҳам Зайнаб бўлсан, албатта солар эди,— деб кулди Хушрой.— Менга қолса, ҳар ким ўз нафсига яхшилик ёки ёмонликни ўзи ҳозирлайдир!..

— Тавба, денг, опа!

— Мен шу чоққача,— деди Хушрой,— бандасига бош эгишни ва бандаси олдида тавба қилишни ор билдим ва шу орланишим орқасида ҳар кимнинг устида юрдим...

— Катта гапирманг!

— Катта гапирсан, гапирмасам,— деди Хушрой,— менинг феълим ҳар кимга маълум ва ҳаммадан ҳам сенга очиқ!.. Қўйчи бу гапларни, ўзинг тинчмисан?

— Тинчлигим қурсин...

— Айтсанг, айтмасанг,— деди опаси,— албатта тинчлигинг қурсин!

— Қуритган қурсин...

— Сенинг тинчлигингни ҳеч ким қуритган эмас, Зайнаб! Ҳамма жабрни ўзинг ўзингта қиляпсан!

— Ҳамиша шу гапни айтиб қолгансиз,— деб ўпкалади Зайнаб,— дунёда ким ўзига жабрни хоҳлайдир?

— Сен ва сенга ўхшаганлар!

— Худо урар...

— Айтсанг, айтмасанг, худо уриб қўйибди!

— Шундай кунларга мен қолай дедимми?

— Дегансан!

Зайнаб опасининг истеҳзолик юзига қаради ва унинг нима демакчи бўлганига тушунолмади:

— Деган бўлсан айтинг...

— Сен менинг қандай қилиб эрга текканимни билсанми?

— Биламан...

— Билсанг билганингча тур,— деди Хушрой,— энди келайлик сенинг эрга тегишингта: албатта тона олмассан, сенинг эр қилишда тариқча ихтиёринг ва ризолингинг йўқ эди. Эҳтимолки ихтиёр нима, орзу нима ўзинг ҳам пайқамас эдинг. Балки ихтиёр ва орзуларинг ҳам бўлгандир, бироқ уни ҳеч ким майдонда кўрмас эди.

Шунинг учун тизгининг ойинг билан дадангнинг қўлида, бошқача айтганда, уларнинг туяга ортган юки, кимга сотса, қаерга жўнатса ихтиёrsиз эдинг... Ёдингда борми, никоҳ куним мен кулиб, чақчақлаб аравага миндим, сен бўлсанг уйдан йиглаб чиқдинг ва эрингникига йиглаб бординг... Яхши, эринг сенга ёқди, аммо эринг фақат сенга ёқдан билан иш битмаслигини яна хотирингта келтирмадинг. Эринг сени ташлаб қўиди, сен чурқ этмадинг, истиқболинг тўғрисида ўйламадинг...Faқат галвир сувдан кўтарилгандан сўнггина, сен ўзингни ҳар тарафга ташлай бошладинг... Лекин энди бир минг тоблансанг ҳам натижа ўзингнинг феълингча битта: сенинг учун ҳар кун бир ўлим, ёки ўша уйдан бошингни олиб чиқиш!

Хушрўйнинг раҳмсиз муҳокамасидан оққан бу ҳакиқатлар Зайнабни йиглатди.

- Мен шундай бўлар, деб ўйламаган эдим...
- Сен ўйлашни билармидинг? — деб кулди Хушрўй.
- Бирор ўлай деса, сиз куласиз!
- Мен йиглашни билмайман! Кишилар йиглаганда, менинг кулгим қистайди.
- Менинг ўрнимда бўлсангиз, сиз ҳам йифидан бош кўтармас эдингиз...
- Сенинг ўрнингда бўлсам биласанми, нима қилар эдим, Зайнаб,— деди Хушрўй,— дунёсини ост-уст қиляр эдим, бир томчи ёшимни юз томчи заҳар билан қўшиб ташлар эдим!

Зайнаб кейинги гап билан эгачисининг юзига кўтарилиб қаради ва Хушрўйнинг юзида золимона бир истеҳзо кўрди.

— Яхши,— деди Зайнаб бир синиқ товушда,— ҳамма дўстларингиз сизга душман бўлсин, уч йилдан бери сизнинг сўзингизни айтиб ёнингизда келган қайин онангиз ҳам душманингиз ёнига ўтсин, ҳатто сизни туққан ота-онангиз ҳам «сабр қил, болам!» деб қуруқ сўз айтиб ўлтирсинглар... Бас шу ҳолатда сиз йигламай нима қилар эдингиз?

Хушрўй пинагини бузмай яна кулди.

— Душман ўзи нима деган сўз? — деди.— Мен сенга боя ҳам айтдим: кишининг дунёда дўсти йўқ, магар нафсига ўзи дўст; кишининг дунёда душмани йўқ, магар нафсига ўзи душман! Масалан сен ўзинг: отангга, онангга дўстим, деб ишондинг, аммо улардан

ниманы яхшилик кўрдинг? Букун уларнинг «сабр қил, болам» деб берган кенгашлари сенинг ярангга малҳам бўларми? Албатта бўлмас. Бошдаёқ эринг сенга қарамай қўйди. Аммо сен қайин онангнинг ваъдасига ва тагин алланарсаларига ишондинг... Ўзинг ўйла, болани онә туғадир, лекин унга муҳаббатни ҳам она туғиб берадими? Албатта бу мумкин эмас. Сен бечора шунга ҳам ишондинг. Энди гап нима? Отанг сенга сабр едирадир, қайин онанг бўлса кундошинг дуосида... сен бўлсанг йиғи қучогида...

— Сиздан ўзимни чақдиргани келган эмасман,— деди йиглаган кўйи Зайнаб,— ўз уйимда ҳам тегмай чақадиган газандаларим бор... Сиз ҳам менинг куйгак жонимга ўт ёқманг-ла, агар қўлингиздан келса, бу ўртанган синглингизни тинчтиинг!

— Сен хеч тинчий олмайсан...

— Ҳар нарсага ақлингиз етади... Лоакал бу бахтсиз синглингиз учун биргина бош оғритсангиз-чи... Устимга шу бало келгандан бери эшигингизга неча қайта келиб қуруқ қайтдим, эндигина сиз ҳам...

Хушрўй бир оз Зайнабнинг юзига қараб тургандан кейин:

— Менинг кенгашимга юрасанми? — деб сўради.

— Жўялик бўлса нега юрмай!

— Юрсанг,— деди Хушрўй,— чиқ эрингдан!

Зайнаб ўкраб юборди.

— Ўзим ҳам шундог деярсиз, деб турган эдим...

Хушрўй:

— Негаки, сенинг дардингнинг давоси, менга қолса, факат шу!

— Қандай қилиб чиқай, ахир...

— Эрдан чиққанлар қандай қилса, сен ҳам шундай қиласан!

Зайнаб жавоб бермади. Чўри хотин ўртага дастурхон ёзиб, чой келтириди. Хушрўй хизматчини ўчоқ бози юмушларига буюриб чойни ўзи қўйди.

— Дастурхонга қара, Зайнаб!

— Иштаҳам бўғилди...

— Менинг айтганимни қилсанг, иштаҳанг ҳам очиладир.

— Эрим... эримни кўзим қандай қийсин!

— Жавоб сўрасанг,— деди кулиб Хушрўй,— сени талоқ қилиш учун эринининг кўзи қиядими?

— Билмайман...

— Албатта яхши биласан, қияди! Аммо сен аҳмоқсан, кўрпангга қараб оёқ узатишни, қарс икки қўлдан чиқишини билмайсан!

— Этагингни қоқиб кета бер, дейсизми?

— Чунки шундан бошқа чоранг йўқ!

— Сен ҳасратда ўл, кундошинг яйраб-яшнасин — шуми мақсадингиз?

— Ҳозир ҳасратда эмасмисан, кундошинг яйрамайдими?

— Тузук,— деди Зайнаб,— лекин ҳар қадамда унинг ҳузуруни бузаман, бир чўқитиб, ўн қаратаман.

Хушрўй кулди:

— Бундан нима чиқади? ..

— Ишқилиб келгиндини тинчитмайман.

— Сен тинчитмасанг,— деди Хушрўй,— бошқалар сени тинчitar...

— У нима деганингиз?

— Яъни роҳатини буза берсанг, эринг сени қўяр!..

Зайнаб бу ҳақиқат олдида ўйланиб қолди. Хушрўй ўзининг ваҳший кўзлари билан синглисига қараб кулимсирап эди. Бу кулимсираш ораси «қўлингдан нима келади?» — дегандек бўлар эди. Зайнабнинг тузи шу чоққача кўрилмаган равишда ўзгариб кетди. Негадир тинмай оқиб турган кўз ёғиси ҳам қуриди ва товушида ҳам ҳануз эшитилмаган кескин бир оҳанг бор эди:

— Эсимни киритдингиз, опа,— деди,— раҳмат, сизга!

— Раҳматни менга айтма,— деди Хушрўй,— ишонсанг, юрагингга айтарсан...

16

ОЙ-КУНИ ЯҚИН ЭДИ

Кумушнинг ой-куни яқин эди. Набиралик бўладиган Ўзбек ойимнинг иши бошидан ошган, Кумушнинг оий туғмасданоқ у бешик ясатиш билан машгул эди. Дояча ким, ақиқага нечта қўй керак, нечанчи кунда тўй ўтказиладир, нечта эркак, нечта хотин айтиладир ва кимлар? — Мана шунингдек масалалар билан Ўзбек ойимнинг мияси жуда шишган эди. Кумушда кўрилган баъзи нишоналарга биноан набирасининг ўғил бўлишига

шубҳа қилмас — «ўғил туғасан, Кумуш, мен ҳам Отабекни сенга ўхшац өнгил кўтарган эдим» дер эди. Кумушни хизматдан бўшатилиб баъзи ўчоқбоши юмушларини Зайнаб идорасига топширилганига энди бир ойлаб бор.

Ўзбек ойим набира масаласида қанча курсанд бўлса, Отабек шунчалик хафа, чунки Кумушни кўрган сайин, уста Олим фожиасини хотирлар эди. Юсуфбек ҳожи маълум алданишдан сўнг юрт ишидан қўл ювган, кўп вақтини меҳмонхонада қуръон ва «Далойил»¹ ўқиб кечирав, кундош ораси бузилиб, ўртадан сўз чиққанини гоҳ эшитса, иккала келинни ўз олдига чақиртириб уларни қатор ўтқазар эди. Аввало Кумушдан ўпка қилиб: «Ойим, ҳар нима сиз каттасиз, Зайнаб ёш, каттадан кичикка шафқат лозим, мундоф яхши эмас!» ва Зайнабга қараб: «Болам Зайнаб отин! Сиздан ҳали ёшлиқ ғурури кетмаган, лекин менинг болам бўлганингизни сиз ҳам унутманг!» дер ва шунинг сингари юмшоқ гаплардан кейин иккисини дуо қилиб бир-бирисига салом берди-рар — «ана, шундоғ бўлсин, опоқ қизларим!» деб кетишга рухсат берар эди. Улар кетгацдан кейин, албатта Ўзбек ойим эри ёнига кирап, ҳожи бўлса хотинини сизсираб: «Сиз икки келин ушлашни билмабсиз, Зайнабга жабр қилган кўринасиз, айниқса Зайнабнинг кўнглига қарашингиз керак, Отабекка ҳам насиҳатингиз лозим!» дер эди. Ўзбек ойим шундай кезларда Кумушнинг ёнини олиб «Зайнабни худой кўтарсин, айб ўзида...» дея бошласа, ҳожи унинг оғзини аранг тўхтатар: «Секин-секин, уят! Қайин она деганинг адл туриши лозим! Зайнаб сиз билан менинг орзу-хавасимиз эмасмиди?!»

Аммо набира масаласидаги Ўзбек ойимнинг баъзи бир қўйишқондан ташқари ҳаракатларини ҳам босувчи яна ҳожи эди: «Зайнаб бор, Зайнабни унутдингизми, ўз келинингиз Зайнабни!»

Бундан ўн беш кунча илгари Кумуш онасига бир хат ёзган эдиким, аҳамиятига кўра биз бу ўринда кўчирамиз:

«Онажон! Күёвингизнинг ёзганларидан ташқари, мен сизга шу билан олтичи хат ёздим. Аммо сиздан учта ва дадамдан иккита хат олдим. Айниқса дадам-

¹ «Далойил» — дипий қитобнинг номи.

нинг кейинги хатидаги қора хабар билан дори дунё кўзимга торайди. Ўлим ҳақ, аммо бечора бувим жои бе-рар экан, ёнида туриб дуосини олиб қолмагани учун кўп ҳасрат чекдим. Айниқса мусофирчилигим ёмон асар қилди. Кўз ёшларим билан юзимни ювдим. Бугун бешинчи кундан бери раҳматлик бувим арвоҳига атаб қуръон бошладим. Хатм қилиб бағишлайман, худо га-рики раҳмат қилсин, сизга сабр берсин. Энди мусофир қизингизвинг баҳтига сиз ўлманг, омин.

Ваъда маълум бўлсинки, алҳамдуилло күёвингиз ва қудаларингиз саломатдирлар ва уларнинг сояларида мен қизингиз ҳам ўйнаб-кулиб юрибман. Сизни ва отамни жуда согиндим, агарда оғир оёқ бўлмасам эди, қиши бўлишига қарамасдан Марғилонга жўнар эдим. Қудангиз қайин опамнинг сўзига қараганда, келаси ойга кўзим ёрир эмиш. Қудангиз мени на ерга ва на кўкка ишонадир, ўн беш кундан бери қўлимни совук сувга ҳам урдирмай қўйди. Ўзи гўёки тўйга ҳозирлангандек бешик ясад, сарпо тикиб юрибдир... Менинг бўлса нима учундир юрагимда бир қўрқув бор... Үтган хатларимда кундошим билан муросамиз келишмай турганини кулгулик тарзида ёзган эдим. Нафсилаамда эрса, орамиз жуда бузилган, мен ҳам ўша вақтларда чин кундошлиқ тўнини кийган эдим. Зайнабнинг битмас хусумати эса голиба менинг икки қатлитим ошкор бўлгандан бошланди. Сизнинг бошингиздан кундошлиқ савдоси ўтмаган бўлса ҳам тушунсангиз керак: биз икков агар қўйиб берсалар гўё бир-биrimizни еб-ичмакчи эдик... У кунлардаги ҳолимдан ўзимга эди ҳисоб беришга ҳам уяламан... Яхшики, бизнинг можаро-лардан қайин отам жуда сийрак хабардор бўлди. Шундоғ ҳам бўлса бу жанжаллар гоҳо унинг қулогига етиб қолар ва биз икки ёв унинг олдига чақирилиб насиҳа-тини эшитар ва лекин яна ёмонлигимиздан қолмас эдик. Сиз ранжисангиз ҳам айтай; қайин отамни ўз да-дамдан ҳам яхши кўраман. Бу яхши кўришим күёвингизнинг дадаси бўлгани учун эмас, балки унинг нур ичига кўмилгандек бўлиб кўринган сиймосини, сийм, деб хитоб қилгандаги мулоийим, беозор ва муассир сў-зини яхши кўраман. У насиҳат учун оғиз очса, вужу-дим эриб кетгандек ва бир турли ухлаб ҳузурлангандек, қисқаси, Зайнаб билан жанжаллашишининг ўзи бир ху-зур ва жанжалдан бўшалгач, қайин отамнинг қаршиси-

га ўтириб насиҳат эшитиш ундан ҳам яхши ҳузур... Сиз менинг телба сўзларимдан аччиғланманг. Агар бу гапимнинг тўғрилигини билмакчи бўлсангиз, Тошкент келганингизда қайин отамнинг насиҳатини ўз қулогингиз билан эшитинг-да, ундан кейин сўзимга қиймат беринг!

Шу йўсун Зайнаб билан уятсизча кўп олишдик, бу ит-мушукликдан биз зерик масак-да, куёвчигизнинг жонидан тўйдираёздик. Бундан бирмунича илгари у биз икки кундошнинг юзимизга: «Агар шу ҳолда давом эта берсаларинг икковларингта ҳам баровар жавоб бериб қутуламан!» деди. Унинг бу таҳди迪 иккимизга эмас, балки биттамизгагина хос эди. Мен бу таҳдида албатта қўрқмадим, аммо «Зайнаб тушуниб қолмаса яхши эди» деб қўрқдим. Дарвоҷе натижа мен қўрқканча бўлди. Зайнаб бу таҳдида сўнг онасининг уйига аразлаганинамо кетиб қолди. Улардан ҳам яхшигина дакки ега бўлса керак, бир неча кундан сўнг ёввошгина бўлиб қайтиб келди. Энди шу воқиага икки ой чамаси вақт ўтди ва лекин орамиздан жапжал чиқмади. Мен жўрттага баъзи гапларни тескарилийка олиб кўрсам ҳам, у чурқ этмайдир. Унинг бу ҳоли эрса менинг учун яхши эмас, у яна кўп вақт бизнинг орамизда тикан бўлмоқчи...

Келаси ойдан жуда юрагим уюшадир... Кечалари кўкка қараб келаси ой шу кунларда ёргу дунёда борманими, йўқманми дейман... Ойша бувим марҳум бўлмагандан шу ой ичи ўзингиз Тошкентга етиб келар эдингиз. Аза ҳамма вақт топилади десангиз қизингизнинг кўнгли учун ҳали ҳам келганингиз яхши. Дадамга менинг арзимни айтсангиз албатта қайтармас. Мендан дадамга беҳад салом. Келаси ойдан қўрқаман... Кўришолмасак мендан рози бўлинг, дадам ва бошқа ёри дўстлар ҳам. Кумуш ёздим.

Тошкент 1269 йил, 1 қавс ойида.»

Кумуш ўз хатида ёзганидек, дарҳақиқат, Зайнаб шу кейинги кунларда ёввошга тортган. Ўн оғизга бир оғиз сўз қайтармас, тинчгина, мулоҳимгина, яъни мундан бир йил бурунгича эди. Қайин она тарафидан: «Опангнинг кўзи ёрир вақти етди. Ўзоқбоши ишларингни энди ўз қўлингга ол!» деб қилинган таклифни мамнуният билан қабул этиб, ҳатто Ойбодоқ онани ҳам ўзоқбоши

юмишидан халос этаёзган. Унга фақат ҳовли супуриш, уй йигиш ва шунга ўхшаш майда ишларнигина қолдирган эди. Зайнабдаги бу ўзгариш фақат ҳалиги тараф билангина қолмай, эри тўғрисида ҳам шундай эди. Отабек ўз ёнига кирса — кирдингми демас ва кирмаса — кирмадинг демас эди. Эрининг баъзи бир самимияти қоронгуроқ муомалаларига қарши Зайнаб ҳам муҳмалроқ қилиб кулиб қўяр эди.

* * *

Ой туғиб, мўлжал яқин етди. Марғилондан ҳам Офтоб ойимнинг йўлга чиқиши хабари келди. Лекин Кумушда маълум оғриқ бошланган эди. Оғриқнинг биринчи куни Кумуш ҳеч кимга сездирмай юрди. Аммо, иккинчи кун буни бошлаб Отабек, ундан кейин Ўзбек ойим сезди. Отабек маълум хавф остида бу сирдан кишига оғиз очиш учун ўзида мажкол топмаса ҳам, Ўзбек ойим дарров Ҳасаналини мундан олти ой илгари белгиланиб қўйилган доя хотинга югуртириди.

Доя келгандан сўнг ичкари ҳовли эркак зотидан то-
залаанди. Кумушни ўқтин-ўқтин оғриқ ушламоқда, доя хотин ва Ўзбек ойим унга ўzlари билган удимлар билан ёрдамлашмоқда эдилар. Кечга томон дард кучайиб кетди. Ўқтин-ўқтин дам-бадамга алишинди.

Ташқарида Отабек йўқ эди. Ҳасанали дарбоза билан меҳмонхона орасида қўлини-қўлига ишқаб юриниб турар ва қайта-қайта ахтахонага кириб, тўриқ йўрганинг у ер-бу ерини супурар эди. Ҳожи бўлса хурсанд ва хафалиги номаълум бир қиёфада «Далойил» ўқир, ҳар беш дақиқада ичкари томонга қулоқ солиб тўхтар, гоҳо даричадан Ҳасаналини чақириб «тинчликми» деб сўрар эди.

Улар масжиддан шомни ўқиб киргач, ичкаридан Ойбодоқ кечлик олиб чиқди. Ундан на Ҳасанали ва на ҳожи оғиз очиб ҳол сўрамадилар. Таом устида Отабекнинг йўқлиги ҳам ҳис этилмади. Сўзлашмасдангина лагандан бирмунча чўқиган бўлдилар-да қўл артишдилар...

— Хуфтан айтилдими? — деб сўради ҳожи.

— Эшитмадим... Чиқа берсак ҳам бўлар,— деди Ҳасанали. Шу вақт ичкаридан хотинларнинг фабқулодда

қий-чув товушлари эшитилиб, иккисининг ҳам қулоқлари диккайди ва қўрқа-писа бир-бирларига қарашидилар. Қий-чув орасидан заиф йиги товуши ҳам келиб қўйди... Иккиси бирмунча кулимсираб олдилар, лекин шундай бўлса ҳам, яна чурқ этиб оғиз очмадилар. Орадан кўп фурсат ўтмади, ичкаридан Ойбодоқ югуриб чиқди ва даричадан туриб «севинчи!» деди. Ҳожи ёнчигини кавлай бериб «алҳамдуилло» деб қўйди. Ҳасанали ҳам илжайиб ёнчиқ кавлашга тутинди ва:

— Ўғилми, ҳолва¹? — деб сўради хотинидан.

— Ўғил!

— Баракалла.

Ҳожи кулимсираб қўлидаги уч-тўртта оқ танга билан битта тиллани Ойбодоққа узатди да: «Тангларни ўзинг ол, тиллани доячага бер!» деди. Ҳасанали севинчисини топширгандан сўнг дуога қўл очди: «Олло таоло умри билан берган бўлсин!» Шундан кейин хотиржам бўлган ҳолда хуфтанга кетдилар.

Отабек меҳмонхонага яқинлашиши билан чақалоқ йигисини эшитиб, ихтиёrsиз ичкари ҳовлига томон бурилди ва йўлакда онасига йўлиқди. Қоронгу бўлса ҳам Ўзбек ойимнинг тусидаги шодлик белгилари очиқ кўриниб турар эди:

— Ўғил муборак бўлсин, болам!

— Ўзи тетикми?

— Тетик!

— Оддига кирайми?

— Йўқ,— деди Ўзбек ойим,— чиллалик уйга кечаси кўчадан келиб кириш яхши эмас... Ичкари кирсанг, тўғри Зайнабнинг олдига бор. Даданг шундами?

— Ўзи?..

— Ўзи яхши, хотиржам бўл! — деди Ўзбек ойим, орқасига қайтди. Отабек кетига бурилиб ташқари йўлакдан киргувчи дадаси билан Ҳасанали шарпасини олди ва ўйланиб тўхтади. Айниқса, ҳозирги пайтда дадаси билан тўқнашиш унинг учун бир оз ўнгайсизроқ туюлган эди. Шу йўсун бирмунча вақт йўлакда туриб, сўнгра ичкарига томон юрди. Зайнабнинг уйига ўтар экан, бир неча қайта Кумуш ётган уй тарафга қараб олди.

¹ Тошкентда «қиз туғди» ўрнига «ҳолва туғди» дейдилар.

— Ўғил муборак бўлсин!

Зайнаб эрини шу сўз билан кулиб қаршилади. Отабек ҳам кулимсираб «қутлуғ бўлсин!» деб қўйди. Ўтиргандан кейин Зайнаб ўзича кулинди:

— Ҳалиги...— деди. «Ҳалиги»дан кейин айтадирган жумласини унугиб қўйдими, ёки ўйлаб қолдими нима бўлса ҳам айтольмади. Отабек унинг оғзини кулимсираган ҳолда бир оз кутиб — «хўш, ҳалиги...?» деб сўради.

— Ҳалиги...

— У ёғи?

— Оти қурсин... ҳа, айтгандек ошингизни ейсизми?

— Ейман.

— Совуб қолмаган бўлса — шу.

Отабек эртадан бери ҳеч нарса емаган эди.

— Қандоғ бўлса ҳам! — деди.

Ҳозир Зайнабнинг чёхраси очиқдек кўринса ҳам, аммо бу очиқ чехранинг замирида уни жиддийроқ машғул қилган яна бир гап бордек, яъни кўринишдан шошибланлик ва ё шунинг сингари бир ҳол унинг шу очиқ чехраси остига яширингандек эди. Зайнабнинг ўн беш дақиқалик муомаласида Отабек юқориги каби «эсдан чиқариш» ҳолатига бир неча қайта учради ва охирида сўрамоққа мажбур бўлди:

— Нега ҳолингиз паришон?

Зайнаб кулди:

— Нега паришон бўлсин.

— Менинг кўзимга паришон кўринасиз.

— Тўгри,— деди Зайнаб,— қўрқдим...

— Нимадан қўрқдингиз?

— Туғищдан...

— Қийналдими?

— Қийналиш ҳам гапми,— деди Зайнаб,— ўз кўзингиз билан кўрмаганингиз учун ишонмайсиз!

— Ойим мундоғ демаган эди-ку?

— Сиздан яширганлар.

Отабекнинг юраги жуда уюшиб кетди. Ҳатто кундошини паришонхотир қилган бу гап Отабекка қандай таъсир қилиши кўп тафсилга муҳтоҷ эмас. Бу тўғрида Зайнабга яна савол ташлаб тафсилот олишдан қўрқди ҳам узоқ ўтиrolмади. Чойини наридан-бери ичиб, ўрнини тўшатиб ётди. Зайнаб шамни ўчирди. Ҳали ётмоқ-

қа вақт эрта эди, Зайнаб Кумушнинг уйига — хотинлар олдига чиқиб кетди.

Отабек ухлаш учун ётган бўлса ҳам ҳалиги гап уни кўз юмдирмай қўйди, ўнг, сўл, чалқанча ётиб боқар эди. Лекин Зайнабнинг — «қийналиш ҳам гапми?» жумласи қулоғи остидан кетмас эди... Кумушнинг уйидан кети узулмай келиб турган хотинларнинг гўнғир-гўнғири ҳам унинг уйқусига халал берар ва ора-чора гўдакнинг йиғлаган товуши ҳам эши билар эди. Бу маъсум товушга қарши унда бир хил яқинлик — оталик ҳисси қўзғалгандек бўлса ҳам, аммо бошқа қора хаёллар ичida тез йўқолур эди. Шу йўсун ивир-чивир, аччиғ ва сучук ҳолат ичидаги ухлаб кетди. Бир-икки кун миёна-сидаги кечинмалар турли ранг билан уйқули димогидаги акслана бошладилар. Чўчиб уйғонди... Ёнида Кумуш... Зайнаб йўқ эди. Уйқули кўзи билан нариги уйга қулоқ солди, ҳануз бояги товушни эши билар ва ўнг ёнини босиб кўрпага бурканди, бундан кейин тинч ухлаб кетди...

Туш кўрар эди: «Чаманда гуллар очилган эмиш... Бу гулшан унинг ўзиники эмиш... У ранго-ранг чечаклардан кўзини ололмас эмиш... Теваракка келган ёвдан хавф бор эмиш... Ханжарини ушлаб ёвга қарши чиқсан эмиш... Ёв қочган эмиш... Ёв орасида онаси ҳам бор, отаси ҳам кўринар эмиш... Қайтиб чаманга кирса бир сигир гулни босиб, янчиб ўтлаб юрган эмиш... Бу ҳолда ўзини унугланган ва қўлидаги ханжари билан сигирга юргурган эмиш... Сигир эмас — сариқ сочли алрасти эмиш... Дармонсизланган ва ханжари қўлидан тушган эмиш... Дунёни қоронгулик босган эмиш...» — чўчиб уйғонди ва ўз ёнида ухлаб ётган Зайнабни кўрди. Ҳалиги босинқирашдан юраги гуп-гуп урар ва вужудини тер босган эди. Секингина ўнг ёнига ағдарилиб ҳовли томонга қараб ётди. Унинг ағдарилиши билан Зайнабнинг кўзи оҳистагина очилиб яна ёпилиди.

Вақт саҳарга яқин, теваракдаги хўрозлар кетма-кет қичқирап эдилар. Яқин орадаги обжувоз пойкўпининг зарби ерни силкитиб-силкитиб тўлқин берар эди. Нариги уйда ёниб ётган шам нури дарича тирқишидан милт-милт кўзга илинур, аммо шип этган товуши эши-тилмас эди. У қайтиб ухлаёлмади. Кечаги қийналиш тўғрисида хаёлланиб кетди. Субҳазони айтилиб, секин-секин тонг ёриб борди. Маҳалла масжиидидан ҳам аzon товуши келгач, у таҳорат олмоқ учун қўзғалди.

Кумушнинг ёнига кириш қулай бўлсин, деб нонуштани Зайнабнинг уйида қилди. Ўзбек ойим тарафидан кириш учун рухсат берилган эди. Чойдан кейин дояча Кумуш ёнидан бир оз вақтга чиқиб турди. Гўрга Кумуш ётқизилган, унинг оёғи томонида Ўзбек ойим чақалоқни кўтариб ўтирган эди. Отабек кирганда ўзининг синикқан юзи, ичкарига ботинқираган кўзи билан Кумуш илжайиб унга қаради. Отабек тутилинқираброқ «муборак бўлсин!» деди. Кумуш жавоб ўрнига уялиб, юзини кўрпага яшириди. Ўзбек ойим:

— Берганга қуллуғ бўлсин, ўлтири! — деди.

Отабек Кумушнинг бош томонига ўтириди. Ўзбек ойим фотиха ўқиди. Сўнгра чақалоқни Отабекка яқинлаштириб:

— Тойчогимнинг кўрманасини чиқар, дадаси! — деди. Отабек қизариб болага қаради, Кумуш юзини яна кўрпага яшириб олди.

— Ўзингиз тузукмисиз?

— Шукур...

— Қийналибсиз деб эшилдим...

— Туғмоқ ҳазилми, сенга! — деди Ўзбек ойим, Кумуш Отабекни ўзига имлади ва қулогига шивирлади:— «Сизнинг гуноҳингизга...»

— Хўрак қилдингизми?

Ўзбек ойим:

— Кечадан бери ичига иссиғ киргани йўқ. Зайнабга айтай, сутлик атала қилиб берсин! — деди.

— Албатта! — деди Отабек ва онасига бир тилла севинчи бергандан сўнг хотиржамлик билан уйдан чиқди.

Тушлиқдан кейин Отабек меҳмонхонада китоб мустолаа килур, даҳлизда Ҳасанали узилган от асбобларини улаб тикар, ҳожи масжидгами, бошқагами кетган эди. Шу вақтда ичкаридан Ойбодоқ чиқиб Отабек ёнига келди:

— Бек, сиз уйга кириб чиқар эмишсиз,— деди.

Отабек китобни белгилик қилиб ёпди:

— Тинчликми?

— Тинчлик... дарров киринг-чи!

Отабек Ойбодоқ билан кетма-кет ичкарига кирди. Зайнаб ранги ўчган ҳолда Кумушнинг уйидан чиқиб келар эди.

— Нима гап? — деб ундан сўради Отабек.

— Билмадим,— деди,— опам кўнгиллари айнаб қусяптилар...

Отабек эшик ёнига келгандан сўнг уйдан бир неча хотин паранжи ёпиниб чиқдилар-да, у уйга кирди. Ўзбек ойим жом ушлаган, Кумуш жомга ўқчиб қусар эди.

— Нима бўлди?

Кумуш жавоб беролмади.

— Билмадим, боятдан бери тўхтовсиз қусяпти,— деди Ўзбек ойим. Қусиб чарчаган Кумуш ҳолсизланиб бошини ёстиқقا ташлади. Ўқчиб ёшланган кўзлари билан эрига қараб олди.

— Ёқмайдиган хўрак бергансиз!

— Ёқмайдиган ҳеч нарса егани йўқ,— деди онаси.— Ўша аталадан бошқа хўрак қилмади. Ундан ҳам ярим косагина ичди. Қолгани ана, токчада...

Ўзбек ойимнинг гапи тугамасдан Кумуш яна жомга интилди. Отабек унинг бошини тутди.

— Табиб айтдирайми?

— Айтдир. Менинг ҳам кўнглимга шу келиб турған эди.

Отабек Кумушнинг қусуғи битгунча турди-да; сўнгра югуриб ташқарига чиқди. Ҳасанали ҳануз бояғишида эди.

— Ота, сиз югуриб табибга боринг-чи!

Ҳасанали ишини ташлади:

— Нима гап?

— Келинингиз боядан бери қусар эмиш.

Ҳасанали табибга югурди. Отабек қайтиб уйга кирди. Чақалоқни Зайнаб кўтарган, Кумуш ҳамон қусмоқда... Кумуш ҳолсизланиб ўзини ёстиқقا олди. Қовоқ осталари кўкарган, ёнига келган Отабекка ҳам қарамоқ-қа мажолсиз эди.

— Тузукмисиз?

— Кўнглим...

Отабекнинг ҳамма бадани титраб кетди, шундай бўлса ҳам ўзини қаттиқ ушлади:

— Қатиқ ичириб кўрдингизми? — деди онасига.

— Йўқ.

— Қатиқ буюринг!

Ойбодоқ қатиқ келтиргунча Кумуш яна жомга интилди. Бир-икки ўқчиб қусгандан кейин, Отабекнинг қўлидаги сув билан оғзини чайди ва пиёладаги қатиқ-

дан бир-икки ҳўплаб, ўзини ёстиққа ташлади. Ҳарорати кучли, юрак уриши фавқулодда тез эди. Отабек унинг манглайини қўли билан босиб ушлаган эди, бир оз тинчигандек бўлди. Ўзбек ойим бурчакда бола кўтариб ўтирган Зайнабдан чақалоқни олиб, уни жомни тўкиб келишга буюрди. Отабекнинг манглайдаги турган қўли қизиб кетиб, иккинчи қўлини алмаштиришга мажбур бўлди. Манглайдаги совуқлик ҳис этиб Кумуш қўзини очди.

— Кўнглингиз босилдими?

Кумуш жавоб ўрнида ёстиқдан қўзғалди. Жомийўқ эди. Отабек шопиб токчадаги хитойи норин товоқни олди. Кумуш қусди. Бу гал қусуқ бояги қатиқ аралаш кўқимтил ва сарғимтил нарсалар эди. Оғзини чайқагандан кейин Отабек қатиқни таклиф қилган эди, ичмади ва ўзини ёстиққа отди...

Табиб келди хабарини эшишиб, Отабек жонлангандаек бўлди. Уй эшигига жом кўтариб келган Зайнаб кейинга қайтди. Ўзбек ойим ҳам чақалоқни кўгариб уйдан чиқди. Отабек табибининг хурматига туришни унутиб Кумушнинг манглайини босганча ўтирас эди. Табиб Отабекдан воқиани сўраб билгандан сўнг, Кумушнинг томирини кўриб лабини тишлаб қолди ва товоқдаги қусуқни ҳидлаб қаради:

— Бугун нима хўрак қилган экан?

— Атала.

— Ўша таомдан бир оз қолгани бормикин?

— Бор! — деди Отабек ва боя онаси кўрсатган жойдан косани олиб табиб қўлига берди. Табиб косадан бармоғига бир оз илаштириб ялади ва дарров туфлаб ташлади.

— Заҳар ичибди!

Отабек сапчиб кетди, тузи қўрқинч ҳолга кирган эди...

— Бекор гап!

Табиб Отабекнинг ҳозирги ҳолатидан даҳшатта келди...

— Мен ҳозир дафъи учун дори юбораман,— деди ва қўзғалди. Отабек ҳам унинг билан биргалашив ўрнидан турди:

— Заҳарни ким берди?

Нима дейишга ҳам ҳайрон табиб:

— Мен... Мен... Ўзингиз ўйлаб кўринг-чи... Мен дарров дори юборай, дарров ичириинг, тузукми? — деди.

— Билдим, билдим! — деди бечора Отабек.— Зайнаб, Зайнаб, Зайнаб... Ифлос! Юборинг, юборинг, дарров юборинг!

Табиб кетди, Отабек телбаларча югуриб Кумушнинг бошига келди, юзини очиб манглайнин босди ва ўпди... Кумуш кўзини очиб куч билан сўл қўлини эрининг елкасига ташлади... Қўлида чақалоқ билан Ўзбек ойим кирди.

— Зайнабни чақир, Зайнабни!!

Ўзбек ойим табиб сўзидан хабардор эди:

— Зайнаб! Зайнаб!

Зайнаб югуриб уйга кирди. Туси мурдадек оқарган эди. Отабек Кумушни кўйиб ердаги аталани олди:

— Ич муни, ич, жалаб!

Зайнаб орқасига тисланди... Отабек косани унга отди... Зайнабнинг кийими атала билан беланди. Шунинг устига даҳлиздан Юсуфбек ҳожи кўринди.

— Кет ифлос, кет! Талоқсан, талоқ!

«Талоқ!» сўзини эшитган Кумушнинг кўзи ярқ этиб очилиб, яна юмилди... Ҳожи воқиани табибдан эшитган, шунинг учун ҳозирги фожиа сахнасида ажабланиб турмади.

— Чик, Зайнаб, чик,— деди у ҳам.— Лаънат сендек хотинга!

Зайнаб четланиб уйдан чиқди... Ҳожи Кумушнинг бошига келиб ўтирди. Отабек ва онаси оёғ устида эдилар, Кумушнинг кўзи юмуқ, соchlари юзи устида паришон эди. Ҳожи ўз қўли билан соchlарини тузатиб Кумушнинг кўкимтил товланган юзини кўрди ва манглайнин босди...

— Ойим... Ойим!..— деди ҳожи. Кумуш кўзини очиб бесаранжом унга назар ташлади ва таниб... қўзғалмоқчи бўлди.

— Қўзғалманг, ойим... қўзғалманг!

Кумушнинг кўз ёши чеккасидан оқиб тушди... Ҳожи ҳам ўзини тўхтатолмай, Кумушнинг ёшини артиб, бошини силади:

— Худо шифо берар, болам!

Кумуш жомга қўзғалди, Отабек келиб қўлтиқлади, ҳожи ҳам унинг бошини тутди... Бу гал қусуқ қонга айланган эди, бурнидан ҳам бир неча томчи қон оқди...

Қусиб ётгач, кўзи ярқиллаб очилиб кетди ва теварагига бетоқат қаради:

— Ойи... дада... — сўнгра,— бегим! — деб ингради... Эрининг юзини юзига қўйди, уялгансимон кўзини юмди...

* * *

Эртаси кун дағи маросими бўлди. Жанозага Тошкентнинг ҳар бир маҳалласидан деярли кишилар иштирок қилди. Faқат мақтуланинг энг яқинларигина бу тантанага етиб келолмадилар.

Бечора она, бечора ота!..

Учинчи кун улар ҳам келиб етдилар... Уларнинг ҳозирги ҳолини тасвир этиш мумкинми?!

Еттинчи кун хатми қуръон қилиниб ҳалққа ош берилди ва шу муносабат билан чақалоққа «Ёдгорбек» деб исм қўйилди.

Кумушнинг яқинларигина эмас, балки фожиадан хабардор бўлған шаҳарнинг катта-кичиги Зайнабга бериладирган жазони эрта-кеч кутмакда эдилар. Бироқ фожианинг ўнинчи кунларида Зайнабнинг жинни бўлиб, очиқ кўйи кучада юрган хабари ва оғаси томонидан ушланиб кишанга солинган можароси эшитилди. Зайнабнинг жунуни қозилар ва табиблар тарафидан ҳам тасдиқ этилгач, унинг устидаги жазо кўтарилди. Дарҳақиқат ақлдан озиб кўчаларда очиқ кезиш ва кишанга тушишнинг ўзи ҳам Зайнаб учун кичкина жазо ҳисобланмас эди.


Фожианинг йигирманчи кунида яна хатми қуръон қилиниб, бутун юрга ош берилгандан сўнг, бечора болу паридан айрилганлар Марғилонга қайтиш ҳаракатига тушдилар. Ёдгорбек ҳам Офтоб ойимнинг қучоғида кетмакчи, унинг олиб кетилишига қарши ҳеч ким йўқ эди.

Энг кейинги видслашиб куни етди. Отабек, Мирзакарим қутидор ва Офтоб ойим (...) қабристоннинг икки туп қуриган чинор ёғочи орасига турғизилган янги хиштин соғона қаршисида тўхтадилар. Соғонанинг ўнг бошидаги тошдан ўйиб ясалган лавҳа кўзга чақилиб турар эди: (**383-бетдаги лавҳага қаралсин**).

Бечора она чидолмади, қабрни қучоқлаб уввос тортди. Отабек ҳам қабр ёнига тиз чўкиб, кўз ёши билан тупроқни лой қила берди... Кутидор лавҳа қаршисида эди. Лавҳани ўқиб чиққандан кейин у ҳам пиқ-пиқ

لاَ إِلَهَ إِلَّا اللَّهُ وَمُحَمَّدٌ رَسُولُ اللَّهِ
 هَذِهِ الْمَقْدِدَةُ الْمُنْوَرَةُ الْمَظْلُوَّةُ
 الْمَشْهُورَةُ الْمَغْفِرَةُ
 كَرْمَشُبِي بِنْتُ مِيزَارِكَرِيمٍ مِرْغَنْفَانِ
 تَارِيخُ تَوْلِكَاه١٢٤٨ دَفَّاقَتْ شَهَادَةُ هُجْرَى جَادَهَا الْأَوَّلُ

بِالْوَهْمِ هُرَادَاهَ دَوْنَ كَسْكَنْ كَنْجَلَاهَ يَادَ كَارَاهَ



شَهَادَةُ مِيزَارِكَرِيمٍ كَرْمَشُبِي بِنْتُ مِيزَارِكَرِيمٍ

Кумушбиби бинти Мирзакарим Мариноний, тарихи таваллуди
 1248, вафоти 1269 йил ҳижрий, жумод-ул-аввал.

Бу лавҳа бир дилпорадан ҳусн санамига ёдгордир.
 Бунда мадфун кундош балосининг намоён бир қурбонидир.

Аё чарх, этдинг ортуқ жабр бунёд,
 Кўзим ёшлиг, тилимда қолди фарёд.
 Ҳаётим лолазоридин аюрдинг,
 Ёқиб жоним, кулим кўкка совурдинг.

йиглаб юборди. Ярим соат чамаси шу ҳолда қолдилар. Қуръон ўқишга ҳеч кимда мажол йўқ эди. Қаршидаги бинога Юсуфбек ҳожи тарафидан қўйилган қори буларнинг ҳолига тушунди. Секин-секин қорихонадан чиқиб келди ва нарица ўтириб қуръон ўқиди. Офтоб ойимнинг ноласи босилса ҳам, лекин кўз ёши тийилмади. Бир улгина эмас, ановлар ҳам шу ҳолда эдилар. Фотиҳа тортилгандан сўнг, қутидор ва Офтоб ойим қорига пул бердилар. Қори кетгандан кейин ҳар қайсилари ўзларини босиб алоҳида-алоҳида қуръон ўқиб бағишлидилар, сўнгра оҳиста-оҳиста йўл олиб қабр билан видолашдилар. Гўё Кумуш «мендан рози бўлинг!..» деб снасига хитоб қилас, Офтоб ойим орқасига қарай-қарай йиглаб келар эди...

Отабек уларни уйга қўйиб, яна қабр ёнига келди ва туни билан шунда қолди. Эрта билан Ҳасанали аравани қўшиб тайёрлаган, майда-чуйда аравага ташилар эди. Энг кейинда Офтоб ойим Кумушнинг кийимлари билан Ёдгорбекни кўтариб чиқди, кейинроқ Юсуфбек ҳожи билан қутидор кўриндилар. Қутидор видолашиб аравага чиқсанда кўча тарафдан Отабек кела берди, келиб отнинг жиловини ушлади ва от устига минганд Ҳасаналига, «тушинг отдан!» деди. Ҳасанали отдан тушди. Отабек иргиб отга минди ва қутидордан сўради:

— Отни ҳайдайми?

Қутидор билан ҳожи тушунолмай бир-бирларига қарашдилар. Йўлакда турган Ўзбек ойим дарбозадан мўралаб қўйди. Қутидор индамагани учун Отабек отни ўзича ҳайдаб юборди.

— Хайр! Ҳўш!

Марғilonга жўнайдиган Ҳасанали гангигб кўчанинг ўртасидан ҳожига қаради. Ҳожи йўлакдаги ойимга ер остидан кўз қирини ташлади... Отабек ортига қарамасдан аравани ҳайдар эди...

Бир йилдан сўнг Отабек уста Олим билан бирга Тошкент келди. Ҳожи ва Ўзбек ойим оғиз очиб ундан ранжий олмадилар. У меҳмонлар каби эди. Отаси ва

онаси билан очилиб сўзлапшмади. Уста Олим билан бир ҳафта чамаси Тошкентда туриб, энг сўнгги кеч ёлғиз кўйи Кумуш қабри ёнида бўлди. Кеча ойдин, қабристон тип-тинч, узоқроқдан қуръон товуши эшигилар эди. Икки туп чинор бутоқларида қўниб ўтирган уч-тўртта бойқушлар, қабр ёнига тизланган Отабек ва юқори, қуйи дўмбайган қабрлар бу тиловотга сомиъ каби эдилар. Қуръон оётлари қабристон ичида оғир оҳангда оқар эди. Қабр ёнига тиз чўккан йигитнинг кўз ёшлиари ҳам куръон оётларига қўшилишиб оқар эди. Бирор соатдан кейин тиловот тўхталди. Отабек ҳолсизланниб оёқ узра турди ва орқасидаги ярим ялангоч кўлагани кўриб, бир неча қадам қабр томонга тисланди...

Кўлага ялингансимон унга яқин юриб келди...

— Ким бу?

— Мен Кумуш!..

Отабек товуш эгасини таниди. Бу мажнуна Зайнаб эди.

— Кет мундан!

— Мен Кумуш!..— деди яна Зайнаб, аммо кетмай иложи қолмади. Зероки, дунёдаги энг яқин кишиси унга «кет!» амрини берган эди. Зайнаб орқасига қарай-қарай Отабекдан узоқлашди. Отабек қайтиб унга қарамади, қабр ёнига тиз чўқди...

Эртаси кун Ўзбек ойим йиглай-йиглай Ёдгорбек учун тикдирган кийимларини ўғлига топширди. Отабек уста Олим билан бирга Марғилонга жўнади. Бундан сўнг Отабек Тошкентга қайтиб келмади, бир неча қайта Ўзбек ойимнинг ўзи Марғилон бориб келди.

1277 йилнинг куз кезларида бўлса керак, Юсуфбек ҳожи Қаноатшоҳдан бир хат олди, Қаноатшоҳ Авлиё отадан ёзар эди:

«Ўғлингиз Отабек яна бир киши билан бизнинг қўшинда эди. Авлиё ота устидаги чор аскарлари билан тўқнашишимизда биринчи сафимизни шу икки йигит олди ва қаҳрамонона урушиб шаҳид бўлди. Мен ўз қўним билан иккисини дафн этдим...»

Юсуфбек ҳожи хатми қуръон қилиб юртга ош берди, Ўзбек ойим қора кийиб таъзия очди.

Битди.

ЕЗУВЧИДАН

Кейинги Марғилон боришимда яқин ўртоқлардан Ёдгорбек тўғрисини суриштириб билдим: Ёдгорбек ушбу асрнинг ўн тўққиз ва йигирманчи очлик йиллари миёнасида вафот қилиб, ундан икки ўғил қолибдир. Ўғилларидан биттаси бу кунда Марғилоннинг масъул ишчиларидан бўлиб, иккинчиси Фарғона босмачилари орасида экан. Бу кунда ному нишонсиз, ўлик-тириги маълум эмас, дейдилар.

ЙИРИК САНЪАТКОРНИНГ ТҮНГИЧ РОМАНИ

Мазкур китоб улкан ёзувчи Абдулла Қодирий (Жулқунбай) ва умуман, ўзбек прозасининг түнгич реалистик романидир. У адидининг биринчи йирик асари бўлишига қарамасдан, зўр маҳорат билан ёзилган. Асарни қўлингизга олиб, ўқий бошлашингиз билан сизни аста-секин «Ўтган кунлар», яъни ўтган XIX аср ўрталарида содир бўлгали воқеалар ичига олиб кириб кетади. Китобнинг дастлабки бобларида Қўқон хонлигининг сўнгги ҳукмдори Худоёрхон салтанати замонида савдо иши билан Тошкентдан Марғилонга сафар қилган ёш йигит Отабекнинг ҳаёти, унинг кўнглидан ва бошидан кечиргандари хикоя қилилади. Отабекнинг ўй-мулоҳазалари, ҳис-туйгулари, унинг гўзал Кумушни севиб қолиши ва икки ёш қалбнинг соф муҳаббати сизни тўлқинлантириб, завқу шавқингизни уйготади. инсоний эзгу туйгулар руҳингизни кўгаради.

Аммо автор фақат омади юришиб кетган, хушбахт ошиқ ва мәъшуқа, ё эса ота-она зулми туфайли ёр висолига етолмай энтиқкан баҳти қаро йигит ба қизнинг юрак сирларини, шодлик ва аламларни таъсирили қилиб тасвирлаш билан чекланса эди, унинг романни бир талай ўртамиёна сентиментал қиссалардан бирни бўлиб қолар эди. Ваҳдоланки, воқеалар бобма-боб, бўлимма-бўлиб ривожлантирилиб, севги тарихи «ижтимоий» изга киритилади: эндиғина покиза орзусига етгән ёшлар жиҳдий социал тўсиқларга учрайдилар. Муаллиф Отабек билан бирга ёки уни бир жойда қолдириб қўйиб, чақимчилик уясига, Марғилои ҳокими — Қушбеги ўрдасига, Тошкент қамалига, исёйлар майдонига, кўз кўрмаган, қулоқ эшитмаган қирғин аросатига, Қўқонга — Худоёрхоннинг истибод маҳкамасига, Ташкент ҳокимиининг оталини Юсуфбек ҳожи ҳузурига, чиркин урф-одатлар ва оиласиний бидъатлар ичига, баҳти очилмаган косиб уста Олим кулбасига, қанчадан-қанча хиёнат ва фитналар ўчогига, кундошлар мөжаросига ва ниҳоят, қаҳрамонларининг фожиасига етаклаб боради. Севишганлар хонлик тузумининг иғвогарлик, қотиллик ва қон хидлари билан тўла муҳити гирдобига тушиб. ўқтин-ўқтин бўғиладилар; феодал-патриархал оила истибодининг кир панжалари орасида димиқадилар. Уларнинг қисқа мурдатли баҳти, дил қувончлари би-

рин-кетин барбод бўлади. Китобхон қалбини истар-истамас даҳшаг қамраб олади. Ёшини яшаб, дарди бедавога чалинган, туб томиридан чириган хонликнинг ижтимоий иллатлари, фожия манзаралари тобора ўзинг кўз ўнгиде намоён бўлиб, кўксини қисади, нафрат ва газаб, алам ва изтироб ҳисларини жунбушига келтиради. Ёзувчи бунга шахсларни тўлиқ ва атрофлича индивидуаллаштириб тасвирлаш, уларнинг характеристери ва тақдирни социал муҳитга, ижтимоий муносабатларга боғлиқлигини акс эттириш, характеристлар ҳаракати орқали конкрет-тарихий воқелик (хонлик тузумининг таанглиги ва инқизори)нинг муҳим томонларини ифодалаш, ижобий қаҳрамонларнинг интилишлари йўлида ду‘ келган ҳар бир ижтимоий гуруҳ вакилини, ҳар бир шахсни ҳеч қандай юз-хотири қиласдан рўйност рўйсатиши, мавжуд феодал-патриархал ахлоқ ва урф-одатларини аёвсиз фош этиш йўли билан эришиди.

Ҳаётни ҳаққоний тасвирлаш принципларини чинзакам гўзаллик даражасига кўргарган «Ўтган кунлар» романининг эълон қилинганига кирк йилдан ошиди. Унинг биринчи бўлими алоҳида китоб ҳолида 1925 йилда, иккинчи ва учинчи бўлимлари 1926 йилда нашр этилган эди. Абдулла Қодирийнинг ўғли Ҳабибулла Қодирийнинг айтишича: «Ўтган кунлар» романини яратиш фикри... 1919—1920 йилларда тутғилган бўлса ҳам, ёзишга 1922 йиллардан киришган, 1925 йилнинг охиirlарида тутгатган». («Шарқ Юлдузи», 1965, № 11, 223-бет.)

Абдулла Қодирий «Ўтган кунлар» ни яратишга қадар, талай ҳаётни ва ижодий йўлини босиб ўтди. У 1894 йил 10-апрелда Тошкентда боғдор оиласида дунёга кеди. Унинг отаси ёшлигида савдо-сотиқ ишларига аралашган бўлса-да, омади юршишмай, боғдорлик-дэҳқончилик касбига ўтган. «Бошида бой оиласда тутғилдимми ёки камбагал оиласами, албатта, билмадим,— деб ёзади А. Қодирий ўз автобиографиясида.— Аммо ёшим 7-8 га етгач, қорним ошга тўймаганидан, устим тузукроқ кийим кўрмаганидан, аниқ билдимки, беш жоннинг томоғи фақат 80 ёшлик бир чол отамнинг меҳнатидан, 1300 саржин боғнинг ёзда етишириб берадиган ҳосилидан келар экан».

Улур Октябрь социалистик революциясидан илгарилар мана шу меҳнаткаш оиласда яшаган ёш Абдулла анча қийин турмушни бошидан ўтказди. У дурадгорлик («тоқиҷилик») ҳам қидаи, бойларнинг қўлида малай, кейин миরза (секретарь) ва приказчик бўлиб ҳам ишилади, эски усолдаги мактабда ҳам, «русско-туземная школа»да ҳам, эски мадрасада ҳам ўқиб, маълумотини ва ҳаёт тажрибасини ортириди. Ҳар хил мактабда ўқиб, ҳар хил хизмат шароити 15 ёшидан шеър ва ҳикоя ёза бошлаган ҳаваскор ёзувчининг илк ижодига ўз таъсирини кўрсатмасдан қўймади. Унинг «Садойи Туркистон», «Самарқанд» газеталари, «Ойина» журнали каби жадид вақти матбуотида босилган асарлари (1913—1914 йиллар), жумладан, «Аҳволимиз» ва «Миллатимга» номли шеърлари жадид-буржуя маърифат-парварлиги руҳида ёзилган эди. Аммо у ҳеч қаҷон Октябрь революциясидан аввал ҳам, кейин ҳам буржуя миллатчиларнинг реакцион сиёсий қараашларини ҳимоя қилган эмас. Ёш ёзувчи илмсизлик оқибатида «ёмон» фарзандлар етишиши ва ахлоқсизликлар келиб чиқишини тасвирлаб, жамиятга ўқимишли, ахлоқли, «яҳши» кишилар кераклигини ўқтирмоқчи бўлди. 1915-йилда чоп этилган «Жувонбоз» ҳикоясида илмсизлик, жаҳолат орқасида отасининг бойлигипи совуриб, бузуқилик ва жиноят йўлига кириб кетган бойвачча саргузашти

ҳикоя қилиниб, «ёмон» мисолни кўрсатиш билан «ахлоқни тузатиш» мақсад қилиб олинди.

А. Қодирий «Баҳтсиз куёв» (1915) драмасида ижарага қарз кўтариб уйланган бой хизматкори Солиҳ исмли етим йигитнинг қарзини тўлолмай ҳовли-жойи ва бор буди шудидан ажralиши ва ёш эру хотининг ўз-ўзларини ўлдиришга мажбур бўлишларини тасвиirlади. «1913 йилларда чиқсан «Падаркүш» пьесаси таъсирида «Баҳтсиз куёв» деган театр китоби ёзил юборганимни ўзим ҳам пайқамай қолдим», деб тан олади А. Қодирий автобиографиясида. Лекин «Баҳтсиз куёв» драмасининг мазмунидан кўриниб турибдики, унда эскича урф одатларнинг ярамаслиги темаси кўпгина жадид ёзувчиларини қараганда ҳам кенгайтирилган, демократик талабларнинг баъзи элементлари ўз акси садосини топган: ёзувчи камбагал бир хизматкорининг баҳтсизлигини кўрсатишга тиришган. Бироқ фожианинг сабабини очиши иятида асарга янги фикрли элликбоши образи киритилаб, у ўта муҳофазакор домла-имомга қарши қўйилади ва унинг ибратомиз ватъ-насиҳатида ортиқча тўй харажатларини, кераксиз олиқ-солиқларни «шаронит йўл-йўриқлари»га мувоғлиқ ислоҳ қилиш фикри илгари сурилади.

А. Қодирий ижоди гоявий жиҳатдан ҳам, маҳорат жиҳатдан ҳам тез ўсади. «Улоқда» ҳикояси (1916 йил) унинг революция арафалиридаги ижодиёқ ҳалқа жуда яқинлашганидан далолат беради. Энди ишкада хос бўлган қуруқ дидактика, ясамалик, илм-маърифатга бўлган интилишни, жаҳолат ва бидъатларга бўлган нафратни зўрлаб (жабран) образ ичига олиб кириш тенденцияси барҳам топа бошлияди. Ёзувчининг эскирган маросимлар ва одатларни тасвиirlаш усули янгиланади, бир босқич юқори кўтарилади. Ҳалқнинг майший ҳаётини картиналарини танлаш олишнинг ўзи ва «қаҳрамон» кайфиятининг сифати китобхон иродаси ва туйгуларини турмуш ҳодисасига тақиди карашига йўналтирилади. «Улоқда» ҳикоясида тасвиirlangan ёхеалар жуда табиий, турмушта монанд. Авторнинг қаравши, «ташвиқоти» образ қобигини ёриб, қалқиб чиқиб турмайди. Асарда улоқка ишқибоз 12 яшар ўсмир боланинг улоқ томошасига бориши тараддуди ва уни кўришдаги шавқу завқи кўнгилсиз ҳодиса билан — бир кишини от босиши ва унинг ўлими билан тугайди. Улоқ томошаси билан унинг хафагазак оқибати ўртасидаги конграстда номаъкул маросимларга бўлган иорозилик кайфияти сингдирилган.

Зотан, «Улоқда» асари ёзилган пайтда А. Қодирийда маънавий, фикрий уйгониши бошланган эди. «Айниқса 1916 йил рабочий олиш масаласи бошлангандан кейин,— деб эътироф этади А. Қодирий,— умуман, Туркистон ишчиларида уйгонган истибоддога нафрат менда ҳам кучли эди».

1917 йил февраль инқилобидан сўнг А. Қодирий ижтимоий ташкилотлар ишига аралаша бошлияди. Бу вақтда у ҳалқ милицииясида кўнгилли бўлиб ёзилади, Тошкент эски шаҳарида очилган озиқ-овқат комитетида миrzалик қиласи. Лекин «шу чоққача мен ўзимда бирорста сиёсий фирмага мансубият, ёки яқинлик ҳис этмас эдим,— дейди А. Қодирий.

А. Қодирийнинг чинакам онгли турмуши ва активлиги фақат Октябрь революциясидан кейин бошланди ва ижодига зўр таъсир кўрсатди. У Исмоил Одилов номли масъул хизматчи, коммунист билан танишиб, Эски шаҳар ишчилари ўртасида Совет ва партия топшириқларини бажаришга киришади: бинокорлар уюшмасида ижтимоий-маданий ишларни олиб боради, уламо ва бўйларга қарши

айрим хитобнома ва ишчиларни ташкилотга чақириб тарғиботномалар ёзди. 1918 йилдан озиқ-овқат комитетининг ишида ва у тарқатган варақаларини ёзиша қатнашади. 1920 йилдан касабалар шўросида котиблик вазифасини бажарди ва касабачилар ҳаракатини матбуот орқали пропаганда қилиб турди. «РОСТА» деворий (босма) газетасида мұхабир бўлди. Шу равишча, у Октябрь революциясининг чинакам ҳалқчил мөхиятини тушуниб, ўз ҳаёти ва ижодини совет тузуми билан боғлади. У революциядан кейин бирин-кетин тутгилган вакъти матбуот — «Иштирокион» (1918—1920), «Қизил Байроқ» (1920—1922), «Туркистон» (1922—24) газеталари, «Инқи lob», «Билим ўчоги», «Коммунист йўлдоши» журнallарида қатнашиб, гоявий чиниқиб, қаламини ўтиклиштириб борди. Ёзувчи эскилик сарқитлари, хурофот, нодонлилк ва чапанилик урф-одатларини қоралаб, бир талай фельетон, ҳангома, ҳажвий ҳикоялар, публицистик мақолалар ёзди: «Қурбонлик ўғирлаб», «Маллабой билан Сайдвали орасида», «Хусусий мактублардан», «Бир чимдим билдириш», «Икки оғиз тариқатдан ҳам бўлсин», «Тинч иш» (1920), «Жинлар базми» (1921), «Отам ва большевик» (1922) шулар жумласидандир. У бир пардалик «Ҳеч ким биласин» деган комедия (1921) яратди. Шунингдек, роман, ҳикоя, театр, комедиялар яратиш зарурлиги ҳақида бир неча мақола ёзди.

А. Қодирий 1924 йилда билими ва ихтисосини ошириш ниятида бир йил Москвада В. Брюсов номидаги Олий адабиёт курсида ўқиб ҳам келди.

1923 йилдан бошлаб биринчи ўзбек сатирик журнали «Муштум»ни ташкил этган ташаббускорларида билан бўлди ва ҳамиша унинг саҳифаларида ўз талантли асарлари билан иштирок этиб турди ва ўзбек совет сатирасини ривожлантиришда кўзга кўринарли роль ўйнади. У кучли сатирик сифатида ўзини кўрсатди. Унинг маърифатпарварлиги, нур ва зиё талаблиги жаҳолат, эскилик ва мутасибликка қарши кескин норозилик томони билан намоён бўлди. Бунда у рўйирост, ошкора, табиии сатирик-танқидий приёмга мурожаат этди. Унинг тасвирида фош этувчи ҳажв етакчи ўринни эгаллади.

А. Қодирийнинг сатирик асарлари ичida «Муштум» журналида босилиб чиққан ва қатор ҳикоялар туркумидан ташкил топган «Калвак Махдумнинг хотира дафтаридан» ва «Тошпўлат тажанг нима дейди» дегая асарлари айниқса муҳимдир. Буларнинг биринчисида ёзувчи революциядан аввал ижтимоий ҳаётда катта ўрин тутган, революциядан кейин эса ўз мавқеини йўқотган ва янги турмуш қуришга тўсиқ бўлаётган руҳонийларни Калвак Махдум саргузашлари орқали фош қиласа, иккинчисида, революциядан сўнг ҳаётда ўзига жой топа олмай қолган текинхўр, безори ва такасалтант чапани Тошпўлат тажанг образи орқали ўтмиш сарқитларини сатира ўги билан куйдириб ташлайди. Бу образлар қиёфасида ҳалқ хўжалигини қайта тиклаш йилларида ҳали сақланиб турган, аммо жон аччиғида ўзини ҳар соҳага суқиб, иғво ва фисқу фасод тарқатган эскилик қолдиқлари янги ижобий ҳодисаларга дуч келиб, заҳарханда кулаги воситалари билан ўзларини-ўзлари фош этадилар, маънавий пучликларини рўйирост кўрсатадилар. Абдулла Қодирий сатирасида ёзувчи реализмининг муҳим хусусияти — ҳарактерлар ва типлар яратса билиш маҳорати яққол намоён бўлди.

Аммо Абдулла Қодирийнинг сатира ва юморида баъзан унинг реализмининг заиф томонлари кўриниб қолади. Масалан, ёзувчи «Масков ҳатлари», «Йигинди гаплар» деган ҳажвияларида якка-тасо-

дифий ҳодисалар ва шахслар устидан кулганда, натуралистик (холис) тақиқид йўлига кириб кетади, кулгининг асл гоявий-эстетик пафосини китобхонга сездиришни унутиб қўяди. Аммо А. Қодирийнинг айрим ҳажвий ва публицистик асарларида учрайдиган бундай «қокилишлар», 20-йиллар тақиқидчилиги нотўғри баҳолаганидек, асло ёзувчининг совет воқеалигига салбий позицияда бўлиши билан белгиланмасдан, балки ижодий изланиш ва сатиранинг жанр хусусиятини бирмунча жўн тушуниш, кулгуни «объективлаштириш», унинг зарбдор муштими ёлгиз «мустаор имзо» зиммасига юклашга уриниш натижасида келиб чиққан нуқсон эди. У «Йигинди гаплар» туфайли ёзган изоҳ-хатида мана шуни уқтиради: «...Кулгу мақоладаги (асардаги — Х. Ё.) мустаор имзо мақоланинг ҳаракатини аксар вақт ўз тарафига буриб юритадир.. Мақоланинг имзоси Овсар қўйилгән, демак, ундаги кўп таъбир, ифодалар овсарона — далиёнадир. Тентакни тентак тинглайдир деганидек, кулгуликдагина эмас, сажиевий адабиётта яқин турган кишилар бу мақолани шу нуқтадан қараб текширсалар, яна ҳам ҳақиқат очилади. Масалан, маним кулгуликада ишлатадиган печа турлук мустаор имзо, яъни қаҳрамонларим бор: Калвак Маҳдум, Тошпўлат тажанг, Овсар, Думбул, Шилгой ва бошқалар. Агар сиз, шу имзолар билан ёзилган кулгуликларни текшириб чиқсангиз, мунда асли ёзувчининг шахсини тамоман кўролмайсиз. Фақат сўзни имзо эгасининг ўз оғзидангина эшиласиз.. Мақолада ҳарна ёзиғоги бир «Овсар» тилидан, фақат ишчи-дехқон манфаати кузатилиб айтилган; ҳуқумат кишиларига бўлган гаплар ўртоқлик ҳазилин, шахсий мазоҳлар». Бу ўринда А. Қодирий «мустаор имзо» эгасининг ҳажвий образ яратищдаги ролини тўгри таъкидлагани ҳолда, сатирикнинг «Ўз пижоди устидан бўлган ҳукмронлиги» (Ф. Энгельс таъбири)ни анча камситади, авторни «мустаор имзо» соҳибини ўз аччиқ киноя билан идора этиб туриш вазифасида четлаштиришга уринади, ҳодисаларини холис «мустаор имзо» кўзи билангина кўришга ундаиди. Бу Абдулла Қодирийнинг реалистик ижодий методи тўқимасига натуралистик элементларининг сиалқиб кириши натижаси эди. Эскиллик картиналарини «холис» чизишига уриниш, кулгининг йўналициини маҳсус равишда маъкидлашнинг запфилиги «Масков хатлари», «Йигинди гаплар» каби асарларда автор сиймосининг аниқ кўринишига, унинг «актив куч» эканини, янги ҳаёт билан мустаҳкам ижодий алоқасини ёрқин кўрсатишга халал берди.

Зотан, А. Қодирийнинг ўзи «Калвак Маҳдумнинг хотира дафтари-дан», «Гошпўлат тажанг нима дейди» сингари кўпчилик ҳажвий асарларида ўзининг «мустаор имзо» назариясига зид ҳаракат қилди; заҳарханде кулгининг реакцион ижтимоий гурухлар афъоли ва хулк-авторини кескин фоши қилувчи, «куйдирувчи» табиатини муболагали раришда бўрттиради. Автор мана шу муболагага сингиб кетган ўтқир киноя, пичинг, кесатиглари билан мавжуд ҳолатнинг аксини, ижодий позициясини (инсоннинг маънавий-ахлоқий тозалиги ва гўзаллиги учун кураш идеалини) тасдиқлади. Шу ўйсида А. Қодирий ўзбек сатирасини юқори босқичга кўтарди, унинг реалистик негизлари мустаҳкамлани, тасвир объективининг ҳаётини ва ҳаққоний бўлишига алоҳида эътибор берди, образларни прототипларга максимал ўхшатишга, характерларни индивидуаллаштириш принципларини изчил амалга оширишга интиди, уларни типик шароитда кўрсатишнинг ўзига хос усулларини «кашф» этди.

«Ўтган кунлар» романи ҳам реалистик санъат яратни йўлидаги мана шундай ижодий изланиш самараси бўлиб майдонга келди. Ҳа-

қиқатан, автор «Ёзувчидан» деб асар бошида қайд этгапидек, у «янги замон романчилиги билан танишиш йўлида» бир тажриба эди. Аммо муаллиф камтарлик қилиб айтганидек, «кичик бир тажриба» эмас, балки фавқулода тажриба, ўзбек совет адабиётида йирик бир ҳодиса эди. Чунки ёзувчи «...янги даврнинг янгиликлари кетидан эргашиб, фақат «романчилик» яратиш соҳасида эмас, балки «халқимизни шу замоннинг «Тоҳир ва Зуҳра»лари, «Чор дарениш»лари, «Фарҳод ва Ширин» ва «Баҳром тўр»лари билан таништиришга» ўзида ички «мажбурият хис этди». У ўзбек алабиётида роман жанрининг шаклланиши ва такомиллашишгагина эмас, балки мазмунига ҳам катта янгилик киритди, адабиётнинг воқелик билан, халқ ҳаёти билан алоқасини, ушинг ижтимоий-тарбияйи ҳамиятини кўтарди. Тарихий материалга мурожаат, «малзумни мозийдан, яқин ўтган кунлардан, тарихимизнинг эрг кир, қора кунлари бўлган кейинги «хон замонлари»дан белгилаш» замонавий вазифаларга хизмат этди.

Ўрга Осиё республикаларида халқ хўжалиги социализм қуриш асосида қайта тиклалаётган, бу улкан вазифани муваффақиятли амалга ошириш учун миллый чегаралаш ўтказилаётган, хотин-қизлар озодлиги ва уларнинг эрқаклар билан тенг ҳукуқлилиги кескин қилиб қўйилган ийларда ёзилган бу романда бош қаҳрамоннинг оиласвий ҳаётга, муҳаббатга, хотин-қизларга муносабатини белгилаш пафоси ва юртилияг бирлиги учун қайғуриш пафоси замонавий аҳамиятга эга эди. Ёзувчи ўтмишнинг «энг кир, қора кунлари»да ҳам муҳаббат эркинлиги, социал адолат орзуси яшаб келганини ва бу хилда иштилишларнинг ижтимоий-тарихий ба миллий илдизларини топишга ҳаракат қиласди. Шунинг баробарида у роман марказига феодал тузуми («Хонлик замонлари»)нинг инқиroz даври учун характерли бўлган ҳодисаларни қўяди: оиласвий ҳаётдаги ярамас урф одатлардан тортиб чирик давлат идора системасигача барча эскирган анъанааларни, юртда бетиним ҳукм сурған истибод ва ўзаро қонли низоларни чизиб беради, ҳатто Россия таъсири остида жамиятда унда-буnda чақнаб кўринган «зиё»нинг зулмат қаърига тушиб дами қирқилишини яққол кўрсатади, XIX аср ўрталарида мавжуд вазиятини хаспўшламасдан, «худди ўзидек» тасвирлаб, тушкунликка юз тутган ўзбек феодал жамияти ишлатларини ҳаққоний очиб ташлайди. Адаб тасдиқловчи ва фоши қилувчи ниятларини бадиий гавдалантириш мақсадида асар бошларида диққатни сюжетнинг севгити-муҳаббат тармолига тортса, кейинроқ ҳарактер яратишининг исканичи жиҳатига — мамлакатнинг миллий тақдири проблемасига қаратади ва тобора сюжет чизинининг ҳар икки тармогини (гоҳ у, гоҳ бу гомониши биринчи планга чиқариб) бир-бирига узвий боғланнишда ривожлантиради. Аммо ҳар қалай Отабек ва Кумуш ўртасидаги баҳт-сизликлар юртга кўлка соглан зулматнинг талай оқибатларидан биря сифатида майдонга келади. Хайрли ишлар ташабbusкори Юсуфбек ҳожининг амаллараст, худком беклардан «туртки» ея-ея, охир чоғида мағлубиятга учраши ҳам, Отабек ҳаётидаги пайдар-пай баҳт-сизликлар ҳам ижтимоий адолатсизлик ва бебошликларнинг оқибати эканини тез пайқаб олиш қийин эмас. Уларнинг ижобий иштилишлари ҳам, зарбаларга йўлиқинлари ҳам ижтимоий муҳитнинг самараси каби тасвирланади. Шу сабабли улар ҳарактери ва ирова йўналишидаги мусбат мазият (мумтозлик)лар ва занфликлар ишонарли ва табиийдир. Россия маърифати билан, ундаги нисбатан маъқул бўлган хўжалик, сиёсий ва оиласвий тартиблар билан таниш Отабек (ва Юсуф ҳожи)нинг ўз юритда хила одилона йўл тутишга талпиниши,

хонлик ва беклик лавозимларига инсофли ва фуқаропарвар ҳоким қўйишини орзу ва ташвиқ қилиши, оилада эса эскирган таомиллардан, бидъатлардан юз ўтириши лозим топиши нақадар ўзини оқласа, уларнинг олиҳимматлари, нисбатан бўлса-да, тараққийларварларликларининг қўпол феодал манфаатпарамастлиги ва чирик анъаналар билан тўқнашиб, фожиага учраши ҳам шу қадар чин ва бадиий картиналарда изоҳлангандир.

Демак, «Ўтган кунлар» романининг дафъатан кўзга ташланиб турадиган реалистик қиммати шундаки, автор унда характерларининг ўз ички мантиқига ва типик шароитига мувофиқ табиий равишда ҳаракат қилишини биринчи планга қўйди, автор истаклари ва қарашларининг, гуманистик ва адолатпарварлик идеяларининг образлар тўқимасидан тошиб чиқиб кетмаслигига ёки алоҳида ҳолда яшамаслигига тўла риоя қилди. Асарда феодал тартиблари ва одатларининг норасо ва неболлигига танқидий муносабатда бўлиш етакчи ўринига кўтарилиди, ижобий ҳодисалар эса хонлик феодал тузуми, унинг идора усули ва ахлоқига қарши қўйилди. Бу қарши қўйища социал-слифий конфликтлар эмас, балки ҳоким синифларнинг ички емирилишини, таназзулини акс эттирадиган конфликтлар ўстириб борилди, конфликтларининг салбий тарафини реакцион, қора кучлар — Худоёрхон, Мусулмонқул, Азизбек, Ҳомид ва уларнинг шериклари, ижобий тарафини — Отабек, Юсуфбек ҳожи, Кумуш ва ҳоказолар ташкил этадилар. Ёрқин кучлар адолатсиз тузумнинг «тарихимизнинг энг кир, қора кучлари» бўлган сўнгти «хон замонлари» (А. Қодирий таъбири)нинг димиқтирувчи ва қонли муҳитида кучли ҳаракат қилишдан маҳрум этилган «ортиқча кишилар» бўлиб қоладилар, эса фожиали равишида ҳалок бўладилар. Чунончи, Отабек бошда ота-она орзуси ва розилигидан четда ўз истаги ва «эрки»га кўра (буни пайқаган фаросатли, зийрак Ҳасанали воситаси билан) севгани Кумуш висолига эришади, кейин эса йигит улар «орзуси»га таслим бўлади, иккинчи хотинга (Зайнабга) уйланади, қайта-қайта бунинг жабрини тортиб, тобора унинг муҳитига қаршилик кўрсатиш қобилияти сусяди, истар-истамас жасорат ва ҳаракати заифлашиб, муҳит оғушида сузинига мажбур бўлади; муҳитнинг ногаҳоний тўлқинлари жунбушига келиб, йигитни ўз гирдобига тортиб, қаттиқ чайқалтирган пайтларда эса у ўзини «ўнглаб олиш» билан банд бўлади. Романинг иккичи бўлимида Отабек Ҳомиднинг қалбаки хатлари туфайли Кумуш даргоҳидан қувилгандан сўнг, унинг «ота-она орзуси»га бирдан-бир норозилиги бўзахўрликка берилиши, Маргилон билан Тошкент орасида ҳуда-бехуда қатнаб бўзлашдан нари ўтмайди. Тўғри, Отабекнинг иродаси баъзан энг оғир говларни ёриб ўтиша ва бартараф қилишга қодир. Аммо бу турли-туман, ғалати ҳолатларининг қўққисдан чатишмаси натижасида рўй беради. Жумладан, Отабекнинг «Душанба кун кечаси» кўрсатган (отаси Юсуфбек ҳожига мақбул бўлмаган ва «қотиллик» дай туюлган) мардлиги бир жиҳатдан тасодифан, беихтиёр содир бўлади. Булар ҳаммаси А. Қодирийнинг қаҳрамон характери билан типик шароитнинг ўзаро муносабатини тасвирилаш маҳоратида муҳитнинг қаҳрамон иродаси ва тақдирига ҳал қилувчи таъсирини устун қилиб қўйганлигидан далолат беради. Қаҳрамон ҳамиша адабинг диққат марказида турса ҳам, лекин тарихий фон (хонлик инқизорзининг бадиий тасвири) характерни ҳаракати келтирувчи асосий омил бўлиб қолаверади. Характернинг муҳитига кўрсатадиган актив акс таъсири етарлича бадиий тадқиқ этилмайди. Отабекнинг муҳитига, «оқим»га қарши бориши мавруди билан, ҳатто ҳаёти

қўил устида турган кезларда ҳам ҳақ гапларни айтавериш билан чекланади ёки ташаббуснинг жиловини яқин кишилари (хизматкори Ҳасанали, отаси Юсуф ҳожи, онаси Ўзбек ойим)га топширишга кўнадики, бу персонажлар билан алоқадор сюжет ривожи ҳам охир пировардида, социал мұхитнинг маълум томонлари мазмунини ифодалайдилар. Адолатсиз мұхитнинг зарбали турткilarини ея бериб эсанкираган, ўжар, қаҳри қаттиқ воқеликнинг шиддатли қуюнига дучор бўлган Отабекнинг шахсий баҳти узил-кесил чилпарчин бўлади, умидсизликка тушади, унинг «покиза қалби»ни эзгу туйгулар билан тўлдирган Кумушнинг вафотидан кейинги ҳаёт эса йигит учун маъносиз туйилади ва у иختиёrsиз равишда рус қўшиниларига қарши урушда иштирок этиб, ҳалок бўлади.

Отабек дунё ишига ва тарихга қаттиқ бөгланган. Лекин у ҳали тарихга сезиларли таъсир кўрсатувчи «қаҳрамон», унинг «бунёдкори» эмас. Отабек образида (Юсуф ҳожида ҳам) халқчил тенденциялар тегишинча тўлиқ ва изчил мужассамланмаган. Унинг сиймоси ва фаолиятида халқнинг феодал зулми ва бидъатларига қарши норозилиги бавосита ўз аксини топган бўлса-да, унинг кўлами, шиддати етарли даражада ифодаланган эмас. У феодал тузумининг қонли сиртмоқларининг қурбони бўлиб, хонлик ишқиризини, фалокатини созгали ва билгани ҳолда, унинг зиддига қаратилган гадбирларни кўра ёки уларга қўшила олмайди, таназзул даврининг алгоқ-далюқ йилларида ўзаро қирғинларга, шўриш ва гавіоларига хотима беришида, элу юргта нисбатан осойишталик келтиришда Россияга қўшилишининг прогрессив аҳамиятига, халқнинг бу интилишига, юмшоқ қилиб айтганда, бепарво қараган. Ноаҳил, сергальва, бетинч замонининг, «Золим фалакнинг» гардиши чорасиз Отабекни ўз чамбарига қисиб, унинг курашга бўлган иродасини бўшаштириб юборган.

Характернинг шаклланиши ва тақдирида типик шароитнинг устунлиги ва қўрқингчи «салобати»ни таъкидлаш бошқа ижобий персонажларни ҳам «оғир юқдай» босиб туради. Аввалига танимagan йигитта (Отабекка) тегишига сира кўнмаган, уни бир кўрганда ошиқ бўлган ёри эканини билиб, ўз баҳти ва тақдиридан беҳад кувонган Кумуш бора-бора «муҳит» таъсирида ўз устига кундош келишига ва яна аллақанча «қўргулик»ларга чор-ночор рози бўлади.

Умрининг энг кўн қисмини ўз оиласида ва давлат ишида озмикўпми адолат ўрнатиши, одамларга яхшилик қилиш учун, «юргтнинг тинчлиги ва фуқаронинг осойиши учун сарф қилиб» келган Тошкент ҳокимининг оталиги (кенгашчиси) инсонпарвар ва фуқаропарвар Юсуф ҳожи ўз интилишлари йўлида бир қанча марта зарба устига зарба егандан сўнг, ниҳоят, «дунё можароларидан этак силклиди», амалий ишлардан бош тортиб, қўлини ювиб қўлтиққа уради

Авторнинг ошкора хайриҳоҳлигига сазовор бўлган софдил кинилар тақдири халқ ҳақиқати, унинг кучи ва курашини очишдан кўра кўпроқ мамлакатда ҳукмроҳ доираларнинг ўзбошимчалиги, мустабидлиги даҳшатини қабартиб кўрсатишга хизмат қиладилар. Отабек билан Юсуф ҳожининг носоз ва нобоп тузумдан сиёсий, ахлоқий жиҳатлардан норозилклари фонида қўйол феодал кучлар қўлида ҳалокат сари юз тутган хонлик идора усулининг бебошликлари янада мудҳиши тус олади. Шу йўсунда ижобий образларнинг халти-ҳаракати, тақдири ҳам пировардида феодал воқелигига танидий муносабати ўтириш вазифасига бўйсунадилар. Олижаноб шитилишлар, соф севгининг жаҳолат, фитна ва макрлар қурбони

бўлишини тасвирлаш асносида эса кези ва мароми билан ҳасадгўй, гиначи золим ҳукмдорлар, алдамчи беклар, «Иттифоқнинг нима эканини билмаган, ёлғиз ўз манфаати, шахсияти йўлида бир-бирини еб-ичкан мансабпаст, дунёпаст ва шуҳратпаст муттаҳамлар» (Юсуфбек ҳожи таъбири), инодчи амалдорлар, иғвогар фитначилар характерлаб берилади. Адид Отабек, Юсуф ҳожи ва Кумуш билан бирга ўзини ҳам азоблаётган мудҳиш феодал тартибларини эзаб фош қилмоқ учун фитна ва фисқу фасод уясини қидиради. Бу уяни «ота-она орзуси»да ҳам, Ҳомиддинг чақимчилик ва хиёнатларцида ҳам, хон, мингбоши, қушибеги ва бекларнинг тор-шахсий манфаатлари йўлида ўзаро талаш ва қирғинларни уюштиришларида ҳам топади. Ҳа, ҳукмрон синф ва гуруҳларнинг бидъат ва хурофотлари, жиноят ва истибоди, разолат ва ахлоқсизлиги шу маконда жамланган эди. Ўтмиш ҳаётнинг ипидан иғнасигача яхши билган Абдулла Қодирий бу маконнинг бутун астар-пахтасини ағдариб тасвирлаб берди. Ёзувчи реализмининг кучи ҳам шундадир. У эскириб-чириган сўнгти Қўқон хони салтанатини ҳалқ позициясидан, танқидий назар билан, худди тиниқ ойнада акс этгандай, яққол кўрсатиб, унинг барча айб ва иллатларини аёвсиз фош қиласди. Айни чоқда, ёзувчи ўша «қора кунлар»да ҳам чакнаган гуманистик интилишларнинг бўғилишгина тасвирлаб, тарихий жараённи ва кишилар тақдирини тўлқинланиб кузатиш ва «туйғуларни тарбиялаш»га бениҳоя ёрдам беради.

«Ўтган кунлар»нинг танқидий гоявий-эстетик мазмунидан тортиб бадиий формасига қадар ҳамма компонентларида ёзувчининг барқарор реалистик принципларни жорий этиши, асарни чинакам оддий ҳалқ тилида ёзили, унга демократик, оммабоп композицион-сюжет формаларини киритиши, традицион ҳалқчил адабий приёмлардан фойдаланиши (вокеаларни маълум вақтга қадар китобхонада «сир» тутиш, асосий сюжет орасига қаҳрамон кайфияти ва аҳвол-руҳиясига монанд қисса киритиш, ярим олди-қочди саргузаштлар ва хоказо) «Ўтган кунлар»ни (юқорида қайд этилган ижодий қаҳрамон проблемасини ҳал қилишдаги бъязи бир ижодий норасоликларига қарамасдан) ўзбек совет адабиётининг ўлмас, нодир асарлари қаторига қўйишга ҳақ беради.

«Ўтган кунлар» ўзбек прозасининг бўлгуси тараққиётига баракали таъсир кўрсатди. У ўзбек романчалигига социалистик реализм адабиётининг яхши намуналарини яратишга реалистик замин ҳозирлади ва катта йўл очиб берди.

«Ўтган кунлар»дан уч йил кейин, 1929 йил бошида босилиб чиқсан Абдулла Қодирийнинг иккичи тарихий романи «Мехробдан чайен»да биринчи романнинг гоявий-бадиий бъязи бир маҳдудлиги барҳам топади. Бу нарса, аввало, феодал зулми қарши оёққа турган, меҳнаткашлар ичида етишган маърифатли йигит — Анвар образини яратища, хонлик катта суюнчиғи бўлган реакцион руҳоний табақаларни жуда жонли индивидуаллашган образлар орқали фош қилишда ва сарой фитна-фасодлари ва разилликларини атрофлича очиб ташлашда кўринади. Ҳалқ муҳитидан қаҳрамон танлашнинг ўзиёқ адаб ижодининг камолотидан, ҳалқчиллик принципларининг янада тўлишганидан дарак беради. Ота-онадан етим қолиб, манфаатпаст, ўлгудай зикна домла Солиҳ Маҳдум оиласида таълим олган ва тарбия топган, ўз зеҳн-фаросати, қобилияти ва билими туфайли хон ўрдасида бош муншийлик амалига кўтарилган Анвар оддий ҳалқ билан бўлган алокасини сира узмайди, шу муҳитда ўзлаштирган виждан поклиги ва ҳалқпарварлигини бир умр сақлаб қолади. Анвар ва Раъно

(Солиҳ Маҳдум қизи)ларнинг севгиси тарихини тасвирлаш асосига қурилган, руҳонийларнинг фитналари ва Худоёрхоннинг Раъонни қўша-қўша хотинлари (ва чўрилари)дан бирига ийлантиришга интилиши билан ривожлантирилган сюжет, бир томондан, ижобий қаҳрамонлар характерининг халқчил моҳиятини бўргтириб кўрсатса, иккинчи томондан, салбий персонажлар характерида хонликнинг ичдан емирилиши ва чиришини конкрет лавҳаларда ифодалаб беради. Анеар билан хон ўртасидаги тўқнашувга олиб келган конфликтнинг ривожи ҳам, фольклорчасига романтик кульминацияси ҳам, ечими ҳам халқчил аҳамият касб этади. Конфликт ечими ҳалқ ёрдамида Анеарнинг ўз мақсади йўлида галаба қилиши, Россия фуқаросига ўтиб, фитна ва низолар бирмунча барҳам топган Тошкентта қочини билан хотималанади.

Демак, ёзувчи «Мехробдан чаён»да «Ўтган кунлар»даги каби феодал-хонлик тузумининг нобоплигини, унинг антигуманистик моҳиятини рўйистост фош қилиш билангина чекланмасдан, ижобий қаҳрамоннинг халқчил табиатини изчилиб кўрсатиб беради, хонлик тартибларининг инқирози, улардан кўра прогрессив гартибларга ўтиши муқаррарларигини таъкидлаш билан тугалланади.

«Ўтган кунлар» ва «Мехробдан чаён» романлари ўзбек прозасида реалистик принципларнинг галабасидан далолат беради. Ёзувчи тарихий воқсларни ва унинг тафсилотларини тасвирлагандан, уларнинг «худди ҳаёт»даги каби шаклларини сақлаб қолишта, характерларни «асли»га, «турмущадагиси»га, прототипларига язишлаштиришга интилади. Буни адабийн ўғли Ҳабибулла Қодирий ҳам тасдиқлайди. Унинг ёзишича, отаси (А. Қодирий) «Ўтган кунлар»ни ёзиши тарихини ҳекоя қилганда, гап ораси шундай деган:

«Бир кун богимизга, отамни кўргани эшак миниб шаҳардан бир чол меҳмон бўлиб чиқди... У отамнинг эски қадрдони экан... Уларнинг сухбатларидан мени шуни англадимки, бу меҳмон тошкентлик бўлиб, уйли-жойли, бола-чақали киши экан. Аммо ёшлик чоқларида савдо важи билан Андижонга бориб қолиб, у ерда кўп ийлаб истиқомат қилган, Андижондан ҳам уйланиб бола-чақали бўлган ва кек-сайгач, ўз шаҳрига қайтиб келган экан. Меҳмоннинг ана шу соддагина тарихи менга чувалган ипнинг учини топиб бергандай, ёзмоқчи бўлганим «Ўтган кунлар» романининг шаклини чизиб бергандай бўлди. Шу асосда бошимда воқеани аста-секин кенгайтира, ривожлантира бошладим». («Шарқ юлдузи», 1965, № 11, 221-бет). Яна Ҳабибулла Қодирийнинг таъкидлашича, отаси ўз «асарида китобхонга тўғри тасаввур бериш мақсадида шаҳарлар кезиб, кўп яшаган, ўша даврни кўрган, эшитган шахсларни излаган, улар билан сухбатлашган ва асардаги ҳар бир ҳаракат ўринларини аниқлаган, мўлжаллаган, тахминлаган.

— Мён Марғилон кўчаларида юриб, карвонсарой, эски Ўрда ўринларини белгиладим. Мирзакарим кутидор, уста Олим, Ҳомид, Содиклар уйини тахминладим ва «Хўжа Маъзоз»да бир кечадунадим,— дерди дадам, менинг роман ҳақидаги майдада-чўйда, эзма саволларимга ҳам жавоб бериб.

...Ўзбек ойим — бу Хосиятбиинг (дадамнинг опаси), Офтоб ойим — Хоним бибинг (оиймнинг опаси), Кумуш эса — Ойкумуш опант,— деб куларди»... (Шу журнал, 222-бет.)

Албатта, ёзувчи кўплаб кузатган шахслардаги хусусиятлардан, белгилардан энг керакли, характерлilarини саралаб-тандаб олар, типиклаштираси ва бирон персонажда мужассамлантираси зди. Ха-

рактерларни эса типик шароитдан келиб чиқиб кўрсатишга, инди-видуаллаштириб, ёрқин акс эттиришга моҳир эди.

А. Қодирий романлари тилининг бойлиги, бўёқдорлиги ва мухтасарлиги 20-йилларда ёк бадиий адабиёт тилининг қандай бўлишилигидаги масалани қатъий ҳал қилиб берган эди. Ёзувчининг тили хам унинг асарларидаги барча компонентлар сингари, гўзаллик ва бадиийлик намунаси бўлиб қолдилар.

Сўз устаси Абдулла Қодирийнинг бадиий маҳоратига фақат ўзбек ёзувчиларигина эмас, балки қардоши ҳалқларнинг ёзувчилари ҳам койил қолганлар, унинг тарихий романларини ўқиб юрганлар. Чунончи, машҳур қозоқ ёзувчиси Мухтор Аузев: «Шонли ўзбек прозасининг манбаида Айний турар эди, 20-йилларда талантли прозаик Абдулла Қодирий пайдо бўлди. Мен 28-йилдан бошлаб унинг асарларини ўзбек тилида ўқишига киришдим»,¹ — деб эътироф этади.

А. Қодирий 1934-йилда замонавий темада қишлоқларни колективлаштиришин кўрсатилига багишлаб, «Обид кетмон» повестини ёзди. Икки кисмдан иборат бўлган бу повестда ўрта ҳол дехқоннинг колхозга кириши ва колектив хўжаликнинг якка хўжаликдан ағзаллиги батафсил тасвирланди. Обид кетмон образида ёзувчи ҳалол меҳнатни улуғлаб, якка хўжалик дехқонларнинг энг яхши тажрибаларини колхозга кўчириш зарурлигини пафос билан ҳикоя қилди.

Бирор А. Қодирий Обид кетмоннинг меҳнат билан боғлиқ фаолиятини ҳаётий қилиб тасвирлагани ҳолда унинг маънавий дунёси ва характеристида содир бўлган ўзгаришларни етарли даражада очмади, колхоз қурилиши ташкилотчиларининг ёрқин образларини бир текисда юксак маҳорат билан кўрсатиб бермади.

Лекин повестда эски домлаларнинг типик намояндалари образи санъаткорлик билан чизилди. Бу муҳит кишиларини тасвирлагандан ёзувчининг тили бурролашади, қалами эркин ҳаракат қиласди. Қишлоқнинг катта ва кичик масжиди имомлари — Мулла Исо маҳдум билан Мулла Муҳсин домалар феъл-атвери, фикр ва ўйлари, ҳалқни алдаш ва бошқа сифатлари билан жонли гавдаланадилар.

Умуман, повестда меҳнаткаши ҳалқнинг тақдирни билан боғлиқ бўлган, кишини тўлқинлантирадиган реал турмуш ҳодисалари тасвири билан бирга, баъзан бадиий тўқимага узвий сингдирилмаган хроникал факълар, тавсифий изоҳлар ва ҳисобот рақамлари (иккичи қисмидә) учраб туради. Ҳақиқий реалистик картиналар ичига оралаган бундай баёнчилик элементлари повестнинг муайян сюжет чизиги бўйича равон ривожланишига анча путур етказган. Бу хилдаги айрим камчиликларидаи қатъни назар, жонли ҳалқ тилидаги бой иборалар ва мақоллардан кенг фойдаланиб ёзилган бу асар машҳур адабининг замонавий темани ҳам бадиий ўзлаштираётганидан дарак берар эди.

Талантли ёзувчи ва бадиий сўз санъаткори Абдулла Қодирий — Жулқунбойнинг ўтмишнинг нобоп томонларини қаттиқ коралаган, ҳаётни, инсонийликни севишига чорлаган, юракка энг яқин эзгу туйтуларни тарбиялайдиган асарларини кенг китобхонлар оммаси, шубҳасиз, севиб-севиб ўқийдилар.

Х. ЕҚУБОВ
Филология фаллари
доктори, профессор

¹ Школа мастерства, Гослитиздат УзССР, Ташкент—1960, стр. 57.

МУНДАРИЖА

Ёзувчидан	3
---------------------	---

БИРИНЧИ БЎЛИМ

1. Отабек Юсуфбек ҳожи ўғли	7
2. Ҳон қизига лойиқ бир йигит	14
3. Бек ошиқ	22
4. Маргилон ҳавоси ёқмади	25
5. Киройи күёвинг шундог бўлса	28
6. Тошкенг устида қонили булутлар	34
7. Мажбурият	38
8. Қутлуғ бўлсин	42
9. Қаршилаш	48
10. Тўй, кизлар мажлиси	52
11. Кутиммаган баҳт	58
12. Чакимчилик	63
13. Қамоқ	68
14. Нажот истаб Тошкентга	76
15. Тошкент қамалда	79
16. Азизбек	83
17. Юсуфбек ҳожи	87
18. Жар	90
19. Ҳукмнома	96
20. Истиклол дарди	104
21. Исён	108
22. «Ёнр гарibi бечора»	113
23. Мусулмонкул	119

ИККИНЧИ БЎЛИМ

1. Ота-она орзуси	132
2. Унутмайсизми...	141
3. Қовоқ депонанинг белбоғи	155

4. Жодугар ҳинди	159
5. Хиёнат	169
6. Иситма орасида	177
7. Қувланиш	185
8. Бәхт ва бахтсизлик	193
9. Үнгутолмаса нима қилсин...	207
10. Қора кунлар	212
11. Наво куйи	217
12. Жонсиз бир хабар ва қўрқинч бир кеч	221
13. Кулиб қарамаган баҳт	225
14. Рақиб изидан	238
15. Душанба кун кечаси	249
16. Ўзни танитиш	254
17. Хайриҳоҳ қотил	259

УЧИНЧИ БЎЛИМ

1. Мусулмонқул истибдодига хотима	275
2. Қоронги кунлар	287
3. Қипчоқда қирғин	294
4. Ой этак билан ёпилмас	301
5. Мактуб	305
6. Ўзбек ойим — оғма, Зайнабнинг дарди	307
7. Қудаларни кутиб олиш	315
8. Зимдан адонаат	319
9. Ҳожи этак силккан	324
10. Ҳасаналининг ҳийласи	327
11. Кумушнинг сўз ўйини	332
12. Кундош — кундошдир	339
13. Эсон бўлсақ кўришамиз	352
14. Хушрўйиби ва Зайнаб	361
15. Эсили киргизди	365
16. Ой-куни яқин эди...	370
17. Хотима	385
Ёзувчидан	386
Йирик санъаткорининг тўнгич романи. Ҳомил Еқубов	387

На узбекском языке

АБДУЛЛА КАДЫРИ

МИНУВШИЕ ДНИ

Р о м а н

Редактор *Х. Мадумудова*

Рассомлар *Э. Исҳоқов* ва *А. Кива*

Расмлар редактори *Н. Холиқов*

Техн. редактор *М. Мирқосимов*

Корректор *Ш. Собирова*

Босмахонага берилди 24/VII-1972 й. Босишига руҳсат этилди 11/IV-1973 й. Формати 84×108 $\frac{1}{32}$. Босма л. 12,5. Шартли босма л. 21,0. Нашр. л. 21,1. Тиражи 150 000. Рафур Фулом помидаги Адабиёт ва санъат нашриёти. Тошкент, Навоий кӯчаси, 30. Шартнома № 251—59.

Москва шаҳар «Известия» нашриёти босмахонасида тайёрланган матрицадан Қирғизистон ССР Министрлар Совети ишлари бўйича Давлат комитетининг Қирғизполиграфкомбинатида № 3 қорозга босилди. 720461, ГСП, Фрузизе шаҳри, 5. Жигуловская кӯчаси, 102. 1973 й. Заказ № 3750 Баҳоси 7-муқовада да 85 т., 5-муқовада 74 т.

Қодирий Абдулла.

Ўтган кунлар. Тарихий роман. С. Азимов таҳрири остида. Сўнг сўз филология фанлари д-ри, проф. *Х. Ёқубовчики*. Т., Адабиёт ва санъат нашриёти, 197
400 б.

Кадыри А. Минувшие дни.